

國家文物局 藏

清代傳記叢書



明文書局印行

清代傳記叢刊·綜錄類⑦  
周駿富輯

國朝耆獻類徵初編(十九)

卷八三至  
卷九二

(清)李桓輯



明文書局印行



國朝青獻類徵初編卷八十三目錄

卿貳四十三

白瀛

宋邦綏

周煌子興代出

覺羅阿揚阿

陳世烈

余文儀

德福子榮柱

胡寶瓌

日本書紀卷之三十一

一

145-004

國朝耆獻類徵初編卷八十三

通奉大夫前晉江西巡撫江西布政使司布政使湘陰李桓輯  
卿貳四十三

白瀛

白瀛山西興縣人乾隆二年進士改庶吉士四年散館授編修七年充會試同考官九年 駕幸翰林院分韻賦詩瀛與焉十年改陝西道監察御史先是七年 諭令各直省關口所有經過米豆應輸額稅悉行寬免永著爲例十一年七月江甯布政使兼理濟甯關事安凝以米豆免稅有損無益奏請照舊徵收 上不許瀛疏言人臣之事君也將以宣主上之恩澤而布之下民者也詩曰

其其黍苗陰雨膏之四國有王郇伯勞之然則居旬宣之任者謂  
宜推廣德意奉行無弊斯稱職焉抑又聞人臣之進說於其君也  
非有爲上爲德爲下爲民者不敢瀆也孟子曰我非堯舜之道不  
敢陳於王前況身遭明聖尤不宜妄自菲薄此封德彝所以見讓  
於天下後世也我 皇上子惠元元特免各省米豆關稅務使米  
穀流通兵民足食此千古未有之曠典乃臣閱邸鈔見江蘇布政  
使安凝條奏以爲米豆稅之免有損無益請照舊徵收仰蒙我  
皇上斷自 宸衷卻其所請至明至聖何以加諸而臣尙鰓鰓過  
慮者以爲我 皇上御極以來蠲租賜復湛恩洪澤之布不一而  
足唯賑濟災荒豁免米豆稅兩事無田窮民大有裨益此海宇之

所以均霑樂利者也安凝職司旬宜當此膏澤下沛之日理宜設法籌畫全其美而杜其弊卽如所稱胥役之賄縱商民之欺隱安凝均得而禁約之乃身爲關差不能悉心辦理以致弊竇叢生是奉行不善安凝之責也而反歸咎於米豆稅之免謂自免稅之後江南米價甚昂夫免稅而米價甚昂豈徵稅而米價反平乎揆厥所由或因免稅之後吏胥人等防其夾帶百端措勒以致商民裹足不前安凝身當其事自應立法防弊務令商賈流通而反肆無稽之言阻格仁政曷曰屯其膏安凝之謂也伏查前年免米豆稅之時有御史那拉善者妄奏阻撓蒙我皇上立賜罷斥天下臣民懽忻感頌今安凝仍蹈前轍臣不知其居心爲何等伏願 皇



上推愛民若子之心力行仁政斷以不疑持之悠久而不爲浮議所惑則天下幸甚 諭曰安凝所奏不過在關言關白瀛所陳亦係在諫言諫至於事之應行與否朕自有定見摺中引古無稽之言爲過當至勸朕以勿惑浮議朕若果爲浮議所惑之主白瀛未必敢爲此奏也敬讀 皇祖實錄謂明之亡實亡於言官之肆爲譏訕各爲門戶以致尾大不掉不可不慎此誠洞見千古治亂之幾言官進言亦直陳其事之可行與否耳敷衍鋪張所謂欲加之罪何患無辭也十一月 命巡視臺灣事務十二年六月疏言臺灣各縣向有供應御史衙門公用於耗羨項下支銷日久弊生不可不亟加釐剔臣於到任後親查密訪深得其詳總緣上下交手

又無稽查吏胥浮冒諸弊叢生見飭該府將例設公項按款提解  
交本署巡捕官辦理年終具冊查覈統計一年如於原額尙有盈  
餘則留於節省項下儻有不敷或於養廉內撥補或咨明督撫聽  
其酌量籌辦十一月復言臺灣孤懸海外爲東南四省藩籬番漢  
雜處民無土著率皆粵之潮惠閩之漳泉游手好閒之流偷渡來  
臺各分黨羽好利輕生非平時嚴行禁止遏其萌芽窮其根株不  
足以靜浮囂而固邊圉向緣督撫巡察各持意見以致上下觀望  
遇事粉飾吏職日廢而民氣愈驕其所由來者漸也臣自到任數  
月以來凡遇大小事件悉與督撫商酌而行務令內外通達嫌疑  
悉泯使官吏無所售其捏飾地方諸務逐件實力奉行卽如查拏

偷渡以清奸匪之源嚴禁水米以絕奸匪之流其餘打降拜盟賭博竊盜等事有犯必懲雖小必除務期吏治整飭地方靖謐至於生番潛處內山本無生事之心熟番愚直性成原有奉公之意總緣漢奸貪利忘生往往私入內山抽藤釣鹿或欺熟番無知奸盜邪淫無所不至以致憤怨莫訴釀成事端者有之臣見在嚴飭各地方官凡偏近內山地方有私搭草窠零星居住者槩行驅逐其熟番社內所有生事不法之徒不時查拏毋許容留隱匿致令混雜生事其定立界限之處見在督臣來咨徹底清查臣當督率有司殫心經理務令內外肅清以成一勞永逸之計再海外重地營伍尤關緊要臺地兵驕將惰積習已久上下相關以姑息爲安靜

畏懦者倖免無事任其跋扈貪邪者朋比作奸情同猫鼠驕兵之盤結愈固將弁之畏縮愈甚此時已成痺痿不仁之象將來必有潰敗難收之勢見任鎮臣陳汝鍵長厚有餘精神不足聞有設施不中冑要以致將弁輕玩恐於積玩已久之地不甚相宜臣已將實在情形詳悉札商督撫應參者覈實指參應調者酌量掣調見准督臣來札逐漸查覈辦理臣仍不時留心稽察務令兵氣安輯將弁整頓以仰副我 皇上慎重邊疆整頓戎行之意再臺地米穀出入歷來聚訟紛紜在內地則取之唯恐不多在臺員則禁之唯恐不嚴臣以爲財利所在止宜設法流通不必故爲增損徒滋弊端臺郡見存積儲四十萬猝有緩急不患無備而沿海居民仰

食甚眾自應接濟況有無相易於臺地本無所損唯是出入之間加意稽察使酌盈劑虛之權操之自上哀多益寡之利受之自下此固臣所日夜籌畫不敢稍執意見貽誤公務者也奏入均報

聞十三年九月奏臺灣秋旱情形得旨一切賑卹事宜督率地

方官善爲之臺灣不比內地更宜加意十一月命再畱任二年

旋命畱福建以道府題補十四年補興泉永道二十二年丁父

憂服闋補雲南迤東道尋丁母憂服闋授四川建昌道三十二年

以病乞回籍調理三十六年病痊復補四川建昌道時大小金川

不靖大兵分路進討檄赴軍營協理糧餉事務三十七年正月四

川總督桂林奏派大員分理三路糧餉令瀛駐劄木坪總理南路

甲金達夫糧驛站事二月副將軍溫福提督阿桂令往雅州運辦銅斤趕鑄礮位六月以總理軍營糧務松茂道查禮赴三雜谷土司境內照料兵行調瀛赴大營接辦十一月大兵克美諾賊巢小金川之地皆下將軍溫福以番境功噶爾拉山爲進剿金川之路令瀛於布郎郭宗迤西之簇拉角克溝設站轉運三十八年六月溫福兵潰於木果木小金川復陷於賊定邊將軍阿桂奉命整兵進討瀛仍隨營督運十一月大兵復小金川十二月阿桂奏白瀛白到軍營兩載有餘一切籌辦軍糧等事均屬勉實爲軍需得力之員命賞加按察使銜仍留督辦隨營糧餉諸務三十九年正月大兵進剿金川瀛逐站督運以備轉輸六月以辦理臺站

出力下部議敘尋以兵丁糧石違例本折兼支致兵丁不敷日食  
經阿桂奏參 降旨查詢四川總督富勒渾奏瀛因糧石稍形竭  
蹙稟請止將官員跟役及各項夫役酌量本折兼支而於通行各  
站文內未將兵丁一項劃出以致冒昧折支請交部嚴議部議降  
調 命帶所降之級仍畱辦糧餉四十年八月大兵克勒烏圍直  
指噶拉依 諭曰白瀛承辦軍需歷經四載自收復小金川及進  
攻金川一切不辭勞瘁奮勉出力著賞戴花翎十二月補江西按  
察使仍畱軍營辦事四十一年升湖南布政使四十二年調江西  
布政使畱軍營覈算奏銷四十四年四月遷刑部侍郎十二月卒

右 國史館本傳

宋邦綏

宋邦綏江蘇長洲人乾隆二年進士改庶吉士旋丁父憂七年散館授編修九年七月充河南鄉試正考官十月遷侍讀十二月提督湖北學政十二年調山西學政尋 詔仍留湖北任十五年二月奏言開報生員優劣責在教官有時教諭訓導俱係新任諸生賢否素未深知值學臣歲試報以無優劣申覆日久卽不便咨部勢必延至下次請嗣後許申明展限如報有優劣學臣查覈得入於科試補行報部下部議行十月丁母憂十八年服闋補侍講充日講起居注官尋授四川東道二十一年遷河南按察使二十二年遷廣東布政使二十五年調山西布政使二十七年七月因



失察屬員婪贓部議降調得旨寬免八月擢湖北巡撫二十八  
年二月奏言督撫莅任親查糧驛二道庫又奏軍政等冊內刪除  
病故參革緣事各員均從之四月湖廣總督愛必達湖北前任  
臬司沈作朋俱以縱歸州盜犯張洪舜事論罪如律上以邦綏  
莅任日淺亦模稜瞻徇革職畱辦隄工十月授陝西布政使二十  
九年以廣東布政使任內卓薦鹽運使王槩不慎降二級調用  
詔從寬畱任三十年授廣西巡撫三十一年九月奏言民間買賣  
田地例將額徵稅銀彼此推收清楚按數輸納粵省徵冊向聽里  
書經管或匿冊勒措或飛灑多派臣嚴飭禁將冊編號鈐印同稅  
餉櫃置州縣大堂諭業戶稅契時當堂對冊過戶推收給發完糧

執照照數輸納再墜林等處山嶺土坡見傍墮助勸墾酌借牛具  
籽種以盡地利又漢土各屬舊設土勇堡卒徭獐地方設狼兵狼  
日各給軍田輕其糧賦平居守禦巡防有事徵發調遣嗣因兵額  
缺少田糧輒轉私售經前督臣楊應璩奏明清查臣抵任後飭催  
將各兵名下田糧逐一查明造冊填給執照如有缺額未補及老  
弱各兵卽行汰革募精壯充補共查出軍田十二萬餘畝給土勇  
狼兵九千餘名戍守有資可無滄混 上嘉勉之有鎮安府屬之  
小鎮安土司者界連安南匪犯黃副團等糾眾出界滋事邦綏飭  
屬捕置之法奏革土巡檢岑純武職並言土巡檢職卑難控制請  
改設通判一整飭化導又歸順州屬之湖洞寨人戶稀少應裁原

設州同將宣化縣那南寨巡檢移駐其那南事務歸併金城寨巡檢管理再於那波者賴者欣三村增十一兵十土勇二十怕懷隘爲小鎮安門戶增設把總一兵十五土勇三十令兼轄那波等村下部議行十月奏言粵西營房墩臺大槩在山巔水澗時有風雨摧剝潮溼朽蛀地方官隨時修補例應領公費項下支銷有在任日久並無坍卸有甫周歲月屢經興修至汛員僅交代於離任時而於見任不定以限期今一體保護恐塘兵恣意作踐請嗣後預支州縣歲修公費每塘房一間酌量該地工料貴賤歲扣銀二三錢或四五錢存庫遇修撥用交代時按日計算造報修後令營弁查明定以瓦房保護三年草房二年如限內疾風異漲衝損傾頽

仍令州縣興修備弁兵徇縱殘毀經道府查報分別參革賠修下部議如所請三十二年四月同總督楊廷璋奏請粵西太平鎮安二府並南甯府屬之遷隆上岡皆與安南接壤其間有三關百隘向例每冬知府副將親查一次請嗣後每年春夏秋三季令太平鎮安南甯三府同知通判同汛弁巡直於交界處所會哨事竣報明查考其冬季仍舊令知府副將親查再各關隘原設汛弁防守見飭製造籤旗填明某汛名目各於所轄隘內率兵勇籤往旗來輪班巡查疎懈者參處奏入報 聞三十三年授兵部侍郎三十四年七月署倉場侍郎十一月調戶部侍郎三十五年以疾卒

右 國史館本傳



周煌 子與佐

周煌四川涪州人乾隆二年進士改庶吉士散館授編修六年充山東鄉試副考官七年充會試同考官十二年充雲南鄉試正考官二十年十二月 詔偕侍講全魁冊封琉球中山王尙穆爾遷右中允二十一年遷侍講二十二年復 命奏渡海泊舟姑米山遇風禱天妃靈應事請加天妃封號別頒 諭祭文與海神並祀下部議行以隨往兵丁在琉球滋事失約束部議革職 上念其出使外洋遭遇風險從寬畱任纂輯琉球國志略呈 覽嗣 命武英殿排印頒行二十三年三月大考二等准其開復十二月遷左庶子 命在上書房行走二十四年遷侍講學士二十五年充

福建鄉試正考官疏言闈閣舊設十二房因易經卷少議裁一房  
今查詩經卷及四千同考四員未能分校裕如請增一員以復舊  
額十二房之數部議從之二十六年擢內閣學士提督江西學  
政三十一年擢刑部侍郎三十二年調兵部侍郎三十三年提督  
浙江學政三十八年五月命偕侍郎承德往四川會訊璧山縣  
民控武生鄧貴榜勒派侵冒案十月復命會審蓬溪縣生員黃  
定獻控知縣借軍需勒派案俱鞫虛議罪如律四十四年二月充  
四庫全書館總裁十二月擢工部尚書四十五年三月充會試副  
考官以中式前列試卷語意龐雜磨勘大臣奏請應議部議罰俸  
九月調兵部尚書四十六年八月煌赴熱河行在帶領武職引

見時川省查辦咽喉 上召煌詢之煌據所見聞奏對 諭曰  
文綬辦理咽喉一案平日不能督率文武屬員緝捕以致竄入楚  
黔鄰境已屢經降旨嚴飭並降爲三品頂帶從寬畱任令其督緝  
茲據周煌奏川省咽喉近年每邑俱多至百十餘人常川騷擾並  
有朋頭名號戴頂坐轎乘馬白晝搶奪如入無人之境通省官吏  
罔聞兵民不問甚至州縣吏役身充咽喉如大竹縣衙役之子號  
稱一隻虎等語可見咽喉肆行不法已非一日文綬身爲總督乃  
竟漫不經心以致養癰貽患甚至白晝搶奪拒捕傷差公然無忌  
若不及早嚴辦將來黨羽日多安知不釀成蘇四十三之事此時  
務須痛加懲創盡絕根株以戢凶暴而靖地方並 諭新任四川



總督福康安防護煌原籍村莊四十七年二月 命在上書房爲  
總師傅十月以辦理名臣奏議草率交部議處尋免之十一月  
諭曰周煌不勝總師傅之任著回原衙門辦事十二月 命在紫  
禁城內騎馬四十九年調左都御史五十年正月以病乞休 上  
念其奉職有年小心勤慎 詔以兵部尙書致仕加太子少傅銜  
四月卒 諭曰原任左都御史周煌由翰林洊擢正卿在上書  
行走有年老成端謹奉職克勤今春遽疾陳請解任曾晉秩太子  
少傅加兵部尙書銜准其回籍調理前兩次祇迎道左特親加詢  
問諭令加意調攝以冀痊可茲聞溘逝深爲軫惜著加恩晉太子  
太傅派散秩大臣帶領侍衛十員往奠所有任內降革處分俱予

開復應得卹典該部察例具奏尋 賜祭葬如例謚文恭子興岱  
見官內閣學士

右 國史館本傳

乾隆四十九年九月左都御史周公以末疾請解職得 旨慰留

加攝越三月再請 諭俟千叟冥禮成明年正月六日盛典屆期

公疾不克人 加賚賦詩如與冥例翌日以太子少傅兵部尙書

予告有小心勤慎之 哀春寒未果行十四日 上行祈穀禮

三月二日 躬耕耤田公再掖拜於城闕 溫詢再三 親解賜

佩囊四月朔公薨於京師邸第 諭嘉其老成端謹奉職克勤

晉贈太子太傅派散秩大臣奠醊 賜祭葬謚文恭某年月日葬

於其鄉之某山首某趾某小門生彭元瑞謹按狀誌墓公諱煌字景垣號海山四川涪州人其先世 贈光祿大夫工部尚書某曾祖考也康熙庚午科舉人 贈光祿大夫工部尚書某祖考也康熙辛卯科舉人湖北巴東縣知縣 贈光祿大夫工部尚書某考也其歷官由乾隆丙辰科舉人丁巳科二甲進士翰林院庶吉士編修右春坊右中允入直上書房左春坊左庶子翰林院侍講學士內閣學士兼禮部侍郎刑部右侍郎兵部左侍郎工部尚書兵部尚書上書房總師傅 賜紫禁城內騎馬其司文衡三爲山東雲南福建鄉試考官一爲會試總裁一爲順天鄉試同考官再爲江西浙江提督學政其撰述有應制集海東集豫章集湖海集蜀

道吟海山存彙江右庠音選詩林韶濩選而琉球國志略奉 旨  
命武英殿板行者也其配曰文夫人 贈一品夫人繼方夫人  
封一品夫人今皆合葬其後嗣曰子七人翰林院編修宗岐翰林  
院編修興岱乾隆癸卯科舉人興嶧興岷興岳宗舉宗畝女一人  
孫六人孫女六人公積學砥品泊於榮利翰林十九年始晉一官  
卒受 特達之知授學 青宮正位七卿公儀體偉岸聲如洪鐘  
與人交無款曲耳語遇有不可而折無所避退未嘗非毀人合於  
君子三變之容故望者或以嚴毅難犯而天下之人咸知其坦懷  
摯誼孚信有素以是益景附之世或謂直道難行非也公以嚴氣  
正性踐平履坦終始一致嗚呼可謂正直大臣矣銘曰

中山之封以榮海東鸞章麟服銜使惟公颺颺告暴舟礁姑米忠  
信涉波務持大體明神昭昭 帝乃嘉愍以篤簡在洵陟鉅任三  
謙於蜀持法允欽告諭父老宣播 德音在鄉言鄉汝毋引嫌  
命衛閭里一德堂廉惟神所阿惟 帝所護正直是與千秋隧固  
右墓誌銘彭元瑞撰

周文恭公煌任武政時嘗語韓旭亭師云今天下惟川陝楚豫甲  
兵甚少其地當中原腹心道路險阻一旦有盜賊竊發恐非有司  
所能辦者欲見 上陳奏經略會以病去官不果行後川楚教匪  
作亂果以兵勢單弱不及防備遂使蔓延九載始信公言不幸而  
中也

右錄宗室昭榘撰

漢司馬長卿以本省人奉命檄諭蜀中父老 本朝大司馬周文  
恭公亦兩次奉 命至蜀審案真佳話也再至成都詩有云鄉路  
遠分江內外儂家原近灤東西詩意亦頗自負

乾隆二十一年周大司馬同侍讀全穆齋魁奉 命冊封琉球舟  
至姑米山颶風大作舟中皆呼孃媽須臾見一燈自遠而至皆歡  
呼曰天后救至矣海山有詩云疾痛尋常呼父母一時回首籲天  
妃

右雨村詩話張惟屏錄

周興岱

周興岱四川涪州人父煌歷官兵部尚書謚文恭自有傳興岱成  
乾隆三十六年進士改庶吉士三十七年散館授編修四十二年  
充順天鄉試同考官四十七年以辦理四庫全書謹敘奉 旨遇  
有應升缺出與俸深人員輪班分次帶領引 見四十八年充山  
東鄉試副考官旋丁父憂服闕補原官五十三年擢右贊善五十  
四年充陝西鄉試副考官是年累遷至侍講學士五十五年四月  
奉 命提督廣東學政五十六年超遷內閣學士兼禮部侍郎仍  
留學政之任因前校文津閣書籍有誤交部查議降一級畱任五  
十八年還京充會試知貢舉武會試總裁五十九年充湖北鄉試  
正考官六十年授禮部右侍郎充順天鄉試監臨武會試總裁旋

奉 旨在南書房行走嘉慶二年轉左侍郎三年復充順天鄉試  
監臨四年正月調吏部右侍郎二月 命兼管樂部事務三月充  
經筵講官十月轉左侍郎奉 命祭告川陝嶽瀆五年正月調戶  
部右侍郎時在道奉 諭曰自川楚教匪滋事以來所過地方焚  
燒搶掠迫脅萬狀民人不得已而從賊經朕節次降旨令領兵大  
員剴切曉諭如賊匪中果能有歸命投誠者仍係朕之良民令地  
方官妥爲收卹見在戶部侍郎周興岱赴川陝祭告嶽瀆著於所  
過川陝曾經被賊處所將此旨宣布騰黃並面告地方官遵照妥  
辦以副朕矜卹愚民脅從罔治至意四月興岱奏言臣行抵廣元  
縣詢問川北鎮總兵朱射斗在高院場失利時總督魁倫未同前



進並無接應至潼關最關緊要魁倫復防範不嚴致賊匪於三月十八日夜竄過太和鎮數萬生靈慘遭焚殺臣將次省城於漢川新都一帶沿途訪聞大略相同再臣於初五日行抵梓潼適賊匪在該縣境內滋擾臣目覩民人遷徙紛紛並有被賊所擄者臣因前途阻塞在該縣暫停一日督率嚴防百姓始行安住初七日臣卽行前進親見各處團寨頗形惶惑臣乘騎竟日行一百八十里於馬上逐處詢問居民普加慰諭俾無驚恐至蒙 垂問川省帶兵各員何人奮勇畏葸之處皆云川省勦辦賊匪自德榜秦移師到來實爲奮勇出力且能於臨陣時宣布 聖主如天之德是以新被裹脅者紛紛投出無不感戴 皇仁但一人之力究難處處

兼顧懇請 敕下督兵大臣同心協力以期迅奏膚功奏入 諭  
曰昨據勤保奏將魁倫一案已添派周興岱一同會審今據周  
興岱查奏各情節看來魁倫種種罪狀竟無一字虛假著周興岱  
勤保再將以上情節向魁倫逐加詰訊一面按律定擬具奏一面  
卸解成都監禁候旨遵行旋經勤保會同周興岱審明覆奏 上  
命交王大臣會擬魁倫罪名興岱旋即回京六月兼管錢法堂事  
務六年充江西鄉試正考官七年正月以典試江西時有收受衣  
表銀兩並出告示等事 命巡撫張誠基詳查得實 諭曰周興  
岱係二品大員奉命典試自應潔己奉公乃於該省餽送銀兩輒  
行收受並告以未帶冬衣致撫請等語送衣表殊屬卑鄙著退出

南書房仍交部嚴加議處議上命降爲四品京堂二月補授翰林院待讀學士八年閏二月大考屆期自陳年老懇請休致奉旨勒令休致三月諭曰周興岱自請休致是以降旨勒休咎實由於自取但念伊父周煌曾任上書房師傅周興岱前在南書房行走稍有筆墨微勞著加恩賞給編修准其在館效力九年二月以恭校實錄內繕寫字謬降三級兩任十年擢侍講十一年擢內閣學士兼禮部侍郎十二年以實錄全書告蒞恩予二等議敘十二月授兵部右侍郎十三年充會試知貢舉擢都察院左都御史十四年充武會試總裁是年卒子廷授二品廕生見任工部員外郎

右 國史館本傳

公姓周氏諱興岱字冠三一 一字東屏世爲四川之涪州人高祖茹  
荼明湖南路總兵官曾祖儼湖北巴東縣知縣祖琪湖北漢陽縣  
知縣考煌兵部尙書 贈太子太傅諡文恭前妣文妣方皆一品  
夫人文恭公七子公其次也少穎悟器局異常童讀書過輒成誦  
長從錢唐陳太常兆崙遊太常故海內名宿特契之乾隆三十五  
年中本省舉人明年成進士改翰林院庶吉士授編修充國史館  
纂修官四十二年充順天鄉試同考官旋丁方太夫人憂免喪充  
文淵閣校理四十八年爲山東副考官文恭公嘗典山東試人以  
爲榮五十年丁文恭公憂五十三年擢右春坊右贊善明年轉左

遷司經局洗馬爲陝西副考官遷右庶子擢侍講學士視廣東學  
政政尙嚴明釐革舊弊五十六年擢內閣學士兼禮部侍郎五十  
八年充會試知貢舉武會試總裁五十九年爲湖北正考官六十  
年授禮部右侍郎充順天鄉試監臨武會試總裁是歲十一月有  
旨南書房行走嘉慶元年廕一子入官二年轉左時三省教匪  
滋蔓 純皇帝垂問情形公據實陳奏不稍諱飾四年正月 純  
皇帝升遐 上命權工部右侍郎調吏部右侍郎時方 特詔徵  
言屢進封事雖家人弗及知也二月兼管樂部事充經筵講官轉  
左權戶部左侍郎十二月奉 命祭告川陝嶽瀆因請回籍省墓  
五年正月調戶部右侍郎 上以教匪滋事以來所過焚掠民人

多不得已而從賊迨悔罪投出而所謂安撫者又有名無實 命  
公宣 旨贍黃且告地方官善爲經理路出梓潼值賊眾盡至居  
民咸欲走避公於馬上宣布 威德令無播徙以安人心民皆感  
泣慰留禮成還涪涪人以文恭亦嘗乘傳歸里傳爲盛事是役也  
凡所見聞必以入告事有不便於民者則移檄大吏除之略見措  
施焉六月管理戶部錢法堂事六年爲殿試讀卷官江西正考官  
恩賞黑狐端罩七年正月以典試江西嘗有出示等事降補侍  
讀學士是歲當試翰詹公以目疾自陳並請休致三月復降編修  
十年遷侍講十一年擢內閣學士充 玉牒館副總裁十二年授  
兵部右侍郎十三年權戶部右侍郎擢左都御史十四年權理國

子監事充武會試總裁按公素患肺疾然當官勤瘁未嘗敢以疾辭至是喘頻發因乞假調攝甫半月遂不起時嘉慶十四年十一月九日也春秋六十有六夫人杜氏工部主事鶴翔女慈和有家法先公二年卒子廷授二品廕生工部屯田司主事子女夫也廷掄國子監生女三壻曰山東萊州府知府張問陶候補縣丞林蕃舉人王慶孫九人公姿貌嚴毅望之儼然居官一以文恭爲法兄宗岐亦官翰林早歿任侍郎時請以其階 貲贈友愛諸弟與人交坦白無他腸遇是非所在則面折之弗顧以是或不諧於俗然性好友朋公退之暇招集同志談宴以爲樂而意所激發達達義形於色子出都後聞公時以爲念及長臺端以書抵子問所宜言

予以副相非科道比當論其有關大計者公甚憇之平時以廉慎勸其子至卒語不及私以嘉慶十七年二月葬於某鄉之原廷授自蜀貽書請爲文刻於墓道予名位微烏足不朽公而知公之深則未敢多讓也銘曰

繫周之先自楚遷蜀高曾以來蔚爲右族武達文通雲委波屬洎大司馬立朝惟肅公爲仲子紹庭繼躅考訓聰聽師資自淑載筆登瀛臨文剖璞四方鑑衡中禁頗收遂躋崇秩咸荷殊擢侍鮮姬媵居謝庭囿仰酬 晒遇勿懈宵夙人謂公疎我愛其樸人識公淺我知之熟白君山峙黃草峽東中有幽宮佳氣攸伏勒茲貞珉以永巖谷



國朝書目類考卷之十三

六

右神道碑銘趙懷玉撰

覺羅阿揚阿

覺羅阿揚阿正紅旗人由官學生補兵部筆帖式乾隆二年授吉林烏拉理事通判十二年遷同知十八年擢盛京工部員外郎二十三年調刑部員外郎二十五年遷郎中三十三年隨侍郎悟勒穆機赴察哈爾查辦牧丁空缺名糧三十四年六月 命阿揚阿隨侍郎曹秀先赴浙江審長興縣監生李公麟控庫吏陳維商等私增糧耗審明分別治罪如律七月擢四川按察使十月調廣東按察使三十八年四月奏獨子畱養之例罪名輕重懸殊往往狡捏冒濫請嗣後實係親老丁單仍照例畱養外若審係假捏卽本案情輕應擬緩決亦不准減免軍流以次遞加受財以枉法從重

論下部議行四月 諭來京署刑部左侍郎尋 命兼署正藍旗  
滿洲副都統三十九年奏滿洲人員簡放綠營遇應得卹廕子弟  
例以營員補用恐易染習氣弓馬生疎請送部引 見分別旗營  
兩用下旗議行五月 命偕直隸總督周元理查審獻縣民婦李  
王氏控李嗣業冒宗占產知縣范清澗受賄枉斷訊虛定擬成讞  
十二月以山東陽穀縣知縣張克伸於逆匪王倫滋事不能保衛  
城池例應斬候刑部錯擬邊遠充軍部議降一級調用奉 旨銷  
紀錄四次從寬免降四十年四月 命往直隸東光縣偕督臣周  
元理查審民婦張金氏呈控戶書吳景霞盜買販米鞠誣論罪如  
律九月以八旗引 見人員步箭平常 諭此次挑取引見人員

之都統副都統等俱交部議處尋議阿揚阿降二級畱任是月  
命偕侍郎袁守侗往查貴州鎮遠府知府蘇嶠揭報督撫藩臬通  
同袒護台拱同知席瓚旋訊係嶠聞劾反誣督臣圖思德所參嶠  
浮徵婪索屬實應卽行正法十月 命偕袁守侗赴四川審順慶  
府通判冀國勳侵蝕臺站軍需銀米鞠實擬罪十二月以前任吉  
林烏拉理事通判任內失察邪教部議於見任內降一級調用得  
旨改爲降三級畱任四十一年正月投刑部左侍郎兼正紅旗  
滿洲副都統並協理步軍統領衙門刑名事務四月因失察司員  
擅革舞弊書吏任貽渭不行舉辦部議降調得 旨從寬畱任十  
月 命往湖北偕巡撫陳輝祖查審黃梅縣民王余奇控戶書鄭

德純冒帑苛徵鞠誣定擬如律四十二年三月 命往安徽滁州  
偕督臣高晉查審知州琨玉虧空奏入 諭曰據阿陽阿等奏查  
明琨玉別無虧空將王顯緒李秉義等分別解京質審一摺所奏  
殊未明晰此案經阿揚阿高晉奏參既將王顯緒押至定遠自應  
面加審問錄取供詞具奏阿揚阿係專差前往審案大員並非僅  
令提解人犯高晉雖係原保上司但經朕久加任用其會同查辦  
伊亦有何可引之嫌從前王顯緒等未經到案尙得諉爲未見今  
王顯緒李秉義俱已提到其因何發給琨玉銀兩是否與李秉義  
同具印領抑係琨玉私用戳記冒領肥己何以擅行發給其與琨  
玉有無別項情弊及李秉義稟明並未領銀到庫何以不行參揭

之處俱應逐一跟究乃並無一字提及實出情理之外即使伊等  
審明見在情節有與原參不符之處何妨據實檢舉其處分亦不  
甚重何以全未慮及一味模糊了事僅以解京質審即可置之不  
問耶阿揚阿高晉著傳旨申飭並令其將何以不措一詞之處明  
白回奏旋具奏請交部嚴加議處部議革任 命免之仍註冊四  
十三年正月 命赴四川查審大足縣民胡估控知縣胡憲高派  
幫津貼紳約侵冒浮支訊虛定擬如律尋 命偕尙書袁守侗往  
甘肅盤驗各州縣存貯監糧實數報無虧缺四月奉 諭步軍統  
領衙門設有協理刑名部臣一人參酌刑律原以步軍統領或從  
武職簡放恐於刑名律例未及周知是以酌設協理大臣以資參

國朝書影卷之三十一  
三  
覈今步軍統領均係朕簡用部院內親信大臣遇有刑名事件皆能自辦無所用其參酌且協理所辦刑名不過杖罪以下之槩又大抵隨同畫諾初未嘗置可否於其間殊屬有名無實嗣後步軍統領有由都統副都統等官簡放者聲明請旨簡放其由尙書侍郎簡放者卽不必復派協理之員所有原派之侍郎阿揚阿毋庸協理著爲令四十四年署經筵講官四十五年署吏部侍郎命往查審山東壽光縣民婦魏姚氏控告知縣勞敦樟挾嫌嫁禍藉差科派勒索按律擬罪四十六年以廣東按察使任內失察沙灣麥塘積年窩盜部議降調諭改爲降四級畱任四月廿肅逆回滋事上以良鄉首站承辦撥解餉糈命同諧穆親金簡往來

照應八月 諭曰甘肅監糧一案於開例之始卽私收折色前據  
王直望等節次供認明確因思袁守侗阿揚阿從前差往盤查何  
以尙稱倉糧係屬實貯必係該地方官聞有盤查之信那東掩西  
爲一時彌縫之計其僉量人役亦通同弊混袁守侗等受其欺蔽  
率稱並無虧短亦未可知當經 諭阿桂李侍堯將當日盤查時  
該地方官如何通同弊混欺蔽之處徹底嚴究確情據實具奏本  
日據阿桂等奏到訊據陸瑋等各員俱供稱向日盤驗時或將應  
動常平倉糧以銀折給畱作監糧以抵盤查之數或將額徵應行  
撥運兵米暫畱抵補監糧不敷之數其餘聞信趕緊買補是以彼  
時尙未短少等語此項監糧並未實貯在倉朕早有風聞特因監



糧爲災賑而設恐各督撫誤會朕意致將災賑之事靳固不舉轉  
非朕查辦冒賑使百姓得受實惠之意今諸弊俱已盡行敗露若  
再置而不問何以懲貪吏而整法紀朕辦理庶政從不稍存成見  
若此案勒爾謹王直望諸人其侵冒害民之罪豈可不嚴示懲警  
朕向云不爲己甚去己甚王直望等此案實已甚致朕不得不爲  
己甚而朕心仍愧之至袁守侗阿揚阿係朕特派前往盤查監糧  
豈無耳目乃一任各州縣通同蒙蔽前此盤查之時距開例未及  
三年而開銷監糧至六百餘萬之多亦應問其故也其舊存常平  
倉又銷去一百三十餘萬石其中弊端疑竇何以並未察及阿揚  
阿人本見小護短不知大體若袁守侗則未必至此也且阿揚阿

前於朕前曾而奏盤驗常平倉穀今據阿桂等查奏情節已屬失實袁守侗阿揚阿查辦此案均難辭咎著交部嚴加議處部議革職諭從寬畱任十月命往監視捏災冒賑侵蝕監糧各官犯行刑訖卽遵旨前往喀什噶爾更換景福四十七年以刑部侍郎任內保舉筆帖式章馱保不實部議降二級畱任四十九年擢左都御史五十年補鑲紅旗漢軍都統五十一年二月京察加一級七月回京調鑲白旗蒙古都統五十三年署刑部尙書五十四年元旦以官員行禮越至甬道未能先事督飭部議革任得旨從寬免革任仍註冊五月命兼管兵部印鑰九月卒子吉昇任兵部員外郎

國朝書庫類編卷之三十三

右 國史館本傳

三

陳世烈

師諱世烈字允文嘯瀘其號也先世蜀之巴縣人明末流寇之難  
祖考諱仲舉挈妣劉氏避地入滇卜居建水遂爲滇人考諱天武  
歷官雲南臨光鎮標右營遊擊娶夏氏生二子師其次也八歲孤  
露母氏助之力學舉雍正壬子鄉試第二癸丑會試遇大挑例已  
列一等大學士鄂文端公特抑之召至私第勛以遠大賙金遣歸  
丁巳成進士選庶吉士散館授職檢討故事國子監司業缺出以  
翰林俸最深者十人引 見師俸頗後適以輪班引 見越次授  
之異數也丁卯鄉試充廣西正考官尋擢翰林院侍讀學士充日  
講起居注官又遷大理寺少卿充中嶽南嶽及諸古帝陵祭告使

國朝通志卷之八十一  
三

擢內閣學士兼禮部侍郎歲庚午坐誤封發票本鐫級實非已過  
代同官者受過也已蒙 召見問陳世烈閣學缺在否執政對已  
奏補有人 恩旨降二級補用次日聞內艱奔歸服闋將北上而  
痰病作體素豐碩由南回至江夏時以是疾數日不知人事湖北  
巡撫奏 聞畱治得愈至是呈明在籍調理然夏暑勞動輒作因  
遂不敢遠涉歲癸酉制府愛公聘掌五華書院講席慨然曰是亦  
所以報 國也前後六年育才甚眾及歲戊子撫軍鄂公實文端  
季子復敦請掌舊席禮於是得廁弟子之末一日講業畢謂曰爾  
無謂我今乃識爾爾前與楊踔之吾土楊踔嘗受業禮當謁吾爾  
不隨往吾心已異爾程子言鄉村裏坐不覺壞多少後生我則疾

今日後生喜遊達者之門十九爲虛聲爾他日得志尤願無忘故步澧生也晚當甲戌以後己卯以前不及從諸賢如同邑翰林編修施君培應布政使周君構及得友楊君踔及列門下時楊已作令河南是時同輩咸以文藝相高不謂師所拳拳乃出於尋常喜好如此也師之望議也合坐者實深陽史相國所親而師任有加二級可邀議抵深陽因以爲諷師毅然曰微公言亦實不忍其貧老及奏上被鐫怡然不以屑意還里以後絕口不道雖妻子亦不知其實比澧官都下得從前輩少廷尉周公於禮粵西大銀臺蔣公良騏游杯酒談往廷尉於師爲後進距師望議僅一年銀臺則師丁卯鄉試所得士也嗚呼古所稱盛德君子誠何以過師耶康

熙五十三年土賊李天極朱六飛擁乞兒衛枝葉謀亂事覺六飛走匿臨安郡深山師考贈公追捕得其從逆名籍訝曰此非誑兇誘餌卽賊輩妄援張其黨之眾耳巨魁伏法輒手自焚或以爲言曰吾甯以此得過不欲多殺爲功澧毀齒時故老猶有稱道其事以爲流慶及師者觀師甘於里議一節誠古所稱式穀之似耶澧於門牆爲後進見賞乃以狷鄙其他匠成諸賢就所長而進之者其不各有得力耶惜不及哀而紀之也師自祖考妣人溷以考貴贈祖考昭勇將軍祖妣淑人考亦 贈昭勇將軍妣 封淑人及師官庶常恭遇 覃恩皆改從文階 贈封一如師秩配王夫人先師卒于一人安康建水縣學廩生孫二人與咸謙恆女一人

通副榜蘇姓孫女四人生康熙丁亥年七月初二日午時卒於乾隆五十四年己酉七月初八日丑時壽八十有四今年安康走告澧曰先子待君勒銘而後葬澧惴懼不敢辭謹撮目見耳聞之大概者若夫門內懿行及官侍從受 恩節次與生平著述安康已紀家乘不復及銘曰

於惟治古在廷咸讓譽則不尸或甘分謗雍雍吾師谷廣澤深如何不茹維仁宅心不盡厥施以迪後生中行匪易厲狷裁狂天篤厥壽何必久位至樂無假疏水餘味佳城一閉天下惜之億萬千年視此刻辭

右墓誌銘錢澧撰





余文儀

余文儀浙江諸暨人乾隆二年進士由咸安宮教習授刑部主事  
累遷郎中十九年授福建福甯府知府二十三年調漳州府二十  
五年調臺灣府二十八年遷臺灣道二十九年擢按察使三十年  
疏言命案最重買兇認兇閩俗尙氣好鬪貪利輕生奸弊百出請  
嗣後認兇之犯有旋經自首審明確據者買兇之犯照例加等治  
罪自首之犯准免罪所得銀兩比照告發之賊免追則認兇自首  
者不但得命並免追贓用財買兇者空失貲財而知之自首告自無  
買兇之事其弊將不禁可絕三十一年疏言例載卑幼擅殺期功  
尊長妻妾謀死本夫等案承審官限一月內審解府司督撫各限

十日審轉具題稍延例卽參處此等重案禍積隱微豈非旦夕一門內骨肉周親互相掩護尤難免串供巧避儻承審官因限迫顧慮處分稍有遷就卽不無枉縱請嗣後承審官遇供證明確仍照例辦理如果情節難明或經上司駁飭致例限稍逾並非無故遲延者許督撫於審題時據實聲明可否免議出自 聖恩則推鞠得益致精詳而重罪出入不虞錯誤矣俱下部議行三十四年四月臺灣奸民黃教滋事 命往查辦文儀疏言黃教遁入深山見獲逆黨韓筆等三十八人審明正法黃理等三十一人分別議擬又疏報續獲李井等六人 諭曰余文儀到臺灣以後惟安坐府城審擬案犯而於勦捕事宜置之不問亦未及一語若以身係

文職剿賊之事與彼無涉者然殊屬非是軍旅之事固不責之文員但臬司大員非下僚末秩可比地方有此等大案豈可不一體仔肩實心協緝縱文員不能親臨行陣獨不當督策將弁上緊剿賊乎臬司原有奏事之責況余文儀係專派前往豈以一臬督撫以爲畢乃事乎余文儀妄分畛域實係規避不可不示以懲儆著交部嚴加議處總督崔應階奏黃教等已就斬獲俱係買線緝捕官兵並無當場殺獲之功余文儀不能查出武職冒功咎無可辭得旨余文儀向爲刑部司員尙能辦事且係文職著從寬以刑部員外郎用十月補刑部陝西司員外郎三十五年二月命署刑部侍郎七月三河縣書吏方國秀控銀號何彪年侵用藩庫銀

文儀偕邁拉遜赴保定鞠審尋疏言省城銀鋪與藩司書胥表裏  
作奸何彪年承領藩庫傾換銀兩私行那用事後雖經追還而原  
辦之前任知府誇略知縣郭玉並不詳報藩司觀音保置之不問  
均請革職部議如所請旋實授右侍郎三十六年五月授福建巡  
撫十二月奏請將福州府古田縣之水口黃田二驛歸縣丞管理  
從之四十一年擢刑部尙書 命紫禁城騎馬四十二年六月  
疏言子延良係候補員外郎懇令在刑部學習行走 允之十月  
以老疾乞休 諭賞給太子少傅銜四十七年七月卒

右 國史館本傳

德福 子榮柱

德福伊爾根覺羅氏滿洲正白旗人乾隆二年由刑部筆帖式遷主事八年遷員外郎十二年遷郎中十三年授浙江金衢嚴道十五年調杭嘉湖道十六年遷按察使疏言浙省沿海知縣員缺以縣丞升補者向例三年報滿卽得與久任知縣一體題升未免過優嗣後應先令試俸二年果有政績方准實授再三年俸滿方准題升下部議行十七年遷湖北布政使十八年調廣西布政使二十一年調福建布政使二十七年四月疏言各省軍流人犯照道里表安置福甯府屬二百餘名恐聚處滋事請各省應發福甯府屬軍流人犯解赴巡撫衙門勻撥安置 從之七月 命往阿克

蘇辦事三十年閏二月烏什回人以副都統素誠苦累激變參贊大臣納世通調官兵及布噶特人往勦德福以阿克蘇庫貯軍器火藥無幾恐各城官兵至不敷配給行文喀什噶爾葉爾羌速由臺站運送並催令伯克色提巴勒底赴阿克蘇辦事疏至 諭曰軍器火藥自屬緊要但各城大臣既領兵會勦自必攜帶豈有專俟阿克蘇預備之理況此時各臺站俱有回人保無心懷叵測妄行搶奪德福何見不及此再所奏阿克蘇辦事不可無大伯克因行文楊應琚等催色提巴勒底於入覲歸途之便馳驛速赴該處尙屬可行色提巴勒底抵阿克蘇日卽畱彼辦事尋伊犁將軍明瑞勦平逆回奏納世通與赴援副都統弁塔哈乖張背謬狀 命

將弁塔哈納世通於軍前正法並 諭德福與弁塔哈同在阿克  
蘇辦事俱無端緒令明瑞定擬具奏尋議革職賠補濫給官糧  
諭曰德福同弁塔哈在阿克蘇辦事弁塔哈妄自尊大德福未能  
規正每相附和又將無關緊要事件由六百里馳奏弁塔哈既以  
失機正法德福亦應治罪因令明瑞等定擬具奏但其獲罪情由  
尙不至如弁塔哈之甚德福著革職發往伊犁效力贖罪所給布  
疋特行蠲免其賠補三十三年授刑部員外郎旋擢湖北按察使  
三十五年三月署湖南巡撫十月署四川總督三十六年正月暫  
署雲南總督疏請將永順鎮屬龍陵營騰越協南甸汛缺額兵就  
近於永順鎮標及騰越協營舊存兵內選補足額其原營額缺原



國朝通志卷之六十三  
官如數挑補又奏永昌府龍陵廳東西界騰越保山南界宛頂大  
渡毘連潞江遮放芒市三土司表延九百餘里同知一員未免顧  
此失彼請將鶴慶州觀音山巡檢移駐龍陵專司監獄捕務以資  
佐理均下部議行又疏劾提督常青違例乘轎營兵缺額久不募  
補 上以彰寶在雲貴總督任會面奏常青有裒無貶 敕明白

回奏彰寶覆奏常青辦理邊務認真尙無驕縱劣蹟疏入報 聞  
又奏土司田賦輕民人貪利典買夷人生計日絀經略大學士傅  
恆曾於善後事宜案內奏准凡民人典擺夷田畝限年退歸彼時  
只查辦關外干崖蓋達南甸隴川猛卯遮放芒市七處潞江土司  
居騰越腹地差役尤繁田多被民誘典應飭永昌府諭令首報酌

原價多寡限十年八年爲率收租已敷原本卽將原產退還夷人以後永禁典押夷地違者治罪 從之五月授四川總督 諭曰滇省軍營應辦軍務德福若有所見不妨具摺陳奏德福因密陳關外崎嶇瘴癘我師難以襲擊緬酋 諭曰德福至四川所陳緬賊各情形一摺識見乖謬緬地水土惡劣我兵難於采入自不宜復議大舉墮其術中而賊匪頑梗亦豈可竟置不問因議以秋冬之間派兵襲擊出其不意並非欲直擣阿瓦亦非欲竟取猛密不過躡彼疆境乘勢誅掠焚燒令賊匪知我兵並未歇手庶幾稍知畏懼送還內地之人以完此局就事而論實有不可不如此辦理者何至過於顧慮襲擊亦不可行耶前諭德福到川卽接受總督

印辦理小金川軍務若執此懦怯庸謬之見恐其於進剿事宜轉致貽誤德福著來京候旨 諭曰德福前在阿克蘇辦事曾獲罪譴經朕棄瑕錄用數年之內由臬司簡任巡撫因其尙知實力奮勉復加恩擢用總督乃甫至四川卽意得志滿全不似向年之實心任事且敢逞其乖謬之見借滇省事宜欲以諷諭罷小金川之事夫小金川番酋格桑去年秋閒與沃日土司搆釁侵擾經阿爾泰前往曉諭僧格桑卽遵守約束跡歸巢彼時以番蠻互相仇殺乃其常事且旣已遵諭退回原可無庸再辦會未半年而僧格桑復敢乘閒圍攻沃日且及明正土司此豈可復以口舌化導若不用兵擒剿使番眾知儆何以申威令而靖邊隅乃阿爾泰辦

理此事毫無定見惟圖遷就完局因令德福卽赴川督之任協同  
妥辦冀其經畫得宜剋期集事孰意德福尙未接印卽生畏事之  
心希欲阻撓軍務妄奏取巧深負朕委任之恩著革去總督賞給  
三等侍衛以己力前往伊犁聽候差委四十年 命回京署刑部  
侍郎四十二年四月署倉場侍郎七月實授十月擢刑部尙書四  
十三年七月兼署禮部尙書八月兼署鑲藍旗滿洲都統四十四  
年正月兼署左都御史五月 命協同尙書福隆安畱京辦事四  
十六年二月暫署兵部尙書五月疏言旗人置產向在兩翼監督  
稅契民人置產則在大宛二縣近旗下家奴置產防家主知覺潛  
赴大宛稅契旗員亦多隱旗籍赴縣納稅請嗣後旗人無論官員

開散家奴置產既令呈明本管佐領赴左右翼監督衙門稅契如私赴兩縣者以違制論官員交部議處閒散家奴鞭責仍令補稅換契下部議行七月疏請將都司以下官記名者俟扣滿二年方准升用再扣二年令督撫出具考語送部引 見得 旨此等人員自奉旨記名後兵部向例扣足二年即予升用再扣二年後遇有應升缺出又復遞用似此按年遞升殊覺過驟嗣後參將副將等官記名者仍照舊例交軍機處辦理外其遊擊以下人員交兵部記名者統限扣足三年准予升用一次所有該員記名之處即行註銷著爲令九月卒 賜祭葬諡勤肅子榮柱官奉天府府尹坐事革職別有傳

右 國史館本傳

榮柱

榮柱伊爾根覺羅氏滿洲正白旗人父德福刑部尙書自有傳榮柱由監生捐納主事籤分刑部洵升郎中乾隆三十八年授河南按察使三十九年署布政使十一月 諭曰河南巡撫徐績初至豫省民情土俗未得周知通省各員素未相習莫若倚重一人以資助理署藩司榮柱由刑部司員出身明練誠安可以倚靠乃朕所深知者徐績當與熟籌妥辦自可不致舛誤尋榮柱奏盤獲山東王倫案內逆匪秦繼統劉克達並究有同走各犯飛咨東省查拏 諭曰所奏甚好榮柱向在刑部頗能辦事昨年簡用河南按

察使卽前任巡撫何焯亦稱其能令隨同辦事一年有餘自必更  
加幹練前徐績初到豫省令其倚重榮柱與之事事詳籌妥辦榮  
柱當仰體朕委任之意幫同經理不可因藩撫地分相隔稍存避  
嫌觀望之見四十一年四月徐績及署臬司周於智疏題竄言誣  
告家主占妻一案審擬失出 上以榮柱向係刑部出色司員律  
例最所諳習雖見署藩司讞獄非其專責然於此等重案亦應畱  
心商辦何得視同膜外聽該撫臬率擬若此申飭之四十二年實  
授布政使四十三年正月署河南巡撫奏河南上年雨水缺少二  
麥未能普種開封彰德衛輝懷慶河南五府情形尤屬拮据應例  
外大加糶借 命實力妥爲之又奏汲淇臨漳三縣積歉後購種

艱難見飭詳察情形於縣領麥種者借給籽種於願種雜糧而工  
無出者折給銀兩并將儲備餘麥糶濟民食得 旨嘉獎又奏豫  
省撫標暨南北兩鎮綠營兵丁操演鳥槍俱以金鼓爲號今臣竊  
思演放一槍而金鼓迭奏耳目先已紛雜神志安能專一自河北  
鎮總兵觀成到任後令撤去金鼓仍照乾隆三十九年部頒之例  
健銳火器二營連環鳥槍法式惟以中靶爲優劣演放較速而有  
準前撫臣徐績亦令撫標一體做習今查南鎮尙未議改一省營  
制未便兩歧請 敕部議通飭遵辦 從之四月 諭曰昨新任  
河南巡撫鄭大進來京陛見召對時詢問榮柱居官辦事如何據  
奏榮柱才具本優操守亦謹但恐少年高興伊每加裁抑望其成



就等語榮柱才幹原可造就所以不急用爲巡撫者原望其歷練  
成才再加擢用榮柱係德福之子伊見文綬之子國泰擢任巡撫  
未免心存希冀豈知朕於用人之際權衡高下一秉至公不冒絲  
毫假借鄭大進此奏實於榮柱有益伊若能虛心受善愈加奮勉  
諸事謹飭自能長受朕恩若因此稍存嫌隙則自取咎戾朕不能  
爲榮柱寬也七月 諭曰鄭大進將榮柱詳報庫貯月冊及應撥  
領各款覆覈代奏而不令榮柱自行覆奏實屬過當前因該撫面  
奏榮柱時露高興朕恐其自恃有才目無巡撫或於公事不免攙  
越是以傳旨訓飭俾知謹飭並非令該撫槩行抑置不許藩司自  
遞奏章也卽榮柱遵朕諭飭亦止須遇事收斂不侵巡撫之分今

乃於職所應奏事件亦詳報巡撫轉達竟不免畏懼巡撫更誤會  
朕教誠本意矣朕整飭庶僚一秉至公不使稍有過不及之弊督  
撫等當善體朕意爲兩司者亦當恪盡職守將此傳諭知之四十  
四年十二月擢河南巡撫 諭曰正當堵築要工辦理災賑之時  
務宜鎮靜安辦不可急於見長四十五年四月 上南巡旋蹕榮  
柱 覲見於山東 行在疏奏本年 萬壽恩詔豁免各屬民借  
未完籽種口糧等項其年分遠近數目多寡之處應如何扣截辦  
理請另降 特旨全行豁免 上以此等款項凡在恩詔以前者  
均應查明題請豁免並不論年遠年近及數目多寡今榮柱復爲  
此請揆其意不過欲在朕前見其慎重錢糧獻勤取巧設准其所

請另行豁免通省民人見其前赴行在始有此旨必以爲由該撫奏請蠲免並可借此沽名市恩督撫大吏如此存心辦事豈是公正大臣之體若非朕明燭其巧必將以所奏爲誠心慎帑愛民視榮柱爲封疆循吏豈不墮其術中耶著交部議處又 諭曰榮柱自用巡撫以來頗覺器小工於取巧不知大體難勝河南災後撫民之任 命補盛京刑部侍郎五十年 諭曰吏部議處盛京刑部員外郎伊都錯擬罪名失入降調一本未將榮柱議及盛京刑部所督不過奉天等處審案無多司員等原擬如有錯誤該侍郎自應悉心酌覈卽飭改正何得率行具奏未便竟至不議榮柱著交部察議並著爲例五十四年 上以京察屆期榮柱聲名平常

交部議處降補刑部郎中五十五年授奉天府府尹五十六年奉  
天等處猝被風災未經親往查驗奉 旨交部嚴議尋照部議革  
職嘉慶七年十月卒子開明見任四川重慶鎮中營遊擊

右 國史館本傳

日本書紀卷之三十三

三

胡寶瑒

胡寶瑒江蘇青浦人原籍歙縣乾隆二年由舉人授內閣中書軍機處行走八年四月遷侍讀六月遷福建道御史七月疏言直隸自被旱以來遷移覓食者甚眾見蒙 恩旨先後運米五十萬石備賑請 敕督臣徧行曉諭俾土著之民靜以待賑其各處流民願歸耕而無力還鄉者酌量咨送回籍使趕種春麥不致田畝久荒於來歲民食有益下直隸總督議行九年二月疏言近蒙 皇上特命大臣查閱河南等省營伍所以覈訓練而杜廢弛見在器械之堅脆技勇之生熟人數之虛實糧馬之盈虧自難掩飾惟是積玩之處此時間風修整買補勢所不免而不肖營員或乘機借

端苛派或此後坐扣月糧俱未可定請令各督撫提鎮等嚴飭查  
參徇隱一併嚴議 詔如所請行十年十二月疏言山東兗沂曹  
等處及江南鳳潁淮徐海一帶被水之區見經消涸應乘時設法  
疏導並勸諭農民引流赴壑俾田不久浸以便春耕來歲蝻子尤  
宜加意預防下兩江總督議行十一年轉戶科給事中十三年遷  
順天府府丞尋遷府尹十五年四月遷宗人府府丞九月遷副都  
御史 命往河南會辦傅毓俊控告張天重謀逆一案審明毓俊  
誣陷論罪如例十七年三月擢兵部侍郎兼順天府府尹十月  
命署山西巡撫十八年九月實授十月調湖南巡撫十九年奏言  
郴桂二州銅鉛各廠因距州治遠不能兼顧委員董理一年更替

查廠中弊竇多端一切鉛錫銅斤沙渣淨色抽課收煎支解款目繁多接手之員必數月方講求明白此數月內已受欺蒙侵漏之弊請做臺灣瓊州例令新員與舊員先期協辦數月以收駕輕就熟之益得 旨允行二十年二月調江西巡撫七月奏請嚴查鄱陽湖船隻以靖積匪 上嘉之二十一年三月奏勘明廣信府所屬銅塘山無可墾之地無可用之材無可煎之礦應請永行封禁二十二年六月疏言豐城隄工最要除石隄官修外其民修土隄向俱按照圖甲額設里夫行之既久黠者避役貧者誤工乾隆十四年改爲折徵法雖稍變役仍未均今請略爲更定按田均隄俾貧民得免派累業戶共樂輸將至各鄉距隄遠近不同一遇衝漲



勢難迅集而折銀統歸官辦則工有緩急費有盈絀俱可通局籌度惟向年折徵別增圩長經收弊端百出今擬附漕糧徵收存田始有糧有糧始有夫毫無加累圩長無從侵冒工程乃可永固均如所請行是月調河南巡撫八月疏言河北濟沁等水俱歸黃河之北衛河最大受淇泉湯洹諸水下合漳河匯入直境容納有餘治之之法惟慎隄防而已河之南西則伊洛澗瀍俱入於河南則汝光等屬之水會汝入淮並陳汝開歸所屬惠濟渦河等水亦歸江南之潁亳入淮惟夏邑永城商邱虞城之水獨注宿州由睢河入洪澤湖四縣並無山谷泉源氾濫於平地則見多而歸於睢河僅屬一綫且藉以刷淤睢河壅阻則宿靈以北實被其患四縣之

水亦致倒灌其入睢河之界因爲沙礮灘所遏水大則衝激小則停淤前此屢議開鑿應聽江南興工其在豫省境內者連年河底停淤應開濬寬深以廣容受至地畝一片相連並無溝塘是以雨集則田皆積水雨過則田皆漫水地多旱種久浸輒傷若棄積窪以爲儲蓄之所更廣疏橫直小渠節節引支入幹則宣洩易而水患可除於農田有益 諭曰覽奏頗中冑縻詳妥爲之九月疏言臣與 欽差侍郎裘曰修等會勘豫省水道計惟有先開幹河繼開支河再開溝洫分別要工次工緩工次第興修十月復偕曰修等疏言豫省大幹河有四一賈魯一惠濟一渦河一巴溝巴溝袤百八十餘里在商邱則名豐樂在夏邑則爲響河在永城則爲巴

河今擬豐樂以口寬八丈爲率響河十丈爲率其餘十二丈爲率  
至巴溝下口本寬十五丈無庸加寬底皆半之其深處高下參差  
取最窪者爲水平挑深以平爲度計上游寬倍舊河下游加舊河  
之半河底一律平坦不至倒灌此辦理巴溝之情形也惠濟表三  
百九十餘里議挑之始原以分賈魯之勢既開之後披水匯注愈  
下則匯入之水愈多必需遞加方可注受河身上游在開封之中  
祥陳杞四縣下游在歸陳之睢淮柘鹿四州縣今加寬自九丈至  
十五丈不等底均三丈柘城應鑿沙疆九百餘丈鹿邑之底以六  
七丈爲率此辦理惠濟之情形也賈魯舟楫往來運濟糧食連年  
淤墊漸至淺狹彼岸頂衝此岸淤成河嘴更多阻塞中牟以下有

惠濟以分其流無庸加寬由朱仙鎮以下應截去河嘴並砌築決口修理舊隄面寬十二丈底寬四丈此辦理賈魯之情形也渦河發源通許之青岡至太康爲燕城河鹿邑以下河勢深闊但應增建月隄鹿邑岳家莊以下則益加收束應加面寬十六丈底寬八丈並鑿沙壘五百餘丈深如其舊燕城上截乃三邑南境之水藉以宣洩舊河僅寬二丈今加寬至六丈底二丈燕城下截雖寬而淺亦一律挑深俾可貫注此辦理渦河之情形也其支河之應濬者商邱之北沙河發源儀封從考城至商邱直達亳州之渦河又洪溝河發源虞城之惠民溝從夏邑之巴清河老黃河永城之減水溝下入睢河此二河爲支中之幹河其餘應濬大小支河共三十

四道至支幹各河所挑之土卽築隄酌加礮夯多設涵洞再開工  
之始均於河心安釘誌樁並立標記於收工時覈丈尺以除諸弊  
得 旨覽奏俱悉二十三年正月 諭曰豫省災區積困已久朕  
特用胡寶瑒爲巡撫伊不辭勞瘁實能仰體朕痾瘵在抱之意而  
又能盡力調劑以蘇窮黎甚可嘉也著交部議敘部議加一級七  
月加太子少傅 上獎寶瑒及裘曰修遵 旨治河不惜工不愛  
帑不勞民水用洩土計方上源下游以次就治見 御製中州治  
河碑文二十四年九月疏言衛輝府通判缺經臣奏准改歸河工  
查該通判尙有兼管鹽務一項長蘆河東鹽包行運汲縣則係河  
北地方扼要之區延津則係河南各州縣門戶之地應分歸二縣

稽查驗放以專責成 從之二十五年八月疏言衛河自雍正四  
年經前任河臣嵇曾筠會同撫臣田文鏡奏准於汲縣之高廟下  
馬營淇縣之宋村等三處濬縣之雙鵝頭等七處湯陰之王家窯  
等四處內黃之章家村等十二處增建草壩其二十六並奏明因  
水勢大小分別停辦減辦工料於鹽規項內支銷乾隆七年以後  
未經修治淤墊實甚臣悉心相度務俾一律深通請自今年疏築  
後定爲三年一小修五年一大修如當小修大修之年運河水足  
仍停止俟下次相機辦理 上可其奏十二月調江西巡撫二十  
六年八月 諭曰河南見有堵築楊橋隄工經理賑卹之事胡寶  
瑑撫豫日久情形熟諳著仍補河南巡撫十月奏闡鄭縣革役馬

見龍持械拒捕傷差業將首要犯先後拏獲 諭曰從來養奸誨盜皆闕冗選愼之吏釀成之朕畱心整頓胡寶琮能體朕意是以此案辦理迅速如此十二月疏言賈魯惠濟二河在中牟境內者均偪近楊橋黃水直下合龍後淤沙甚多查賈魯舊河已淤復修不易黃水初灌時將河身偪而南徙自鄭州界至祥符之時家岡仍入賈魯故道業已抽刷成河通舟祇須將分者截之使合淺者疏之使深再就兩岸見有衝刷支溝多挑渠港俾民田積潦有歸並寬畱河身以資容納增築隄堰以杜旁趨無須大工自成天然河道至惠濟河自兩閘至岡頭橋已淤斷且距賈魯新河頗遠不便強之使通而岡頭橋距十里坡賈魯河不過四五里又有新衝

河形可因勢利導由岡頭橋入惠濟舊河挑濬新淤修補舊堰並  
於十里鋪建滾水壩一則節宣有度可以分賈督之勢而惠濟亦  
歸故道得 旨事半功倍爲之甚妥二十七年正月 上南巡寶  
瓊迎 駕於德州 御製詩賜之曰九江遷古汴因地藉賢才資  
爾就熟路爲子抒幹裁澮川剔壅闕田野闢汙萊善後方多務欽  
哉更勛哉八月奏患痰疾 諭曰胡寶瓊辦事素能奮勉今患病  
將及一月以至形諸奏牘決非偶抱微恙者著傳諭速卽據實奏  
聞尋請解任 諭曰此奏甚非朕之所望惟須安心靜攝以慰廑  
念 賜人蔭一斤並 命太醫院慎選良醫馳驛前往診視十一  
月疏言豫省地勢平行恃以宣洩者溝渠實與河道表裏臣於二



國朝通志卷之八十三  
聖鑒是年每一州縣中所  
挑路溝及小港廢渠宜復臚列奏蒙  
開溝自十數道至一百數十道不等長自里許至數十里不等寬  
深自數尺至丈不等皆以足資蓄洩爲度路溝除驛路加挑外凡  
商旅通衢亦一律開溝種樹雖縣互而分戶承挑民易爲力自是  
每歲或於春融或於農隙隨時勘辦是以逐處寬深鮮有水患且  
各就地頭出夫貧富自均就役亦便皆令渠長地保管理不經胥  
吏之手一無擾累其民力難以全收之處自應欽遵 聖訓酌借  
口食工多而地畝亦多仍屬眾擎易舉惟工多地少則須酌借但  
歲修非比特興大工各州縣額設公費動給已足敷用總期爲之

以實俾小民蒙利而不致少累 諭曰胡寶琮奏見辦豫省民田道路溝渠一摺經理甚爲妥善國家雖久停力役之征而開挑溝洫實爲農田之利通力合作亦小民之所宜自爲謀者也今豫省每一州縣開溝十數道至一百數十道不等田溝固有業戶路溝亦傍民田民間業佃就地施工用力甚便而其事易集行之已有成效直隸河南地屬接壤著方觀承董率所屬做而行之實因利利民之道也二十八年卒 諭曰河南巡撫胡寶琮幹練老成恪慎精敏敷歷中外宣力有年昨因舊疾復發遣御醫診視尙冀痊可茲聞溘逝深爲軫惜著加贈太子太保兵部尙書應得卹典仍著該部察例具奏其遺摺內請入籍江蘇青浦縣之處並著照所

國朝言行錄卷之十三  
請行尋 賜祭葬如例謚恪靖

右 國史館本傳

乾隆二十八年正月十八日太子少傅兵部侍郎兼都察院右副都御史巡撫河南兼提督軍務胡公卒於官先是 天子聞公疾屢 賜慰問頒淺藥食品兩遣侍衛偕太醫來視及遺疏上 上深軫惜特加 贈太子太保兵部尙書祭葬如例并 兪所請入籍青浦 恩至渥也喪將歸承重孫傳書幼道遠未至孤子鼎蓉等持公之友王君爲公所編年譜泣而請銘余與公同歲舉於鄉交四十年今來汴亦且五載於公生平最悉義無可辭公諱寶璵字泰舒號飴齋晚號瓶庵姓胡氏徽州府歙縣人按年譜胡氏歙

大姓自後唐同光後代有名儒人物科第之盛甲於江左曾祖考諱守倫窮經早歿著有易旨探微蔭堂詩鈔傳世祖考諱希烈幼孤蓄德以六行著於鄉考諱廷對以名諸生貢太學自溧陽訓導補甯國遷婁縣終常州府學教授學與政皆有聲公爲巡撫兼提督後皆晉 贈如公官曾祖妣汪氏祖妣汪氏妣洪氏皆一品夫人同母兄弟八人公行在第七生有神兆資稟異人幼承家學能綜貫羣籍其才閎肆而精博於制藝詩古文詞篆隸行草諸藝事無所不工而尤究心當世之務通達治體蓋爲諸生時已負公輔之器矣年三十舉雍正元年癸卯 恩科鄉試因公車者幾二十年至乾隆二年始考授內閣中書太保西林鄂公語人曰省中隱

埋一老名士大能任事亟令入軍機裏行直舍無書而有問則應  
據經史百家及直省地形土俗職官兵制因革利病言之鑿鑿太  
保公深倚重之六年秋大學士松莊查公今兵部尙書果毅公阿  
公奉 命度地奉天三省奏公同行隨 駕校獵畢卽由木蘭徧  
歷諸部至盛京過吉林渡松花江轉而至黑龍江再轉而至甯古  
塔又徧閱諸部至春而還橫穿側出其行二萬二千餘里於冰霜  
風雪中歷覽絕無人之境巖巒阻深榛莽密熊虎之跡交橫於  
道而覽其山川形勝辨其土宜一過卽了然於心口公自以爲極  
域外之大觀爲生平第一盛事而才勇之過人益於斯而見矣會  
有 詔慎舉言官必如陽城馬周者查公卽疏公名以上 御試

擢第一記名既以資遷內閣侍讀旋授福建道監察御史轉戶科  
給事中再遷順天府府丞 王師勦金川 命今大學士忠勇公  
傅公往經略 敕公從行日馳常三百餘里遇險則徒步躡危崖  
斷棧從者多不相及或三晝夜一食傅公恪遵 廟算剋期告捷  
贊畫機宜公之勞績最著凱旋之日有問之者則曰吾書生不知  
兵謹供書記而已 上知公才可大用卽軍中拜京兆尹仍敘功  
爵一級再晉三級前後 賜賚甚厚疊遷宗人府府丞副都御史  
兵部右侍郎兼府尹如故自是遂出領封疆之任自山西而湖南  
而江西而河南再撫江西復至河南凡四省六任山西河南皆兼  
提督河南兼節制駐防滿營其在山西撫饑民理冤獄抉貪吏除

奸豪戎行以整關隘隄防悉修力行教養之政凡一歲其在湖南民貧而狃於俗吏治習於骹骹苗獠常困兵役之擾公爲整飭化導簿領山積視事常至夜分不息凡五月其在江西有重案關士風者乃刊布 聖朝訓典而親訓誡之設編船嚴保甲以息鄱陽之盜奏罷廣信開山之議重封禁以杜民之後患江浙歲饑江西亦僅中熟以市僧居奇乃爲宣禁以通商販鄰省賴以急濟凡兩年有奇公所至必有惠政故居則民樂之去則民思之有攀留追送數十百里外不忍去者而豫人之德公爲尤至初公爲副都御史隨 駕南巡有偃師奸民傅毓俊以私憾控張某謀逆逮繫累百餘人 命公往鞠七日而至集案牘夜視之詰朝官僚入見曰

吾已得其實矣一訊而詞伏止誅毓俊一人餘皆省釋中州人至  
今以爲神明公撫江西時歸德歲歉二十二年六月水患尤甚連  
及開陳汝許大河以北之彰衛懷各郡同時被澇者六十餘州縣  
天子軫念災黎大發帑金數百萬撥米數十萬石知非公莫能  
辦遂命移撫河南至則率勵大小屬吏察胥吏之侵漁壅遏爲  
奸弊者計口而賑不遺一人更爲葺廬舍招流亡借牛種冬則隨  
地畱養糜之孺之所全活以數千萬計復奉命開濬水道爲永  
久計時工賑兼舉民皆飽食趨事凡開治四府二十八州縣之爲  
水者六十有七計二千五百餘里皆因自然之勢層注而下分入  
於江南之睢澠諸水匯於淮以歸洪澤乃繪其源流記修濬之深



廣爲圖說以獻請 御製碑文勒永城之通衢 帝深嘉之遂晉  
加宮傅自是連歲大稔二十五年十二月復移江西至次年七月  
而河決於楊橋沁洛丹衛同時並漲被災者五十餘州縣因復  
召公還汴至則大學士劉公協辦大學士兆公及戶部侍郎裘公  
河南總督高公咸在有成議惟決口數百丈未合將開引河築壩  
束水需橐薪之屬數千百萬日役數萬人公以次徵發受傭與直  
者皆得如 詔意不日而河歸故道而黃沁交匯之工至是亦底  
績矣方河與諸水初漲時其災更甚於前歲然而民心帖然境外  
不見有一流亡者則以比歲有秋非若向時之積歉且小民咸知  
上恩意諸倉既開內帑數百萬絡繹而至皆安以待賑而公於

救荒之政前效可徵必不使有一夫之失所也至於水退而民卽得耕次年夏秋皆復大熟者蓋天心之仁愛下民而賈魯惠濟諸水久已通流河得直趨南下而無阻遏及水去沙停復乘其浮淤而治之而田間之水又各有所洩是以水落而田出民得借種以播宿麥也此非公前此經理之明效乎是以公之所至必爲豐年民樂其業而公亦自忘其勞每行部必躬歷田間問民疾苦或境內有事輒夜半卽行途間買餅餌而食所過傳舍不知有供億之煩也自奉本儉而又習於勞雖貴顯不改儒素猶憶往時同奉祭告之命並轡出都過涿州而公騎已遠比至會稽公旋已數日矣聞公請假便道還松江太守聞之曰吾官此數年不知郡中有

此搢紳訪之則已步至里門所居破屋八椽門不能容車猶然蓬  
華士也歎息而去余以丁丑歲蒙 恩賜休公招至大梁書院與  
諸生講學每公暇輒來來必暢談諸生文藝佳者引而教之娓娓  
不倦聞者莫不興起蓋愛民好士出於至誠其性然也嗟乎公以  
老書生一無緣藉晚受 聖主特達之知內躋九卿外長文武二  
十餘年之中勲施爛焉揆之素心亦可以無憾所憾者朝廷失一  
公忠任事之賢臣使草野不得蒙其福此黎庶之所以悲思而士  
友追念生平不能不撫遺編而隕涕也雖然公完人也公可以不  
朽矣余又奚悲焉公生於康熙三十三年十二月初五日巳時距  
卒年七十其著述甚富惟四書文彙已刻其詩古文凡若干卷藏

於家配俞氏 誥封一品夫人子四長鼎梅先公歿次鼎蓉貢生  
次鼎衡次鼎崧皆幼女四人孫一傳書將以某年月日葬公於某  
原銘曰

白岳之英聞世挺生乘時利見爲名公卿敷歷中外才兼文武畢  
公孟侯方叔召虎晉楚西江亦越大梁自公至止豐年穰穰豐年  
穰穰吉人藹藹咸曰我公令德壽豈躋堂而祝時維季冬春鐙初  
罷民不夜春遺表上陳 帝深軫惜贈官表墓 恩綸絡繹存順  
歿甯生榮死哀古三不朽公其備哉三泖新阡釣游之地既固且  
安神其永庇

右墓誌銘陳浩撰

公諱寶璵字泰舒世居徽州以理學世其家祀文廟者七人父虞  
雲教授婁縣因家焉公生十五歲賦牡丹句驚其坐人年三十舉  
於鄉有同試禮部者託公齋文書至京奴愆於期公憮然曰以我  
故致渠不與試吾義不獨試也袖筆出考授中書隨大學士查郎  
阿度地塞外登醫無閭至黑龍江畢臘再至登爾者庫入烏蘇凡  
半年行二萬二千里艾殺棘刺蓬蒿觸抵豺虎茹乾餼啖雪盡得  
其險要扼塞乃還時乾隆六年也查公以陽城馬周薦御試第一  
擢福建道監察御史遷順天府丞督學政十三年從經略傅公征  
大金川時蜀中軍書旁午瘴癘毒淫大赦納囚等山馬契需不度  
公菲屨徒步繩索相引雙跚勃窣不納勺飲或三晝夜一食乃得

至屯營處賊方張礮樓天接矢石夾兩耳下公簪筆畫策削牘作  
奏動合機宜卒佐經略降其酋凱旋 天子親斟金杯賜公酒海  
內以爲榮以軍功遷順天府尹加都察院右都御史巡撫湖南山  
西再調江西鄱陽湖多盜公立編船法責文武督治盜遂息其年  
江浙米翔貴公禁遏糴者西粟方船而下南民賴焉調撫河南陳  
汝等州大水 天子詔公與侍郎裘日修分疏水利開河六十七  
道計二千五百里繪溝支幹派圖記修濬丈尺若干勒諸石功成  
加太子少傅調江西未抵任而河南又災 天子亟追公還會同  
大學士劉統勳塞楊橋口築隄公慮水去而沙停乘賈魯惠濟諸  
河衝決慮刷宣浮淤俾無梗滯俄而黃流平田皆涸出卽給麥種

設棚廬救之耕耨果汗邪滿車民蘇彫劫十六年扈 蹕南巡河  
南奸民誣人謀逆詞連百人公馳驛夜鞫片言燭奸誅客訴者民  
皆懽呼性謙謹躬躬躬然雖監門廝養尤益敬與鈞然權要鴟  
張不爲動爲詩文立就不加點竄尤善騎能日行三四百里某太  
史以善騎夸公約至朝各諫馬去某狂奔盡氣入內閣不見公方  
竊喜自負而公自內出已批救數行矣奉 命祭南嶽還松江上  
冢知府蔡長洪驚曰吾守此數年不知有八座某也來謁則蓬華  
數椽乃嘆息去公感 上恩厚年已七十猶刺閭判事極翦簪之  
勤眸子清碧能白日視鬼神臨卒諸屬吏來受遺言公手指南汝  
道陳公坐日避河神陳爲悚然歸竟病三日先是教授公官宣城

居正學書院院有王文成公祠生公之夕夢文成手一金軸曰五十年後煩送吾鄉乾隆十六年天子駐會稽命公齎金軸御祭王文成讀祝堂下方知前夢之徵也子某葬某銘曰  
雖居句如折矩雖飲甘如茹苦能談笑折樽俎能遺蛇歷險阻行而拱翼坐而俯九命而車上不舞彼何人君子以爲古

右墓誌銘袁枚撰

胡寶瑒初名金蘭字泰舒祖希烈以貢生歷官常州府教授始自歛遷於婁縣寶瑒生有神兆資稟異人雍正元年舉於鄉乾隆二年試授內閣中書大學士鄂爾泰選直軍機處六年秋大學士查郎阿兵部侍郎阿里袞奉命相度奉天三省地形請以同行時



適隨 駕校獵卽由木蘭徧歷諸部至盛京過吉林渡松花江轉至黑龍江再轉至甯古塔又徧閱諸邊及春而還共行二萬二千餘里橫穿側出於冰霜風雪中覽其形勝辨其土宜自以爲極域外之大觀也會舉御史查郎阿疏名以上 御試第一時已遷內閣侍讀旋授福建道監察御史轉戶科給事中再遷順天府府丞寶璵任道科五載屢上疏言直隸賑濟請酌量土著流民分別處置河南查閱營伍當杜苛派剋扣之弊山東江南被水州縣宜乘水涸時設法疏導皆得 旨允行十三年 王師勦金川 命大學士傅恆爲經略 敕以從行日馳三百餘里恪遵 廟算剋期告捷寶璵贊畫居多擢順天府府尹前後 賜賚甚厚屢遷宗人

府府丞副都御史十六年隨 駕南巡有偃師奸民傅毓俊以私憾控張天重謀逆逮係百餘人 命竇璲往鞠乘傳七日而至集案牘視之比夜分曰吾已得其竇矣一訊而伏止誅毓俊一人餘皆省釋中州人以爲神明明年遷兵部右侍郎兼府尹如故遂授山西巡撫旋調湖南自湖南而江西而河南再撫江西復至河南凡四省六任焉在山西撫饑民理冤獄抉貪吏除奸豪整關隘力行救養之政在湖南民貧俗敝苗獠困兵役之擾悉整飭之其在江西設編船嚴保甲以息鄱陽之盜奏罷廣信開山之議重封禁山以杜後患江湖歲饑江西亦中熟因市僧居奇適爲宣禁以通商販鄰省賴焉及二十二年撫河南方患水開陳汝許與河北之

彰衛懷同時被溺者六十餘州縣 天子軫念災黎發帑金數百  
萬撥米數百萬石以賑之寶琮率屬吏計口而賑不遺一人葺廬  
舍招流亡借牛種至冬隨地畱養所全活以數千萬計復奉 命  
開濟水道工賑兼舉民飽食趨事所開幹支各河凡六十有七道  
計二千五百餘里皆因自然之勢層注而下分入於江南之睢淝  
諸水匯於淮以歸洪澤湖迺會其源流記其深廣爲圖說以獻請  
御製碑文以垂永久 上深嘉之加太子少傅自是連歲大稔  
二十五年十二月復移江西次年七月河決楊橋沁洛丹衛同時  
並漲被水者五十餘州縣 命大學士劉統勳協辦大學士戶部  
尚書兆惠及戶部侍郎裘日修南河總督高斌共治之復 召寶

瓌撫河南時決口數百丈未合將開引河築壩東水需藁薪之屬  
數千百萬日役數萬人以次徵發受備者皆與直民不知擾被災  
之地賙卹周至無一流亡者水落田出民借種以播菽麥次年秋  
皆復大熟寶瓌在河南最久習知其地利民俗盡心經畫故民樂  
而安之二十八年正月卒於官事 聞 贈太子太保兵部尙書  
謚恪靖 賜祭葬如例且 允所請入籍青浦寶瓌兄弟八人長  
嘉會次嘉浩皆庠生三才標監生四寶琦國子監學正五嘉謨六  
寶光舉人鳳臺教諭八寶琳由保舉至刑部郎中累官山東鹽道  
家門鼎盛不改儒素嘗被 命祭告請假便道還松江太守聞之  
曰吾官此數年矣不知郡中有此指紳訪之則已徒步至里門所

居破屋數椽門不能容車猶然蓬蒿也歎息而去

右傳王昶撰

乾隆七年 詔求骨鯁質樸之士九卿咸有薦辟 廷試策論  
上親取胡恪靖第一公時官中書用大學士查公薦也後官御史  
有敢言之目任封疆能持大體爲名臣相傳公生時父教授君夢  
王文成遺以金軸曰五十年後煩送吾鄉及 高宗南巡至會稽  
遭公齋 御書名世眞儒額及 御祭文祀文成方悟前夢因爲  
題曰三不朽懸諸堂按夢境渺茫豈可據爲典要而碩輔眞儒之  
魂魄千載如生絲綸俎豆之 恩榮九幽亦感此則塙然可信也

右紀聞陳康祺撰

國朝耆獻類徵初編卷八十四目錄

卿貳四十四

索琳

周元理

喀爾阿

沈德潛

其  
一  
二  
三  
四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十

國朝耆獻類徵初編卷八十四

通奉大夫前署江西巡撫江蘇布政使司布政使湘陰李桓輯  
鄉試四十四

索琳

索琳完顏氏滿洲正藍旗人父那蘇泰熱河副都統乾隆元年索琳由廕生以主事用籤掣兵部三年中繙譯舉人海升吏部員外郎調兵部十七年充軍機章京十九年擢刑部郎中二十年調戶部二十四年四月京察一等閏六月授山西歸綏道二十五年正月遷按察使六月疏言查歸化城歸綏道審轉命盜各案如兇盜屍親事主均係民人由七協通判承審經同知歸綏道覆審招解



臬司申請撫臣題結其有蒙古與蒙古交涉命盜案件由外藩各  
扎薩克派員來城會同通判審解同知轉解都統歸綏道會審咨  
部若係蒙古與民人交涉命盜案件通判驗報行文外藩扎薩克  
申請都統咨委員來城審明仍經同知轉解歸綏道會同都統覆  
審移解臬司轉解撫臣會同將軍都統題結凡此案件例以扎薩  
克委員到齊之日起限有屢次訂期不至案犯經年久羈其干連  
待質之犯省釋無期更有牽涉二三旗分或一旗委員未到又另  
訂期勢不能依限完結查原定扎薩克委員會審之例原因蒙古  
不知法律恐其疑有屈抑故令會審以服其心現今各扎薩克無  
不深曉立法平允卽委員會審之時亦從無疑議是會審之例徒

致案牘久懸犯證拖累請嗣後歸化城七協應蒙古於蒙古命盜各案由通判驗訊申請都統就近派委土默特參佐領會審咨部其蒙古與民人交涉之案亦請都統委參佐領會審由撫臣會題所有各扎薩克委員會審之例停止結案後仍將審擬定罪之處由歸綏道行文扎薩克知照奏入 上是之二十六年升浙江布政使二十九年奏言四月欽奉 上諭向來緣事降調官員例應引見者俱由該督撫出具考語送部引見朕旣以覈其人之材具亦因以覘督撫之鑒別屬員法至善也其離任候補之員因係前任案件畢誤降調本籍督撫因非見屬之員無從出具考語嗣後離任人員緣事降調例應引見者並著原隸之督撫一體出具考

國朝典章考卷之八十一  
二  
請送部引見著爲令見在各員俱已欽遵辦理惟是此等離任人員已回本籍者大率別有事故未能卽時赴補如丁憂則須俟服闋告病則須俟病痊他若終養更須俟養親事畢若遲至數年之後始赴任所請咨竊恐原隸之督撫或有更易而接任之督撫未悉賢否亦無從出具考語查向來官員遇有事故離任原有給咨回籍之例伏思與其事後無從考覈似不若於請咨回籍時卽令該督撫豫將該員平日爲官如何出具切實考語明立印案並咨明本籍督撫存案庶原籍任所皆有原隸之督撫考語可稽易於查辦如蒙 兪允則將此等候補降調人員例應引見者准其由本籍咨送祇須令本籍督撫查明從前咨回存案考語於文內敘

明送部卽與原隸之督撫出考無異而該員得免遣赴任所往返稽遲似覺便捷得 旨嘉獎三十年閏二月授副都統 賞戴花翎前往庫倫協同桑齋多爾濟辦事四月民人趙立喇嘛垂黨等與鄂羅斯私行貿易經成衮扎布奏 聞 上命桑齋多爾濟索琳查明具奏六月成衮扎布奏稱恰克圖往來之人及恰克圖居住之人等皆言鄂羅斯尙通貿易而協理台吉沙克都爾亦告稱曾見桑齋多爾濟屬下官員達賴等齋有王大臣等文書帶領商人連次赴鄂羅斯貿易 諭曰鄂羅斯貿易之處已經停止桑齋多爾濟豈可潛行貿易著阿里衮馳驛前往庫倫查辦卽帶領索琳一同辦理七月 諭曰前據成衮扎布奏稱恰克圖地方並未

停止貿易等語朕曾令索琳等查明具奏乃索琳扶同桑齋多爾濟掩飾並不據實陳奏今知阿里衮到彼查辦恐其敗露始行請罪殊屬不堪索琳著革去副都統自備資斧管理恰克圖兵在章京上效力贖罪三十三年八月 召還京十月授戶部右侍郎十一月 命在軍機處行走三十四年署理藩院侍郎三十五年七月理藩院奏參古北口驛站章京富爾德赫短發馬價 命偕羅布臧錫喇布前往審訊索琳傳寫 諭旨舛錯下部嚴議降一級 畱任尋偕刑部侍郎博清額赴土默特鞫誠親王婿納遜特固斯謀鴆格格案十一月充國史館副總裁三十六年正月因未能究出謀鴆實情反將案犯交納遜特固斯看守徑自回京 上嚴飭

之降三級調用三月 命署內閣學士在軍機上行走旋以副都  
統銜赴西藏辦事三十七年二月 諭曰據桂林奏准駐藏大臣  
咨稱民人杜華飲酒身死不明通判蘇恩楨遊擊永明互相推諉  
不辦應由內地另行派員往辦西藏距內地甚遠故特派大臣前  
往辦事遇有案件理宜卽行審擬完結如屬員推諉不辦亦應一  
面奏參一面辦理豈有調取內地官員往辦之理乎在莽古賚從  
前惟管理旗務謂不諳事體猶可索琳由軍機章京擢任布政使  
辦事有年又屢經差遣並曾在軍機處行走熟諳朕旨何事未經  
自非莽古賚可比此等舉動甚屬不堪莽古賚索琳俱著嚴行申  
飭五月吏部議奏浙江失察屬員侵虧之歷任撫藩索琳應降二

級調用 命俟更換回京之日再行請 旨三十年閏三月署禮  
部侍郎四月 諭曰索琳前以戶部侍郎與署侍郎博清額前往  
土默特查審事件未能妥協是以將伊革去侍郎降署內閣學士  
令其在軍機司員上行走嗣因駐藏需員復給與副都統銜前往  
辦事乃於民人杜華身死不明一案部議請革去職銜彼時因索  
琳駐藏在外當經降旨俟其更換回京之日再降諭旨後又因藏  
內及前任浙江藩司任內例應議處者三案共應降七級調用均  
聲明換班回京之日請旨今經兵部彙案具奏索琳著銷去副都  
統銜加恩授爲內閣學士革職畱任俟八年無過方准開復所有  
禮部侍郎員缺仍著索琳暫行署理是月 命在軍機處學習行

走十月補內閣學士兼禮部侍郎銜旋赴歸化城鞫案十一月署  
理藩院侍郎往庫倫換班四十一年四月升理藩院尙書留庫倫  
辦事七月因審理命案徇情營私降理藩院侍郎仍帶革職留任  
四十三年七月 召選京復因在庫倫時辦理鄂羅斯與商人貿  
易事宜未能妥協部議革任 從之八月 命在理藩院郎中上  
行走四十四年正月復以副都統銜赴藏辦事 賞戴花翎十一  
月巴唐賊匪阻路行劫 命索琳帶兵前往尋奏賊匪亟宜懲創  
已令公班第達前赴嘉禾喀爾見在趕辦烏拉牲隻令遊擊納其  
善等帶往班第達營俟來春進兵以期迅速奏功 上嘉之四十  
五年二月行抵拉里山卒



國史館本傳

右 國史館本傳

三

周元理

周元理浙江仁和人乾隆三年舉人授直隸蠡縣知縣十四年調清苑縣遷霸州知州以經理城工仍畱清苑累遷宣化府知府旋丁母憂二十七年服闋補廣平府調天津府又調保定府三十年遷清河道三十三年遷按察使三十四年擢布政使三十五年以捕蝗不力降三級畱任三十六年二月 命同尙書裘日修總督楊廷璋勘青縣滄州減河及河道閘座合疏言減河之設原因洩運河盛漲非同閘座啟閉兼以蓄水也今閘座皆高出河面數尺當水洩既不藉閘板之積蓄則水發亦惟賴減河之暢流宜用滾水石壩不應更立閘座其滄州之捷地閘形勢兜灣應改壩移近

國朝通志卷之八十一  
河旁裁曲就直以順水性至減河每年遇水後往往受淤壅塞必  
須測量疏濬使水得順流達海上是之三月授山東巡撫十月  
奏小清河發源章邱之長白山承章邱各縣河流及各泊之水至  
樂安縣達尾閘之淄河門入海其北建軍張壩一分北條爲支脈  
溝南條爲預備河乾隆五年又於預備河之南接挑福民河以分  
水勢其白章邱至博興又有許山清河麻大會城猴子等泊爲納  
水之區本不應時有漫溢前撫臣富明安因迤東一帶入淄河尾  
閘二十餘里河淤水溢逐次挑濬然止治其流而未清其源以致  
洶出地仍被淹臣悉心籌畫惟有先將許山清河二泊濬深開廣  
遇水發時有所停蓄然後聽其入河分注歸海又下游各河每年

責成各縣農隙濬淤庶水患可弭報 聞是月遷直隸總督三十  
七年正月疏劾三座塔監督長春私設稅局鞠實論罪如律三月  
疏言直隸雨多河漲通京一帶衝衝疊道閱久未修日漸衝刷小  
溝渠亦多未濬上年行潦無歸塗旅多滯而溝渠淤阻漫淹民隄  
民搶在在衝決田廬均受其患應照以工代賑之例覈實估修今  
勘天津東門外之海河糧道又宛平大興良鄉房山涿州定興安  
肅清苑滿城正定新樂邢臺沙河永平邯鄲磁州新城雄縣任邱  
獻縣景州昌平懷柔密雲等州縣疊道悉係通京並山東山西河  
南衝途日就低窪跨道木橋亦多坍塌又良鄉之茨尾雅河已淤  
官莊一帶河身幾同平地新城雄縣之盧僧河爲分減白馬溝河

之盛漲新城清河民捻雄縣東西南老隄並清河兩岸民捻均係  
迎酒要工任邱近淀民捻獻縣臧家南北兩隄逼近滹沱並有填  
淤衝漏應并籌覈請乘汛期未至之先一律興修勒限報竣 諭  
曰應舉行者工歸實用可也時 命尙書裘曰修閘直隸河工旋  
合疏言直隸諸水千支萬派總由三汊河爲入海之道運河西岸  
則大清河會永定而出子牙河會三支黑龍港而出全資西岸疊  
道堵橋穿運而東匯入海河今東岸自南倉下改爲疊道盛漲時  
可徑達塌河淀不專恃海河爲出口但西岸橋座向止十一昨委  
員估添六座臣等覆估又添三座多其出口俾無壅遏則上游不  
致受害至格淀隄原爲隔別清渾而設今子牙渾水自莊兒頭至

當城以下漸次澄清其來甚遠而出口專注大經橋實爲太偏向  
來於格淀隄之尾閘王家河俞家河建橋座與清河通流然過水  
有限以一隄支柱南北子牙與清河兩相衝激盛漲不能徑下徒  
費增修莫若自當城以下見衝段落改爲壘道水大聽其自漫水  
小仍於行人便利并於壘道上酌添涵洞數座不專恃王家河俞  
家河兩椿則行水暢順而子牙下游澄清亦斷不至清河受淤  
詔如所請五月雄縣民劉盡忠控知縣胡錫瑛盜賣倉穀 命裘  
曰修儲戶部侍郎英廉往訊得實定罪 諭曰直隸散賑前據周  
元理奏稱察覈所屬俱實力辦理民需實惠今雄縣之案地方官  
之辦理已可槩見所稱賑務安實者安 著嚴加議處部議革任

得旨從寬畱任三十八年二月 上巡幸天津 賜詩曰三輔  
羣瞻首善風文濡武詰寄攸同河工綦重永期晏民氣稍蘇慢詡  
豐昔以旬宣職克盡今推節鉞任逾崇佐人人佐道斯異挈要無  
過虛與公四月加太子少保六月 上詢金門閘宣洩情形疏言  
金門閘舊有攔水單壩春間蒙 親臨指示加長使有回瀉過壩  
並令求賢北邨兩灰壩均照金門閘添築攔水一道以緩水勢卽  
恪遵委辦見在隄固涵緩並於河流去路一體濬治務使積淤盡  
刷水道暢利令永定道滿保覈定章程遵守得 旨嘉獎十二月  
偕侍郎兼管府尹蔣賜棨同勘八旗在官荒地奏稱從前拋荒地  
畝多由水衝沙壓及鹽鹼石子施工較難收利亦薄漸成廢棄臣

等履畝察驗內有附近熟地之處儘可墾種及沙灘僅蓋浮面稍  
去卽有土可藝其時卽有原業佃戶在旁面加曉諭此地墾成不  
但可收租息並免滋生蝗蝻大於農田有益況八年後起租實多  
利便伊等亦欣然認墾查八旗原報荒地一百餘頃今勘得可墾  
地五十二頃零在官原報荒地一千三百餘頃勘得可墾地四百  
十七頃零臣等酌議俟承墾四五年令州縣勘明如果成熟酌定  
租數報司存案俟八年期滿覆勘無異照租額徵收查墾熟在官  
地畝例禁典賣該佃戶應永遠墾種至八旗荒地除有業主外照  
例入官徵收又沮洳庫下之區分別開溝洩水因勢利導其難資  
宣洩者無庸開溝以節民力下部議行四十年元理年七十奉



命入都 御賜旬封綬壽額並 命紫禁城騎馬四十一年二月

上巡幸山東過天津 賜詩曰微職洵臻幕府開京畿最久更

長才事無巨細無弗悉民有艱難有賴培莫謂駕輕斯易耳可知

責重留菴哉道塗供帳甯須亟夏諺猶慚爲度來九月同學政羅

源漢請熱河增建學校下部議行四十三年正月 詔改熱河爲

承德府其酌改事宜令元理悉心籌畫旋請改八溝爲平泉州略

喇河屯五廳爲灤平豐甯建昌赤峯朝陽五縣均隸承德設知府

知州知縣及酌增教職佐雜俱下部議行五月奏熱河人煙輻輳

附近山岡多產煤處今潘家口汛土窯子山場見已試採煤匪窯

成應聽開採 詔允之十二月以歲暮錢價增昂請酌撥局錢發

換以平市價 上是之四十四年正月疏言宣化府城外西莊臨柳川河爲常峪青邊口外諸山水匯歸之所每遇汛漲直逼城根向有護城隄年久衝坍臣前年閱兵親加勘驗請改建石塘並築石坦坡以期鞏固報 開先是井陘知縣周尙親短價派買倉穀復因修橋廟科派民錢三月劣生梁進文集眾毆役縣民李馥等爲之斂錢上控元理請懲刁風分別定擬未將派累之知縣劾奏 上以元理袒護劣員解總督任 命尙書福隆安往鞠之元理具服 諭曰據福隆安查訊井陘縣民聚眾抗官知縣周尙親科派馮寶周元理袒護本應革職發往軍臺姑念其年老善革職仍加恩賞給三品銜在正定隆興寺管理廟工效力贖罪十二月授

都察院左副都御史暫署直隸總督四十五年四月遷兵部侍郎  
九月擢工部尚書四十六年因病乞休得旨准回籍調理加恩  
給太子少傅四十七年十月卒於家遺疏入諭江蘇布政使前  
往致祭一壇

右 國史館本傳

乾隆四十六年冬十一月工部尚書周公引疾乞休上憫公老  
可其奏加太子太傅旋召對瀛臺俟明春汎舟南下於是朝  
中公卿大夫莫不寵公之行作為歌詩盛推公中外勞績善始既  
終而歸本於聖天子慰安老臣之至意其明年春三月就道夏  
六月過蘇州余與公握手胥江歡宴彌日既抵家不半載遽以疾

卒疏聞 詔稱公老成勤慎令江蘇布政使致祭一壇越二年  
孤子升士將葬公於某所乞予爲誌銘予與公舊爲戚屬而升士  
復婿子女孫媼姪綢繆相知最稔其烏可以無言案狀公諱元理  
字秉中先世汝南人扈宋南渡居於會稽明成化間遷杭州北郭  
芳林里曾祖諱承宣大父諱奇齡父諱昂皆以公貴 贈榮祿大  
夫母陳太夫人生二子公其長也公生數歲而孤陳太夫人食貧  
守節歷四十餘年得旌於 朝公年十九補仁和生員乾隆三年  
舉於鄉十一年揀發直隸以知縣用得蠡縣旋調清苑以總督方  
公薦擢知廣東萬州有 旨改霸州以經理城工仍畱清苑時有  
部胥持僞劄馳傳者察其奸詰問具服奏上 天子鑒其才調易

州知州二十三年擢知宣化府旋丁母憂歸治喪畢時 上方西  
巡五臺南巡江浙畿輔當其衝自宮館驛傳車馬芻牧諸役悉倚  
府縣官以辦主者或非其人往往藉端侵漁爲民厲於是諸大吏  
念公老成可專屬遂奏起公統理諸務事集而民不擾二十七年  
服闋補廣平府又調天津府時方 命大臣會勘津門五閘及永  
定子牙兩淀之宜疏築者使者多咨公以決是年調保定府三十  
年晉清河道三十三年晉直隸按察使明年晉布政使三十六年  
駕東巡授山東巡撫仍往來直隸會勘水利未半載卽有總督  
直隸之 命三十九年八月山東白蓮賊王倫等作亂破壽張堂  
邑陽穀犯東昌及臨清嘯聚頗眾奪糧艘爲浮橋渡臨清運河掠

西岸 上以畿南地界臨清 敕公督兵扼守要害公馳至故城  
令真定總兵萬朝興中軍副將瑪爾清阿集兵千二百人駐臨清  
西岸遏賊衝會大學士舒公率禁旅自德州至夏津而山東河南  
兵由東昌館陶扼西南要路期九月乙亥三路會剿先二日癸酉  
賊三千餘人渡西岸犯我師瑪爾清阿擊敗之賊潰已復合既而  
大敗明日我師奪浮橋賊退保臨清舊城會兩路兵亦至公令萬  
朝興分兵渡河合搆賊巢庚辰王倫自焚死賊黨悉伏誅他被獲  
者分別輕重以次奏讞事畢乃還明年七十生辰 召至京 御  
書扁額及冠服朝珠上方珍物以賜並令紫禁城騎馬實異數也  
四十二年春奉 命督造 孝聖皇太后山陵於易州五閭月而

竣公爲治不務揅切舉大體而已遇寮屬泛愛而兼容其廉能之吏亦未嘗不加褒異故前後諸公或以偏私失眾譽而公獨號爲有長者行也四十四年春以讞并陘獄有所瞻徇奉 旨解任監修正定隆興寺寺成擢左副都御史仍署直隸總督明年遷兵部左侍郎九月晉工部尙書尋引疾乞休既抵家詣錢塘謁祖墓爲西湖之游而月乃歸其卒也以乾隆四十七年十月五日年七十有七配費夫人繼配姚夫人又許夫人俱 封一品夫人長子達士國學生先卒次子升士候選主事女五人長適太學生丁日濳次適潯州府經歷陳墉次適內閣中書閔思毅次適刑部主事陳山琨次未字孫一霞銘曰

名臣良顯早歲蜚聲吳山嶽嶼越水滄泓百里牽絲馳驅王事勤  
敏有功日隆厥施 帝嘉乃勞旬宣是庸節旄爰授海岱風從誰  
克保釐寶唯陳畢匪競匪絀邦用甯謐烽煙乍警載旆南征翩僊  
羽扇指顧功成旋晉司空載歌湛露曲莫承 恩履殞琛賂每懷  
一飯敢戀粉榆引年自古竟作歸園潞水洋洋扁舟南指故友郊  
迎一握有喜西湖咫尺載省松楸優游風日樂此林邱曾不百年  
奄歸蒿里回首華堂翩然脫躡遺章入告 帝念舊勳焚黃致奠  
澤被江濱江水滌洄式瞻新壟膺膺原田佳城高聳撫存念逝勒  
此銘詞貽爾子孫勿替引之

右墓誌銘彭啟豐撰



三十一

三

喀爾阿

喀爾阿納喇氏滿洲鑲藍旗人父奇善襲其祖喀山所遺一等男爵喀爾阿由二品廕生乾隆四年引見奉旨以主事用十年補刑部主事十九年遷員外郎二十三年擢正黃旗滿洲副都統三十一年授山西布政使三十二年諭來京署刑部侍郎三十年命往湖北審革職通判金文鎔控茶陵新修隄工與報部冊不符擬文鎔戍是年承襲一等男世爵三十四年正月擢雲南巡撫六月調河南巡撫未離任奏浪穹縣武生丁元甲傳播違悖經卷經知縣歐陽照盤獲詳報審明擬罪如律得旨嘉獎時大軍征緬甸七月奏滇省常平倉撥運軍糧動缺倉穀前撫臣明德

奏照時價買補兵米亦應一體採買又祿豐尋甸等三十三州縣額徵米五萬二千餘石題定每石折銀一兩充餉見在倉項缺額應令仍輸本色得 旨允行八月 命仍留雲南巡撫任旋因征兵戕傷民夫問擬經縱傳 旨申飭是月劾呈貢縣知縣楊家駒藉承辦軍需串通教諭沈錫設局科派請革審 諭曰楊家駒承辦軍需事件竟敢藉端派民恣意牟利貪黷不法實出情理之外滇省自征勦緬匪以來一切軍需事宜及軍行經過各省俱係動支正項絲毫不以累民或官給閒有不敷一經督撫入告無不立時增給俾得裕如並有督撫尙未陳奏朕偶爾念及特旨加增者復節次賞給每省銀數十萬兩務期踴躍趨事之良民均霑實惠

尙有不肖胥役或敢借名需索之事屢飭督撫實力稽查隨時參處毋使閭閻稍有滋擾諄切教誡不啻至再至三至於科派里下之事久經嚴禁且朕念切愛民惟恐一夫不得其所凡地方閒有水旱偏災應行賑卹者閱奏卽行發帑不稍稽遲亦從不少有靳惜而辦理軍需諸務雲南一省已撥給庫帑一千三百餘萬之多賞銀亦至三十萬州縣辦公儘有官項可動豈得藉口於無米之次肆行橫派乃楊家駒竟敢借軍需名色公然派及民間剋扣侵漁盈千累萬冀以飽其慾壑苟非喪盡天良何竟悍然不顧若此實爲國法所不可片刻姑容而教諭沈錕串通干預且有收受生童豆石之事情亦可惡楊家駒著革職擊問教諭沈錕亦著革職

交與彭資一面嚴審實情從重定擬速奏旋真楊家駒於法沈鐺  
擬絞監候十月調補貴州巡撫十二月會同欽差湖廣總督吳達  
善審辦威甯州知州劉標虧空銅本究出前撫方世儁良卿按察  
使高績等受賄實情各論罪如律又奏盤查司庫有良卿等長支  
養廉銀兩 諭曰據喀甯阿奏查司庫雜項銀內有前撫良卿長  
支本年冬季養廉銀九百九十兩係原任布政使張逢堯經放請  
將張逢堯交部嚴加議處其良卿預支銀兩並於張逢堯名下勒  
令追賠再張逢堯進京陛見亦曾支養廉銀九百三十餘兩見在  
移咨追解又良卿尙有預支三十五年春季養廉銀八百兩高績  
署布政使時長支養廉銀七百八十餘兩皆係高績經放請歸高

績名下著追等語各官養廉例應按季支放今黔省既有透支之事恐他省似此者亦所不免著傳諭各督撫藩司嗣後無論大小等官養廉一槩不准透支其藩司自支養廉並將支用日期報明督撫存案如有故違豫支者該督撫卽行參究追賠如督撫徇隱不奏自行濫支一經發覺將督撫藩司一併從重治罪至張逢堯身爲藩司乃於良卿豫支養廉徇隱透給且於起身時自豫借養廉更屬違法張逢堯著交部嚴加議處所有伊經放之良卿豫支養廉及伊借支養廉共一千二百餘兩均著落張逢堯名下十倍賠繳以示懲儆三十五年二月奏桐梓縣民趙式璧等因該縣知縣胡守業按糧派買協濟軍需馬匹疑官吏侵漁聚眾進城劈柳

釋犯臣見在星馳前往督緝奉 硃批恐非汝一人所能辦當同  
欽差等盡法處治其地方官辦理不善處於案結後一併嚴參治  
罪旋會同吳達善等獲犯置諸法三月 命來京候旨四月授刑  
部侍郎五月 諭曰昨召見喀甯阿詢及桐梓縣知縣胡守業辦  
理軍需據稱伊往桐梓查辦此案即將收支帳冊弔齊攜至省城  
而吳達善等奏參捏改帳冊之事適至若喀甯阿果攜冊而歸則  
該縣安得復有捏改之事因令軍機大臣詢問乃稱伊赴縣緝犯  
時諭令該府縣將歷年收支簿冊檢齊送省一併查辦等語是伊  
昨日所奏殊爲不實且喀甯阿既往該處查辦此案即應將收支  
各冊立時提取封固親攜稽覈其中情弊自可徹底清釐乃轉令

諺府縣檢齊送省是明子該縣以捏飾改造之隙全不曉事喀甯  
阿著交部嚴加議處部議革任 諭曰喀甯阿自擢用巡撫以來  
辦事時形竭蹶竟一無能爲之人因照部議革任但竟予罷斥轉  
得遂其安爾伊曾任刑部司員於刑名尙爲熟習著加恩以刑部  
員外郎用仍帶革職畱任四十二年擢刑部侍郎四十三年四月  
山東東阿縣監生曲九苞控知縣王冒護加倍收漕典史劉德寶  
於竊犯池周誣扳案受縣民白住賄始省釋命往鞠旋審明浮收  
無左證九苞坐誣德寶受賕屬實擬如律十一月 命往河南勸  
張九錫控河工州縣採辦工料派累勒措屬虛照全誣例擬罪四  
十四年三月偕尙書福隆安審辦直隸井陘縣知縣周尙親因公



苛斂擬尙親罪如律十月 命往浙江查審臨海縣監生陳世佐  
控縣差盧克光等藉差毆斃伊兄陳加明知縣鮑鳴鳳匿情捏報  
屬虛擬世佐誣告罪四十五年三月偕侍郎和珅往雲南查審雲  
貴總督李侍堯婪贓各款屬實擬罪如律四月授山西巡撫八月  
奏朔平府倉穀原爲供支右衛兵糧今該衛官兵裁減請將府倉  
穀六萬石撥歸所屬存貯下部議行九月奏山西籍之原任雲南  
巡撫裴宗錫應賠平糶多減價銀俟查明滇省虧空應賠數目再  
將家貲移抵經部駁 諭曰戶部奏駁喀爾阿請將原任巡撫裴  
宗錫應賠平糶多減價銀一萬六千六百餘兩俟查明滇省虧空  
應賠若干再將伊家貲一併覈明抵補之處未免遲逾請令先行

鑾繳一摺所奏甚是已依議行矣裴宗錫家產貲財從前降旨查明存記原爲抵補滇省虧空之用但其有無多少尙未查明卽果有虧空亦係裴宗錫分賠代賠之項至此案平糶多減銀兩則係裴宗錫本身應賠之項自應於封存家產內先將此項全數扣完其餘畱存候抵方爲正辦乃喀甯阿轉請俟滇省虧空查覆之日一併覈抵其意不過藉此緩爲扣追俾得多取租息此乃外官官相護之惡習喀甯阿甫經朕加恩復任巡撫尤不應出此著傳旨嚴行申飭十月奏參將德成監視武關箭靶任聽播鼓兵丁捏報通判高杞遣家人攔阻兵丁輒敢扭結誼鬧雖訊無受賄情弊請將該參將交部議處 諭曰所言未得真情已於摺內詳細批

示矣武闈外場較閱弓箭鼓手等虛搆捏報乃向有之事如此案  
果無別項情弊何以高杞令家人攔阻勿搆鼓手尙敢扭結誼鬧  
情節顯然況京師鄉會試朕特派王大臣監視稽查尙有鼓手受  
賄不法等弊豈外省轉無此事喀甯阿不應爲姑息之事若此著  
傳諭喀甯阿卽將此案嚴切審究務得實情以懲積弊旋審明武  
白劉際昌等賄囑情弊依例問擬四十六年二月丁父憂回旗守  
制閏五月 命在刑部額外侍郎上行走並 賞戴花翎九月四  
川民人楊春控河南南汝光道王麗前在伊兄四川灌縣知縣王  
宓任所經手運送軍米腳價侵吞累萬捐授道員維時楊春總領  
運戶有應領銀一千九百餘兩未給發 命馳往審辦旋奏覈對

奏銷冊王麗並無侵吞確據亦無短發楊春名下腳價銀兩楊春坐誣遣戍另審出王麗包辦夔州府運送卓克采軍米得銀五千兩擬覈職發軍臺效力四十七年正月都統明亮奏參烏魯木齊州縣捏報糧價以圖採買冒銷 命喀甯阿往查旋 諭曰昨以明亮查奏烏魯木齊採買糧石價值與時價不符顯有浮開冒銷情弊因令喀甯阿馳驛前往審辦此案係索諾穆策稜奎林任內之事奎林不過糊塗失於覺察且在任不久與該處州縣或不致有交通情弊至索諾穆策稜在任前後幾及十年前於經方案內既曾收受節禮該處地方官藉採買之名將價值以少報多希圖侵冒肥橐若非該管都統有收受餽送之事豈肯任其浮開冒銷

以致官價與時價迥不相符著傳諭喀甯阿到彼時卽將此旨告  
和明亮一面將各州縣解任嚴行鞫訊究出實情毋得稍存將就  
瞻徇之見五月奏烏魯木齊自三十八年至四十五年州縣承解  
採買不照市價報覈每石贓銀三四錢或至五六錢並訊出迪化  
州知州德平等餽送索諾穆策棱銀兩自一千至數千兩不等  
諭逮索諾穆策棱解交刑部治罪九月關浙總督陳輝祖查抄前  
任巡撫王爾望貲財抽換抵兌經藩司盛任奏參 命同大學士  
阿桂往審得實擬罪如律是月擢刑部尙書四十八年十一月尙  
書福隆安家人富禮善責夫役張二致死賄囑趙文達頂兇刑部  
不能究出實情奉 旨降三品頂帶仍帶革職畱任四十九年九

月賞復五十年正月與千叟宴四月工部員外郎海昇毆妻吳雅  
氏致斃裝點自縊刑部檢驗不實復降四品頂帶五十一年九月  
賞復五十三年二月 命紫禁城騎馬九月因病給假五十五年  
卒子查郎阿襲世爵任獨石口副將嘉慶五年卒查郎阿子景文  
襲

右 國史館本傳



沈德潛

沈德潛江南長洲人乾隆四年進士改庶吉士七年授編修八年遷左中允累遷侍讀左庶子侍講學士充日講起居注官九年充湖北鄉試正考官遷少詹事十年晉詹事充武會試副考官十一年三月授內閣學士八月請假歸葬得旨不必開缺御製詩賜之曰我愛德潛德潛風挹古初從來稱晚達差未負耽書方藉通元筆胡懸孟章車其如感風木暫許返林閩南國欣歸陸東門漫擬疏江鄉春意懶能不憶金除命給德潛三代封典十月諭曰朕向畱心詩賦不過幾餘遺興偶命屬和其中才學充裕如沈德潛等間或一加超擢而躁進之徒競思進獻若借此可爲梯



榮捷徑不知沈德潛優升閣學朕原因其爲人誠實謹厚且憐其  
晚遇是以稠疊加恩以勵老成積學之士初不因進詩優擢雕章  
琢句專事浮華此風一熾必有藉手捉刀希圖僥倖者傳諭知之  
十二年四月 命在上書房行走六月假滿赴職 賜詩曰朋友  
重唯諾況在君臣閒我命德潛來豈宜遽引年瀧岡表阡罷白駒  
來賁然卽此至性旰令我愈以憐畫錦非所誇孝烏或致焉席前  
陳民瘼不負予諮延兒輩粗知書善爲道孔顏尋擢禮部侍郎十  
三年充會試副考官尋 諭曰沈德潛年力就衰著以原銜食俸  
在上書房行走十四年 詔原品休致 賜人淺官帛 命有所  
著作許寄京呈覽尋進所著歸愚集 上南巡 諭在籍食俸

賜詩曰水碧山明吳下春三年契闊喜相親玉皇案吏今詞客天子門生更故人別後詩裁經細檢當前民瘼聽頻陳老來底越精神健劫外胎禽雪裏筠是冬以祝 皇太后六旬萬壽詣京十七年正月回籍十月進所撰西湖志纂二十二年 上南巡加禮部尙書銜疊前韻 賜詩曰前席何曾隔六春三千里不閒疏親星垣帝友豈無友吳下詩人尙有人咨度瘼情期達隱平量句意欲肱陳步趨望九雖稱健靈壽聽教手握筠二十六年詣京祝 皇太后七旬萬壽 上命集在朝諸王文武及致仕大臣年七十以上者爲九老凡三班並繪圖德潛列致仕九老之首時德潛進所撰選刻 國朝詩別裁集請 御製序文 上以德潛選次未當

命儒臣重爲精校去畱 賜之序曰沈德潛選國朝人詩而求  
序以光其集德潛老矣且以詩文受特達之知所請宜無不允因  
進其書而粗觀之列前茅者則錢謙益諸人也不求朕序朕可以不問既求朕序則千秋之公論繫焉是不可以不辨夫居本朝而  
妄思前明者亂民也有國法存焉至身爲明朝達官而甘心復事  
本朝者雖一時權宜草昧締構所不廢要知其人則非人類也其  
詩自在聽之可也選以冠本朝諸人則不可在德潛則尤不可且  
詩者何忠孝而已耳離忠孝而言詩吾不知其爲詩也謙益諸人  
爲忠乎爲孝乎德潛宜深知此義今之所選非其宿昔言詩之道  
也豈其老而耄荒乎又不克家門下士依草附木者流無達大義

具巨眼人捉刀所爲德潛不及細檢乎此書出則德潛一生讀書之名壞朕方爲德潛惜之何能阿所好而爲之序又戴名世者皇考所謂名教罪人是更不宜入選而慎郡王則朕之叔父也雖諸王自奏及朝廷章疏署名此乃國家典制然平時朕尙不忍名之德潛本朝臣子豈宜直書其名至於世次前後倒置者益不可枚舉因命內廷翰林爲之精校去畱俾重鋟版以行於世所以栽培成就德潛也所以終從德潛之請而爲之序也十月 諭曰今年恭逢 聖母皇太后七旬大慶在籍諸臣來京叩祝具見惻忱獻歲之初朕恭奉安輿時巡南服諸臣甫及旋里復當出境迎鑾僕僕道途於林下高年諸多未便可諭諸臣今冬曾經赴闕者明

春無庸赴省候接在兩浙者不必至江南在江南者不必至東省  
如沈德潛卽於蘇州錢陳羣卽於嘉興餘均視此爲例副朕體恤  
至意二十七年 駕過常州德潛偕錢陳羣來 賜詩曰去歲入  
都祝 慈壽幡然九老頌林泉清詞還擅香山會葺事便教故里  
旋更慮遠迎塵跋涉所期重晤得流連論文兼及蒼生隱虛席誰  
嘗宣室前三十年 上南巡晉階太子太傅 賜其孫維熙爲舉  
人 賜詩曰吳中今古老人科比似徵明定若何書畫雖輸詩勝  
彼功名已過詩如他遊山有興仍清健處世無爭祇善和明說九  
旬有三歲那更年格尚嫌多三十二年 賜人淺三十三年亦如  
之三十四年八月 諭兩江總督高晉浙江巡撫承德前經降旨

將錢謙益之初學集嚴行查禁嗣據奏到陸續收繳銷燬因思沈德潛錢陳羣二人平素工於聲韻其收藏各家詩集必多在錢陳羣於錢謙益詩文似非其性之所近且久直內廷尙屬經事諒不至以應禁之書轉視爲可貴若沈德潛向曾以錢謙益詩選列國朝詩別裁集首經朕於序文內申明大義令其刪去但旣謬加獎許必於其詩多所珍惜或其門弟子狃於錮習尙欲奉爲瓣香妄以沈德潛齒宿德尊謂可隱爲庇護慫恿存畱亦未可定果爾豈沈德潛不知恩重不復望朕爲之慶百歲耶沈德潛錢陳羣自退居林下以來朕恩禮優渥所以體恤而矜全之者無所不至伊二人甯不感戴殊榮勉思仰副若其家尙有錢謙益初學有學等集

未經呈繳者卽速遵旨繳出與二人豪無干礙斷不必慮及前次  
收藏之非妄生疑畏豈朕成全兩人至此而委曲令其繳出轉從  
而加之罪責乎高晉永德將此旨密諭沈德潛錢陳羣知之九月  
德潛病卒高晉覆奏德潛家並無未繳錢謙益詩文集 諭曰沈  
德潛積學工詩書儒晚遇受朕特達之知嗣以年高引退特許歸  
里俾得頤養天和爲東南搢紳領袖前者屢次南巡見其精神強  
健疊沛恩施年來復時予存問方冀壽躋百齡益承優眷今聞溘  
逝深爲軫惜著加恩贈太子太師入祀鄉賢祠又 御製詩曰平  
生德弗愧潛修晚遇原承恩顧稠壽縱未能臻百歲詩當不朽照  
千秋飾終宣命加優典論定應知有獨畱吳下別來剛四載悵然

因以憶從頭 賜祭葬如例謚文愨四十三年江南東臺縣已故  
舉人徐述夔著一柱樓集詩詞悖逆經縣民首告集內載德潛爲  
述夔作傳下大學士九卿議請追奪德潛階銜祠謚撲其墓碑

諭曰沈德潛所作傳內稱其一柱樓編年詩已付梓並云品行文  
章皆可法是沈德潛於徐述夔悖逆不法詩句皆曾閱看並不切  
齒痛憾轉爲之記述流傳尙得謂有人心者乎沈德潛自中式進  
士及選入翰林時朕因其平日學問尙好格外施恩又念其畱心  
詩學且憐其晚成是以不數年間擢爲卿貳又令在上書房行走  
而伊自服官以來不過旅進旅退毫無建白並未爲國絲毫出力  
眾所共知及乞休後給尙書銜晉贈太子太傅並予在籍食俸恩



施至爲優渥沈德潛理宜飭躬安分謹慎自持乃竟敢視悖逆爲  
泛常爲之揄揚頌美實屬昧良負恩且伊爲徐述夔作傳自係貪  
圖潤筆爲囊橐計其卑污無恥尤爲玷辱指紳使其身尚在雖不  
至與徐述夔同科亦當重治其罪今伊業已身故不加深究然竟  
置而不論俾其身後仍得享受恩榮則凡在籍朝紳又將何所警  
惕乎著照所請行以昭炯戒四十四年 御製懷舊詩列德潛於  
五詞臣之末詩曰東南稱二老曰錢沈則繼並以受恩眷佳話藝  
林志而實有優劣沈躋錢爲粹錢已見前詠茲特言沈事其選國  
朝詩說項乖大義製序正厥失然亦無訶勵仍子飾終恩原無責  
備意昨秋徐案發潛乃爲傳記忘國庇逆臣其罪實不細用是追

前愿削奪從公議彼豈魏徵比撲碑復何日蓋因毫而荒未免圖  
小利設曰有心爲吾知其未必其子非己出絜袴甘廢棄孫至十  
一人而皆無書味天網有明報地下應深媿可惜徒工詩行闕信  
何濟

右 國史館本傳

乾隆三十四年秋九月丙戌太子太傅禮部尚書沈公卒於里第  
大吏疏以 聞 天子憫悼作詩諫之 詔贈太子太師入鄉賢  
祠與祭葬如禮謚曰文愨公晚達立 朝凡十年以樸謹清直當  
上意以詩受 上知嘗以詩集請 御敘 上欣然允其請親  
製敘畀焉先後 賜詩至四十餘篇 敕公賡和者多矣多至不

可勝數公之詩以忠孝爲本以溫柔敦厚爲教其中之所懷者未嘗不宣之於言其見諸言者未嘗不陳之於朝其素所畜積然也初公爲諸生時與吳中詩人結社城南城南人競稱公詩從橫山葉氏學葉數稱公詩新城王文簡公與葉善致書於葉亦稱公詩而桐城張公廷璐督學江南尤器公蓋公自爲諸生已有聲而詩名尤焯著云乾隆初舉博學宏詞 廷試被黜四年始舉於鄉年六十有六矣明年成進士選庶吉士七年四月 廷試 上願見公年老詢之知爲東南老名士也授編修旋 召至內閣給筆札 命和消暑詩十章詩成稱 旨自是後 上作詩多命公屬和八年累遷至侍讀學士兼日講起居注官明年六月晉少詹事

充湖北鄉試主考官又明年五月晉詹事 上召見與公論詩學  
原流升降因謂公曰張鵬翀才捷於汝風格顧不及汝鵬翀故以  
詩受知於 上者也又明年三月晉內閣學士時夫人俞卒於家  
公請假歸將行 上復召見公陳先人遺德乞 恩追封涕淚並  
下 上憐之卽 詔封其三世且 賜詩寵其行明年六月還  
朝授禮部侍郎入上書房輔諸 皇子十三年充會試總裁官先  
是京察時公自陳不職乞 賜罷舉齊公召南白代至是病墮  
上命解職以授齊公而公專理上書房事明年公年七十有七  
上憫公老 命得致仕俾杖屨 御製詩集卒事乃行 上謂廷  
臣曰煥與德潛以詩始以詩終矣嗚呼可不謂榮哉家居二十年

上常賜詩及諸藥物慰問頻數十六年 上南巡 命仍食侍  
郎俸二十二年又 南巡晉尙書銜三十年又 南巡加太子太  
傅食尙書俸嘗再入京祝 皇太后萬壽與香山九老會 上命  
工圖像親作歌以紀之公旣以詩受 上知其所奏進陳善納忠  
往往能繼古澗酌卷阿之作者其於閭閻息耗四方水旱歸本  
宸居責成牧守補救之實壹見於詩反復盡意不苟爲虛美 上  
嘗賜以詩曰嘉爾臨文不忘箴又曰當前民瘼聽頻陳世徒見  
上遇公之榮而不知公之所以被 上知者固有在矣其他奏對  
御前者人莫得聞其見於詩者如此公晚歲主紫陽書院以詩  
文導後進有一藝者必獎成之公性利厚與人交不爲町畦之行

不爲逆億與人語款款不爲塹隋之言然至老而不失所守平居著述甚富尤畢力於詩詩法盛唐尤以杜甫爲準的所選漢魏六朝唐明詩數十卷四方學者咸宗趨焉其自爲詩集三十卷古文集三十卷詩餘一卷俱刊版行於世而矢音集四卷 敕和之詩具載焉公諱德潛字確士其先祖諱長壽明初自吳興遷蘇州居竹墩傳十世至公會祖諱世烈國學生祖諱欽圻長洲學生能詩考諱鍾彥並 贈光祿大夫禮部尚書母褚氏 贈一品夫人妻俞氏 贈一品夫人子男一人種松國學生女二人長歸章樹印次歸計嘉穀孫男十一人維熙 恩賜舉人維燕維然維燾維杰維煦維魚維點維默維照維焄女六人公生於康熙十二年距卒

之年年九十有七將以今年十二月癸酉葬於元和姜邨祖墓先  
期種松命其子維熙走告啟豐曰願銘我先大夫啟豐少以父執  
事公嘗從公學詩願先公宦達謬以文學被主知乃不獲竭區  
區之忱如所以稱述公者每讀公詩未嘗不愧且歎也雖然銘公  
者非啟豐之責而誰責邪銘曰

詩以言志芽姚虞鼓之舞之八伯俱卿雲有爛光華舒周興雅頌  
文郁乎幽風流火昌王圖卷阿繼之一德孚更或作頌清風如周  
召吉甫先後符中心款款容瞿瞿離騷而降大道蕪天地不交德  
則孤空起哀怨誰陳謨我皇聖神文命敷出納五音政所需和  
聲鳴盛羣英趨唯公樸渚古爲徒以矢其音志不渝如谷應響

帝曰愈十年侍從飄白鬢幡然攜杖投林間時侶耕牧諧樵漁值我歸老陪坐隅商山洛社相嬉娛乘雲超忽凌清都蔚然詩教千秋模我銘斯墓良非諛後有作者其嗣諸

右墓誌銘彭啟豐撰

乾隆三十四年九月七日禮部尙書太子太傅沈文愨公薨於家余三科同年也故其子種松來乞銘余按其狀而不覺嗚咽流涕曰詩人遭際至於如此盛矣哉古未嘗有也在昔卿雲庶歌則有八伯喜起廣歌則有皋陶卷阿矢音則有召公其人皆公侯世卿非籍詩進者唐人或以單詞短句受知而目色偶及恩眷已終卽晚遇如伏生桓榮亦不過蒲輪一徵几杖一設而其他無聞焉惟



公以白髮一諸生受 聖人知三十年位極公孤家餐度支遠封  
榮祖近蔭貴孫薨後 皇情紆眷賜謚賜祭賜葬賜誅贈太子太  
師崇祀鄉賢嗚呼如公者古何人哉古何人哉然而皆天也非人  
也公諱德潛字確士自號歸愚吳郡長洲人弱冠補博士弟子丙  
辰薦博學鴻詞 廷試報罷戊午舉於鄉己未登進士入翰林王  
戎春與枚同試殿上日未昃兩黃門捲簾 上出賜諸臣坐問誰  
是沈德潛公跪奏臣是也文成乎曰未也 上笑曰汝江南老名  
士而亦遲遲耶其時在廷諸臣俱知公之簡在 帝心矣越翌日  
授編修屢和 上詩稱旨遷左中允少詹事典試湖北歸 召入  
上書房再遷禮部侍郎校戊辰天下貢士公自知年衰薦齊召南

自代而已請老 上許之命校 御製詩畢乃行 上賦詩以賜  
曰朕與德潛可謂以詩始以詩終矣歸後眷益隆三至京師祝  
皇太后 皇上萬壽入九老會圖形內府而 皇上亦四巡江南  
望見公 天顏先喜每一晝接必加一官賜一詩嗟乎海內儒臣  
耆士窮年兀兀得 朝廷片語存問覺隆天重地而公受 聖主  
賜詩至四十餘首其他酬和往來者中使肩項相望不可數紀嘗  
進詩集求序 上欣然許之於小除夕坤甯宮手書以賜比以李  
杜高王海外日本琉球諸國走驛券索沈尙書詩集盛矣哉古未  
嘗有也然公逡巡恬淡不矜驕不干進不趨風旨下直蕭然繩屣  
卓綈如訓蒙叟或奏民間疾苦流涕言之或薦人才某某展意無

所依回或借詩箴規吁堯咈舜務達其誠乃已諸大臣皆色然駭而  
上以此愈重公公既老所選詩或不能手定庚辰進本朝  
詩選體例舛午上不悅命廷臣改正付刊而待公如初此雖  
皇上優老臣赦小過使人感泣而亦見公之樸忠有以格天之  
深也公嘗訓孫惟熙曰汝未冠蒙皇上欽賜舉人亦知而翁十  
七次鄉試不第乎公鄉舉時已六十有六其時雖觴夢想必不  
自意日後恩榮至此而從來人主之權能與人爵未必能與人壽  
儻皇上雖有恩施而公不能引其年以待之則亦帝力於公何  
有矣觀公之九十七歲方薨然後知蒼蒼者有意鍾美於公以昌  
萬古詩人之局而皇上與天合德先天而天不違公之年與恩

俱亦有莫之爲而爲者嗚呼此豈人力也哉公醇古淡泊清臞蘊  
立居恆恂恂如不能言而微詞雋永無賢不肖皆和顏接之有譏  
其門牆不峻者夷然不以爲意詩專主唐音以溫柔爲教如絃匏  
笙簧皆正聲也所著古文詩各三十卷詩餘一卷先娶俞氏後朱  
氏均 贈夫人以庚寅二月二日葬元和之姜村里銘曰

古松得天讓萬木先雖槁暴於前而償以後澤之緜緜則較夫早  
達者轉覺羸焉潘潘沈公杖朝而走 帝曰懋哉朕知卿久朕有  
文章待卿可否殿上君臣詩中僚友公拜稽首老淚浪浪從古傳  
人半仗君王蒙 陛下將臣置日月旁以星雲色爲名姓光生論  
定矣死何勿彰吁嗟乎宮爲君商爲臣宮商應聲先生之詩之神

右神道碑袁枚撰

沈德潛字確士長洲人晚取韓子歸愚識夷塗之語以名其齋又自署歸愚老人云少聰穎讀書等身爲諸生自康熙癸酉科卽入鎖闈連十九試不售至乾隆戊午科年七十始登賢書己未成進士入史館不十年洊升至內閣學士禮部侍郎歸愚積學工古文詞跌宕夷猶謹守堯峯家法無敢逸出範圍其於詩學尤邃是時江南盛詩社又宗尙蘇陸之學硬語麤詞荆榛塞路歸愚獨斤斤然古體必宗漢魏近體必宗盛唐元和以下視爲別派所選有古詩源唐明詩別裁行世橫截眾流獨標心印誠談藝家之金丹大藥也歸愚旣晚達獨以文字結主知膺殊獎時天子天縱

多能方隆文治喜與詞臣輩廢唱迭和惟學士張南華能當上  
意而歸愚亞焉顧南華賦才敏瞻走筆如飛日可賦詩百首歸愚  
則含毫邈然安章頓句遲久成篇兩人者嘗結詩社南華詩點筆  
就而歸愚苦吟未安滋愧惡南華曰遲速本之性生子不能效我  
速我亦不能爲子遲也一日 召對便殿語及詩學 上顧德潛  
謂曰爾詩以風格勝然不如張鵬翀敏捷咨歎久之兩人造詣在  
聖人品藻中矣歸愚於己已歲致政家居年八十有二矣聞至今  
尚健在云

右小傳鄭方坤撰

康熙三十三年甲戌年二十二學院試取爲長洲博士弟子員雍

正十二年甲寅年六十二時 詔舉博學鴻詞督撫學三院考試  
取六十子第三十三年乙卯年六十三四月入都八月應北闈試  
不遇乾隆元年丙辰年六十四八月應北闈試不遇九月 御試  
保和殿子失寫題中字不合格不遇歸三年戊午年六十六八月  
省試九月榜發中第二名四年己未年六十七二月應春官試中  
六十五名殿試二甲 欽點庶吉士十一月乞假歸里七年壬戌  
年七十四月散館德潛名第四畱館六月輪班引 見 上諭張  
中堂云沈德潛係老名士有詩名命和消夏十詠八年癸亥年七  
十一三月 御試翰詹諸臣德潛二等第五九月晉侍講學士九  
年甲子年七十二六月 欽點湖北正主考十一年丙寅年七十

四七月夜夢俞淑人醒而成詩有三年我未看瓜苦四紀君惟廢  
薺甘抱病但聞辭藥石益粒始得易衣舊句進 呈新詩此詩未  
刪 上見之 御門曰 上謂汝既悼亡何不歸家料理感 上  
恩諭卽進摺假歸 陸辭曰 賜五言八韻起二語云我愛德潛  
德潛風挹古初錢司寇香樹贈詩云 帝愛德潛德我羨歸愚歸  
尤藝林傳誦也十一月到家十二年丁卯年七十五四月啟行入  
都六月 陸見 皇上云汝滿假卽來可云急公今命汝入上書  
房輔導諸皇子授汝禮部侍郎 皇上憫德潛年老 諭云汝天  
明始來午時二刻卽出以身教不專以言教也十三年戊辰年七  
十六三月 欽點會試總裁六月 上成悼 孝賢皇后詩 命



南書房諸臣與德潛同和有兒字亡字二韻難於措辭子慶和云普天俱灑淚老耄似童兒海外三山香宮中一鑑亡 命卽寫卷後傳觀眾臣示安適也十四年己巳年七十七患噎未愈 上命大司馬梁詩正傳旨沈德潛不必到上書房許其歸里享林泉之樂朕與之以詩始亦以詩終令其校閱詩彙校畢起行梁公捧御製十二本到德潛處奉 旨後逐日恭閱閱過四本先繳進上召見云汝所改幾處俱依汝唯大鐘歌中云道衍儼被榮將命汝改榮國因道衍封榮國公也榮將本黃帝時鑄鐘人汝偶然誤會然古書讀不盡有我知汝不知者亦有汝知我不知者餘八本盡心校勘不必依回旋出 賜臣五言長律一首起云清時舊

塞士吳下老詩翁結云近彙經商推相知見始終 皇上沖然若  
谷之懷古帝王所未有也恭閱畢繳進 上後召見云我一見汝  
便知好人汝回去與鄉鄰講說孝弟忠信便是汝之報國又云賜  
汝扁額原是詩壇耆宿旣而改耆碩見年老之人堅固自守同於  
碩果不食以後更發榮滋長也明日恭進四詩 陛辭良久內侍  
捧出扁額一 御畫一緞綾各四匹人蔴二斤治墮丸十六最後  
又傳出 御製用陸辭韻四律首章落句云高尚特教還故國清  
標終惜去朝班次章落句云爾自一舟歸浩蕩望窮潞水暮川虛  
三章中云笑予結習多難遣嘉汝臨文不忘箴四章中云儘有煙  
霞爲供養正賒歲月入謳歌 君恩優渥幾於略分在旁觀亦皆

獻歡感歎也六月歸里十六年辛未年七十九二月接 駕於清  
江 召見於武帳中次日 賜七言詩一首中云玉皇案吏今煙  
客天子門生更故人別後詩裁經細檢當前民瘼聽頻陳第四語  
緣昨陳奏民間疾苦也十月啟行往祝 聖母六旬萬壽十一月  
到京隨羣臣朝賀十二月二十五日 上召入內廷 命觀歸愚  
詩序文中稱歸愚叟並云他日見訪山居卽以爲愚公谷也等語  
從古無君序臣詩者傳之史冊後人猶歎羨矣二十二年丁丑年  
八十五二月迎 駕召見於武帳中 賜詩一幅有星垣帝友豈  
無友吳下詩人尙有人句有 旨加禮部尙書職銜以示眷念老  
臣之意二十七年壬午年九十二月同錢尙書陳羣舟行迎 駕

常州白家橋 召見御舟 賜坐體郵備至翌日 賜九裘詩仙  
扁額又詩二律其一與錢尚書同 賜者起云二老江浙之大老  
新從九老會中回 天恩優渥不敢當也隨 鑿至浙是役也其  
和 御製一十八章 恩禮稠疊不可枚舉

右沈文憲公自訂年譜張維屏錄

歸愚尚書歸老山林主盟風雅十餘年間四方人士望走其門天  
下以爲鉅人長德景星慶雲相傳爲諸生時館於木瀆生徒散後  
輒吟唔至夜分主人有一婢年及笄矣所居與尚書比屋紡車之  
聲時或申旦人問之曰聽沈老相公讀詩令人忘倦不知其夜深  
也主人母戲謂若重沈相公盍嫁之乎他日其家將贖歸字人女

涕泣不欲往問之曰主人有言我心諾之不可更也主人奇之以告尚書尚書自顧甚老且力不能量珠以聘口謝之而心不能無知己之感也主人知其意竟以爲贈踰年舉於鄉夫人旋卒尚書名位日起引年還里門生座客時奉觴詩如夫人前尚書嘗赴宴集酒半奚奴持一襪至傳夫人語曰天寒衣得毋薄乎雖雅不畏寒必爲加一衣當時以爲美談比於子京半臂嗟乎當尚書未顯時荒江破屋間一老秀才耳青衣何人乃能識於塵埃中其可傳也已

右靈芬館詩話郭麐撰

文愨公爲諸生時久困場屋省試十七上不第薦舉鴻博年已六

十有四 廷試報罷驅車南旋同徵諸公皆賦詩送之或恐不及再見旋以戊午舉於鄉己未登進士入翰林數年閒驟遷禮部侍郎年七十八致仕歸 高宗皇帝賦詩以寵其行歸後眷益隆位極公孤家餐度支加一官必 賜一詩優游林下者復二十年詩人遭際之盛與得天之厚古所未有也

有鶴徵後錄李富孫撰

先生少從學於吳江葉星期葉居橫山故阮亭尙書云橫山門下尙有詩人然先生獨綜今古無藉而成本源漢魏效法盛唐先宗老杜次及昌黎義山東坡遺山下至青邱崆峒大復卧子阮亭皆能兼綜條貫嘗自進其全集 御製敍言以高王爲比誠定論也

國朝詩集卷之十四  
所選別裁諸集匯千古之風騷聚一時之壇坫年至九十八而終  
蓋得於天者厚矣

右湖海詩傳張維屏錄

沈歸愚尚書晚年受 上知遇之隆從古詩人所未有作秀才時  
七夕悼亡云但有生離無死別果然天上勝人間落第詠昭君云  
無金贈延壽妾自誤平生深婉有味皆集中最出色詩六十七歲  
與余同入詞林其紀 恩詩云許隨香案稱仙吏望見紅雲識  
聖人

右隨園詩話袁枚撰

高宗嘗於南邦黎獻集中見沈公德潛詩賞之乾隆丙寅公請假

歸葬 命給三代封誥 賜五律一章題云沈德潛爲父請封陳  
親遺訓聲淚俱下此所謂終身之慕乎詩有云奚用悲寥落因知  
遂顯揚更 賜詩寵行丁卯還 朝己巳 予告庚午公遊黃山  
天台謁禹陵奉 賜詩有云爲語餘年須愛護來春吳會共論文  
蓋預定南巡期約也明年公主講紫陽書院二月迎 駕清江浦  
溫諭詢吳民疾苦 賜緞帛淺貂尋扈蹕西湖 賜道存風雅  
額 幸金山時又 賜和山居雜興十章又 賜題紫陽書院詩  
公進恭和 御製詩一百四章是冬以祝 皇太后萬壽入都  
召見 賜坐明日 召入南書房 命題韓滉七才子圖又題  
御書無逸篇後又題 御畫古幹梅 賜貂裘及德藝清標額公



進詩集求 賜序 上欣然許之序略曰德潛之詩遠陶鑄乎李杜而近伯仲乎高王矣乃獨取義於昌黎歸愚之云者則所謂去華就實君子之道也昌黎因文見道始有是語而歸愚叟乃能深契於此識夷守約斂藻就澹是則李杜高王所未言而有合於夫子教人學詩之義也夫非常之人然後有非常之遇德潛受非常之知而其詩亦今世之非常者故以非常之例序之異日者江國行春靈巖駐蹕思欲清問民艱暇咨新什將訪歸愚叟於愚公溪谷間矣高王蓋指青邱漁洋謂公詩有過之無不及也壬申正月

上召賦雪獅聯句詩小宴 重華宮 賜詩 命和又 賜御書鶴性松身堂額及藏佛一尊冠服六種蓋爲公八十稱壽也翌

日陳謝 上與論人臣體用公奏體用兼備如姚宋韓范諸臣可  
以維持宗社有體無用猶不失爲正人特不堪重寄耳若無體而  
妄談作用必僨事 上然之南歸 賜詩送行及送費銀二百兩  
尋進西湖志纂 上題三絕句代序癸未 上和公攝山詩十二  
章 御書長卷以賜海外諸國爭走重金購公詩集日本臣高彝  
寄書千餘言溯詩學源流詆錢牧齋持論不公而以公所論爲中  
正贈詩四章願附弟子列公拒之蓋法文衡山不以書畫予遺夷  
意也

右事略李元度撰

乾隆壬戌六月沈宗伯德潛引 見奏對畢 上命和消夏十韻

餘願和者亦和於內閣分給筆札 賜飲及餅餌瓜果自午至未  
成詩六章有 旨嘉獎後乞假省墓 詔贈其先人如其官並  
賜詩褒之云清朝舊名士吳下老詩翁向每誦新句猶然見古風  
同官皆謹依此二十字爲韻做賀知章還四明例贈行焉

右記余金撰

歸愚尙書主吳下壇坫時門下士王光祿鳴盛錢詹事大昕王少  
寇昶曹侍講仁虎趙少卿文哲吳舍人泰來黃明府文蓮彙刻吳  
中七子詩以文章氣節重天下談宗派者至今稱頌康祺以爲就  
今日論之師徒著述強半流傳二王錢曹諸公其才學實出歸愚  
上而在當時則陶成獎借尙書未必無功世之身負達尊有氣力

足以庇士者其亦畱心雅道收桃李門牆之效哉

成就人才挽回世運是當今第

一事業一命已上均存此責但爲史書附傳學業淵源起見猶淺論也

右紀聞陳康祺撰

<p>國朝詩林卷之四</p>	<p>五言古詩</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>
<p>五言律詩</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>
<p>五言絕句</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>
<p>五言排律</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>
<p>五言雜詩</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>	<p>送友人</p>

國朝詩林卷之四

三

國朝音獻類徵初編卷八十五目錄

卿貳四十五

涂逢震

裘日修

史奕昂

補錄

涂逢震

姓名ノ一ヨ

國朝耆獻類徵初編卷八十五

通奉大夫前署江西巡撫江西布政使司布政使湘陰李桓輯  
卿貳四十五

涂逢震

公諱逢震字京伯號石溪爲璋公季子生具夙慧常目注日光不  
眩三齡能預知鄰家火災強母去得免又於黑夜中叱穿窬人爭  
竒之旣長能文章補博士弟子員璋公歷任清河項城兩縣公隨  
侍佐理凡田渠風俗教養利弊皆能代親體察區畫有佳公子之  
目公母孳蒸人卒於項城署公獨奉諱歸哀毀骨立鄉里稱之及  
璋公自清河解組歸家餘四壁公曲盡孝養時祖櫬在堂暴水至



公助父繫棺樓棟哭三日水退追父歿公營白馬岡舉母柩合窆之葬之日術者謂不利於公請少避公不許負土成墳竟無恙人以公至性爲不可及云雍正癸卯公舉於鄉官中書舍人佐軍機事當西師時公夙夜在公有能名乾隆己未以官滿當出而佐郡既成進士遂以一甲第二人及第爲國朝本省登鼎甲者始未散館卽受上知充宣諭化導使歷江蘇淮陽等郡所至民情帖服父老婦孺輒歡迎馬首薄俗爲之感革者皆駸駸入於孝弟而公砥礪約束杜絕饋遺更能體察時政與大吏商榷廢舉人以公誠謹弗嫌也將復命授中允旋遷侍讀晉學士充講官入直上書房再擢內閣學士晉工部左侍郎計兩載以編修而陟卿貳中閒

賜宴聯句 頒賚稠疊 恩寵優隆無有過之者蓋公旣授經  
鶴禁而於工部事務三年中益詳審釐剔於工程開銷積案爲之  
蕩刷一清又條注則例應准若干使胥吏不能往返駁詰陰行其  
奸直省以工代賑原以救饑而事後覈減過半追補芻如公謂此  
由始事之時奸吏覆藏不發致貽後累乃爲申明定例先行咨會  
斯事後免追償之擾而 國帑亦無耗費之虞公私稱便焉戊辰  
夏公旣罷官杜門寂處一編相對亦恬淡安於性生耳明年補光  
祿少卿歷太常少卿洊通政副使公每履一任則同官倚以集事  
以公老成持重故皆深信弗疑公性厭治生產家遺薄田五十畝  
讓於伯兄逢乾公久之嚮且盡甲戌逢乾公年七十公遣迎相聚

抵天津歿公感慟無以慰竭力殞殮歸其櫬而仕宦之心茫然廢矣戊寅冬乞假回籍貧不能挾家去乃攜子廷元先行明年上已抵吳門晨起登虎邱購簾杖折玉蘭一枝步歸舟中客方飯公以倦入寢所假寐移時遂歿公生於康熙某年月日壽若干歲葬某處配李恭人爲吉水副貢生李景道女子一廷元娶李氏吏科給事中臨川李友棠女女一配丁丑進士熊之福爲浙江巡撫熊學鵬子公官歷十階辛酉湖南考官壬戌會試同考官乙丑武會試考官甲戌會試校閱落卷官一充江南宣諭化導使一充陝西祭告香帛使一充河南祭告香帛使扈從 東陵者一扈從熱河者二公嗜法書工染翰平生不欺人與人交淡以長立朝無所阿附

惟循理敬事人咸指目之爲君子云

右傳蔣士銓撰

乾隆間南昌涂侍郎逢震以一甲第二人及第由編修充宣諭化  
導使未散館授中允歷侍讀署學士充講官直上齋擢內閣學  
士升工部侍郎自釋褐至卿貳才兩載耳儒臣遭遇之隆莫與爲  
比蔣心餘太史作公墓誌稱其生有異稟內行純密通達政體曲  
盡人情先朝不次之恩有自來矣

右紀聞陳康祺撰

國朝子月與有不第

卷之十三

三

裴曰修

裴曰修江西新建人乾隆四年進士改庶吉士散館授編修八年  
擢侍讀學士充日講起居注官九年遷少詹事十二月充湖北鄉  
試正考官十三年遷詹事十四年四月 命祭告南鎮會稽山十  
一月 命南書房行走十五年六月充浙江鄉試正考官十月遷  
內閣學士十六年八月遷兵部右侍郎十二月充江南鄉試正考  
官十七年署吏部右侍郎十八年六月充浙江鄉試正考官九月  
調吏部右侍郎十月署戶部侍郎十一月充經筵講官尋充會典  
館副總裁十九年三月以察議侍郎張泰開保舉瞻徇事不實部  
議革職奉 旨從寬畱任十月調戶部右侍郎先是胡中藻逆詩

案發供天津道張紹渠之弟紹衡曾述曰修言堅磨生集已有人  
進呈 上面詢曰修並無此語 命提拏張紹衡質訊嗣紹衡供  
此語得自裘曰修屬實曰修執奏如前二十年五月 諭曰此事  
面質對其言出自裘曰修已無疑義若謂裘曰修有意通信何  
難密札胡中藻令其并行銷燬滅跡而乃假諸張紹衡之口此固  
不然但從前查辦胡中藻詩集朕原特交蔣溥密辦事閱數年裘  
曰修同事內廷偶爾閒談亦情理所有而張紹衡向胡中藻說及  
原在未經發覺之前俱出無心於胡中藻本案初無關涉自可無  
庸辦理乃裘曰修面承詢問堅執以爲並無此言是以將張紹衡  
提拏質對俾此事水落石出而裘曰修以業經諱飾於前因卽遂

非於後今既供證確鑿則表曰修面欺之罪實無可追著交部嚴  
察議奏六月議革職尋 命授右中允十一月遷侍講十二月授  
吏部右侍郎二十一年二月充經筵講官四月軍機處行走七月  
以宣化莊頭吳士望控生員孫禮等墾荒斷渠 命曰修借總管  
內務府大臣德保往勘所墾地與渠水並無礙飭令分墾毋牽混  
九月 恩賞戶部飯銀每年五百兩 命赴巴里坤辦理軍務十  
二月奏言肅州備用之馬多多益善此次解送五千匹若不敷用  
西安滿洲營可得千餘綠營可得三千臣已屬巡撫盧焯預備俟  
臣抵肅商之督臣黃廷桂如有調撥卽行文令續解可應時無誤  
又西安見運米送巴里坤若令晉省解肅之駝帶運亦可稍減腳



費得 旨允行二十二年正月奏言西陲地廣回民不下數十部落而厄魯特人介處其中當策妄阿喇布坦時恣殺掠回民切齒已久是以從前我師所至輒爭先效順此次進剿厄魯特必竄逸或闌入回地臣聞伯克額敏和卓爲回部知名之人受 恩最重請頒 敕令彼宣諭諸回部以我兵所誅惟厄魯特且爲回部除害若有竄入境者能擒而殺之一體賞賚勿被煽生疑懼 諭曰大凡此等外夷我力勝則彼不招而自來若我力竭雖詳諭百端彼之觀望自若卿所言雖亦一策徐徐度之可耳五月裘曰修還京 命往山東南上江會勘水道疏濬事宜 諭曰朕此次南巡親蒞河工相度險要指授在工諸臣並特派侍郎夢麟會同總

河白鍾山疏荆山橋一帶總河張師載巡撫高晉協辦徐州府黃  
河兩岸隄工其徐州護城石工則委之副都御史德爾敏下河諸  
工則委之副總河嵇璜六塘河以下各工復委之侍郎夢麟分任  
責成各有專屬凡以爲積歲被災羣黎籌宣洩之方捍禦之策者  
宵旰靡甯冀收實濟業經屢頒明旨矣近據山東巡撫鶴年奏報  
山東之金鄉魚臺等州縣未涸地畝尙有一千餘莊因思此方積  
潦再經伏雨秋霖將益苦汎濫而上江之宿虹靈璧等處河南之  
永城夏邑等處在在皆有積水計漫溢地界不下數百里此其受  
病非一朝一夕驟至蔓延蓋其始皆由於地方官漫不經心偶遇  
水災不急爲籌度日復一日因循釀害積水日益增淹地日益廣

國朝書牘卷之三十一  
一  
以至高下田廬盡成巨浸及至受害既深自非大動帑項厚資工  
力不能奏效而大小各官又莫能深悉受害之由確得祛患之術  
惟恐議疏議築虧帑貽累遂爾噤口束手坐視其民爲魚而莫展  
一籌見今水患已不可勝言若不及時澈底籌辦將來其何所底  
止耶此亦朕南巡未了之事著侍郎裘日修馳驛前往山東河南  
上江見在積水各州縣往來周視寬以時日熟察情形咨詢輿論  
勿憚再三其在山東者與鶴年會商在河南者與圖爾炳阿會商  
在上江者與高晉會商其地方官有熟習水道之員聽其酌量差  
委務在通盤籌畫無分疆域凡可以登民衽席計安全而謀樂利  
者果歸實用毋惜多費帑金朕痾瘝一體南顧疇咨輟轉憂勤之

意皆諸臣所共悉其深體而其勉之以副委任六月日修由山東查勘至河南七月由河南至上江八月偕安徽巡撫高晉奏籌宿州靈璧虹縣疏濬事言宿靈璧虹等處每年所以被水之由緣豫省虞夏商永四邑之水畢匯宿州所恃以宣洩者惟睢河之一道上游毛城鋪等處減洩之黃水累年浸灌水過沙停積漸成淤至上年天然閘峰山四閘陸續開放而毛城鋪至本年四月底始行堵閉黃河直流已經一載是以徐溪口一帶竟成平陸睢河上段之在宿州者見已全行淤墊睢河旣淤豫省諸水及宿州四境山水散流漫衍達於徐溪靈璧則有斗溝拖尾河沱河虹縣則有荀家溝岳家河一律疏濬虹縣又有潼河受水極大向由林子河經

歸仁開以東之涵洞入安河今林子河淤已久亦宜舍舊圖新從  
潘家山南之徐家衝開通以達董家溝安河入洪澤湖較爲徑捷  
凡此皆宿靈璧虹三州縣積水情形就臣等所見酌擬之辦法也  
至烏雀嶺董家溝安河係虹縣泗州宿遷桃源四州縣錯壤須會  
同辦理董家溝在宿遷境內已全淤安河則界桃源宿遷泗州三  
州縣亦開淺阻金鎖鎮劉李埂田家集陡門等處上下八十里爲  
入洪澤之咽喉尤爲緊要皆須逐段開濬必此處較上游深通而  
後睢河一帶之水順流直下於洪澤施工次第當由此起見行文  
下江督撫諸臣確勘詳估及時辦理惟是下游之下復有下游洪  
澤一湖以清口爲出路前蒙 皇上指示河臣將草壩拆卸以暢

其流江南官民皆仰頌 聖明燭照於數千里之外但每歲係應期開放俾上游之水隨來隨去則來者雖多而去者能速不致壅闕於一時 諭曰裘曰修等奏會勘宿靈璧虹三州縣積水情形於該處水勢之來源去路頗爲明晰所言歷年受病之由及目前利導之法已具得其要領前曾降旨令在事諸臣將勘明工程及時辦理見奏宿靈璧虹等處疏濬各工應興舉者卽行興舉不必會商往返致稽時日朕爲百姓生計並不惜費惟期用之於實永遠消患而已總之侍郎裘曰修夢麟河臣白鍾山嵇璜張師載並各該督撫受命同事祇如一人原無分此疆彼界所見旣確卽應一力擔承務期歲前竣事始於河工有裨而不誤明春耕種爲要

至毛城鋪爲睢河上游欲睢河之無淤墊計惟有堅閉毛城鋪苟非盛漲不得開放設不得已如今歲之自行漫溢卽當於斷流之後將淤沙盡力挑濬若少因循則今年淤一尺明年卽淤二尺河身墊高節節阻礙年復一年其淤更甚故逐年挑濬深通是爲要務河臣當永久奉行其睢河下游皆達於洪澤湖而洪澤以清口爲出路前經指授河臣於汛前將草壩拆卸俾得暢流已有成效嗣後卽以此爲成法不待盛漲一遇水勢漲發隨時酌量拆卸草壩預爲洩水之地從前惟恐運河水少故須蓄以濟運今則惟恐其多情形迥異此所當因時審度不可執一而論也向來河員習氣欲保隄工則以開毛城鋪爲長策至於下游之清口則又墨守

舊規憚於拆卸草壩以致出水不暢啟閉兩失河工日就敗壞而沿河州縣歲受其災河臣能於此等冒繁處恪遵所示機宜以時蓄洩當無後艱所有見議應開支河趕辦竣工去累年淤阻汎濫之積不特宿靈璧虹等州縣漸有起色上游豫東諸積水皆有所歸民生利賴所關甚鉅諸臣其其勉之九月日修由潁亳一路復至河南偕巡撫胡寶琮奏籌豫省疏濬事言黃河以南之水鞏縣以上俱入於黃至滎澤以下北阻大隄南則連山橫互諸水所經惟以正東及東南兩面爲去路正東則上江宿州之沮睢河也向因沙灘徐溪口等處埂塞致省城之巴河響河豐樂河皆無出路下阻則上淤並此諸河在在淤墊幹河旣淤一切渠溝又無出路



此商虞夏永四邑頻年水患之由也東南一面則以江南潁州府之阜陽太和亳州等州縣爲出路淮水之大本能宣洩而兩省犬牙相錯之處淺阻亦多豫省之水濡滯而不下則豫省先受其患極漲而潰奔流四溢其患又且及於上江此開封陳州迤下及於歸德之柘城鹿邑汝甯迤下及於西平上蔡頻年被水之由也今睢河沙礮一帶業奉 旨興挑潁亳一帶臣曰修前與高晉會勘東面東南面去路無阻然後中州諸水可得而泊臣等博採輿論謂宜先開幹河繼開支河繼開溝洫分要工次工緩工次第興修東面之幹河在商邱爲豐樂河在夏邑爲響河在永城爲巴河實係一河而旁受惠民溝陸鄰溝毛家河虬龍溝歧河民便溝諸水

河身既狹加以日久沙淤深不過四五尺宜大加挑濬治東南面之幹河大沙河爲最卽古潁水隄岸殘缺應補築次則開封之賈魯河卽古汴水自尉氏以下周家口以上宜一律挑濬又惠濟河自杞縣以下尤淤阻渦河自鹿邑以上漫口甚多並幹河之當挑濬者此外如永城之漕溝夏邑之毛家河小引溝觀音閣引河白河三岔河虞城之惠民溝商邱之白沙河大湖溝鹿邑之清水河汝甯府之淇河汝河宜徧加挑濬一律通流所挑土卽以加幫兩岸之隄但一經漫水汕刷便成決口擬於河身最狹及沙鬆湍急處普加砢夯臣等通盤籌畫由引河以達於支河由支河以達於幹河其不能歸河者於田間多作溝渠導引或窪地聽爲澤藪以

寶傳蓄總使源源之水既下注無虞而潢汙野潦亦有所約束而不至散漫得旨如議速行是月日修復至山東借總河張師載於濟甯上下查勘尋偕巡撫鶴年奏言館陶臨清等州縣濱運河兩岸向有民埝以禦漲水而衛田廬因係民築民修僅堆填浮土不及礮夯堅實今年兩河驟漲直注東省致秀決甚多雖經堵築水落後殘損坍塌處急應增培高厚若仍責之民修不免虛應故事懇恩准照直隸永定河隄工之例每夫日給米一升仍責成地方官督令實力修補詔如所請十月偕新任巡撫蔣洲奏言山東水道應疏濬處兗州爲要曹州次之皆緣微山湖積水不消致宣洩無路臣曰修與前撫臣鶴年於六月閒相度地形奏開伊

家河今臣到工復將原估十丈河頭再展寬數丈使湖水建瓴而下則濟甯魚臺滕縣嶧縣以及江南之豐沛二縣地畝可普行涸出至水消後更有應辦者就兗州言之魚臺縣舊有運河一道界微山湖西面上接濟甯之牛頭河金鄉之涑河柳林河應一併挑濬使下游直接江南茶陵十字河頭而脈絡貫通上游則濟甯金鄉以下各州縣匯注之水皆有去路而水患可除又泗河自濟甯姚安莊以下河身愈下愈狹至今泛溢未消白馬河則中段之董家口與泗河相接狹不能容致淤阻應將二河之尾挑濬俾兩河分流消納亦易府河係泗水分支向有金口閘建涵洞二今淤塞入河底來路既塞去路亦斷若將涵洞改建水閘楊家壩亦改建

石閘用板啟閉則上下通流節宣有制洸河合流入馬場湖每多  
旁溢查濟甯之興文鎮以下舊有河形年久淤塞亦應行挑濬就  
曹州言之則應分二道其西南自豫省之延津滑縣封邱直隸之  
長垣東明等處坡水漫溢而來是以明代築太行隄時卽沿隄開  
河一道名順隄河順軌東流自微山湖水漲此河不能下達致多  
淤墊應疏濬其東北則曹范壽張陽穀等處上承濮州定陶各坡  
河之水從沙河趙王河入運今歲水勢異漲運河爲其頂阻倒漾  
而上遂多淹漫見於八里廟增建滾壩此處正當沙趙二河之衝  
於地勢最爲得宜總使平槽之水濟運有餘而泛漲之時消減亦  
易再查沂沭二水皆爲幹河流河至江南流陽縣入海尙屬安流

沂河入江南之駱馬湖多淤阻應一併疏通以除水患 諭曰覽  
奏俱悉朕正慮及沂州府屬每被水災奏內有疏通駱馬湖語宜  
速相度妥辦又奏山東運河情形言南旺以下至韓莊閘水勢未  
消臣等亟思措置之方於來源去路並加講求查南旺舊制原係  
三分南行七分北上今則北少南多見於分水口兩岸接長南壩  
收短北壩俾順勢北行再將何家壩減低二尺放入北運則南下  
之來源已少於糧艘回空後嚴閉南閘盡放北閘暫使汶水全往  
北流俟伊家河放水運河下段隄岸盡出凡不能施工之處可次  
第興修庶明歲重運進行不致遲誤至南旺以上水勢已消各工  
段及時修築 諭曰恐汝等分身不及今又遣劉統勳前往專司

運河一切工程此奏可與之妥酌爲之是月日修復至上江偕高  
晉奏言潁州府屬地勢平衍北高南下各河道均以淮河爲歸宿  
達洪澤湖祇以積年上下淤阻遂多漫溢今豫省既將上游疏濬  
安省應一體籌辦其在豫省連界應濬者亳州之兩河口及三道  
河淝河太和之茨河明河商邱之大沙河均照豫省寬深丈尺興  
工本境應濬者亳州之宋陽河霍邱之高塘河及茨河淝河下流  
其隄岸均一律修整 諭曰接連豫省之河應較豫省加寬方可  
容受也又言宿州上承豫省及下江蕭碭諸水又洪湖受毛城鋪  
減洩之黃水來源甚多查睢河衝出之南北二段既經估挑其上  
段正身地居中夾若併加開濬三河並行以中段接洪湖減洩之

黃水以南段接豫省永夏諸水以北段接下江蕭揚諸水均順其  
自然之勢使分途下暢至毛城鋪爲睢河上游仍恪守 聖訓堅  
閉毛城鋪非盛漲不得開放其橫壩引河悉心籌辦務於河道民  
田兩無妨礙又宿州舊有運糧溝挑治並澮河下游淤淺處一律  
疏濬增建石閘以時啟閉既可分新衝南段之水以通澮河而由  
澮入淮糧船從此直達宿城既增上游洩水之區又資往來運送  
之便兩岸民田積澇均可分洩 諭曰所奏皆善可妥協辦理尋  
調戶部右侍郎十一月奏言全淮俱入洪湖而去路又以清口爲  
咽喉疊奉 諭旨令來歲及早多拆東西草壩以暢其流今值初  
冬東壩蓄水之期向來口門祇留十八丈至二十丈不等收束太



緊今擬酌畱三十丈則湖水暢出且今歲多出一分來年可多受  
一分於宣洩有益 諭曰甚合機宜欣慰覽之又奏言上江諸水  
開通後歸安河以達洪湖自歸仁集下至陡門出口之路蘆葦叢  
生淤墊較甚上游數百里東下之水至此皆爲所格連年患由於  
此惟是水面瀰漫無從紮壩若槩用甬工不但天寒艱於入水亦  
且蘆根糾結甬具難施查沿湖一帶漁船頗多募四五百隻掘取  
蘆根兼撈淤土爲力較易尾閘疏通則壅遏之患可減至安河河  
頭亦有應爲籌計者查歸仁集外奎河潼河柏家湖林子河羅家  
河水俱入安河來水旣眾咽喉尙屬狹隘宜開董家溝一路又勘  
得歸仁隄迤下舊有涵洞年久湮塞擬再開通又分林子河一支

由此經行則安河進水之地亦有所分而壅遏無患 詔如所請  
十二月日修復至河南偕胡寶琮奏言開歸陳三府之豐樂河饗  
河巴河渦河惠濟河賈魯河爲諸河之幹見已陸續工竣其支河  
三十餘處有應續議挑濬者臣等再加履勘如商邱之兩沙河虞  
城之苑家隄遂平縣之石洋河上蔡縣之柳堰河泥河小茅洞新  
蔡之三岔河各相機疏築中州全省水患可冀無虞 上嘉允之  
二十三年四月上江河工告竣曰修與協理河工安徽巡撫高晉  
俱蒙 恩議敘 御製詩有爾晉惟方伯曰修汝亮工之句六月  
奏言偏災地方慮糧食短少例免米豆稅以招商但既經免稅必  
設法稽查始則定地給票販米繼則沿途照票放行既售又須回

票註銷胥役在在需索較照例所納之稅增倍且票中填明往售之地中途雖有善價不得隨便他售商販卻顧不前致災地米糴稀少是欲通商而商反以爲累欲便民而民轉受其不便請照舊收稅商免守驗需索米豆自然流通 詔九卿議奏允行七月京師米貴 命發官米減價平糶以日修等董其事奏言今歲市價較往年倍增若減價太多恐奸徒乘機居積適滋弊端臣等酌議每石減百文先行試糶數日後市價稍平糶價以次遞減并將平糶錢交庫爲搭放兵餉用不必發五城易銀庶吏胥不得高下其手 從之十月充方略館副總裁十二月以天津民人潘濬控鹽商牛兆泰一案詞連日修與兆泰寄書事 諭曰袁日修與鹽商

牛兆泰係屬嫻親寄書可也而使鹽道之壻持書寄鹽商雖無囑託之言明有囑託之意軍機行走之人尤當慎密防閑爲要此何爲者耶襄曰修不必在軍機處行走二十四年六月江南飛蝗延及山東 命偕內閣學士海明往勘尋奏蝗起自海州其撲捕不力之地方官治罪如律閏六月充江南鄉試正考官十一月 賜曰修繼母郝氏八旬衍慶生母王氏七秩連祺額二十五年二月 命偕侍郎伊祿順赴甘肅清查軍需九月授倉場侍郎十月奏言每年漕艘抵通必至石壩換剝船由五閘轉運入京此一帶河道自大通橋以下至通州之東水關長四十餘里淤積既久河身愈高遇水大則衝潰隄岸開水盡洩雨水微弱之年則又淺阻膠舟

漕運阻滯查每年修隄挑淺名爲歲修與其逐年勞費不若爲一勞永逸之計大加挑濬嗣後可節省過半 允之二十六年七月河決楊橋 命赴河南同巡撫常鈞查勘災賑並疏洩事宜日修奏言豫省河水漫溢當先求堵禦次籌疏洩黃水歸槽溝渠始能料理至災區宜先行撫卹但有司拘於成例以查明申報上司委員監放然後給發饑民迫不及待致填溝壑應請一面查點一面給放無俟彙齊造冊所全實多又粥廠爲惠最溥有司恐聚集貧人生事往往阻格不行不知各縣俱設粥廠則彼境之人不入此境又於一縣中分東西南北四鄉則自然散布不致叢擠在官費不甚鉅而饑民實賴全活 上可其奏八月奏言南北兩岸漫口

雖有二十餘處辦料尙易惟楊橋決口寬數百丈必料物雲集方可蒞事查河工定例每料百斤價銀九分仍自運到工此次決口大工請酌增價一倍使附近料物源源而來遠者亦不致聞風退阻大工可速就 諭曰所見得要如所議速行是月欽差大臣劉統勳兆惠駐楊橋督工日修查勘下淤至潁亳一帶九月奏言黃河旣斷正流由賈魯惠濟二河下灌儻下游不能容納又生旁潰則爲患滋大臣查賈魯惠濟二河所受黃水多有通連之處其斷續隄埝缺口爲出水之路者則畱資宣洩其爲河水灌入者則槩行堵禦俾順勢而下導之中流不致復生決裂又言豫省決口上流未斷江南潁亳一帶種麥無期此時糧價尙平冬春恐致騰涌

請一槩賑卹給與折色其潁屬所貯倉糧俱畱爲來春糶借之用此數州縣糧價不昂則河南光州固始等出米之鄉俱可盡畱本省於災黎有益 上報可曰修尋返楊橋勘南北兩岸各工奏言曹縣漫口關係東省運河今大河正流直衝北岸將來汛水一發仍慮新隄難保臣閱視河心老灘已成崖岸河形爲其所偏是以偏趨必當挑濬挽溜俾河行中道應於楊橋決口工畢詳加估辦報 聞十月奏言沁水出五龍口沿河而下較黃水濁色減而性之湍悍過之加以丹水從北來其力更甚今歲異漲隄不能制大幹東流至懷慶府城從北門灌入復繞城至尋村衝開決口奪溜南趨不由故道致武陟一帶被浸其決口大小不等亟應補築高

厚以防來歲汎水查沁水隄埵惟武陟縣境之木藥店係官工餘  
皆民修此次工大費鉅請借帑興工以紓民力又言被水最重之  
州縣民人有避赴鄰境者聞賑來歸請查明戶口居址一體賑卹  
得 旨嘉允 諭曰裘曰修辦理豫省災賑將竣且聞伊子裘麟  
病故伊母年高未免轉增倚閭之望著令其回京任事十二月豫  
省河工告竣交部議敘 御製中州治河碑有嘉其不惜工不愛  
帑不勞民水用洩土計方上源下游以次就治之語是月丁憂回  
籍二十八年二月 諭曰直隸連年積水未消見雖多方宣洩終  
不如豫省之妥善從前河南疏濬河工皆係侍郎裘曰修協同辦  
理此時裘曰修服制將闋著卽馳驛來京督辦直隸水道溝渠事



務 賜詩曰水由地中行南北勢殊異南土勤溝洫鮮害而多利  
北方盡平衍利少害常致率旱澇偶逢畎澮總棄置比年夏秋澇  
乃見洪波積蒿目乏良方屢命疏消試覆稱海不受是誠無別計  
嗟嗟我災黎視爾頻受沴相與待天時益用增慙愧發帑與截漕  
十求一二濟廉知天津壩洩潦實遲滯重臣令馳巡情吏亟抵罪  
導宣入海河涸壤已耕暨水大釜底形難較津南倍卽今此愁旱  
而彼仍望霽然盡一分力庶獲一分惠繡衣分督濟漸有可耕勢  
此均治標策未爲探本義豫省及上江往年祲每逮夢麟與汝修  
承旨克奏績馳驛召來京斯實爲民甚投艱非奪情甯宜願浮議  
輕車汝其獲宣防汝其志集思見毋執周視陳毋避委輸必源尋

下釀求高自功要在人爲守株兔安企孰急宜先圖孰緩宜後治  
孰壅宜剔孰孰澤宜攘棄代賑防中飽舉事懷抑植勉汝永逸謀  
副予勤求意四月署吏部侍郎六月 上又以直隸山東界生蝗  
命偕尙書阿桂董辦撲捕事宜尋奏言吳橋甯津樂陵南皮鹽  
山慶雲海豐等縣濱河近海窪處甫經涸出溼熱所蒸蝗蝻蠕動  
見飭各州縣分路撲捕又直隸之有運河猶南省之有長江各水  
皆由此入海每有宣洩不及之患務將減河廓清並多求出路以  
益暢達報 聞七月奏督捕滄州靜海霸州文安等處飛蝗復  
諭竭力毋忽九月日修奏查辦直隸河渠事故請假回籍迎養  
諭曰睢河久未疏濬應豫爲籌畫著裘日修於歸途之便卽會同

高晉等查勘辦理十月日修奏言勘辦睢河必厚蓄清水以刷淤  
泥方爲挈要各閘隨宜啟閉遇應開黃腫閘則堵南服河頭應閉  
西流閘則堵北服河頭使水匯入睢河力足衝刷庶無淤積之患  
上嘉納之十二月奏言睢河原係沙積淤不過黃水之時但值  
清水盛漲兩岸亦不無坍塌是以兩旁淤沙停積河底淺滯應查  
明段落擇其淺狹者疏令寬深再南北二河口於秋冬水弱時築  
壩堵截俾兩河清水全歸睢河至四月水漲仍啟壩分洩於蓄洩  
似屬合宜 詔如所議行二十九年三月福建提督黃仕簡據參  
將溫泰言總督每年受廈門洋行陋規一萬圓巡撫受八千圓具  
疏奏劾 命曰修偕尙書舒赫德往查四月會奏起獲洋行底簿

查出道府廳員與總督墊買物件等款請革職並將巡撫定長解任質訊是月舒赫德傳 旨命曰修暫署福建巡撫 諭曰道府等既有收受陋規之事自應如此辦理定長卽有應得處分不過失察及保舉非人何必遽行解任著傳諭舒赫德等就案悉心分別妥辦毋事張皇急遽轉致畸重畸輕五月日修以汀州府知府高霑於長汀縣鍾惟啟私鑄之案未親審奏請革職 諭曰高霑讞牘未及躬親雖有不合按例處分其罪尙不至竟行褫職況該員正在俸滿引見何難於給咨送部隨摺聲明候朕臨期甄別不必汲汲糾劾若此裴曰修攝篆伊始未免意存風力而不知其事實不值如此一辦也高霑仍著送部引見曰修等尋奏黃仕簡所

劾受一萬八千之數屬虛洋行年例督撫衙門實有八千圓領辦  
燕窩呢羽貼費其各參員代總督楊廷璋墊買價銀俱係各員名  
下陋規屬實奉 旨黃仕簡率臆具奏本應議處但所奏尙屬有  
因從寬免其交部楊廷璋交部嚴加議處著卽解任回京候旨七  
月 諭曰前黃仕簡奏參廈門洋行陋規朕以此案關係督撫婪  
索多贓實堪駭異非澈底跟究無以肅法紀而昭懲創因命舒赫  
德等前往查辦舒赫德等自應向溫泰究詰原單所開總督一萬  
巡撫八千之數實在有無收受確據如彼毫無指證然後逐層研  
究遞及道府廳員勒索陋規墊買物件各情形方合讞案重輕先  
後乃舒赫德等初至閩省置原參一萬八千之陋規虛實於不問

僅從起獲底簿將屬員代買物件支節推尋所辦未得竅要竟似  
朕差伊等赴閩專爲查訪於撫過失毋怪乎楊廷璋前此之不能  
允服轉疑舒赫德等有意吹求也節經朕降旨示以端緒伊等詳  
悉研訊黃仕簡據溫泰所開督撫收受陋規數目全屬子虛惟究  
出屬員等代購物件一節自應分別辦理朕前命舒赫德赴閩時  
曾面諭以此案如果督撫婪贓屬實必當重治其罪定長或有應  
行質訊之處即可傳旨將伊解任聽審其巡撫印務令裘曰修暫  
行署理原以封疆大臣受恩深重設罔顧國憲貪黷公行則其身  
家性命尙不能保更何有於一官若黃仕簡所參旣無確據定長  
惟發價購買燕窩呢羽等物亦係沿習舊例初無不可輕貸之處

則從前舒赫德之違令解任尤爲誤會朕意矣此案舒赫德等查辦入手未得關鍵節經訓示更正及審明定讞則楊廷璋之罷斥總督解退閣務及定長之從寬仍畱原任皆視其所自取恐中外之人未能深悉此中就裏特將案情原委明白宣諭知之十二月署倉場侍郎三十年正月遷戶部左侍郎五月兼管順天府尹事六月充經筵講官三十一年二月充會試副考官十月諭曰江南淮徐支河一帶所有官修河隄前經特派裘日修等查辦距今爲時已久且韓家堂見辦漫口其下游支河汊港不無淤墊亦應酌量疏濬著派裘日修高恆前往會同高晉悉心查勘至淮徐河道或有毗連山東河南地方並著一併閱看十一月奏言豫省各

河自乾隆二十二年開挑後每歲照善後章程於農隙時查勘疏濬隄岸亦隨時培補見無淤墊殘缺至歸德一帶渦河上游並各支河大局均與初辦相符且有加深之處兩岸隄工亦皆完固報聞三十二年七月遷禮部尚書仍管順天府尹事閏七月奏言京師因雨路滯通州交倉餘米商販等艱於輓運是以上月米價稍昂請將八月甲米移前數日支放上從其言八月調工部尚書三十三年八月調刑部尚書尋丁憂回籍三十四年諭曰裘曰修丁憂回籍已一年有餘著授刑部尚書俟伊葬事完畢來京供職三十五年四月仍兼管順天府尹事五月刑部改擬賄縱參犯一案佐領額爾圖驍騎校孟忒初擬發遣枷杖得旨令按律



改正再擬絞立決 諭曰此案前因該將軍傅亮定罪過嚴漫無區別是以降旨交刑部另辦乃該堂官意存寬縱槩以發遣枷杖完結經朕面加訓飭令其按律改正今又於定律絞候之外加以立決則所謂過猶不及均非情理之平也閏五月 命督捕武清東安一帶飛蝗 諭曰裘日修等奏在永定河武清東安連界撲捕蝗蝻忽見南來漸往西北周元理卽帶領員役尾追視其所落之處撲打自應如此辦理至摺內又稱府尹竇光鼐前往迤南一帶照飛蝗往來方向尋覓所辦甚屬錯謬裘日修平日尙屬曉事如卽親往查勘當不至爲人蒙蔽今旣目擊情形自應迅赴蝗起處所查明貽誤之地方官奏參治罪而畱竇光鼐在彼督捕方合

事理乃竟安坐武清等處僅聽寶光節前往一查塞責全不知實  
心任事已屬非是至摺內稱將來或於隱僻無人之河淀等處查  
得一語尤爲取巧其意不過以隱僻河淀尋覓難於周到隱爲玩  
誤劣員預畱地步此等伎倆豈能於朕前嘗試耶著交部嚴加議  
處仍著卽往迤南一帶切實根究儻於起惶處所之諱匿不報州  
縣復爲徇庇開脫裘曰修能任其咎乎尋 命降補順天府府尹  
部議照溺職例革職奉 旨帶於新任十二月調工部左侍郎仍  
管順天府尹事三十六年二月 命赴滄州一帶會同直隸總督  
楊廷璋等查勘運河情形奏言見今閘座高出河面數尺口又不  
甚寬兼有閘牆間隔水勢不免壅滯應改用減水石壩並將壩底

龍骨石拆低一尺則河水不待平槽即可預殺其勢並疏下流引河至岐口歸海處一律深挑至捷地開形勢兜灣將來改壩應移近河邊裁曲就直以順水性至減河每年過水之後往往受淤必須節節疏通使水得順流達海方無旁溢之患 上從之是月補工部尚書六月 命南書房行走七月充經筵講官八月倉場侍郎瓦爾達等奏河道淤積久請挑濬利漕 命曰修等會同辦理九月 諭曰直隸被水之處順天所屬者居多裘曰修於近京水利情形較爲諳悉著往來調度查勘總司其事二十七年正月 諭曰永定河北運河等處督辦工程著裘曰修協同直隸總督周元理董率各員妥協辦理二月奏言直隸河工需用雇夫錢請照

京城發兌官錢之例許辦工各員一體交銀領買從之四月奏  
言治河之道挑濬爲要汛水未發之先既發之後逐段詳勘一有  
新淤卽當乘時急辦惟水中嫩淤人夫不能站立難以施工請設  
立濬船給之器具人夫可於船上用力而所挑之土卽以入船運  
至兩岸實爲事半功倍詔如所議行又言直隸諸水千支萬派  
總由三汊河爲入海之路運河西岸則大清河會永定而出子牙  
河會三支黑龍港而出全資西岸疊道諸橋穿連而東彙入海河  
今東岸自南倉以下改爲疊道俾盛漲時可徑達堤壩河淀不專  
恃海河一道爲出路但西岸向祇十一橋今陸續增建九處多其  
出路上游不致受害至格淀一河隄原爲隔別清渾而設查子牙

運河自莊兒頭以下漸清其來路甚遠而出口祇有大紅橋一賁  
爲太偏是以向來於格淀之尾閘王家河俞家河各建一橋與清  
河通流然兩橋口面過水有限兩面衝激隄工不能經久每歲徒  
費增修莫若自當城以下改爲疊道水大聽其自漫水小仍於行  
人便利並酌增涵洞數座不專恃王家河俞家河兩橋則出水暢  
順而子牙河下流澄清之水亦不致受淤得 旨諸凡皆妥尋以  
審擬雄縣知縣胡錫瑛盜買倉穀及科歛一案意涉寬縱部議銷  
加一級免其降級六月奏言向來河官祇講築隄不言濬河不知  
治河不外疏築二字而築不如疏其理甚明直省之弊近水居民  
與水爭地如兩河之外所有淀泊本以潄水乃水退一尺則占耕

一尺既報升科卽呈請築埝有司漸見不及遠以爲糧地自當防護隄埝直插水中水從決口而入被淹更甚請 敕所司於一切淀泊毋許報墾升科並不得橫加隄埝則凡水皆有所歸不致壅遏爲害 上是其言降 敕嚴禁尋兼管倉場侍郎事十一月命偕瓦爾達往盛京查勘民典旗地事奏言此項地畝奉 旨勅帑贖回俾出典旗人不失舊業受典民人照舊典得價 聖恩至爲優渥臣等酌議自回贖後原業旗人果能自種准其撤回原佃民有欠地租者地方官代催抗不給者撤地另行招佃如旗人不能自種原佃民並未欠租不能遽行撤回致佃民失生計 詔如所議行三十八年二月充永樂大典總裁閏三月充四庫全書館

總裁四月曰修患噎證 遣醫診視尋請解任調理 上以錢陳  
羣昔患此證因年老允其告歸今日修甫逾六旬不當如陳羣之  
引退 賜詩以慰之 詩曰腹因廢食減便何事投醫未霍然  
欲乞冰衡權解職可忘芸席共研篇卿云效力正長日我則憐才  
未老年不忍養病例香樹還希香樹例全痊是月 命加太子少  
傅五月卒 諭曰工部尚書裘曰修品學端醇才猷練達入直內  
廷屢膺使命宣力年久倚任方深今春偶患噎隔特遣太醫院堂  
官診治復常遣御前侍衛前往看視比因病體加劇奏請解職未  
允所請並賜詩示慰昨又降旨晉加宮銜俾其舒心攝養以冀速  
痊茲聞溘逝深爲悼惜著加恩派散秩大臣一員帶侍衛十員往

奠茶酒所有在任革職降級之案俱著開復應得卹典仍著該部  
祭例具奏尋 賜祭葬如例論文達四十年 恩授其子行簡爲  
內閣中書准其一體會試

右 國史館本傳

司空之職掌邦土居四民時地利使修利隄防通達溝瀆別五土  
之性而物其所生之宜荷責綦重 朝廷命官必深知其蘊蓄又  
歷試有功然後俾以宅揆熙載之任裘公敷歷六曹經畫咸裕尤  
善於治水 上重公才器數任之公竭智慮告厥成功最後督工  
部尙書而公竟薨於位 國朝河防經 列聖親臨指授廟謨方  
略繼繼承承永垂厥績然黃流自澠池孟津而下北岸無山夾束



合伊洛沁汜演漾穿貫於中州積潦漲決之害與直隸北河淤溢  
之患亦所時有公兩使河南辛巳偕重臣往塞楊橋口二百餘丈  
訖卽往治直隸永定河浚蘆溝中泓疏金門求賢二壩水口築牛  
坵壩遷壯牛河行東南導葛魚北溜又築攔水埧淪鳳河淤兼治  
北運諸河築南倉橫隄以衛民居改疊道以洩西流凡隄之圯者  
皆復之丁丑 上念河南水溢數郡專遣公往勘與巡撫胡公寶  
璵講求疏釀之法興工代賑凡五閱月告成開幹河四使達於淮  
曰賈魯河曰惠濟河曰渦河曰豐樂河其支河之界在開封陳州  
歸德汝甯四郡者凡六十有三或分入於惠濟北沙河或分入於  
惠濟渦溝洪溝滄河達於江南或入於大沙河或入於洪汝二河

冀州縣沮洳者二十有八並築汝陽遂平西平三邑之新舊河隄於是昏墊攸去災黎甯居譬諸血脈通經絡固而百病悉平矣他如疏山東伊家河及安徽所隸朱陽等河浚京都之大通河六千六百餘丈築兩閘減水石壩建長生隄壩及坌隄各百有五十丈莫不履勘咨詢採察輿論用能上副 聖心宣布德意昔晉武帝命杜預建富平津河橋橋成帝曰非卿此橋不立預曰非陛下聖明不成今日之功 聖天子知人善任公殫力竭忠良亦類是此外如往辦巴里坤事 上特賜御用冠服以寵其行查甘肅軍需開睢河疏江南水道再理直隸水利審福建事最後往查盛京旗地皆馳驅鞅掌悉心區處克當 聖心公年纔六十有二體貌清

癯神彩奕奕居位凡三十餘年以文學侍直 內廷綜理部務隨  
帶書局兼司撰著寅人酉歸尚與賓從賦詩弈碁談諧娓娓至夜  
分弗倦宜公享遐齡以符 帝眷乃積勞病鬲雖絕食飲歷三旬  
而神氣如常款接不廢 上日遣 御醫診視 存問疊至公請  
解職 弗許 賜詩示慰晉加官銜俾舒心攝養以冀速痊公感  
涕恭和二詩手書進謝而病卒不起 上爲軫悼易名飾終之典  
哀榮備至朝野傷公逝者無貴賤遐邇萬曉一涕公旌匱所菴淚  
溢洲渚嗚呼非功惠及人能如是乎公諱曰修字叔度號漫士世  
居新建雙港代有隱德曾祖宗海公邑庠生祖松亭公舉明經考  
思補公康熙丁丑進士由建德令行取官吏部歷戶刑兩科給事

中祀建德名宦祠妣熊氏郝氏生母王氏三代皆以公貴 贈工部尚書及一品太夫人公爲諸生一舉優行一舉詞科乾隆元年舉京兆試己未成進士由編修 御試高等受 上知晉翰林侍讀學士充講官歷詹事升內閣學士兼禮部侍郎一任兵部右侍郎再任吏部右侍郎三任戶部左右侍郎一任工部左侍郎兩任倉場侍郎三尹京歷禮刑工三部尚書中間以降官補中允侍講一入軍機三侍 經筵丁卯典湖北試壬申己卯兩典江南試庚午癸酉兩典浙江試丙戌充會試總裁充會典館總裁四庫館總裁奉 敕撰熱河志太學志西清古鑑祕殿珠林石渠寶笈錢錄等書加太子少傅謚文達生於康熙壬辰十月二十九日歿於乾

隆癸巳五月朔日配熊氏一品夫人男子五人麟庚辰進士官編  
修師國子監生皆先公卒行簡國子監生豫皆嫡出遵慶側室駱  
出女子五人孫元復音葆增壽孫女三人公性孝友仁惠十齡居  
父喪五旬外居郝太夫人王太夫人喪哀毀一致敬愛諸兄振拔  
寒畯周急拯難典質以應當官任事舉重若輕御繁以簡僚屬吏  
役皆畏公明而樂公寬門生故吏徧天下受恩卹者至歷久拜謝  
公輒不省笑遺之而已平居不言人過惟以人命最重果報不爽  
爲勸戒見失意者卽惻惻不安必曲折使得其所在戶部最久而  
囊橐蕭然所入卽隨手施與嘗典衣度歲人不知也司寇時能體  
上意無一人死法外公澤躬文雅宏獎提唱有前輩標韻道淞

州攜歐陽公像句 上題得允所請凡扈從侍宴及 慶典大禮  
舉行日廣揚紀頌之作詞林皆奉爲程式十年來西師奏凱回部  
蕩平外番絡繹效順 御製詩文紀誌甚夥 上以公文筆清眞  
雋雅輒命撰著篇成屢邀 贊賞如某什某篇皆奉 敕特作者  
公嘗仰體 睿製詩意繪土爾扈特款塞圖以進嚴威之象恭順  
之情黼黻動猷潤色鴻業類如此所著詩文奏疏若干卷公書做  
張卽之 上以內藏卽之書華嚴經殘本令公補書人莫能辨珥  
筆稽古之榮雖虞褚燕許奚讓焉其拜 恩賜如居第金幣 尙  
方珍玩 御書堂榜等不可勝紀太夫人春秋旣高錫類所加尤  
蒙 宸眷公感泣倍至方勘豫災時子麟卒太夫人書訓曰窮黎

皆赤子勿以汝子傷墮公事公爲節痛聞者誦之公彌留時語左  
右曰吾爲燕子磯水官君輩江行所次苟酌卮酒弗敢辭有老嫗  
曰昔太夫人禱於磯邊神祠始有身公之去來可知也予與公同  
官交契直 內廷三十年聞見最深公子行簡輩將擇某月日欽  
承 諭葬公於某阡屬子文納壙爰撫公本末而銘銘曰

振翩秦階翰飛彩峙參身洪流力障氣砥形折智營鬱塞昏徙艱  
重雜投弗鑿弗詭行所無事若治斯水公歷六卿設施規此冶金  
斲材灼華擷藹口颺眾馨心容羣技萌苟弗舒如過在己美哉豫  
樟 帝濯植之零露滌之飄風抑之穀乃栗兮果乃實兮清廟瑟  
兮和六律兮江河潤物公來有因水仙揚旗公返有神豐碑寫隆

功勳貞珉大哉 皇言練達端醇

右墓誌銘于敏中撰

公姓裘名曰修字叔度一字漫士江西新建縣人康熙刑科給事中思補公之第五子也乾隆元年以廩生薦博學鴻詞舉順天鄉試四年中進士改庶常八年 天子親試翰林擢公高等驟遷侍讀學士轉詹事府少詹遷兵部侍郎調吏部侍郎充經筵講官軍機房行走公貌清整眉有濃翠顧盼精神淵映居恆喜賓客工諧謔搜奇語怪了無倦色而遇事神解超捷每詣一曹受一職手文書默然數日後判決如流二十一年 王師征伊里公面奏軍務機宜 天子大悅卽 賜御衣冠乘傳至巴里坤傳宣 聖意



會逆酋莽阿里克遣弟某詭稱押送諸番探信卡倫公與哈密總兵祖雲龍縛弔總督發其姦哈密兵少有赴巴里坤種地者七百人公請暫畱爲衛撥沙洲五衛麥石添備支發其贖餘者分散各路塘站平糶之上皆獎許公以一書生冒矢石行萬里外與陝甘督撫滿洲諸將軍計議密勿而能下協邊情上符 睿算近代儒臣所未有也調戶部侍郎署倉場總督攝順天府尹充丙戌科會試總裁擢禮部尙書調刑部尙書降府尹尋遷工部尙書年六十二病噎 天子賦詩存問醫藥不絕於道加太子少傅 詔下二日而薨 賜諡文達人賢良祠公聰強機警受大任舉重若輕 太子愛其敏倚若股肱初爲胡中藻事罷官逾月起用再爲捕

蝗事降官逾月復故凡有事於四方與大學士劉統勳先後奔走  
前 命未復後 命又至半途回車謁謁東西雖侍 內廷領六  
部而英簃款關足迹常半天下二十三年 命在工所訊邳州知  
州某短發車價事二十四年 命往太倉訊王閻冒家主事二十  
五年 命往蘭州訊縣丞崔琇擅動驛馬事二十九年 命往福  
建訊總督楊廷璋受陋規事三十七年 命往盛京查旗地事五  
主鄉試一至湖北兩至江南浙江八勘水利三至河南兩至江南  
四至直隸公所讞決無苛嚴亦無縱捨衡文得士心尤善治水嘗  
奏治水宜先審其受病之由再論治病之法就一縣一府而言病  
有其處合一省而言則不然就一省而言病有其處合數省而言

又不然若僅於一處受病處治之而下流之去路未清則爲患滋甚 上深然之所治黃淮淝濟伊洛沁汜等共九十三河疏排濬滄貫穿原委俱有成效可爲後法善應變捷若轉圜而立意矜矜偏於慈惠從盛京歸奏免追八旗生息銀爲司寇時奏免盜蕩者死諸大臣或探 聖意嚙齟不前而公獨抗聲有犯無隱 天子鑒其誠雖忤 旨時加嚴訓不逾時 恩禮如初薨之日公卿士大夫素車塞路外省之河隄老兵煙墩戍卒皆泣歎有失聲者公本以文學受知始終與書局相終始與纂西清古鑑錢錄石渠寶笈熱河志諸書而最後爲四庫全書館總裁 上以書法近宋臣張卽之以內府張書華嚴經殘本 命公足成之有奏疏詩文若

千卷夫人熊氏子女各五人長子麟官編修早卒次師次行簡次  
豫次遵慶行簡以子與公同薦鴻博同舉進士同官翰林同出蔣  
文恪公門下故將葬來乞書碑銘曰

升龕鼎鐘器有所窮禮樂兵農事各不同袁公恢恢兼總天工智  
大於身意過其通馳於文圃挖揚雅風行於邊塞笑談兵戎以決  
庶獄卿月麗空以障大澤手驅蛟龍奉 帝之命皇皇者華樂  
帝之心憂國如家指左識右帖邇安遐甯有臣如斯而堯舜弗嘉  
雨露方濃梁木遽壞台曜雖沈寒芒尚在葵之竺之 恩命沃之  
樹柏樹欒剛日卜之公身雖藏公績彌彰丹心史 upper 石冢旁

右神道碑袁枚撰

國朝詩林卷之三十一  
三二  
裴文達公名曰修江西新建人余人詞館距公卒已二十年不及見也然余所蒙識拔者皆文達所識拔之人時時告語曰裴文達某事某事云爾公 賜宅在內城石虎胡同購一軒名好春退直所憩賓客門下士往來者於闈人悉不關白徑入此軒若已退直則公必坐軒左右若待客矣一日值歲小除諸人者咸詣軒與公餞歲忽司關者至公側耳語公大笑曰戶部堂官歲盡分飯食銀兩亦不可告人耶卽命挈一囊至瀉出之皆貯庫大定兩五十公數坐中客若干令各懷其一曰諸君年事大寤聊以分潤耳數不足復命入取之徧給之乃止公食指旣廣又賓客常滿坐值窘乏亦時時斷炊一日過午尚未具食坐客有愠者公覘知之卽出語

曰請君他日皆飫 天廚頒克食之人豈矜矜於裘某之一餐乎  
且主人亦尙未食不獨客也客意乃解 純皇帝眷公時得召見  
公奏事畢則必言各衙門人才曰某人勤某人幹事某人擅文筆  
是以公在部及掌院日翰林諸曹司遷轉最速由公推轂勤也時  
公房師大學士蔣文恪公溥亦極愛士肯爲寒素地有揭薦牘來  
者悉館門下未嘗拒一人其掌書記者卽公所引入一日公入  
朝遇文恪公公曰有一孝廉在都候選所學極優師留之乎文恪  
唯唯公知文恪性闊達賓客多寡皆不甚措意明日遣一僕徑送  
孝廉人文恪邸第屬僕曰第送詣某書記廳云昨已面語相公相  
公屬畱客耳僕致公命出書記某卽挈孝廉巡歷聽事側兩廊見

屋比櫛悉客館內一室門獨啟遂徑入見榻上亦有臥具連命僕撤去貯聽事中語孝廉曰君行李至卽安置此但出必須鍵戶慎勿啟也又一要語相屬君雖館此實無一事不妨日出游衍然必須飯畢始出日兩飯亦無邀客者但聞長廊口有高喚者曰飯具矣卽速詣聽事食遲則不及孝廉遵其約每日飯畢卽鍵戶出遊約計復當飯則又歸歲值午日中秋日及歲盡前數日卽有老僕從三四輩挾巨囊至徧入客館見一臥榻卽置朱提一封標其面曰歲脩爲數五十若旁有臥榻則貯一小封爲數四以牒從者孝廉居文恪邸二年選湖北一縣令始去在邸日未嘗爲一事亦未嘗一面文恪蓋疏節闊目如此然無礙其爲太平宰相也故因文

達連類及之自數公以後風氣又變非鑽營競進之士及以賄交者不開閣款客矣前一事袁布政鑿爲言之後二事皆畢宮保言之宮保自言愛才已不及公十之一二余識公子及孫號春軒者亦曾一詣焉

右書事洪亮吉撰

文達天資明敏學有體用及官翰林受知 高宗皇帝入直 內廷洵擢卿貳晉升尙書前後三十年間內參密勿外理簿書 朝廷大筭作又多出其手兼屢奉使 命勘治河讞疑獄丈地察邊東極遼瀋西踰哈密南至閩嶠事無鉅細從容以應洞中窵要雖至紛紜輻輳無不剖斷如流先曾祖敬堂先生出文達之門嘗館



於邸第見其氣度靜穆通達治體立 朝侃侃直言無所依回偶  
值畿輔少雨 高宗詢以禱旱文達以省刑修德陳奏有古大臣  
風烈

右鶴徵後錄李富孫撰

裘文達公嘗治某水時有田夫突至與前如欲有言者左右訶止  
之文達呼與語竟得地勢高下之宜久而無患其虛衷博採類如  
此

右記余金撰

裘文達公充磨勘大臣時某省士子用社稷鎮公子眾以爲應議  
公心知非杜撰而一時忘其出處歸第問公子麟對以句出國語

後於左傳檢得之遂長跪受責時公子已官編修矣公課子之嚴待士之寬一舉而兩善備焉

歐陽文忠公像在滁州官庫乾隆己卯新建尙書裘文達公典試回京進呈 御覽題詩以爲鎮滁之寶

右紀聞陳康祺撰

陸州府志卷之五

三

史奕昂

史奕昂江蘇溧陽人父貽直官大學士自有傳奕昂以父廕補刑部山西司員外郎遷郎中乾隆十三年授山東兗沂曹道十四年調運河道十六年東平州運河決 敕部嚴議復 諭曰史奕昂見交部議其處分止於革職史奕昂乃大學士史貽直之子卽令革職亦不至困阨徒使優游坐廢無自新之路且道缺更易生手於一切挑濬築壩備料諸務恐未能及時辦集於運道甚有關係史奕昂平日尙屬黽勉可望造就著從寬革職畱任令其勉圖後效如仍不知奮勉稍有疎虞卽從重治罪十九年 上命前任甘肅巡撫鄂昌前赴陝甘辦理準噶爾軍需以奕昂著甘肅布政使

三十年二月奏言從前軍需報銷每遲至數年承辦之員類多更易查詢愈繁胥吏反得上下其手此次擬俟大兵齊至軍營卽查明隨時題銷其有用贖銀兩或應留備道庫府庫或應提解繳司見在先爲清理如有必須凱旋後覆造者請以凱旋日起限一年造報 上嘉之尋鄂昌與逆犯胡中藻唱和案發詞連史貽直札託鄂昌爲奕昂請署甘藩事罷貽直官 命史奕昂來京以京員用五月授福建按察使六月陝甘總督劉統勳奏稱川省解甘軍需銀兩查驗委有青潮照色折算共短銀二千兩有奇部議前署藩司徇隱不報例應革職 上特子寬免二十一年疏稱武職疎防例由提鎮開報督撫查參福建係有總督省分遇有應參職名

向祇由臬司移營查取轉詳督撫辦理各省殊未畫一請嗣後閩  
省武職員弁凡遇疎防失察應行查參者均令該提鎮等揭送總  
督分別議處又稱外省秋錄所擬情實係督撫同司道於會審時  
密定並不先行明示儻於定案時部文先聲明情實外省鈔案轉  
行人人共曉秋決期遠致有自戕逸脫等事請於行文時將應擬  
情實一節另行密咨均下部議行二十三年奏新頒定例凡州縣  
相驗初供及正犯到案日期俱應咨部存案立法周詳猶有踰越  
分限之處緣州縣相驗通報後每觀望上司意指俟督撫批轉始  
行覆審其間延擱證佐候審廢時失業而刁黠犯屬往往尋覓訟  
師打點房差避重就輕令審官多方究詰追輸服成招限已屆滿

臣詳明督撫通行各府州縣凡人命相驗後如案犯已齊一面具  
文通詳一面卽由府解司不必候批始行提縣至相驗後或案犯  
未齊如首犯已到卽以首犯到案起限速行審結未獲餘犯聲明  
獲日另結若從犯先到供吐確實亦卽先結從罪一面勒限嚴緝  
正犯究結儻承審官延挨不辦立即查照違限月日揭報參處二  
十四年奏漳泉二府建有府監其收禁不過解府審轉之犯空房  
頗多平和龍溪漳浦晉江同安五縣監犯多至百餘名及數十名  
不等請將各該縣收禁臺屬重囚提撥該府監收禁責成司獄防  
範又奏各省督撫藩臬三年例準入 覲同知通判州縣亦定於  
十年引 見惟道府未定有年限應酌以六年爲期俱 從之二

十六年擢廣東布政使二十七年奏向例官員具結請封於祖母  
與母下聲注係室女並無再醮等語再醮二字爲巾幗所羞稱人  
子所不忍道請節去此二字得旨嘉獎二十八年丁父憂三十  
年服闋赴京候補十一月署兵部侍郎三十一年正月實授十月  
諭曰史奕昂朕念其大學士史貽直之子且曾任藩司辦事尙  
無貽誤服闋來京候補其階級與侍郎相等是以擢兵部侍郎此  
係朕重念老臣格外推恩之曠典伊履任兵部以來屢經召見察  
其言語舉動雖似小有聰明而其不能安分之意時復流露偶值  
召對之次諭及尙屬解事應隨處留心此原不過令其於日行事  
件稽覈司員勤惰查察書役弊端而已乃伊恃有此諭遽爾沾沾



自喜大言不慚遂欲獨任侵權放恣自用意似部務專任伊一人者奇成額奏伊在部面斥彭啟豐有不稱尙書只宜爲司員之語詢之彭啟豐稱史奕昂並無此言但其平日有願爲外任之意史奕昂希心外任如果其才堪封疆朕豈不欲多得一人任使若史奕昂用爲巡撫其辦事斷不及周琬而干咎必更有甚於周琬者周琬操守尙可保若史奕昂則並操守亦不可信矣又史奕昂因朕萬壽曾與鍾音同日呈進貢物朕以侍郎秩居二品原非分所應進是以一體卻回並無歧視迨後申飭王檢進貢諭旨內有聯上下之情一語史奕昂未免退有後言向同官言遂有我等不用聯情之語史奕昂如出之有心敢於怨望卽置之重辟亦所應得

但深知其平素輕率妄談心口多不能相應故不加深究然其在部甚不安靜總因器小易盈不能承受恩澤本應重懲示儆究念其爲老臣之子姑從寬降爲三品卿銜令其回籍閉戶讀書變化氣質數年後如能改悔自新將來或再加恩錄用亦未可定儻在家仍怙惡不悛則是自取罪戾耳四十一年 上幸闕里奕昂詣行在迎鑾 賞二品職銜五十年 上以國慶舉千叟宴禮奕昂與焉五十六年卒

右 國史館本傳

公姓史諱奕昂字吉甫號抑堂漢溧陽壯侯之裔世居夏莊祖夔康熙壬戌翰林官至宮詹父貽直歷仕 三朝官文淵閣大學士

兼吏部尙書諡文靖有子三人公其次也雍正四年 世宗欽賜  
諸大臣子弟舉人文靖公愛公聰敏意屬公公讓於長兄奕簪而  
已亦旋中順天鄉試乙科以恩蔭授刑部山西司員外郎出爲山  
東兗沂曹道調運河道公長不踰中人而風骨秀整有守有爲乾  
隆十六年黃河決豫州自陽武建瓴而下穿張秋之挂劍臺勢洶  
洶不止議者或欲塞臺口或欲扣麥田下流公皆不可請於河帥  
顧公曰上源不斷而徒治下流無益也爲今計宜聯東西會爲一  
局先塞陽武咽喉乃從事於東棄故河開新河築兩隄如翼遏水  
北行則河力自退如其議水患果除會有 旨命協辦南河石料  
濟甯乏船公命停運糧艘運石以往爲漕帥所劾亡何南河奏他

省協濟之石未到而東省協濟之石全輸 上知公有才免其處  
分旋 命攝甘肅布政使辦理軍需時 王師征準噶爾故事兵  
四名所過處供肴烝一席健兒呼吹州縣苦之公奏官兵原有口  
糧按站支給請飭州縣改所供爲牛羊乾脯俾兵且食且走免稽  
行程 上可其奏皋蘭令奉將軍嚴檄限五日內解送穀袋三千  
令錯愕無措公命各典鋪將質押民間糧食袋借出記數責成押  
運官運畢歸還不三日而事辦當是時甘肅路遠自涇州起至甘  
肅共二十餘站尖宿五十餘處一路塵市甯謐兵無驛騷二十年  
補授福建按察使閩故多盜南洲積賊范某渠魁也有拳勇歷任  
不能擒公訪知賊頗孝乃拘其母以招之范果出請死公許自新

命縛羣盜以贖范涕泣叩頭去終公之任不再犯法公又多置哨  
船增營兵按月輪巡全部肅然每訊囚反覆詳審不得其情不止  
有邱廷華者姦同舍生致死事屬暗昧誣引他人前臬使獄已具  
矣公鉤距得實力爭於大府前訊釋無辜而置廷華於法在閩六  
年 天子擢公廣東布政使公感 上恩益奮奏首領佐雜雖微  
員有佐理之任宜加甄別繕摺呈 覽不必拘六年俸滿之例奏  
雲貴川廣路遠大員丁艱宜速奏限驛行四百里免懸缺久待奏  
國家封典原以教孝也今見請封生母供結內注並非再醮二  
字殊乖忠厚傷人子之心按結內既稱某人室女以禮聘娶則非  
再醮可知何必多此詞累疏入 上皆嘉許飭部頒行瓊州舉人

某請咨入都吏嫌用印處殘損駁回州文公念瓊州隔海往返甚艱命補藩印給發吏爭無此例公不聽次日出行此人持香跪謝方知擾破州文者卽吏所爲作脅索張本公之精神淵箸細事不遺皆此類也丁文靖公憂服闋入都 聖眷益隆驟遷兵部右侍郎晝日三接行將大用同官忌之以蜚語搆公 天子休公於家與三品銜回籍讀書公遵 旨掩扉足不入城家有 賜書數萬卷朝夕自課葺文靖公故園蒔花栽竹嘯詠其閒雖高年猶臨帖作楷神似晉人家居後疊次祝 釐迎 駕 上必召見 温諭寵錫復二品原銜五十年與千叟宴賡歌賦詩 恩賜稠疊士論榮之辛亥仲秋公慶八十生辰仲冬四日無疾遽終子八人□□

公家住紅泉書屋每晚公必命童子提鐙而出絮語生平決某獄  
辦某案漏下四鼓猶娓娓不休其卓然可傳者無慮數十事惜子  
年衰善忘不及筆記而今又十年矣諸公子均予銘墓不能如當  
年撰吾師神道碑之詳嗚呼余其負公也夫以某年某月某日葬

某銘曰

槃槃史公炯介明淑端右之才旌車之族眞想在衿精神滿腹既  
勤施於四方亦遂心於初服爾壽爾康無適無莫爛其盈庭森蘭  
挺玉欺魄無傷神霄有錄以一個臣享九五福倜然逝矣如客不  
速又何必絮語諄諄而啟予之手啟予之足

右墓誌銘袁枚撰

乾隆十六年夏六月二十八日黃河決豫州自陽武建瓴而下出延津逾長垣東明達齊魯壽張東阿等郡川瀆來匯如馬逸不止秋七月二十日水穿張秋之挂劍臺而東由大清河入海當衝者城不沒三版民怔忡無措號泣者相環諸河官色變而言隤或請塞挂劍臺口或請拍麥田下疏其流或請貸百姓金聽自遷兗沂道史公抑堂止之下令曰築南北隄二百丈毋稍違緩成水不左右衝民稍安公乃上書總河顧公曰挂劍口已爲江河矣黃流稽天隄根茫茫將焉置土石欲挑濬者此刷彼淤畚鍤無所施夫上源不斷徒急下流是屋梁之崩而輔以數杙之支不缺則敗爲今



計宜聯豫東兩省爲一局急塞陽武咽喉旣斷流乃從事於東東  
所漫處宜棄故瀆開新河易西岸爲東岸秀築兩隄如翼東而張  
之增二壩過水北行如此則河力漸退功可成有他變某請身當  
之書上當事者壯公言報曰可公乃駐節河上轉巨石仆大木審  
形司馬別駕行飭料丞若尉行冬十一月十一日塞陽武口十二  
月朔黃流絕坡河積水消再四日告成清流如鏡水波不揚萬姓  
曲踊百貨魚貫費帑一萬有奇是役也微史公幾殆袁枚自陝歸  
泊濟甯公以其狀來曰夫河決無期而算須有定余豈矜而自功  
耀後人哉然通變之用多所參證則詳而益明昔趙充國屯田於  
邊封上文書曰須爲後法余慕古人之用心需子之筆墨將使後

之治河者有所考也枚曰諾遂紀其實於碑

右張秋治河記袁枚撰

國朝名媛類行不考

卷之十五

五

國朝耆獻類徵初編卷八十五補錄

卿貳四十五

涂逢震

大銀臺南昌涂公卒十有六年而夫人卒公子夫婦先夫人卒遺孫穉不勝喪公女適於熊者攜其孤子女大歸撫於尊甫兩粵中丞公任所又四年將以母棺耐窆於銀臺公白馬岡之域遣奴奉狀屬士銓爲合誌士銓故師事銀臺公又與公壻之福同甲旣稔公言行德業益敬公女孀節而明孝義不敢辭按狀公諱逢震字京伯號石溪生有異稟視日不眩三齡時預知鄰家將火強母避去得免又黑夜叱鼠賊人爭奇之旣長有聲庠序雍正元年舉於

鄉官中書直軍機久稱勤能乾隆己未秩滿當外任旋以一甲第  
二人及第爲 國朝本省登鼎甲者始由編修出充宣諭化導使  
未散館卽授中允歷侍讀晉學士充講官入直 上書房再擢內  
閣學士升工部左侍郎距釋褐才兩載耳壬戌充會試同考官乙  
丑主武會試甲戌充校閱落卷官充陝西河南兩省香帛使扈從  
東陵者一熱河者二公具幹濟才奉使江南歷江蘇淮揚州郡  
宣布 朝廷德意愷切感孚萬心悅服薄俗爲之一變又體察時  
政商榷舉廢大吏信公誠謹廉潔不以爲嫌公在工部三年清滌  
工程開銷積案又條注應準則例奸胥束手凡以工代賑始事之  
時吏輒覆藏不發事後覈減過半追補苦累公申明定例先行咨

會俾無多發追償之擾帑亦無耗公私稱便其通達政體曲盡人情類此故每履一任則同官倚以集事戊辰以製造 孝賢皇后冊寶未善落職明年補光祿少卿歷少常洊通政公孝友恬澹考諱璋妣辜太夫人公幼隨父任歷清河項城令稱名宦政績別見家傳公時贊佐有方識者目爲台輔之器祖柩在堂洪水暴至公繫棺屋梁哭拜三日而水不踰其闕先產五十畝公盡讓於兄逢乾未幾粥且盡公念兄且七十使迎赴京邸至天津而歿公慟歸其喪內行純密蓋如是夫人李氏系出吉水爲大司農振裕公孫考歲貢生景暹四齡失恃四德克備年二十又一子歸以孝婦稱公官中書夫人畱養及二親葬後始赴京任內治節儉然公喜簞

賓客中饋豐美異常鄉人困逆旅者公惠最周夫人典質贖之三  
十年弗少倦戊寅冬公眷念先隴乞假歸以貧不能挾家去攜子  
先返明年上巳泊吳門公登虎邱折玉蘭一枝返於舟假寐而卒  
距生康熙某年享壽若干歲夫人奔赴哭屢絕既歸賃屋省垣以  
居薄田供饋粥不及百畝旋以分賠太常祭器盡粥以償於是家  
壁立日再食糜而已夫人生康熙甲申乾隆癸巳二月四日夫人  
周七十子媳皆已歿女自浙撫任來省視夫人鬱鬱老病越誕辰  
十日而卒封淑人子廷元國子監生媳李氏臨川工部左侍郎友  
棠公女孫紹祖公精書翰平生不欺人與人交淡以永立朝無所  
阿附惟循理敬事而已銘曰

端而能達足任其重顯始晦終弗竟厥用革薄以誠考工則中拈  
花而化愁遺斯慟同穴維賢樂邱與共女銜黃壤豐碑手礮祖德  
可述孫雛將玗黻佩借藏如山不動

右墓誌銘蔣士銓撰



日本書紀卷之五

三

國朝耆獻類徵初編卷八十六目錄

卿貳四十六

程巖

儲麟趾

申甫

覺羅巴延三

常青

Table with 10 empty vertical columns and a header row on the right side.

國朝	卷八	一	二	三										

國朝耆獻類徵初編卷八十六

通奉大夫前署江西巡撫江西布政使司布政使湘陰李桓輯

卿貳四十六

程巖

程巖江西鉛山人乾隆四年進士改庶吉士七年散館授檢討十二年大考二等旋充陝西鄉試正考官十三年六月命提督廣東肇高學政七月擢翰林院侍讀十四年遷右庶子十五年八月調廣韶學政九月奏言臣查雍正七年奉 上諭廣東盜案繁多民俗獷悍應設觀風整俗使一員化導訓飭令風俗人心漸歸淳厚又該省督撫奏稱粵東士子鬻陵未能端謹請設學政二員一

司文衡一飭士行以爲造就人才之地朕思文行本屬相關未可  
離而爲二況廣東地方遼廓若司文司行分屬兩員仍各徧歷通  
省耳目聞見恐有未周著設學政兩員按該省地方分管考試督  
察其如何分府及一應學政事宜著大學士會同該部議奏尋覆  
准廣東學政一員改爲廣韶學政將廣韶南惠潮五府並連州一  
州及所屬州縣共五十二學分與廣韶學政考試督察添設學政  
一員爲肇高學政將肇高廉雷瓊五府並羅定一州及所屬州縣  
共四十五學分與肇高學政考試督察各遵行在案臣渥荷 天  
恩於乾隆十三年八月內抵肇高學政任歲科二試通歷五府一  
州見風俗尚屬簡樸士氣猶近質實雷瓊二府遠處天末讀書士

子雖有僻陋之弊已無驕陵之習仰見我 皇上德教誕敷仁漸義摩日出海隅罔不率俾矣第思添設肇高學政一缺原爲士習未端而設今士子沐浴二十餘年 教澤漸摩已久似宜仍照雍正七年以前總設廣東學政一員通行考試督察較他省覺爲畫一至廣東一省所屬十府三州合計二十六箇月歲科二試原可周徧惟瓊州一府僻在海外守候風信不無稽遲如蒙 兪允請將羅定州一州二縣歸肇慶府駐劄衙門考試南雄州並所轄二縣歸韶州府駐劄衙門考試俱係相近生童往來甚便而學政得以二處往返之餘日爲守候渡海之期時日寬展不至周章至衙門所設吏胥及應置辦事宜俱照雍正七年以前辦理 上允之

又奏言高雷廉地方野多曠土其平岡山地不可開墾者固不少而土係黑壤可墾令成熟者甚多請飭下督撫相其高下原隰諭民開墾諭曰樹藝爲民食攸關如果土廣人稀地方官乘時勸墾俾閭閻耕鑿有資自屬足民要務但小民謀生之計自極周備使其地種植可施斷無袖手拋荒之理其歷來曠廢者或係斤鹵磽确卽桑麻雜植萬難施功是以置爲隙地亦未可定著將原摺令該督陳大受閱看畱心體查若其地實有餘利自當設立規條招徠勸墾以裨生計若量其情形本難開闢而欲藉言利民抑勒從事胥吏等或奉行不善適足生事滋擾其端亦不可開也十七年擢順天府府尹仍畱學政任十八年任滿回京十九年疏言

蘄運等河因大雨傾注河水漲發聞有漫潰民墟之處蘄州  
東安永清甯河實坻固安等州縣地勢濱河低窪恐地方官不卽  
加緊疏濬或致有妨禾稼奏入 上命直隸總督方觀承詳行查  
勘尋奏今年雨水過多蘄州之蘄運河玉田之還鄉河間有漫溢  
豐潤甯河二縣村莊亦被淹沒樂亭之深河晉州藁城東鹿之滹  
沱河亦多漲發出岸淹及田畝惟蘄州被水最重見在照例撫卹  
蘄運二河漫口見已趕緊堵築至永定附近窪地惟武清縣東南  
鄉報有積水俟查明再辦二十四年九月授光祿寺卿十二月調  
太常寺卿二十五年擢內閣學士兼禮部侍郎銜二十七年正月  
遷吏部右侍郎六月 命提督順天學政三十年閏二月調禮部



右侍郎仍留學政任九年任滿回京三十一年三月充會試知貢  
舉十月轉左侍郎十二月因親老奏請終養 上允之三十三年  
卒子爲琳福建候補知縣

右 國史館本傳

吾鄉鉛山在明則費相國以文譽清節領袖一時歸然稱人望焉  
至我 朝則少宗伯海蒼程公實爲繼起公名巖字巨山海蒼其  
別號也生有異徵自成童時卽知名當世甫弱冠中甲辰副榜戊  
午登賢書己未成進士先是每科會試榜發大臣舉堪入翰林者  
是歲 上罷保舉法引 見時 上親加甄拔公名入選兼習國  
書壬戌徵館 御試一等授檢討丁卯典試陝西次年充日講起

居注官旋督學廣東凡奉使瀕行例請 訓公所奏對悉當甫出  
都途次擢翰林院侍讀廣東舊爲兩學政一爲肇高一爲廣韶公  
所逮肇高五府一州也顧試期頗覺寬閒而一省分兩學政政教  
歧出非同文之治三載報滿公奏請併一爲便適調任廣韶未幾  
卽以公爲廣東全省學政超授順天府尹仍畱學政任嶺南人士  
咸慶得師有前惠後程之謠惠卽江南紅豆先生也任滿赴京兆  
視事有異政境無蝗災永定河漫口溢公聞報卽單騎馳至武清  
時河官下埽輒隨水去計無所出公急令斫柳枝代之遂挂淤決  
口旋塞其鄰境非順天所屬制府未卽至公輒爲之相度緩急視  
河流所趨爲預防計隄完得無旁溢公奔走於河干者兩旬有餘

日纔一食夜則露處隄上自是得寒嗽疾久弗愈嗣丁內艱服闋  
補光祿卿晉太常授內閣學士兼禮部侍郎是歲庚辰充殿試讀  
卷官秋大獮隨 幸木蘭辛巳以 慈慶推 恩封贈三世如其  
官曾祖母以下皆夫人壬午 上南巡隨 駕卽 行在授吏部  
右侍郎次年癸未 命視學直隸凡所條教一如粵東時既報滿  
轉禮部左侍郎充丙戌會試知貢舉既畢事公病嗽益劇以封翁  
年近八旬歸思愈切遂陳請終養次年春買舟南下都門祖道卿  
士大夫咸在無不歎且羨者進退以禮始終不逾近世九列所未  
有也此乾隆丁亥年事至戊子仍以舊恙復發七月十八日卒於  
里第距生於康熙五十三年甲午歲五月初十日得年五十有五

嗚呼公在閩部卿寺中以清節著其任京兆也又甚耐繁劇如老吏人以爲莫測至其三視學政收得人效文教以興則公之緒餘及之也余識公於諸生時及己未爲同年入翰林爲同直官侍郎爲同列公之長子爲余壻又嫺婭相友善誌公墓繫余之任也曷敢以不文謝公配潘夫人同邑望族以賢淑著先公庚辰年二月二十七日歿於京師官舍距生於康熙甲午年十一月二十五日得年四十七歲生子一名爲琳己卯舉人分發福建試用知縣次爲珽又次爲瑒側室嚴氏生尙幼嗚呼聞公捐館時雷電晦暝風雨大作稍定公啟目眎謂左右曰吾將去矣所憾者君恩未報事親之事未畢耳無一語及他事此非神明素定生有自來安能

若是耶銘曰

山川清淑鍾爲偉人維賈文憲舊有令聞公竇代起照耀冠紳出  
作師表入爲名臣用光前緒垂裕後昆青山峩峩泉流汙汙墓門  
一闕千秋萬春斯文不朽典型具存

右墓誌銘裘曰修撰

程公諱巖字巨山號海蒼鉛山人系出梁新安太守諱靈洗諡忠  
壯公長子文季之後唐自婺源遷樂平杭橋宋遷上饒元末始遷  
鉛山洪武初公二世祖中科目官禮部至公十有三世爲邑望族  
公性明敏年十七補庠生越五年爲 今皇帝改元開科公得副  
鄉貢戊午己未連授科第改庶吉士散館授檢討丁卯典秦試明

年充講官出爲肇高學政旋擢侍讀明年授右庶子公疏請廣東  
兩學政可以一官兼督部議報可上卽敕公任之授京尹仍  
留粵左甲戌任滿赴京職己卯以母憂服闋擢光祿卿卽晉太常  
卿明年擢內閣學士充廷試讀卷官壬午扈從南巡行在擢吏  
部右侍郎明年視直隸學越二歲調禮部右侍郎丙戌轉左侍郎  
冬乞終養明年歸里甫一載以痼疾卒於家公學術醇正汲汲以  
培養人才爲本居官不憚勞瘁務盡厥職性沖和平易不矯立岸  
異而操持謹密使人親愛之而不可狎在肇高任憫士昧師承文  
章淺陋乃選先正時藝一帙曰文轍又評隲八家古文刊給諸生  
俾知取法試日口授指畫至吻燥不倦以是庚午鄉舉肇高所屬

得廿餘人繼此領解首官翰林者勃然蜂起爲向所未有潮州食穀仰給潮陽揭陽辛未公按試日值歲歉米貴公度兩邑士子所攜食米必裕諭先試二學越三日竣事凡七千人被黜者鬻米而去得萬餘石市價乃平粵士謂學使之賢者自惠公士奇而後得公爲二云尹京日三河武清等縣秋潦潰隄甚烈公馳勘洶洶偏馬足菱櫂下卽滾浪去存立者無人色公遽令斫柳枝投之淤積所至觸挂不得去隄岸以成其臨變急智類如此公視學廣東直隸兩主選拔皆稱得士當覆覈日他省皆有汰除獨公所舉如故而直隸乙酉之榜出公門下者六十餘人稱極盛焉公體清癯讀書刻苦又盡瘁王事勤水時非順天所屬者公皆往撫入告得賑

馳雨水中二旬至廢寢食風溼疹厲病益深及居母喪又廬墓旁  
熱地以是氣血寢衰肺且痿故年五十有五不克終養事而卒時  
論惜之蓋戊子七月十八日也公生康熙甲午五月初十日配潘  
夫人先公九年卒潘夫人生一子爲琳己卯舉人官閩令女一人  
爲衍聖公孔昭煥繼室爲珽爲瑒皆庶出辛巳公在閣學任遇  
覃恩高曾祖考妣皆得封贈如其官公恂恂然受 上知凡奏對  
皆稱 旨賜賚無算庚寅九月葬於上饒姚山

太史氏曰伊川云學進則識進識進則量進程公出入承明三十  
年不說不隨克盡職守從容恬退有太平鼎輔之器隨所任使皆  
有施行蓋以度勝也吾聞公生時庭有樂聲異香在室死之日雷



電以風餘馨徐遠其來有自矣史稱王曾進退詳雅詞直氣和韓琦未嘗峻折人過當官理事汗浹不倦公兼有之而其年不永於戲天限之也

右傳蔣士銓撰

儲麟趾

先生居諫院有直聲晚年習靜得內養嘗謂少年時病咯血某禪師教以靜坐數息一日自視胸腹如琉璃洞見五臟霍然而愈

右詩萃潘瑛撰

按儲公字梅夫江蘇宜興人乾隆己未進士官至宗人府府丞有雙樹軒集並奏疏

										145-298

申甫

乾隆元年徵博學鴻詞之士用備館閣而大學士嵇文敏公會筠以申君甫薦於朝是時薦在京輦者凡百數十人而君之詩名最著其後君雖不第尋以中書舍人歷官至副都御史又好推獎士類一語半律之士輒吟賞嘉歎士大夫之言詩者走集其門故稱詩於都下咸以君爲宗君名甫字及甫其先系出池陽後遷於揚州曾祖懿與祖元會父承德三世皆贈資政大夫如君官君少敏悟下筆輒見新意乾隆六年辛酉順天鄉試中式明年試授中書舍人九年在軍機處行走十四年擢內閣侍讀十五年遷刑部郎中十八年授順天府府丞兼學政事京師金臺書院士于膏

火不足用謀於總督方公觀承撥保定蓮花書院餘貲以佐之自是來學者益眾二十八年授光祿寺卿二十九年授大理寺卿三十一年授都察院左副都御史三十二年以事降調三十三年補太僕寺少卿尋遷通政使三十九年仍授左副都御史如故四十二年病脾泄久而不愈以六月十五日卒於寓邸年七十三有笏山詩集十卷君兄弟三人兄來君所家雖貧衣服飲饌必加於己一等及兄與弟歿招其從子來於京飲食教誨之直軍機處凡三十餘年中更戡金川討準夷平定回部軍書旁午日不暇給君戴星而入比暮而歸爲 聖主所深知宰臣所倚任與胡巡撫寶琮蔣侍郎炳同至於奉 命起草每奏進必當 上意政事填委手

批口授皆能明晰曉暢洞中機要則二君或不逮焉然君最以詩  
鳴嘗以重陽日同查禮諸君集陶然亭君詩先成四座閣筆稱歎  
先時寓時晴齋爲汪文端公故第春暮藤花開必招集同志畱連  
小飲又賞芍藥於豐臺尋菊於憫忠寺歲以爲常故詩亦最夥君  
詩原於白香山出入於劍南石湖放而之楊誠齋在 本朝於查  
悔餘爲近每扈從 幸熱河恭和 御製詩旣進傳 旨嘉賞故  
世益以其詩爲工嗚呼 今上元二之間昭宣鴻朗天下文人稱  
爲極盛其薦而遇者若大學士劉文定公綸雲南總督劉公藻太  
僕寺卿陳君兆崙其薦雖未遇而致身貴顯者若尙書裘文達公  
曰修沈文愨公德潛左都御史金公德瑛若仕未甚達與偃蹇以

終者爲桑調元符曾厲鶚胡天游劉大槐方貞觀等然衡其著議  
豈以遇不遇爲增損歟君仰受 聖天子特達之知晉登九列不  
惟知其人且知其詩文學政事兼而有之然則君詩固必傳於世  
而元二之間人文蔚起不可於君徵之哉君配李氏年六十餘妾  
連得四子高佑嘉佑同佑永佑今已嶄然露頭角能讀書是年某  
月歸其柩於揚州明年某月葬於某原高佑等使來請銘乃銘曰  
少作名士晚稱鉅公以昌其詩爲世所宗豈惟傳世聞於 九重  
西清東觀我躡君蹤每見退食吟嘯雍容匪無德行協於友恭匪  
無政事達於兵戎長吟獨謠乃性所鍾視今罕儷與古爲從嗜君  
詩者其曷斯封

右墓誌銘王昶撰

副憲隨宦遊越中受知於嵇公會筠得薦舉由中翰入軍機 聖  
主知遇之隆至斯極矣而復扈從 幸熱河恭和 御製詩傳旨  
嘉賞臯夔拜不是過也詩律工整五言如雨聲先到樹山色半  
歸雲七言如千絲屋角收殘雨一線山腰漏夕陽客路蕭條多聚  
散詩人流落滿江湖皆雅近自然

右寄心齋詩話符葆森撰



國朝詩林卷之十一

--	--	--	--	--	--	--	--	--	--

覺羅巴延三

覺羅巴延三正紅旗人乾隆六年由官學生考授內閣中書九年  
補缺十七年遷侍讀二十年調戶部銀庫員外郎二十二年擢湖  
廣道監察御史二十四年遷刑科給事中二十六年轉禮科掌印  
給事中二十八年授公中佐領三十三年授直隸大名道三十六  
年擢河南布政使三十七年升陝西巡撫三十八年正月 命署  
山西巡撫十一月調湖南仍署山西撫篆時河東鹽池歉收 命  
巴延三查辦奏解州有小池六康熙年間因大池被淹曾經開曬  
接濟今大池產鹽不敷並開以廣澆曬俟足額後仍舊封禁議行  
四十年閏十月山西藩司黃檢奏請酌糶社義二倉息穀遵 旨

駁議尋奏各廳州縣息穀盈絀不齊應視地方情形酌糶臣通行各屬據各廳州縣將應存應糶數目酌定由道府會覈具詳計通省可酌糶三十三萬七千八百餘石請照時價出糶毋庸減價以杜侵漁其銀解貯司庫遇有地方農田水利公事必須速辦者奏明動用 硃批如所議行十一月偕鹽政常齡奏河東鹽政價未平安請將前增價二釐再展限三年經部議駁得 旨該處場價未平其小鹽池六處甫經開採接濟所得贏餘未能補足前兩年歉收之數商力不無拮据著加恩照該撫等所請將從前暫增二釐鹽價再行展限三年俾轉運益資充裕四十一年七月實授山西巡撫十月奏太原縣城基低窪夏秋大雨時行西山水勢由城

西風峪口建瓴而下直注城根前明正德年間距口里許築石堰  
遏水北流開渠歸入汾河民無水患因年久石堰衝壞舊渠淤塞  
水勢漸至縣城據士民呈請修復臣於巡閱之便親至覆勘應補  
築以護城垣得 旨嘉允四十三年五月 諭曰向來河東鹽政  
與山西巡撫因各有專司未免意存畛域於辦理鹽務每多掣肘  
河東鹽政事務本簡非兩淮長蘆可比況直省中如浙江兩廣福  
建俱係督撫兼理鹽政較爲妥協河東鹽政卽著該撫巴延三兼  
管至一切鹽務原有運使專辦今得該撫統轄俾事體歸一呼應  
更靈於商民均屬有益並著爲例四十四年二月黃檢私刊伊祖  
大學士黃廷桂奏疏 諭曰黃檢旣爲伊祖黃廷桂刊刻奏疏閱

時必久巴延三豈無見聞其刻成後亦必送於該撫更不得諉爲未覩巴延三見黃檢如此謬妄並不卽行劾奏殊屬非是況朕前經降旨督撫等奏摺奉有硃批者槩不得引入章奏巴延三曾爲軍機章京於此事更當深悉乃於黃檢妄行刊刻之事視爲泛常竟不具奏天良何在巴延三著傳旨嚴行申飭旋奏請議處部議革職得旨從寬留任六月奏接准直隸正定鎮總兵陳大用咨送匿名揭帖一紙指告高平縣民人任天祥等傳習邪教謀爲不軌隨委該司諱尚忠馳查驗訊據天祥供稱平日並無仇家因何被誣之由不能自解見逮天祥等赴省嚴訊諭曰如任天祥等果有喫齋爲匪情事如匿名揭帖所指自應嚴切跟究分別查辦

今譚尙忠既親至各家逐細搜查並無不法經卷及違礙書本地鄰等亦稱其實係安分良民眾口如一其爲奸徒懷挾私仇計圖傾陷已無疑矣自應卽將任天祥等立時省釋甯家乃譚尙忠復將伊等押赴省城殊屬非是而巴延三亦稱任天祥等到省督率司道嚴加查訊亦太不曉事矣大抵匿名揭帖出於挾仇陷害者居多本有立案不行之例第恐同一誣陷而其中情節各殊或所指尙屬有因自不可竟不問是以令督撫等遇有匿名揭帖之案卽派員親赴所指之家詳細搜查其是非虛實無難立辨如果盡屬虛誣自當立時開釋俾不至拖累無辜且須訊得匿名正犯使鬼蜮無從遁形既不至涉顛預兼可做奸頑以全良善督撫等

辦理此等案件均當體貼此意妥辦今任天祥等各家譚尙忠既經查明實係被人誣陷復又押赴省城其意何居而巴延三既知匿名揭帖所指全誣尙復有何可訊豈欲以此見其辦事認真而不顧事情之誠僞乎若如此辦事則凡溫飽良民一經奸徒捏陷雖審明誣屈仍不免拘解往來雖事後得釋其人早已傾家蕩產矣徒使善良受累無窮而奸匪轉得逞其私願其錯謬不太甚乎任天祥等俱著卽行釋放並查明各家赴省往回費用令譚尙忠加倍罰出以示薄懲巴延三著傳旨嚴行申飭再此案匿名揭帖任天祥等既未指出素有仇家其正犯自在正定一帶且原係公文印封損破方可攬入匿名揭帖其由何站損動無難挨次嚴查

卽可跟究正犯蹤跡今此案爲日已久何以尙無端倪著傳諭楊景素卽飭妥速挨查務獲正犯審擬具奏十二月擢兩廣總督兼管海關事務四十五年四月 諭曰前巴延三赴任時朕令將原任兩廣總督李侍堯楊景素桂林三人居官操守若何密訪確實專摺具奏茲據奏到已將原摺畱中楊景素身任總督乃有操守不謹之事設使其人尙在自當查辦治罪今已身故毋庸復事追求以示始終保全至李侍堯自調任滇省後賊私壘覈見在和珅等前往查審罪狀業經敗露朕自不能爲之曲貸巴延三密摺內何以尙爲許可耶朕於督撫功罪刑賞一秉至公從不宥爲己甚之舉亦不宥爲弛法之事此內外諸臣所共見共聞者也巴延三



新任總督務宜諸事留心整飭潔己奉公以李侍堯諸人爲前車之鑒庶不負朕委任之意也將此諭令巴延三知之六月奏海洋盜犯胡友南等肆劫拒捕傷斃官兵見將就獲各犯依律寘法諭曰此案盜犯於洋面屢行搶劫及至官兵往捕盜犯韓廣石竟敢用槍抵拒將把總譚瑞槍傷墮海兵丁陳元秀等截傷落水淹溺情罪重大非尋常江洋大盜搶劫傷人者可比此等盜犯竟應從重問擬凌遲其親屬亦應發遣以昭懲儆至該犯等先在沙灣河面見雙桅舊船卽起意糾買修理偷越出口已屬人所共見而摺內復稱原籍牌頭保甲無從覺察均無庸議辦理尤爲未協及失察私藏軍器並偷漏出口之疎防文武各員雖係聲明照例查

參究係該督撫等平時不能整頓弁兵實力巡查所致除將此案  
拏獲各犯出力之弁兵仍著加恩獎賞外巴延三到任未久此次  
姑免處分其未獲各犯著該督撫嚴行躡緝剋期務獲歸案嚴辦  
八月偕撫臣李湖奏查本年各屬通報盜案未及半載多至四十  
餘件檢查案犯居址惟番禺縣之沙灣茭塘二處最多卽飭廣州  
府知府李天培密探各犯之蹤跡並令各海口鎮營帶兵堵截搜  
捕後就縛劇盜凌大頭蓉等一百四十七名未獲首夥各盜復嚴  
飭搜拏務盡根株見獲各盜凡巨魁首惡及行劫多次持械傷人  
者應嚴辦以昭炯戒 諭曰巴延三等奏搜捕沙灣茭塘等處大  
夥劇盜一摺據稱派委知府李天培密探各盜散處沙灣茭塘各

鄉村內有凌大頭蓉等陸續歸家派撥附近各縣及委員帶領兵  
役分路堵截海口進村搜捕前後緝獲盜犯共一百四十七名見  
在督同司道審明盜首巨惡先行正法其未獲首夥各盜購線搜  
拏務期淨盡等語此案海洋大盜糾夥百餘人肆行劫掠貽害地  
方非尋常盜案可比巴延三到任未久卽能畱心躡訪派委員弁  
兵役堵截搜拏不動聲色辦理甚屬可嘉緝盜安民副朕用爲督  
撫之意巴延三李湖俱交部議敘部議加一級又奏沙灣菱塘劇  
盜雖經四路嚴搜但恐日久或懈臣親往該處督同臬司查察員  
弁兵役有無疎漏就近分別勸懲得 旨嘉獎四十六年二月奏  
臣詣沙菱各處查勘情形一切移駐參遊丞倅增添汛兵事咨臣

次第體察分析覈議 破批好詳妥爲之以期永久無弊尋借李  
湖條奏防範沙灣菱塘各事宜一沙灣之坑頭村與菱塘接壤爲  
盜匪窩巢請將番禺縣縣丞移駐並改設廳員以資彈壓一石碁  
村偏臨獅子洋爲舟行總匯之地應設專管巡防一沙菱水汛最  
關緊要汛房應移涌口並酌添弁兵一水汛應安設哨船以供追  
捕一石碁改設專營宜與虎門左翼鎮沿海各口水師哨船聯絡  
聲援一沙菱各村民船應分別編號給與印照責廳員查察一新  
設廳員應定爲在外揀調之缺並兩巡檢及將領各官應照海疆  
例五年奏據署瓊州府知府丁亭稟稱黎匪糾集各村黎持械搶劫  
傷人經該署府帶兵前往查拏查崖州樂安等處偏近五指山爲

黎人出沒之地已飛飭雷瓊鎮總兵瑞衡帶兵馳赴會勦臣亦即起程速往相機督辦 諭曰據巴延三奏崖州官坊村黎人糾集村黎持弓執刀放火劫殺民人署瓊州府知府丁亭已兼程前往督拏查究起衅根由並搶劫情事巴延三即起程前往相機督辦一面飛飭該鎮酌帶弁兵星急馳往會同妥辦等語黎匪敢於糾集人眾搶劫村莊殺害民人實屬不法即使該處村民平時或有欺壓黎人之事以致受侮不甘亦當向地方官控告辦理何得擅自仇殺此等野性難馴之匪徒不可不從嚴究辦著傳諭巴延三督同文武員弁上緊搜捕並究出起意為首及附從匪犯逐一跟究如有竄匿五指山內者務須搜查淨盡以示懲創尋奏赴崖州

途次接據丁亭稟報把總曾啟位外委胡秀芳會同巡檢黃彬查  
拏黎匪至紅頭坎地方黃彬被射身死見據拏獲黎匪列命等七  
名跟究匪黨 諭曰此次奏到之摺匪犯逞兇拒捕竟致傷斃巡  
檢其兇橫不法尤非尋常抗拒可比自應迅速勦捕該督既稱擒  
獲列命等七名卽應從此跟究匪黨嚴行搜捕區別首從從重辦  
理未便僅照尋常案件卽多辦數人俾知畏懼亦不爲過又奏瓊  
州一府孤懸海外該鎮府俱帶兵前往崖州會勦郡城左近俱有  
黎人彈壓需員當令香山協副將施國麟代辦鎮務雷瓊道吳九  
齡在雷屬盤查亦令馳回本郡彈壓並先需安撫良民方免句結  
滋患臣於途次一面飛飭勦捕一面多張告示使附近黎人各安

生業有未經從逆者准赴營投首互相擒獻以孤其黨並飭附近  
之有黎各州縣堵截以防竄逸疏入 上矚其言三月奏臣於初  
六日抵瓊據鎮道等稟報帶兵搜捕已將射斃巡檢之黎匪那岸  
擒獲訊係官坊村頭人那回爲首並查明起衅之由緣上年秋冬  
州屬短雨今春糧貴那回糾約附近村黎搶劫糧米如有抵拒卽  
逞兇忿殺實在兇匪不及百人見已生擒四十餘名槍斃三十餘  
名等因臣恐隨同附和者不止此數見在馳赴樂安督同鎮府盡  
力搜捕總須逐一拏獲盡法懲治並仰體 皇上恩威並用至意  
令良黎安生樂業 硃批此語差矣此等逆黎但知懼威豈知感  
恩乎不可存此心此乃外省了事顛頂之言因之釀禍者多矣戒

之愼之四月奏有頭塘等十二村頭人率眾投誠將首逆那回縛送到營未獲各犯見令各村頭人帶領弁兵搜拏又奏臣督率官兵於各山內覆行搜捕訪聞黎匪逃入抱隆嶺藏匿隨令良黎引路分派官兵四路圍擒當卽生擒那觜等一十九名又經各村良黎縛獻那允等四名槍斃那鴨等十九名見據良黎出具並無隱匿甘結均報 聞置那回等於法逆黎平七月奏陸豐縣匪棍林廣參等糾眾搶奪知縣李光萬聽信書役李芳等受賄包庇蒙蔽不辨以致日漸鴟張事主首告者共四十四案見獲犯九十餘名請將知縣李光萬革職拏問嚴審定擬並設法嚴拏夥黨以盡根株 命逮問李光萬又 諭曰此等不法棍徒膽敢糾約多人肆



行搶劫並結交吏役暗中把持殊屬可惡不可不實力查辦嚴究  
夥黨盡法懲治其書役李芳等敢於聽從賄囑庇匪情罪尤爲重  
大著傳諭巴延三等卽速提訊該犯等錄取確供從重定擬具奏  
十月奏擬林廣參等各犯罪名知縣李光萬請發烏魯木齊 諭  
曰日本巴延三等奏到審擬陸豐縣匪棍林廣參等糾眾搶奪各  
犯及知縣李光萬諱匿玩縱一摺已批三法司覈擬速奏矣此案  
林廣參等結交書役糾集多人肆行搶奪擾害地方知縣李光萬  
聽信書役捏飾之言畏罪延擱幾致釀成巨案該督等僅請發往  
烏魯木齊尙不足以蔽辜李光萬著發往伊犁效力贖罪以爲地  
方官延案縱匪者戒又奏九月內有不識姓名人赴轅遞呈因非

放告日期經門役等攔阻其人用刀自刎查驗身懷呈詞係廣西  
撞民覃老貴伊父覃必俊因代寫飭禁夫役碑文書役挾仇愆惡  
被修仁縣知縣台霖布杖斃特赴督轅申訴等情見委廣西按察  
使轉飭平樂府知府查辦 上以覃老貴必係情急自戕巴延三  
不免迴護瞻徇傳旨申飭復 諭曰此案覃老貴因伊父負冤杖  
斃赴轅申訴巴延三自應卽時收閱呈詞親提按問使小民冤抑  
得伸方不負封疆大員察吏安民之任乃藉稱衙門封閉必待放  
告日期始收呈狀其中軍官等所司何事一任門役攔阻以致覃  
老貴含冤莫訴情急自戕巴延三並不據實將中軍等參處試思  
總督衙門與朝廷體制孰爲尊嚴朕辦理庶政孜孜不倦凡有封

國朝通志卷之八十一  
章奏達令奏事處隨時呈進批閱從未有敢於遲壓勒阻者今巴延三以人命重案必令按照放告日期方准呈遞則平日之養尊處優不以政事爲事可知巴延三係朕加恩擢用總督乃廢弛貽誤玩視民命若此伊試捫心自問何以自安著傳旨令其自行議處迅速奏聞尋奏請交部嚴加議處並咨參署督標中軍副將米自仁部議巴延三照因循瞻顧不卽查參律降二級調用得旨改爲革職從寬畱任四十九年三月廣東監生譚達元赴京控訴鹽務總商沈翼川勒派伊弟譚體元捐助公費銀代總督採辦物件命尙書福康安往審巴延三照因公科斂所屬財物律擬革職杖徒諭曰巴延三人本拘懦朕早知其不能勝任繁劇曾向

彼云若用爾爲陝甘總督亦必如勒爾謹之庸劣無能養癰債事  
但伊倖遇地方無事所以不致貽誤卽公費一案亦係因循積弊  
究非藉端婪索巴延三已將用過銀數賠繳亦足蔽辜巴延三著  
照議革職加恩免其治罪仍俟到京再行酌量差遣另降諭旨尋  
賞三品頂帶派往哈密辦事五十二年九月授陝西巡撫五十  
二年五月奏陝省應徵錢糧全完摺內將緩徵項下帶徵已未完  
各數一併聲敘以致眉目不清得旨嚴行申飭八月十四日奏  
雷壩廳同知李景蓮派委司獄江紹文在紫柏山查緝直隸大名  
案內逆犯段文經劉勤二人形跡可疑正在盤詰適有豫省委員  
帶同眼目指認一人實係段文經一人貌似劉勤見派員迎解來

省其實係何員拏獲訊明另奏 諭曰此於十二日已據畢沅奏到係豫省委員毛師沅帶同眼目在畱壩廳地方指認拏獲是該犯自係豫省委員毛師沅所獲乃該撫尙稱查明何員首先拏獲另行具奏該省於首逆要犯既不能督率所屬實力查緝及被豫省委員拏獲又思攘以爲功實屬外省惡習將來解到審明後如該犯在該省境內逗遛藏匿各該地方官尙應查明議處該撫尙欲爲陝省屬員攘功規避地步耶巴延三著傳旨申飭十八日奏河南委員所獲各犯解省訊供一名崔學忠一名柳迎福均在畱壩生理審聽口音實係陝甘人復將崔學忠家屬解省隔別辨識僉各承認陝省眼目亦謂非段文經劉勤而豫省眼目堅強捏

指請將該犯解京交刑部嚴訊旋諭曰崔學忠既有該省眼目及伊家屬質證即使並非段文經正犯亦無足爲異但巴延三卽應於豫省眼目李均德在陝之時將因何確指爲段文經之處向李均德切實跟究則孰是孰非自可立見乃彼時既不向該眼目詳細推求復不將李均德同崔學忠等犯一併解京以憑質訊竟聽毛師沅帶回豫省巴延三本係無能之人而於此等處亦不能見及又何以辦理地方事務耶巴延三著傳旨再行申飭十二月因漢陰通判鄧瑛年老有疾疏請勒休上以勒休丞倅微員不值用特參字樣飭之五十三年九月因廓爾喀滋擾衛藏巴延三奏陝省道遠西藏文報緊要臣酌地添設腰站遇西藏文報妥速

加緊馳送 硃批好勉爲之五十四年二月署陝甘總督七月授  
戶部尙書十月以陝西巡撫任內秋審失察部議降一級畱任五  
十五年二月署吏部尙書十月以考試滿洲繙譯生員取中試卷  
清字錯譌部議降二級調用 諭從寬畱任五十六年十月陝甘  
督臣勒保奏修理潼關城工告竣 命侍郎和琳馳往驗收和琳  
尋奏該處工程前經巴延三德成會同勘估時將不應添之水關  
泊岸等工率行浮估並城上添建堆房七十二座尤爲虛糜帑項  
以致用銀一百三十餘萬應大加刪減 命軍機大臣傳詢巴延  
三德成均自引咎請治罪奉 旨革任 命巴延三自備資斧往  
潼關工所同和琳講求尋 諭曰巴延三旣知德成勘估過當與

之講論不從卽應據實奏聞乃亦隨同附和固難辭咎但念其本  
係庸懦無能之人業經革任免其置議十一月授盛京刑部侍郎  
五十七年以奉天秋審招冊經刑部議駁由緩決改入情實者六  
起 諭曰向來外省辦理秋審刑部覈駁失出在五案者吏部不  
過降級處分但巴延三曾任督撫多年並非不諳刑名者可比且  
係前經獲罪朕屢次曲加寬宥復用至侍郎自應倍加感奮於此  
等事尤宜悉心詳覈方不負朕委曲成全之意乃巴延三並不實  
心辦理失出之案竟至六起之多可見該侍郎一味因循不知感  
激朕恩勉強圖改過是非尋常玩誤可比若僅照例交部議處不足  
示懲巴延三著交部嚴加議處卽解任來京聽候部議並著查明



巴延三之子如已經出仕者著卽革職其有曾經捐職者卽行註銷以示懲創部議革任六十年卒

右 國史館本傳

常青

常青佟佳氏滿洲正藍旗人江西巡撫安圖子乾隆六年由爾良郡王府親軍充三等護衛十年遷頭等護衛十四年擢長史十八年授德州城守尉二十一年授鑲紅旗蒙古副都統調盛京熊岳副都統二十四年調西安副都統二十六年調察哈爾副都統以審辦護軍朋楚克扎布斃妻案遲延未結部議降二級畱任三十年調歸化城副都統三十四年正月將隱匿盜馬賊犯之驍騎校三濟題補佐領部議降二級調用得旨改爲革職畱任尋以失察庫銀被竊部議革任諭寬免仍註冊十二月授正藍旗滿洲副都統三十年調察哈爾都統三十九年誤擊王啟雲爲山東

逆犯王倫黨奉 旨嚴飭四十七年授杭州將軍四十九年調福  
州將軍五十一年六月署閩浙總督七月奏查究泉州府知府鄭  
一桂供前督臣富勒渾調任兩廣過泉曾備金葉交富勒渾家人  
殷士俊餽送 諭曰鄭一桂餽送富勒渾金葉時富勒渾已離閩  
浙總督之任乃猶如此逢迎餽送則在任時必有通同交結納賄  
營私不止鄭一桂一人餽送之事不可不徹底查辦以成信讞此  
時常青見署總督當以雅德爲戒屬員有無似此餽送款蹟卽據  
實嚴查覆奏毋得少涉瞻徇致有不實不盡閏七月奏查出富勒  
渾家人李世榮需索站規 諭欽差大學士公阿桂歸案辦理八  
月奏諸羅縣捐貢楊光勳與弟監生楊功寬因爭家產啟釁糾黨

立會欲圖械鬪洩忿經知縣董啟埏會營訪拏復率眾持械奪回  
就獲匪犯張烈見據臺灣道永福拏獲首犯楊光勳等並餘犯五  
十三名飭臬司李永祺前往會辦 諭曰臺地遠隔重洋非內地  
可比此等匪犯尤屬不可輕縱必須按名拏獲速正刑誅勿使蔓  
延疎脫方爲妥善十月實授閩浙總督十二月奏龍溪南靖二縣  
界之獅頭山有匪徒陳薦糾黨潛匿不時出山搶劫經漳州鎮道  
督兵役搜捕盡獲之解省嚴究寘法得 旨褒嘉是月彰化縣匪  
徒林爽文滋事常青奏據署淡防廳程峻等稟報彰化城陷知縣  
俞峻死之臣飛咨水師提臣黃仕簡領兵由鹿耳門進派副將丁  
雄朝等帶兵聽海壇鎮總兵郝壯猷調遣由閩安出口至淡水進

都司馬元勳領陸路提標兵赴鹿仔港堵禦臣往駐泉州會陸路  
提臣任承恩居中調度委金門總兵羅英笈赴廈門彈壓 諭曰  
臺灣地隔重洋民刁俗悍屢次滋事今有彰化縣賊匪林爽文等  
糾眾騷擾殺害官長攻陷城池尤爲罪大惡極不可不痛加殲戮  
以示懲創賊匪么膺烏合黃仕簡到彼督率該鎮道盡力堵剿無  
難立就撲滅但恐餘黨四散竄逸或偷越內渡常青任承恩見駐  
蚶江一帶著嚴飭沿海口岸地方文武員弁實力巡防最爲緊要  
常青徐嗣曾等總須不動聲色妥協辦理若因外洋遇有此等案  
件該督撫紛紛調遣跡涉張皇致內地民心生疑駭殊有關係  
該督撫務宜處以鎮定也又奏據偵探守備林雲登稟賊匪已到

竹塹地方北路一帶悉被占踞郡城急須保護見在任承恩統兵由鹿耳門進 諭曰此等奸民糾眾滋事一經黃仕簡到彼自必望風潰散任承恩本不應前往今既已渡臺亦不須拘泥回任常青仍祇須駐劄蚶江廈門一帶調度策應此時總以靜鎮爲要五十二年正月奏賊陷諸羅經臺灣鎮總兵柴大紀堵剿林爽文係漳州人匪徒率隸漳籍難保無內外勾連情事臣惟豫設機宜倍加嚴重並與漳州毘連之廣東潮州等境移會兩廣督臣防範一面督催渡臺官兵協力進剿 諭曰常青此次所奏派兵剿捕各事宜較前稍有主見略知鎮定但摺內稱逆首林爽文係漳州人其附從之人率皆籍隸漳屬其中難保無內外勾連情事等語此

等匪徒糾眾滋事無論何處人民從賊者卽係夥黨自應按名駢戮若漳泉民人鄉勇果能應募拒賊出力堵禦防守卽係良民自應加以獎賞不應豫存歧視稍露形跡轉致漳民心生惶惑恐別滋事端又奏鹿耳門爲臺地咽喉須厚集兵力庶可近護郡城遠赴攻勦見添派督撫二標兵千檄原任閩安協副將徐鼎士帶領又調福甯鎮各營兵千檄遊擊延山帶領由鹿耳門進交黃仕簡調度 上以其過於張皇飭之尋 諭曰臺灣奸民林爽文等糾眾滋事一案該督常青於勦捕逆匪一切調度堵禦機宜辦理尙屬鎮靜見在水陸兩提督業經渡臺會勦該匪自無難立時撲滅惟是海疆重地將來善後事宜均須妥協籌辦常青係初任總督

恐未能料理裕如李侍堯著調補閩浙總督常青著調補湖廣總督侯李侍堯到閩接印後常青卽來京請訓再行赴任常青奏臺灣守備陳邦光帶領義民由鹿仔港抵漳賊出抵禦邦光擊敗之擒僞帥楊振國等殲賊百餘隨入城護衛受困兵民同回鹿仔港固守並將楊振國解京聽審報 聞旋奏訊明楊振國等情節解京審辦 諭曰所獲匪犯朕意本欲令其解京今該督於獲犯審明後卽請解京審辦並鎮靜辦理各事宜皆與朕意適合不意常青竟能如此實屬可嘉此時該督惟應督率弁兵悉心調度以期迅速藏事朕必加恩嘉獎更不必以調任縈心稍存疑畏轉致剿捕無益時黃仕簡任承恩先後渡臺分南北兩路進剿常青督飭



內地各海口嚴查以防竄逸 諭曰常青於辦理善後事宜自不如李侍堯之諳練而督率搜捕則常青爲優著李侍堯抵閩後卽駐劄蚶江常青卽親自渡臺督同黃仕簡統領官弁將竄入山內賊黨盡數搜捕務盡根株仍不得因追捕賊匪或致擾動生番方爲妥善又 諭曰常青已調任湖廣總督今以欽差前往督辦一切題升調補若專候本省總督李侍堯辦理則所統將弁等見常青不能專主或心中以爲卽奮勉出力亦不能卽邀拔擢未免稍生懈怠著傳諭常青見在臺灣將弁被賊戕害多有懸缺未補者常青到彼卽應於剿賊弁兵內覈其實在出力者官則酌予升擢兵則拔補千把一面具奏一而知會李侍堯俾有事權以便策勵

將士是日柴大紀等奏請添兵 諭曰常青到臺灣後務須察看情形如果必須增添兵力卽一面具奏一面咨會李侍堯於附近各營再撥二三千名速渡臺灣俾資策應時侍堯奏調粵兵四千一由廈門赴鹿耳門一由蚶江赴鹿仔港 諭曰常青處所有之兵尙未免單薄著傳諭李侍堯如粵兵尙未分路配渡卽檄令全赴鹿耳門直抵臺灣府城俾常青處兵力壯盛足資調遣如業經分路配渡前進著常青於粵兵將抵鹿仔港者亦卽調來合爲一處常青親帶勇往將弁徑赴大里杙賊巢鼓勵弁兵務將首惡林爽文一鼓擒獲其餘賊眾不難撲滅淨盡四月抵臺劾黃仕簡任承恩遷延觀望擁兵自衛郝壯猷守鳳山賊至棄城走請分別治

罪 諭逮任承恩撤回黃仕簡真郝壯猷於法授常青爲將軍旋  
奏賊攻府城率兵勇擊退 諭曰賊匪竟敢攻犯府城常青親率  
官兵鄉勇臨陣多有斬獲此時粵東兵丁陸續到彼常青得此自  
可鼓其精銳迅速進攻所有該道府請發銀十萬兩米十萬石卽  
著李侍堯速行照數運往以備接濟並著常青就近先行酌量加  
有多餘兵糈或米或穀賞給貧民務使不致逃散方爲妥協又奏  
府城外之桶盤棧草店尾柴頭港三處地最衝要偵知賊匪將犯  
府城豫派遊擊蔡攀龍等帶兵紮營賊連次進撲率兵勇出城殲  
戮無算賊目莊錫舍悔罪投誠 諭曰此次賊匪有攻犯府城之  
信常青豫先設法防堵於桶盤棧等衝要地方豫派遊擊蔡攀龍

等各帶兵分紮營盤相機堵剿籌畫調度俱合機宜逮賊匪分路  
攻犯府城常青率官兵鄉勇迎捕截殺斬獲甚多常青年逾七旬  
尙能如此勇往督戰朕心深爲嘉獎伊係年老之人宣力海疆無  
親子在旁侍奉殊堪繫念著伊子刑部筆帖式喜明賞給三等侍  
衛馳驛前往臺灣省視並將賞給常青之玉扳指等件卽著伊子  
帶往以示優眷常青感激朕恩益思奮勉勇往迅能剿除賊匪永  
靖海疆朕必格外加恩五月奏林爽文潛回大里杙臣應直攻北  
路但南路賊匪莊大田等眾不下萬餘若遽統兵北向不惟鳳山  
等處被擾亦恐乘虛來犯郡城須剿盡南路然後乘勝北趨上  
題之 諭部優敘部議加三級六月奏剿賊南潭殲六百餘投誠

之莊錫舍擒偽軍師番婦金娘請解京審辦畱錫舍軍營效用

命賞給錫舍守備又奏各路征兵雲集見派副將丁朝雄等守府

城統兵往鳳山南路搜剿 諭曰據常青等奏統領官兵起程進

剿一摺據稱先往鳳山南路一帶賊人分踞之處堵截圍擊但摺

內又稱莊大田等恃眾鴟張仍敢於離城二三十里之外大穆降

等處聚眾等語賊匪敢於附近府城各處聚眾占踞儻窺伺大兵

已出乘虛滋擾雖常青等派有副將丁朝雄等帶領官兵足資堵

禦究不免有後顧之虞常青先應將城外賊匪搜捕圍擊將賊首

莊大田設法擒獲肅清肘腋方可乘銳前驅尋奏進剿鳳山出城

未十里有賊三路兜圍官兵擊退之又連夜糾集抗拒見在賊勢

蔓延前調官兵不敷進剿請厚集兵力 命大員前來督辦 上  
以派大員前往跡涉張皇 諭添兵會剿又 諭曰常青本由都  
統將軍甫經簡授總督更事未多今自到臺灣後一切調度尙能  
妥協已出人意料之外但伊究竟年逾七旬精神未能周到昨奏  
請派一大員到臺灣督辦其意未必非自揣難以勝任欲朕另簡  
大臣前往督辦軍務不可不豫爲籌及 命陝甘總督福康安前  
往督師 諭曰常青見在臺灣督辦軍務其湖廣總督之任雖經  
舒常署理而常青係正任自有應得廉俸等項但閩省既不支給  
而湖廣又不便專差齎送該將軍在臺灣一切用度何所仰給著  
李侍堯將常青應得湖廣總督分例廉俸卽在閩省庫內按數給

支常青奏賊黨犯府城經丁朝雄等擊退又撲桶盤棧官兵齊赴接應殲賊數十乘勝追捕殺傷甚眾莊大田在南潭遺夥匪千餘焚劫蔦松等處官兵馳剿又槍斃二百餘見在大營距府城未遠勢將犄角無後顧之虞得 旨嘉獎賞雙眼花翎 命直趨南潭會剿七月奏賊冒雨撲大營復攻桶盤棧官兵禦之殲百餘 諭曰常青等奏到情形是伊等尙紮營駐守因賊匪僅一百餘人不及十分之一未能乘機進剿此次添調各兵計粵省先行調兵二千及李侍堯挑備兵二千此時均可前抵臺灣此外添調兵丁尙須時日常青等斷無坐待株守之理前曾諭令該將軍等統領侍衛章京將備徑往南潭擒拏賊首莊大田設餘賊奔救即可聚而

殲戮該將軍是否卽行派撥直趨南潭若察看情形可以如此辦理業已前往固屬甚善但賊匪出沒無定甚爲狡獪若因常青等統兵前往南潭賊匪卽糾合夥黨繞截後路亦不可不慮該將軍等務須加意防範或派奮勉將弁斷後使我兵首尾相應不致被其抄襲方好常青奏鹽水港笨港均有賊搶占以絕糧餉諸羅勢甚危急添派總兵魏大斌等率師堵禦仍照料郡城南北兩面以及鹿耳門要口 諭曰賊人狡計係因大兵俱在府城諸羅一帶兵勢單弱故作窺伺府城以牽綴官兵使常青等不能遠離該處營盤而其意實欲斷我糧道攻偏諸羅常青此時竟宜先往北路或於總兵副將內擇其奮勇可恃酌撥一員令其固守營盤而常



青等竟揀選精銳親自帶領直趨北路前至諸羅會同柴大紀併力擒渠擣穴或再分派勁旅將鹽水港屯占賊匪悉力殲除打通糧道此爲上策常青奏賊擾鹽水等處常派魏大斌等帶兵應援詎南路賊匪聞郡城北面有警糾眾七八千圍大營三面又犯楠盤棧官兵分路奮擊敗之 諭曰南路賊匪將官兵牽綴狡黠顯然是常青等在府城結營株守無益竟當遵照前旨直趨北路會合攻勦爲是時魏大斌勦賊失利派游擊田藍玉赴援 上以零星派撥無濟於事飭之旋 諭曰本日詢問常青齋摺差弁饒成龍據稱將軍紮營在小南門外十里之楠盤棧地方自五月二十四日以後與賊人打仗數次因賊人四路抵禦未能前進賊目莊

大田所踞南潭距桶盤棧營盤只有五里等語常青等自駐筓臺灣已經數月其桶盤棧營盤相距南潭不過五里該將軍等早應統領大兵將賊目莊大田先行剿除乃惟知結營自守似此肘腋之間任其偏處竟不思乘勢攻剿實不可解前以爲南潭離大營尙遠故屢次諭令該將軍等酌留官兵固守營盤親統大軍舍南趨北與柴大紀藍元枚會同進剿此時如尙未啟行該將軍等即行帶領官兵速將五里外南潭屯聚之莊大田痛加剿洗以清肘腋八月 命福康安爲將軍 諭曰朕特命福康安前往更換常青並非因常青辦理軍務大有貽誤實因常青年逾七旬軍旅之事本非素練恐日久因循不能辦理完結是以特命福康安前往

接辦以期迅速。威功福康安未到之前，常青接奉此旨，不必心懷  
疑懼，轉致遇事茫無主見。遇有可進之機，仍當督率將弁相機進  
剿。儻此時能將逆首林爽文擒獲，固屬甚善。卽逆首尙在，稽誅而  
賊目莊大田若能擒獲，官兵已操勝勢。卽著該將軍由六百里馳  
奏，尋奏南潭賊攻大營，派侍衛烏什哈達等擊敗之。因雨後路滑，  
收兵旋。又督兵由少岡嵌腳北勢三路進剿。南潭沿路斫伐密箐，  
賊不能藏伏，悉出抵禦。槍斃者甚眾。三路軍合剿，直至南潭燬草  
簷數百間。賊竄。因天晚山徑偏仄，不便深入。上以莊大田旣在  
南潭，卽應奮力追獲。乃屢以遇雨收兵，傳旨嚴飭。又奏軍中染患  
暑溼，莊大田探知消息，仍復屯聚。若舍南趨北，恐附郡賊夥竊發。

安業各莊不無惶惑 上以賊人探知軍中染患係常青機事不密之咎又不統兵北向不免蹈黃仕簡覆轍申飭之常青奏督率總兵梁朝桂等剿賊南勢莊多斬獲並奏據新授陸路提督柴大紀咨報諸羅圍急糧餉鉛藥俱罄卽派副將蔡攀龍等領兵救援諭曰常青若能先將南路賊匪悉力殲除賊目莊大田拏獲固可稍贖前愆否則速統大兵乘其新到銳氣直趨北路前抵諸羅亦尙可補過卽屬常青之福若惟知株守郡城坐視柴大紀被賊圍困致有疎虞則是常青罪上加罪恐不能當此重戾也九月奏大兵赴援諸羅行至三坎店有賊抵拒擊敗之旋據畱守郡城之總兵梁朝桂報賊從南潭中洲一帶來犯郡城臣折回夾擊賊稍

卻旋又四路攔截道梗不能北向 諭曰常青且將南路屯占賊  
匪剿殺以清後路十月賊犯大營東南率梁朝桂等迎擊轉戰至  
大河溪邊殲二百餘 諭曰常青在府城駐守雖未能前進但一  
切調度尙俱妥協又聞知諸羅鹽水港兩處被賊滋擾先後派兵  
接應且伊在府城亦經屢次與賊打仗是常青雖屬年老尙能料  
理軍務且福康安到鹿仔港後由北路統兵進剿其南路及府城  
一帶亦須有大員駐劄督辦應令畱駐府城督率剿捕十一月奏  
附近府城賊莊漸次剿盡近日南路民人隨營效力者眾擬廣招  
義勇數千廓清南路以便往救諸羅 上以常青帶兵南路不如  
先救柴大紀爲是 諭與福康安會合進攻又奏同江甯將軍永

慶等三路進攻在竹篙厝等處殲賊甚眾山豬毛社義民尤趨捷  
獲礮一生擒賊目張招得 旨嘉獎又奏總兵普吉保已攻開月  
眉莊等處離諸羅五里飭令與柴大紀并力固守俟福康安到鹿  
仔港協同埽穴擒渠並分飭弁兵嚴防海口毋使賊搶船遠遁又  
多備札諭令熟諳番情之諸羅生員劉宗榮等密往大武隴後山  
結番社通事土目防賊竄匿 上嘉其所辦妥協時福康安統兵  
渡臺授常青福州將軍畱辦善後事宜十二月奏派侍衛雅爾彊  
阿等勦賊府城小南門大北門外並堵禦府城沿山要隘又令永  
慶等稽查海口並飭臺灣道永福曉諭遠近莊民樂許輸誠復業  
卽令蹤跡莊大田共相擒獻 諭飭防海口截莊大田竄逸爲要

五十三年正月奏莊大田藏匿南子坑該處係鳳山縣屬見派丁朝雄相機前進開通鳳山道路設法擒拏 上責其敷衍陳奏傳旨嚴飭又 諭曰前因常青初至郡城調度一切尙爲妥協且伊年老尙能親自帶兵打仗是以賞戴雙眼花翎以示獎勵今半載以來株守郡城毫未出力念其尙無大過業經補用福州將軍伊自當照將軍職分戴用單眼花翎時福康安劾柴大紀貪劣狀 諭曰常青在閩年久擢用總督亦有年餘柴大紀平日執法侵漁廢弛營務常青豈無所聞乃竟無一字奏及殊屬昧良辜恩有心徇隱常青著革職交與福康安一併嚴審據實具奏是月爽文就擒福康安移師南路擒獲莊大田臺灣平 諭常青見已革職所

有善後事宜毋庸交辦五月福康安奏柴大紀貪黷不法訊之常  
青自認徇隱不諱請交部治罪 諭曰常青於柴大紀貪黷不法  
一案徇隱不奏前曾降旨將伊革職交福康安審訊經福康安奏  
請交部治罪固屬咎由自取但念常青由將軍簡用總督在任未  
久卽值臺灣逆匪滋事非富勒渾雅德歷任年久因循貽誤諱飾  
袒庇者可比其到臺灣後於柴大紀種種劣蹟固易訪查但彼時  
正值辦理軍務其不卽查參亦屬可原且伊年逾七旬帶兵駐守  
郡城保護無虞功過尙可相抵常青著加恩免其交部治罪俟到  
京後候朕酌量加恩另降諭旨七月 命署鑲紅旗蒙古都統五  
十四年正月授禮部尙書五月 上幸避暑山莊 命畱京辦事



兼署吏部尙書七月授鑲藍旗漢軍都統八月 賜紫禁城騎馬  
十二月充經筵講官五十八年卒 諭曰常青見在病故所有伊  
名下應交未完官項著加恩免其賠繳以示軫卹 賜祭葬諡恭  
簡子喜明官至烏里雅蘇臺將軍

右 國史館本傳

國朝耆獻類徵初編卷八十七目錄

卿貳四十七

金甞

寶光爾

覺羅奉寬

張泰開

閻循琦

邁拉遜

宗室賽爾赫

國柱

德直...  
卷八十一

國朝耆獻類徵初編卷八十七

通奉大夫前署江西巡撫江西布政使司布政使湘陰李桓輯

卿貳四十七

金姓

嗚呼珪何能銘吾師耶蓋自丁卯以來四十年門生勵有存者珪何敢辭公金姓諱姓字雨叔號海住先世由會稽遷杭爲仁和人曾祖諱明遇江南興化縣主簿祖諱星瑞雲南師宗州知州考諱德麟三世並以公貴 誥贈榮祿大夫曾祖妣褚祖妣朱聞人妣嚴皆 誥贈一品夫人兄弟四人公次三行六伯諱虞康熙庚子舉人歷湖北孝感山西蒲縣知縣所稱長孺先生者也長孺先生

以文雄於浙長公二十有二年以兄兼師及公學大成遂競爽焉  
年二十一應縣試冠其曹入仁和學爲諸生明年癸卯舉於鄉會  
試報罷歸益肆力於經史自司馬遷以下諸史窮年點勘數番不  
輟旁及他子集皆手錄考訂故其根柢之學莫窳焉歲戊申秋母  
夫人感寒疾暴下殆甚公在外聞之狂奔歸中途顛天願手寫華  
嚴經全部歸而母僵臥氣息縷縷公俯首入衾以口鼻熨其臍嘘  
呵之良久腹中有聲稍安眠乃投以藥竟於是日浣手書經閱十  
二年而訖功其誠孝如此公淹公車者二十年中閒客游山東者  
久之歲甲寅丁外艱丁巳奔母夫人喪力疾行抵臨津挈囊趁舟  
踰折一齒困甚時長孺先生自孝感歸卜葬考妣得吉壤於南山

之普福嶺乾隆六年秋以錢塘梁文莊公薦授國子監學正明年  
壬戌會試中式第一人闈卷進 呈 上屢稱可之 殿試一甲  
一名進士及第授職修撰甲子主廣東鄉試乙丑散館一第一名  
教習庶吉士丁卯充順天鄉試同考官珪卷出公房既定第六名  
撥入湯葑岡先生房先生爲公壬戌同榜探花耶寓橫街與公對  
門珪謁葑岡先生日子固我同年金海住所薦也當謁金師珪卽  
夕謁公公進而教之甚至明年夏署日講官起居注又明年遷右  
贊善尋轉左十六年實充講官興縣孫文定公奏充 御纂詩經  
館纂修壬申副漳浦蔡葛山先生典江西鄉試是夏六月 御試  
翰詹二等擢左庶子冬授侍講學士明年癸酉主山西鄉試甲戌

充會試同考官奉 命督學安徽公校士公勤竟日坐堂皇披閱  
巡行士習帖然任滿二十二年奉 旨在上書房行走冬授詹事  
府詹事自是直講席者十七年直諒誠敬所陳說必正義法語於  
學行根本尤惓惓三復以是 諸皇子 皇孫皆心重公公之品  
學真不愧是選也乙酉奉 命督學江西請假由浙展墓乃赴任  
明年授內閣學士又明年擢禮部左侍郎三十七年奉 使祭告  
南海時公子三吾作令於粵東得侍左右公扈 駕謁 泰陵暨  
南巡者各一木蘭者七賡歌之作成帙三十八年五月當從  
蹕熱河遘疾仆於直次諸城劉文正公以 聞 予假秋九月奏  
請解任得 旨准其回籍調理明年秋疾瘥乃得出都 諸皇子

皇孫及同直同朝諸公皆贈以詩歌比之二疏有餘榮焉丁酉  
入京謁 孝聖憲皇后梓宮再詣 諸皇子 皇孫執手相勞  
上賚大緞 命卽歸越二年撫臣奏主敷文書院講席四十五年  
上五幸浙江迎送 駕問賜有加於是講課之暇常羊湖山與  
錢嶼沙方伯吳崑田編修諸公皆幡然達尊爲五老六逸會旬月  
無閒賦詩談讌鄉黨望爲神仙珪己亥典閩試庚子視學於閩過  
杭再謁公公偕顧河干先生飲珪於西湖舟中神明縝密杖履從  
容珪竊歎以爲非學養之深厚不能及也公生平廉儉方正處事  
無鉅細井井有法度詩文數千篇無體不具尤長於使事在直廬  
與陳向山諸公倡和限險韻數十疊不解益彊辛丑開八表作長



律八十一首該贍精警不減少壯性篤於孝友事兩兄暨一弟肫  
如也至於族戚年家若吉凶緩急謀之竭忠不愛己力其取受必  
以義雖一介不苟此珪所心折於吾師而亦非一人之私言也壬  
寅秋以疾考終公生於康熙四十一年壬午八月十五日亥時終  
於乾隆四十七年壬寅七月九日寅時壽八十有一配王夫人先  
公卒 誥贈一品夫人繼室胡夫人 誥封一品夫人治家協德  
乾隆五十三年五月八日壽終年八十有五子三三事先公卒三  
吾乾隆丁酉科舉人廣東四會縣知縣候選郎中三俊太學生議  
敘鹽大使女子四長適國子監學錄王君喆次適吏部文選司主  
事汪君孟錡其次子修撰如洋庚子會試 殿試皆第一克繩公

武云次適泰州運判姚君思康次適監察御史汪君日章孫男二  
萼菑孫女六某年月日合葬於某銘曰

斗魁戴匡厥眾正方公秉其氣不嚴而莊讀書萬卷老而不忘引  
年考造湖山輝光有老門生校文公鄉銘公冢石擲筆涕滂

右墓誌銘朱珪撰

公姓金諱甡字雨叔號海住其兄虞故宿學也人稱長孺先生教  
公爲文溺苦不休夜臥轉側時聞諷倍生有至性母患腹疾公以  
口熨臍而嘘呵之疾遂平舉 世宗元年鄉試 今上七年會試  
廷試俱第一授翰林修撰尋遷至正詹內閣學士禮部侍郎三  
逢 御試皆 上親擢冠首受知最深以故衡文之任重疊委用

凡典試廣東江西山右者三督學安徽江西分校禮闈者二或未  
散館未撤棘 寵命先下或許持節便道上冢皆異數也所莅處  
嚴關防減夫役飭條約卷雖盈萬皆手披而目及之往往搜得遺  
珠爲幕府補過或生童文字未協代爲改削如訓子弟然有被黜  
之人捧落卷而感泣者 上命公行走上書房課 諸皇子前後  
入直十有七年卯入未出敏勤勉從無休沐之請遇事納規忠  
心拳拳緝承華法戒一書備 青宮觀覽壬辰秋扈 駕熱河馬  
驚墜地 上慰問者再遣醫治痊次年五月入直胃痛僨作中使  
扶歸具疏乞休 上許之出都時 諸皇子不忍良師之去握手  
歔歔賦詩贈行問承華法戒書成否同僚及門下士餞者麻集車

馬駢麟供張塞路大司農王文莊公見而歎曰吾輩異日出都得如是光榮足矣先是公奉命祭南海適公子三吾卸篆翁源趨庭侍奉士論榮之少苦家貧通籍後依然儒素每食二簋鬱肉脯不以爲嫌任學使時皖江學租故事給貧生外皆因公開除公鈐封其餘交提調備修文廟其廉儉蓋天性也然於濟困扶傾之事慷慨仔肩內宗族外師友周恤倍至歸座主仲公永檀之觀繼世好怡雲鄂公之粟葬故交晚菘居士之四代八棺見義必爲無絲毫顧藉子告後掌教萬松書院生徒來不冠不見曰吾教之以禮也雖篤老而纂思奮筆終日孜孜春秋佳日與鄉里耆英爲五老六逸之會嘯歌湖山薨年八十一所著清語錄十九帙史漢

評林訂謬老干卷詩八千餘首子三人

贊曰枚生八歲卽讀公闈墨欽若天人後入館閣先公一科及公侍直 禁廷而枚已外用五十年來末由瞻接但聞公愛枚文向人口之不置薨後長君奉公遺命具狀乞傳余敢不表章前哲亦以報知己哉客春遇公次子三俊於蘇州爲枚校詩集指示誤用漢書北史二事想見公趨庭之教所貽謀者遠矣

右傳袁枚撰

金海住侍郎姓中壬戌狀元直上書房質莊親王爲其弟子公善時文應制詩王善學之卒以名世公性直遇 諸皇子有嬉笑者卽面折之時 禁廷詞臣皆有所貢獻公遇 萬壽節貢萊石菊

花一枚號曰東籬壽友同事者謂其弇鄙公曰 天子富有四海何所不備奚賴吾輩措大所貢獻其所以收納者聯君臣之情故爾此物雖無所珍惜然貢諸丹陛亦野人獻芹意耳人皆服其誠樸云

右錄宗室昭榭撰

公少借兄虞砥礪問學尤淹貫史事及第授修撰典甲子廣東鄉試散館復第一丁丑在上書房行走公言養正之地殫竭微忱用資啟導不易膺斯任也先後侍書十七年自孝友大端至言動威儀之節罔弗盡言累遷內閣學士晉禮部侍郎告歸主講敷文書院年八十一卒入祀鄉賢公在都時捐金釀資勸仁錢會館部署

周備至今鄉士棲止如歸

公次女幼時一日於中庭忽大驚怖家人問之云見一藍面人從天而下以魁星像示之云所見正同是年壬戌科公得會狀然獨次女見之未喻其故後女適汪康古庚子科公外孫汪如洋亦得會狀乃悟魁星示像而次女獨見者蓋狀元之女而又狀元之母也公聞外孫大魁寄次女詩云當年會狀憐嬌女今見教成會狀兒亦科名中一段佳話也

右聽松廬詩話張維屏撰

姓長於論文悉心校閱所至稱得士安徽學租舊於給貧生以外公事報銷姓盡鈐所餘檄提調備葺繕學宮當事問遺止及茶葉

無編紵之受

右杭州府志符保森錄



日本書紀卷之二十一

竇光鼐

竇光鼐山東諸城人乾隆七年進士改庶吉士散館授編修十三年正月充會試同考官六月大考四等罰俸一年八年擢左中允十五年充山西鄉試副考官十六年遷翰林院侍讀十七年二月擢侍讀學士六月大考一等擢內閣學士入直南書房充湖北鄉試正考官旋提督河南學政十八年丁母憂二十年服闋授左副都御史尋提督浙江學政二十二年 上南巡有臨海縣訓導章知鄴以光鼐不准進獻詩冊欲圖訐告經光鼐訪聞奏參 諭傳赴宮門考試旋以該訓導詩詞鄙俚且檢閱呈內有西陲用兵久稽成功情願從軍等因 命革知鄴職派侍衛伊德解往巴里坤

軍營效力 賜光鼐詩曰兩浙山川常毓秀諸生月旦汝司文從來士習民成俗勛彼行知尊所聞見外發中務清正涵今茹古去纖焚曰公似矣曰明要顛俊紆予一念殷二十六年八月九卿秋讞會議光鼐以廣西省犯追賊毆斃之陳父悔不宜入情實貴州省犯逞兇斃命之羅阿扛不宜入緩決兩議具請刑部奏入 諭曰昨刑部奏九卿會審將廣西陳希統案內之陳父悔改入情實而竇光鼐立意兩議之處具摺奏聞已有旨傳諭該堂官等令其虛心持正定議不必彼此徒事爭執今覆據奏稱竇光鼐將本案故殺之陳希統並欲改入緩決並將貴州省羅阿扛一案牽引比擬並鈔錄原簽附摺具奏會讞大典理應虛公覈定果有擬議未

協不妨平心商推務歸明允卽使意見不能強同原可兩議具請  
候朕酌奪今見寶光備議帖因已見參差竟至以筆舌忿爭曉曉  
不已此等習氣在前明弊政時視爲固然以致各立門戶大壞朝  
政今當紀綱肅清之日一切案牘朕無不折衷裁處寶光備豈得  
逞臆侈滕口說致乖政體但簽內稱刑部刪去黃父防赴村探聽  
一節則係本案是否竊賊要據招冊何以不入又羅阿扛一案何  
以定議緩決與前案輕重不符以竊賊殺人而議緩何以服乎未  
殺賊而改實者朕觀寶光備雖不無氣質用事口舌紛爭之失而  
刑部先後兩奏跡似豫爲張本其中情節曲直亦或有不足服寶  
光備之心者著將此摺交與大學士來保史貽直協辦大學士梁

詩正將兩案審擬各原稟詳悉確覈秉公定議具奏來保等議以陳父悔係隨眾加毆應改入情實而陳希統之有心斃命與羅阿扛之無心鬪殺均應悉如部議且刑部稱此二案寶光備業已畫題何得又請改擬奏上 上命光備明白回奏尋奏陳希統羅阿扛兩案異議處本係簽商並非固執因會議時言詞過激致牴牾刑臣遽將簽出未定之稟先行密奏臣未能降心抑氣與刑臣婉言咎實難辭請將臣交部嚴加議處 諭曰此事在刑部以兩議未奏之案節次具奏誠未免有先發制人之意但國家會識大典寶光備竟氣質自用甚至紛呶謾罵而不自知設將來豫議者尤而效之於國憲朝章尙可爲訓耶是刑部有所不合究不若寶光

簡之甚寶光簡著交部嚴察議奏刑部堂官著交部察議寶光簡摺並發部議降三級調用 命銷去降二級仍降一級畱任十月奏事主擅殺竊盜律止杖徒近來各省問刑衙門多以竊盜拒捕而被殺比罪人不拒捕而擅殺皆以鬪論遂於律應斬決斬候之賊犯致有輕縱而例得勿論及罪止杖徒之事主並擬絞抵殊非禁暴之意應請各遵律例及新准御史蔣嘉年條奏賊犯持杖拒捕捕者格殺之不論事主鄰佑俱照律勿論例畫一辦理下部議行十二月 諭曰朕前此南巡有浙江臨海縣訓導章知鄰以學政寶光簡不准進獻詩冊妄欲捏詞叩闈經學政等訪聞奏參當令革職命侍衛伊德帶往闡展效力俾伊悉知軍營情形果如所

言否比因軍務久竣此等無知之人別無可效用之處因傳諭安  
秦查伊在彼果能痛加懲警安分悔過卽傳旨加恩令回籍如有  
違犯字蹟卽一面看守一面奏聞另降旨定奪乃據查到章知鄴  
筆札記載叢雜乖張如妄引關帝文昌鬼神夢嚙之談已足爲人  
心風俗之累然其詞不過止於荒誕至所著討奸邪竇光鼐一篇  
則竟捏造悖逆之言一皆託諸竇光鼐之口伊轉爲之加以駁詰  
是其居心奸險計圖栽害此等如鬼如蜮伎倆豈能逃朕洞鑒乎  
竇光鼐不過一庸懦之人且見在居官斷不敢爲此卽使竇光鼐  
果有此言亦初未必筆之於書也而章知鄴則已明目張膽公然  
列之於著錄實惡逆之尤著將該犯章知鄴卽於闡展地方正法

示眾以儆奸頑並將此通行傳諭知之二十七年三月奉 旨賞  
光備識見迂拙不克勝副都御史之任著以對品另用十一月  
命署內閣學士告祭南海二十八年充殿試讀卷官二十九年授  
順天府府尹三十二年丁父憂三十五年三月服闋補原官五月  
奏童生冒籍必交通廩生廩生之優劣惟憑教官申送易滋弊竇  
查府丞一官承辦事件無多應責成實心查覈其入籍滿二十年  
者令族親鄰佑各具甘結如查察不實將具結人一併治罪再審  
問時例派滿漢御史遇可疑者飭該縣確查詳覆不實例處該縣  
如未經駁查事後發覺將該御史一併議處冒籍既清應試者少  
其有事故不及與縣試者應照鄉試錄遺之例於按臨之先府丞



移會御史彙齊補考不符取額甯闕毋濫下部議行閏五月因武  
清東安二縣飛蝗蔓延不能率屬搜捕奉 旨降爲四品京堂仍  
交部嚴加議處部議上 命於補官日降三級從寬畱任六月奏  
武清等處蝗蝻業經查捕淨盡新授府尹裘日修見赴天津捕蝗  
謹差官齎送印信適聞三河懷柔二縣俱有飛蝗擬卽日往捕得  
旨准其前往復奏近京州縣旗地多於民地請嗣後捕蝗令民  
人佃種旗地者一體撥夫應用 硃批所奏是著照所請速行尋  
諭日前據廣光館奏民人佃種旗地之戶請一體撥夫撲捕蝗  
蝻一摺因其所奏近理卽批交部照所請行並諭地方偶遇捕蝗  
不獨旗佃與民用迪力合作卽大犂莊頭亦應一體派撥其直隸

地向來作何辦理著楊廷璋查明具奏及派往捕蝗之侍衛索諾木策凌等回京詢其實在情形據稱所到之處不獨旗佃出夫辦公卽王公所屬旗人亦悉協力捕蝗等語旋據該督覆奏自方觀承任內設立護田夫一項不拘旗民均令出夫見仍照舊辦理因節次令寶光肅明白回奏寶光肅堅執意見謂詢之三河順義兩縣及東路同知皆云旗莊並不出夫卽周元理亦有旗莊不冒借用口袋之語曉曉置辯因復降旨楊廷璋令將所奏情節再行覆查今寶光肅到京回奏則以前次所奏護田夫未經奏明不能一體遵照爲詞其說支離更甚試問總督舊定章程通行闔省順屬官民豈獨不遵條教府尹亦豈得諉爲不知況寶光肅所指三河

順義二縣卽係府尹所轄如有司陽奉陰違自當隨時參劾卽無此例而府尹奉差捕蝗亦理應派夫護田其有佃戶人等倚恃旗業聲勢不受約束竇光鼐目擊其情無難詢明何人莊業列名指參卽如大學士傅恆尹繼善外如總督楊廷璋推而上之以至親王等皆無可畏忌竇光鼐若早據實舉出朕必且深爲嘉予並將袒庇莊佃之王大臣嚴加議處乃並不能指實一人而徒涇涇膠執不已於事何當其意不過欲借題發揮逞弄筆墨妄以強項自命冀見許於無識之徒且以總督楊廷璋旣不無瞻徇旗莊卽承旨之軍機大臣有旗產者亦未免意存袒護以此曲爲解嘲自文其過此等伎倆豈能於朕前嘗試乎因令竇光鼐隨軍機大臣進

見面爲詢問伊亦白稱在三河順義不行指名具奏實屬無能難以再爲支飾近京旗民交涉事件在國家初定鼎時或有旗人強占民地及將各項差派專委民承辦者今閱百數十餘年屢經整飭政紀肅清無論旗莊各戶不敢不安分守法卽王公大臣亦不敢怙勢庇佃欺壓平民自圖詭避差役而國家法在必行又豈肯聽其縱放禮法稍爲曲徇乎朕辦理庶務一秉大公至正中外臣民宜無不共見其聞卽此事之是非曲直適就前後事理爲衡斷並未嘗豫設成見而竇光鼐偏執邀名之隱微亦不能逃朕洞鑒特爲明白宣示將此通諭知之七月奏護田夫之法有不可行者查原議三家出一夫免其門差臣按冊計之大宛二縣約出夫七

千五六百名此數千人巡捕半年荒廢本業衣食無資造冊免差  
胥吏必緣以爲奸且捕蝗宜眾而時速若按三家一人之例必至  
緩不及事臣謹上捕蝗事宜數條一人夫不必預設但查清保甲  
臨時酌撥一必用村莊近地之人方得實用一本牌頭按村之大  
小酌設每縣不過數十人一各村田野令鄉地牌頭勸率田戶自  
行巡查一蝗蝻生發一面報官牌頭卽率居人齊集往捕撲滅者  
賞隱匿者治罪一器莫善於條拍宜豫製以便應用一蝻子宜開  
溝圍偪用土掩埋一收買之法止宜用之老幼婦女若強壯之人  
總以直前追捕爲得力 諭曰據寶光簡回奏派撥旗莊人夫一  
事請將順義縣知縣王述會三河縣知縣周世云解任並傳東路

同知劉毅北路同知張在赴軍機處質問等語所奏膠執支離尤屬不曉事理此次直屬撥夫捕蝗無論地方官原係循照舊規旗莊民田均勻周派卽如寶光館所云旗莊之夫或不到場難而較遲據此已足爲均派之明驗更何事曉曉置喙雖該督楊廷璋查詢之該同知知縣等稍爲遷就其詞亦屬情理所有於事本無關緊要若因語言傳述參差小節遽令兩縣兩廳同時解任徒致曠廢公務殊屬無謂設因此歸案赴質之故併將寶光館褫職對簿又復成何政體且亦不值如此張大其事至寶光館另摺所稱護田夫一項以若輩盡力巡查且致荒廢本業彼爲鯁鯁過計以衣食無由取給爲虞所見更爲迂鄙護田夫之設不過令於蝻子萌

生時令在本處由地搜查或遇蝗蝻長發會力撲捕並非使之長  
年株守田畔於三時農業槩行拋荒也卽如設兵防守汎地亦第  
於汎內輪番偵邏稽查又豈責其終日登高瞭望方爲斥堠若如  
竇光鼐之論直是跬步難行有不聞而失笑者乎竇光鼐前此覆  
奏惟知因事借題造作塵腐空文自爲解嘲地步今又將派夫一  
節連篇累牘鋪張條奏而於事體之可行不可行全無理會其拘  
墟膠轕之處正復不勝指摘猶且始終堅執臆說牢不可破向固  
知其僅一硜硜之小人毫無能爲乃不意執迷紕繆若此且以空  
言折辨互相指斥漸成門戶乃前明陋習此風斷不可長竇光鼐  
著交部嚴加議處八月革職十二月 諭曰竇光鼐前因捕蝗一

事照部議革職但究係拘鈍無能尙無大過所有通政司副使員缺著加恩令其補授三十八年四月擢光祿寺卿六月遷宗人府府丞八月稽查右翼宗學三十九年命告祭吉林等處四十五年充福建鄉試正考官四十七年五月授浙江學政四十九年上南巡賜詩曰士習民端首風方繫厥司況茲文盛處所重行修時熟路輕車試迪人克己爲前車應鑒已自力尙勤思五十年正月擢吏部右侍郎是年查辦浙江虧空四月光緒奏浙江各州縣倉庫虧缺未補者多蓋因從前督撫陳輝祖王亶望貪墨敗露時督臣富勒渾並未徹底查辦祇據司道結報之數渾同立限遇有升調事故輒令接任之員出結辦理顛預臣聞嘉興府屬之



嘉興海鹽二縣温州府屬之平陽縣虧數皆逾十萬當查何員虧缺分別定擬去歲杭嘉湖三府歉收倉內有穀可糶者無幾浙東八府歲行採買惟折收銀兩以便那移奏入 上嘉其公正命尙書曹文植侍郎羨晟前往會同巡撫伊齡阿徹底清查嚴參辦理又 命光祿會同查辦五月奏仙居黃巖等七縣前任知縣虧空數目多至累萬全未彌補以致後任不敢接收交代永嘉縣知縣席世維借生監穀輸倉備查平陽縣知縣黃梅借虧空名色科斂累民丁憂演戲殊非人類仙居縣知縣徐延翰監斃臨海縣生員馬賓殊干法紀再藩司盛佳上年進京攜貲過豐外間頗有煩言又督臣過往嘉興嚴飭上下各地方供應浩繁門包或至于百奏

入 上命大學士阿桂由南河馳驛赴浙江督辦尋覆奏查辦過海鹽桐鄉嘉興等六州縣倉穀有缺數百石至百餘石者惟桐鄉縣倉內實無儲穀所有之穀借自社倉又將米三千石開報平糶掩飾一時再查范公塘隄工向派各州縣承修請嗣後責成海塘大員督率海防同知承修再於沙灘地多栽蘆葦三年以葦易柴取用甚便 上命阿桂曹文植等逐一覈辦 諭曰據阿桂奏查詢倉庫情形及寶光爾所稱盛住上年進京攜帶過豐各節已於摺內詳晰批示如寶光爾原奏永嘉平陽二縣借穀派勒之事阿桂面詢該學政係何人告知該學政不能記憶姓名是寶光爾既欲於朕前見長又恐得罪眾人實屬進退無據至所稱盛住進京

攜帶銀兩及總督收受屬員門包各節詢之該學政亦不能指實  
阿桂等傳詢盛住則因上年進京時有應解漕價銀三萬九千餘  
兩盛住自行裝匣攜帶到京後卽赴廣儲司兌交有案是盛住攜  
帶銀兩係屬官物豈可指爲贓私之證而竇光勳因見所帶銀匣  
數多遂疑盛住私贖若如此疑人天下無一清廉之官矣尤爲可  
笑至總督藩司收受屬員門包餽送事關大員婪索若無確據何  
得率行陳奏乃詢問該學政毫無指實是竟係信口誣人若竇光  
勳欲誣人謀反不論其實有無將人治罪有是理乎此案若非朕  
特派阿桂前往查辦則竇光勳與曹文植等爭執攀引卽經年之  
久辦理亦不能完結更復成何事體今阿桂與曹文植等公同面

詢逐層駁詰俱確有可據實光節竟不能復置一詞見復檄調嘉興府屬州縣質詢自可無難得實至富勒渾家人在粵招搖滋事及在浙省有無勒索門包之處阿桂見在提集富勒渾進京時經過之嘉興嚴衛各地方官到省剴切開導令其據實供出該州縣知事難掩飾自必和盤托出所辦尤爲得其要領七月阿桂等奏查明永嘉平陽等縣實無那移勒派之事平陽縣知縣黃梅丁憂演戲一節查係該縣爲伊母慶九十生辰於演戲之夜痰壅猝故

諭曰據阿桂等奏查明黃梅爲伊母演戲慶壽伊母於是夜痰壅身故是其演戲在未丁憂之前況伊母年已九旬風燭無常猝然身故亦屬情理所有此事關係名節實光節輒行入告並不確

細訪查若此事果實則真如原奏所稱行同禽獸不齒於人類矣該學政不願污人名節以無根之談冒昧陳奏實屬荒唐竇光鼐著飭行閏七月復奏前任仙居縣知縣徐延翰監斃生員馬寘各上司展轉情庇並未審出實情 諭曰朕詳閱此案情節馬寘身爲生員夥合匪徒陳天河邵能文等向各僧寺弔紙圖謝又嫌謝錢數少誣首賭博復與僧人關殿寶屬膠庠之敗類其罪亦應滿徒該縣徐延翰將馬寘掌責收禁並無不合至馬寘在監病故屢經驗明確實係死於病非死於傷其徐延翰倒填詳報日月又不關傳屍親眼同相驗收殮規避諱飾之咎實所難辭將來議處尙不止於革職亦足以服屍親之心乃竇光鼐必欲加該縣徐延翰

重罪將奏摺與曹文植閱看聲言汝辦理此案若不將徐延翰照故勘濫禁治以重罪我必將汝奏參並令告知阿桂伊齡阿等語是其袒護劣衿偏執己見不自知其言之狂妄若此設如所言將來劣生必致武斷鄉曲目無官長適足以成惡習而長刁風尙復成何政體耶又寶光備覆奏平陽縣知縣黃梅母喪演戲係闔邑生童所言及平陽縣虧空自黃梅始該員以虧空之多久居美缺縱令伊子借名派索濫用而抗不彌補且指阿桂等於議處虧空一案輕重失平夫阿桂等業將乾隆四十三年以前歷任各員擬以革職暫行畱任按照在任月日分賠勒限一年不完照虛出通關律治罪黃梅之罪亦與他州縣相倣若獨予從重不特無以服

其心天下有此辦事之法乎至所奏母喪演戲一節前經查明係  
本年正月黃梅爲伊母慶九十生辰演戲伊母一時痰壅適於是  
夜猝故而寶光爾尙固執前言夫人子卽忤逆不孝母喪不知悲  
哀亦斷無迫不及待於母死之日演戲爲樂者況黃梅之母年已  
九旬風燭無常於演戲之時猝然身故亦屬情理所有此事關係  
名節古云善善欲其長惡惡欲其短寶光爾係讀書之人亦何必  
污人名節致禽獸之不若耶據稱派往之司員海成爲地方官所  
蒙今伊竟親自赴平陽縣訪查如果能明白當另辦若至生事陵  
夷地方官是伊自取咎耳且阿桂曹文植伊齡阿履蒙任使皆係  
素能辦事之人朕之信寶光爾自不如信阿桂等卽令寶光爾反

躬自問亦必不敢自以爲在阿桂等上也今寶光節之固執已見  
曉曉不休者以爲盡孝乎以爲效忠乎且寶光節身任學政校士  
是其專責見當寶興大典多士守候錄科平陽去省往返二千餘  
里該學政必欲親往訪查而置分內之事於不辦殊屬輕重失當  
且其固執辨論意在必伸其說勢必蹈明季科道盈廷爭執各挾  
私見而不顧國是之陋固不可不防其漸寶光節著交部議處並  
將此通諭知之又 諭日前據寶光節奏平陽縣知縣黃梅丁憂  
演戲一事該府范思敬曾而稟前撫福崧以接任之員不受交代  
俟查明嚴參又該員虧空之數甚多抗不彌補調任温州府方林  
亦嘗赴省揭參等語當卽降旨詢問福崧茲據福崧奏稱在浙時



並未聞有黃梅丁變時演戲之事該府范思敬亦未面稟至虧缺  
之案時刻嚴催僅據該府方林等以催迫太甚誠恐有累閭閻稟  
請展限亦未據揭報等語是此事范思敬等從前並未具稟福崧  
何以寶光館稱會稟福崧竟似福崧亦知其實寶光館惟以先入  
之言爲是不加詳查率行誣攀瀆奏其意何居著將福崧原摺發  
與寶光館閱看令其據實明白回奏勿再仍前固執自干咎戾也  
部議以光緒祖庇劣生擅離職守何應革職撫臣伊齡阿奏參光  
館於未到平陽之先差人招告既到則招集生童發怒咆哮用言  
恫嚇並勒寫親供領筆書役用刑備喝 諭曰生監把持唆訟學  
政方爲約束之不暇而寶光館乃招告於未到之先恫嚇於已到

之後咆哮發怒紛紛若狂實屬大辜厥職若生監等因此挾制官  
長顛倒是非迺足以長惡習而助刁風而竇光鼎執意妄行竟是  
以生監筆據為驗是其舉動乖張昏亂朕亦不能為之曲庇矣竇  
光鼎科分較深學問亦佳從前未經升用即因其性情偏執遇事  
輒挾私見是以遲遲耳近念其學問尚優歷俸最深仍用侍郎畱  
學政之任理宜安分守職承受朕恩乃於浙省一案執辦不休無  
故陷人於悖逆名節有虧之事今復招集生監徧令指實而置日  
前錄科之事於不辨徒令闔省生監守候多時几誤場期如此若  
再姑容則何以為曠職生事者哉竇光鼎著交部議部議革職伊  
令阿復奏光鼎在平陽縣城隍廟多備刑具追究書吏生監平民

一槩命坐及由平陽回省攜帶多人曉曉執辦諭曰此事之始朕因寶光鼎為該省學政適該省有虧空之事因令就所見聞陳奏此朕明目達聰兼聽並觀之意耳即使所言不實亦祇係風聞入奏斷不以此遽加之罪今伊所稱黃梅丁憂演戲各款皆節外生枝況業經阿桂等審係寶光鼎誤聽虛誣朕亦示加之讀寶光鼎當知感激朕恩安靜供職乃見屈賓興大典多士在省城守候錄科伊竟親赴平陽咆哮生事而置目前錄科之事於不辨是以將伊革職此寶光鼎自貽伊威其罪並不在於言事不實也茲從據伊齡阿奏寶光鼎回省攜帶丁憂典史及生監等多人以滋誣位且言不欲作官不要性命等語看來寶光鼎竟係瘋病是以

舉動顛狂若此伊於黃梅丁憂演戲一節始則誤聽人言欲以忤逆不孝之事污人名節今赴平陽訪係此事屬虛復言黃梅任內另有別項款蹟以實其說如此乖張務亂不但有乖大臣之體且恐煽惑人心以致啟生監平民人等訐告官長效尤滋事之風不可不嚴行懲儆僅予革職不足蔽辜竇光備著拏交刑部治罪光緒尋奏臣親赴平陽縣紳士民人呈送五十年派捐田單二百餘張供稱知縣以彌補虧空爲名計畝派捐每田一畝捐大錢五十文給官印田票一紙與徵收錢糧無異又呈送供票九張共計大錢二千一百千文四十四年四十七年兩次勒捐富戶自一百餘千至三十五千不等每歲採買倉穀並不給價有頭票穀領帖

各名色該縣在任八年所侵吞殺價與勒捐之錢計贓不下二十萬且於頒賞老民錢及廩生廩餼亦未給發至其母喪演戲緣欲緩報丁憂借演戲以便催糧家人竊物外逃事遂漏洩邑人皆知今將田單印票飛頭殺領帖催帖借票各揀一紙進呈 諭曰前據伊齡阿奏寶光爾回省攜帶生監多人以爲質證舉動顛狂且恐煽惑人心啟訐告抗官之漸是以降旨將寶光爾拏交刑部治罪今觀寶光爾所奏又似黃梅實有勒派侵漁之事且有田單印票借票收帖各紙確鑿可據豈可以人廢言前因浙省勒限彌補虧空恐該州縣中有不肖之員藉端勒派擾累閭屜降旨飭禁今黃梅借彌補勒令輸捐旣已勒捐仍不彌補以小民之脂膏肥

其懲整妄案不下二十餘萬似此貪官汚吏而不嚴加懲治俾得  
縮滿吞舟不肖之徒轉相效尤於吏治大有關係若竇光緒果有  
賄買招告及刑偏取供各情節一經質訊得實則其獲戾更重今  
觀其呈出各紙此事不爲無因又有原告吳榮烈等隨伊到杭願  
與黃梅對質若朕惟阿桂曹文植伊齡阿之言是聽而置此疑案  
不明白辦理不但不足以服竇光緒之心且浙省見值鄉試生監  
雲集眾口籍籍將何以服天下輿論此事關係重大不可不徹底  
根究以服眾懲貪阿桂見已起程在途接奉此旨仍著回至浙江  
秉公審辦此時竇光緒業已由浙起解阿桂於途次遇見即將伊  
帶回浙省以便質對此案若止派阿桂伊受朕深恩爲大學士自

不肖心存回護但究係原審之人著添派閔鶚元會同審辦閔鶚元係科目出身久任巡撫辦事認真且籍隸浙江見聞更爲真切自當秉公無所回護該撫見在江南監臨鄉試著布政使長齡馳驛前往代辦監臨事宜閔鶚元卽回至蘇州候阿桂經過時一同馳往務將寶光館摺內所奏勒派貪贖各款逐一根究其稱黃梅緩報丁憂借演戲以便催糧似非人情所有且此案內緊要關鍵亦不止此阿桂閔鶚元總須將黃梅勒捐派累實在情形審訊明確且寶光館進呈田單印票飛頭穀領收帖借票各件俱係黃梅勒派勒借及採買倉穀不發價值虛填收領確實憑據寶光館進呈者不過每樣各檢一紙其存留浙省者甚多以此觀之則伊齡

阿不免爲屬員所欺矣此事卻有關係欺伊齡阿尙可朕與阿桂  
可受其欺乎必應審明朕不回護惟有大公至正而已閔鶚元亦  
應如此阿桂等到彼先須就此各項字帖並調齊控案逐款根究  
卽無難水落石出況票內一半鈐有官印及伊私用圖印斷非捏  
飾黃梅如果有種種劣蹟卽應審明定罪以儆奸貪不可顛預完  
結致滋物議也九月 諭曰前因浙省倉庫虧缺不能依限彌補  
特派大臣前往查辦並因寶光鼐爲該省學政見聞較切因令就  
所見聞據實陳奏此朕兼聽並觀之意嗣據寶光鼐覆奏浙屬之  
嘉興海鹽等縣倉庫虧缺浮於報明之數並以平陽縣知縣黃梅  
丁憂演戲列款入奏朕以其不避嫌怨曾褒其公正迨阿桂等查



明該省虧缺較原報之數有減無增所參黃梅款蹟謂係竇光鼐  
誤聽人言實無其事而竇光鼐執辦不休且據伊齡阿兩參竇光  
鼐自赴平陽招集生監徧寫親供咆哮生事其時朕以此案業經  
阿桂等審明竇光鼐固執已見聚集生童招告恐煽惑人心致啟  
計訟之風竇光鼐不得爲無罪是以將伊革職等問此政體國法  
必當如此辦理非朕之憎竇光鼐也嗣復據竇光鼐將黃梅貪贖  
款蹟逐一查出並將借票捐單呈覽職款確鑿是其言並非無據  
而阿桂等前此在浙查辦竟爲地方官瞞過伊齡阿又復聽信屬  
員一面之詞受其慫恿遂爾冒昧奏參不可不徹底根究因卽降  
旨將竇光鼐寬釋令阿桂帶同竇光鼐回至浙江並派閩鄂元會

同前往查辦茲據阿桂等將黃梅在任婪索各款嚴切審訊黃梅勒借吳榮烈等錢二千一百千文又侵用田單公費錢暨朋帖採買錢一萬四千餘千文而於原報虧缺穀價僅彌補四千餘兩仍未依限補足是竇光鼐所奏惟黃梅匿喪演戲及侵用廩生餼糧並短發老民銀兩三款屬虛其餘三款已爲確實是伊從前冒昧固執之咎尙屬可寬見在陸錫熊已出學差所有光祿寺卿著加恩令竇光鼐署理卽行來京供職至黃梅於乾隆四十三年調任平陽縣在任八年種種貪黷營私歷任上司漫無覺察實難辭咎但四十四年以後浙省督撫如王賈望陳輝祖俱已另案治罪法無可加惟福崧在巡撫任已歷數年乃於此等劣員執法侵貪並

不扣實奏參豈可復膺封疆之任前任藩司盛住所屬州縣錢糧是其專責伊在浙較之福崧尤爲最久亦復置若罔聞姑容闕冗是盛住亦不應仍任織造伊等見交部嚴議自係革任革職難逃寬宥福崧著先革去翎頂盛住亦著革去翎頂俱著來京候旨至伊齡阿於黃梅婪索一案雖非其任內之事但輕聽屬員之言兩次將寶光爾冒昧奏參是其錯謬已自請交部嚴加議處著在任聽候部議其餘失察之各上司俱著交部查取職名分別嚴加議處朕辦理庶務一秉大公至正總期案情覈實從不稍存成見諸臣功過惟視其人之自取除將阿桂等審擬一摺交軍機大臣會同行在該部覈議具奏外將此通諭知之尋諭阿桂曹文植等

晟伊齡阿俱著交部嚴加議處十月授宗人府府丞仍署光祿寺卿事務十二月部議光祿寺供奶餅缺額降一級畱任五十四年四月充殿試讀卷官六月擢禮部侍郎奏安徽學政編修徐立綱人品聲名平常 詢督臣書麟撫臣陳用敷有據降立綱以司務博士等官用是月充浙江鄉試正考官八月提督浙江學政五年奏近年文體漸靡皆由肄習講章讀坊刻時文所致臣通飭各學講求傳注及身心體驗聖賢立言之旨以前輩文爲楷式以易詩書三禮春秋左傳史記前後漢書五代史及昭明文選唐宋大家古文彙爲月課分月注冊考課功過 上嘉之五十七年五月擢左都御史十一月 命在上書房總師傅上行走五十八年

四月充殿試讀卷官五十九年八月充順天鄉試正考官十二月  
充經筵講官六十年三月充會試正考官四月 諭曰朕辦理庶  
務往往 天牖朕衷幾先洞燭本年會試榜發第一名王以銜亦  
係浙江人朕批閱之下以各直省應試舉子不下數千人豈無眞  
才足拔王以銜王以銜同籍聯名儼然兄弟恰居前列殊覺可疑  
茲據欽派大臣將覆試各卷分別等第進呈第二名王以銜覆試  
列在二等级第高下尚不相懸其王以銜竟列在三等七十一名  
朕親加批閱疵類甚多派出大臣校閱甚爲公當且據磨勘大臣  
奏稱王以銜會試中式之卷第二藝參也魯比內用一日萬幾一  
夜四事等字樣於先賢身分尤爲引用不切似此膚泛失當之卷

何以拔置第一且所擬策題紕繆處甚多該考官等於掄才大典漫不經心殊非慎重衡文之道竇光節人本迂拘不曉事體朕風聞其於文藝一道尙能留心講習是以派爲正考官不意其糊塗錯謬一至於此且初九日主考出闈復命召見時竇光節不特奏對不明跪起兼至傾跌是其年老昏瞶豈可復膺風憲之任除副考官劉躍雲瑚圖禮及薦卷不當之同考官等卽照和珅等所請交部嚴加議處餘著照所擬分別辦理外竇光節著卽解任聽候部議尋 子四品銜休致九月卒

右 國史館本傳

乾隆六十年諸城竇公以磨勘事罷左都御史任居京師以病卒

明年爲嘉慶元年其孤汝翼等歸公之喪將以某月日葬公於諸  
某山之原汝翼先期郵公狀寓書於杭屬銘公之墓瀛辱公知  
最深不敢辭公諱光胤字元調號東皋曾祖某祖某父詵乾隆甲  
子舉人皆以公貴 贈榮祿大夫禮部右侍郎曾祖妣臧氏李氏  
祖妣牛氏沈氏妣張氏皆 贈一品夫人公幼負絕人之資家貧  
賃書於人覽卽成誦一日讀文選卽操筆爲琅邪臺賦監司某公  
見而大稱賞之時公年甫十二耳十五補博士弟子員旋丙辰  
本省鄉試副榜辛酉舉順天鄉試壬戌會試中式入翰林爲庶吉  
士散館授編修戊辰 御試翰林詹事府等官於 乾清宮閱卷  
者列公四等向例大考惟高等得遷官後等改官降黜有差 上

知公特遷公爲右中允蓋公被 上知遇自此始未幾累遷至翰林院侍讀學士 御試一等特遷內閣學士出爲河南學政丁內憂歸服除補都察院左副都御史視學浙江任滿還以與刑部爭秋讞事吏議鐫級 上許畱任如故又奉 命以對品用遣祭告南海所至卻地方賂遺尋 命署內閣學士越二年授順天府府尹畿輔叢弊久吏胥多因緣爲奸公受事苞苴屏絕懲其尤數人劾州縣之不職者二三人時京縣爲蘭公第錫李公湖皆經公薦舉其後官督撫皆號稱賢臣在京兆四年丁外憂歸服除再補原官蝗蝻災公報 聞親捕之因旗莊不出丁協捕與督臣奏辨禡職不數月 上又起公爲通政司副使遷宗人府府丞公爲府丞



最久凡十年復視學浙江特擢公爲吏部右侍郎會 上遣大臣  
清查浙江州縣倉庫並有 旨問公公以實告且以平陽令黃梅  
科斂病民條其狀以上論者誣公幾不測公復備備奏論 上卒  
直公按治黃梅而還公官復授宗人府府丞擢禮部侍郎又出爲  
浙江學政越三年以左都御史 召還在上書房總師傅上行走  
蓋 上稔公老成冀以學問資輔導公在 禁近 上製文字輒  
命公閱公撰文以進必因事納忠無億言乾隆六十年充會試  
正總裁以所錄首卷多訛疵被勘議落職僅降四品銜予休而公  
於是亦既老且病又公生平不滿學而仁誼道德之旨不言躬行  
尤敬祈義利而喪之以毋自欺立朝五十年揭揭然柴立無所顧

慕剛直不能容人人多沮而忌之者惟以誠悃荷 聖主知屢起  
屢仆卒蒙保全而究亦未竟其施嘗言學貴有用如昌黎折王庭  
湊陽明平宸濠乃真學問故公於書無不闕而不屑沾沾於章句  
訓詁世之人僅以文章稱公未爲知公者也然卽公文章亦足見  
公學之有本蓋公詩似少陵古文如昌黎制義則發揮聖賢義理  
自成一家之文云公得士最盛公之門歷官中外位公卿者甚眾  
乾隆己亥有浙江巡撫某朝京師某故貪墨吏而其鄉試出公門  
與公遇於直房公以言規之某怫然時公之亡謁公而厚致饋遺  
公揮其金絕不與通無何某果敗公性開蕩遇同列下輩樂善汎  
愛言無所不罄每與客談客起猶立語移晷刺刺不能休瀛侍公

稍晚而公於瀛尤厚公亡蓋知我者鮮矣公慮己約敵縲惡粟如窮諸生歲入瘠田以贈貧宗人有所請不吝此皆細行不足重惟公生平大節雖公所未嘗告人與人所不及知者不能具書而按公之狀參以瀛之所嘗聞於公者略爲詮次已足以想見公之爲人公初娶張氏繼劉氏俱 贈一品夫人子六長卽汝翼乾隆戊戌進士宗人府主事汝瑄汝璜汝咸皆國學生張出汝翀劉出汝翻側出女四人嫁娶皆名族孫十一人孫女十二人公之生以康熙五十九年十月初二日卒以乾隆六十年九月二十二日年七十有六著有東臯詩文集應制集省吾齋彙銘曰

維執不嬰選愜所譽飛謀釣誘弗改其輶厥施未究曷云其休其

學則昌祛垢豁脅包羅旁魄躡韓軼歐公實知我以銘公幽

右墓誌銘秦瀛撰

公諱光簡字元調號東皋山東諸城人幼負絕人之資家貧貸書以讀覽卽成誦年十二讀文選遂爲琅邪臺賦觀察某奇之十五爲諸生丙辰年十七中本省鄉試副榜辛酉舉順天鄉試壬戌成進士爲庶吉士散館授編修戊辰御試翰林於乾清宮遷右中允累遷翰林院侍讀學士御試一等遷內閣學士視學河南丁母憂歸服闋授都察院左副都史視學浙江差旋與刑部爭秋讞吏議鐫級上許畱任復奉命以對品用祭告南海尋署內閣學士越二年授順天府府尹在任四年丁父憂服除仍授府

對月言大異改乃屬

卷八十七 鄭貳四十七

三

尹曾蝗災公親捕之以旗莊不出丁協捕與總督奏辨褫職不數  
月起爲通政司副使遷宗人府府丞爲府丞者十年復視學浙江  
旋擢吏部右侍郎會清查浙江倉庫有旨詢公公以實聞復  
爲宗人府府丞尋擢禮部侍郎又視學浙江越三年以左都御史  
內召爲上書房總師傅乾隆甲寅充順天鄉試正考官乙卯充  
會試正總裁以磨勘所錄首卷語疵降四品銜予休致公立朝五  
十年以剛直聞持品不撓獨立不懼惟以誠惻荷聖主知生平  
不名一錢處己極約旣貴敝衣惡食如窮諸生爲文追兩漢熟精  
文選理多古文奇氣時藝取法先正得士最盛士謁與談旣起猶  
立語移晷刺刺不休娶張氏繼劉氏俱贈一品夫人子六汝翼

乾隆戊戌進士由庶吉士爲宗人府主事汝璫汝璜汝淵皆國學生汝紳汝翮女四人嫁娶皆名族孫十一人孫女十二人以乾隆六十年九月二十二日卒年七十六著有東皋文集東皋詩賦集省吾齋橐詩鄉試出公門下公子汝璫屬爲狀謹具任官事迹如右謹狀

右行狀蔣詩撰

先生少有神童之目入泮食餼年未十五擢詞垣後以詩文受主知不數年已至列卿凡六任典試四任學政一任總裁所取皆知名士每試牘闈墨出爭先快睹奉爲楷模士人望之眞如泰山北斗懲直不可干以私任京兆時力過權貴鋤吏民之不法者視

學浙江參地方一官貪黷幾罹不測公矢志不回卒能申其意浙人至今感之制藝如古傳注深得立言之旨工擘窠大書點畫不苟望之知爲端人正士詩擬韓蘇有過之無不及也

右東武詩存王賡言撰

寶東舉總憲任宗人府府丞十六年劉秉權任戶部郎中三十二年吉通政兆熊任通政司正使十四年吉大司成善任祭酒三十年皆仕途中之最久者也

右錄宗室昭榘撰

國家故事大考翰詹惟一等及二等前數名得遷擢稍後或被文綺之賜中贊以上列三等末率改官降黜編檢奪俸至四等則

無不降斥者乾隆戊辰大考諸城寶總憲光鼐時官編修名列四等上夙知公特遷爲右中允異典也公古文學昌黎時文天矯成一家言居官亦鯁直清介爲時名臣甚矣高宗皇帝之知人也

諸城寶總憲乾隆開山閣學出爲河南學政丁憂歸甫逾年上以南書房缺人命山東巡撫傳旨起公公泣辭曰光鼐在衰經中不敢奉詔巡撫屬公陳謝公又曰不祥姓氏不敢內陳敬煩代奏上聞而矐之

右紀聞陳康祺撰





覺羅奉寬

覺羅奉寬滿洲正藍旗人乾隆七年進士改庶吉士散館授檢討十二年充貴州鄉試副考官十三年五月遷侍講六月充日講起居注官十五年轉侍讀十六年遷左庶子十七年正月命在上書房行走二月遷侍講學士三月充順天鄉試同考官六月大考二等八月充會試同考官十八年二月轉侍讀學士四月遷詹事十一月遷內閣學士二十年正月因上書房曠班罰俸三年四月擢盛京工部侍郎二十四年同將軍清葆奏大那綠等九處山場向係臺丁斫木納稅後因搭橋商人拖欠歸公木價酌量給發商人領票斫木以完積欠二十一年八月全完復經奏請仍給各

商領票三年後給臺下辦理今限滿理合仍令臺丁斫木納稅報  
聞二十九年八月 命來京十月授內閣學士仍在上書房行  
走三十二年八月擢兵部侍郎九月兼鑲白旗滿洲副都統三十  
三年充經筵講官三十五年充武英殿總裁官三十六年五月兼  
翰林院掌院學士六月教習庶吉士三十七年三月充會試副考  
官六月教習庶吉士九月月食行救護禮各部院堂官未到班都  
察院奏參奉 旨查議奉寬是夜在圓明園該班住宿 特予免  
議三十九年二月承襲勳舊佐領三月卒 特命 仁宗睿皇帝  
賜奠又奉 諭曰奉寬爲人謹慎在阿哥書房行走甚屬勤勉今  
聞溘逝殊堪憫惻所有應得卹典該部察例具奏尋 賜祭葬嘉

慶二年四月奉 敕旨朕沖齡就傅時係原任大學士福敏啟蒙授業迨踐阼後卽加恩追贈嗣於乾隆六十年上丁釋奠禮成眷懷舊學復晉贈太師因思皇帝啟蒙師傅係兵部侍郎奉寬授經有年實資啟沃今朕傳位訓政皇帝敬承寶阼典學益勤念當日講帷課誦之初功基養正允宜特加崇秩以獎前勞奉寬著加贈太師禮部尙書銜用示崇禮師儒至意四年五月 諭曰原任兵部侍郎奉寬爲朕啟蒙師傅前奉 皇考敕旨特追贈太師並加禮部尙書銜其時未經議及易名之典奉寬著加恩追諡以獎舊學所有應得諡法著該衙門察例具奏尋 賜諡文勤子麟至襲勳舊佐領

右 國史館本傳

張泰開

張泰開江蘇金匱人乾隆五年授內閣中書七年進士改庶吉士九年命在上書房行走十年散館授編修十一月遷中允十二月遷侍讀十一年充日講起居注官十二年正月遷都察院左僉都御史十一月授內閣學士十四年授禮部侍郎十五年提督順天學政十六年調工部侍郎仍留學政任十八年九月調禮部侍郎十月在上書房行走十九年二月國子監學錄缺員吏部以九卿所保舉人引見上以泰開所保之鄒志伊係同部侍郎鄒一桂之子顯有瞻徇同官情弊交部嚴議革職四月特旨給編修銜在上書房行走二十年三月上閱胡中藻堅磨生詩鈔悖

逆泰開重師門罔顧大義爲之作序出貲刊刻 命革職部議罪  
如律 諭曰張泰開本一庸懦無能之人其出貲刊刻由被勒索  
序文又係胡中藻自構張泰開著從寬免其治罪卽行釋放仍在  
上書房行走效力贖罪九月授編修二十一年十月 詔免泰開  
從前罰俸二十二年七月充日講起居注官十月授通政使 命  
爲上書房總師傅二十三年十二月授左副都御史二十五年三  
月充會試副考官二十六年五月提督順天學政十一月授刑部  
侍郎二十七年四月調禮部侍郎十一月奏言宣化府向係科歲  
並試邊方文風樸陋士子試後卽各營別業三年再考始理舊業  
文理荒疎學臣歲試甫竣復接科試竭力搜羅難於足額請三年

兩次分考勤加訓勵文風士習均有裨益下部議行二十八年授  
左都御史二十九年十二月充經筵講官三十一年正月擢禮部  
尚書 命在紫禁城內騎馬三十二年四月 命以禮部尚書專  
管左都御史事五月實授左都御史三十三年六月以老病乞休  
諭曰張泰開在上書房行走有年頗著勤慎茲年逾八秩因病  
乞休著加恩賞給太子少傅禮部尚書銜准其休致回籍 御製  
詩餞之曰年過懸車又一旬南旋嘉與錫恩綸飄蕭白髮三千丈  
啟迪青宮二十春安得蘇仙授梅橘眞成疏傅理歸輪梁溪水是  
還鄉水愈疾應知速倍神三十九年九月以疾卒 賜祭葬如例

謚文恪



右 國史館本傳

張秦開字履安乾隆壬戌進士選庶吉士入直上書房授職不數  
年沔陟卿貳晉禮部尚書兼都察院左都御史嘗以胡中藻獄牽  
連被逮 高宗知秦開忠謹卒贖之 眷注有加以病乞歸加太  
子少傅卒年八十有六諡文恪

右傳秦瀛撰

閻循琦

閻循琦山東昌樂人乾隆七年進士改庶吉士十年散館改主事十二年補工部都水司主事十三年充琉璃窯監督十八年五月充木倉監督七月遷員外郎十九年充寶源局監督二十二年推升禮部郎中奏畱工部二十三年遷廣東道監察御史仍兼工部行走八月奏言江南河東等省被水成災之處撫賑折給銀兩按照戶口秤定銀封以便給發而該管官往往假手於家人胥吏勢不能免扣減之弊甚至官吏通同暗用輕戲宜令督撫於府屬佐貳或鄰封協辦州縣中派委專員監封仍飭令道府各官不時抽驗以除弊竇至貧民領銀易錢買米謀利之徒高擡錢價改用重

戲貧民不能不受其剝削應令隨時稽察明白曉諭以除奸民牟利之弊再鄉城富戶每囤積錢文經久不行散易囤積日多斯流通愈少亦應令悉行散易以平市價 諭曰御史閻循琦奏撫卹事宜一摺頗爲切中情弊若但將各款條析明降諭旨其本屬不肖者未必因此而遽生畏憚而本無此弊者或轉因此啟其舞弊之端是本欲止奸而適以導奸矣著將該御史摺鈔寄各省督撫令其畱心體察不必明降諭旨著在京總理大學士傳諭該御史知之二十三年奏入旗義學教習月給銀米三年期滿以知縣教職分別錄用自應朝夕訓迪方爲無忝厥職乃近聞並未實心督課甚至另覓私館別受修脯每月初二十六到學片時卽散雖例

由禮部派員稽察然有虛名而無實事請嗣後做照羅官學之例每年 欽派大臣會同禮部堂官嚴行稽察務令該教習各專其功以生徒之優劣定教習之勤惰庶肄業子弟得受訓誨之益 諭曰國家設立學校原以教育人材今觀八旗義學徒有學校之名而無育才之實況有咸安宮國子監官學並教養世職官員左右兩翼官學八旗讀書人等儘可學習著將義學裁去仍交管咸安宮並各官學之大臣盡心教習不可有名無實二十四年掌京畿道監察御史二十五年復充琉璃窯監督二十七年授坐糧廳二十九年回工部任三十年五月以失察工部冒銷案解任尋釋仍以原銜畱部三十一年五月補福建道監察御史十一月遷

吏科給事中三十二年轉吏科掌印給事中尋 派總理三殿大  
工三十四年十二月 特命兼吏部文選司郎中事旋擢內閣侍  
讀學士仍兼吏部行走三十五年署工部右侍郎三十六年三月  
充會試知貢舉尋補侍郎三十七年兼署刑部侍郎三十八年遷  
工部尚書 命赴盛京查辦戶部侍郎兼管奉天府府尹瓦爾達  
徇庇錦縣知縣圖爾炳阿寬縱正犯尋鞫實又審出瓦爾達恃勢  
侵占民地等情按律治罪四十年十一月 賜紫禁城騎馬十二  
月卒 諭曰工部尚書閻循琦老成練達宣力有年洵歷正卿正  
資倚任前以染患病噎特分內府藥餌令其加意調攝冀得速痊  
茲聞溘逝深爲軫惜著加恩晉贈太子太保並派散秩大臣一員

帶同侍衛十員前往奠醊所有應得卹典仍著該部察例具奏尋  
賜祭葬諡恭定子學溍原任江南淮揚道學海見任內閣中書

右 國史館本傳

粵乾隆四十年乙未冬十有二月惟丙午肫司空昌樂閻公以疾  
薨於位遺疏奏 聞奉 上諭工部尙書閻循琦老成練達宣力  
有年洵歷正卿正資倚任前以染病嗚噎特頒內府藥餌令其加  
意調攝冀得速痊茲聞溘逝深爲軫惜著加恩晉贈太子太保並  
派散秩大臣一員帶同侍衛十員前往奠醊所有應得卹典仍著  
該部察例具奏於是禮臣覆准加祭一壇給全葬銀五百兩仍子  
諡內閣按諡法以敬事供上曰恭純行不爽曰定公其有焉得

臣等不才不肖  
卷八十一  
旨報依初公疾作以五月時方奉五城監糶之命往來廠署未嘗言瘁九月上自木蘭還連賜服伍食丸既少閒矣公體素強毅勤於政事嘗自言一日不詣公此心似有缺欠處遇奏事必先赴與僚佐諮議必盡所言其於晨夕起居殊不自矜嗇也已而疾劇屢蒙召見問慰距卒前旬日猶蒙異數賜紫禁城內騎馬蓋上之優禮大臣有加無已而公所以終始承恩榮哀畢備者可謂極人臣難得之遭矣公以世宦名家子自曾祖考諭德公逮公四世進士三入翰林公之兄弟羣從或班京職或任外吏皆有文譽公貴至一品而門閥益以光大朝野之望翕然以公長才克稱大用公則夙夜兢兢惟恐不及蓋自少隨父任十餘年官曹

司廿餘年習教豫而更事深有以裕其敏果之才廉謹之節詳審而非瑣屑謙退而非詭隨易直而非鹵莽以此敷歷臺省洵膺隆遇公之爲工部自乙丑散館始改主事部例稱繁主內外工程檜燬或時與匠作處酌體式校資費非其素練而持之以正鮮不爲吏所蒙公惟精白適心不辭勞勩積二十餘年凡四司三廠庫局任幾徧所與同官諸上官無不信重公有所察舉必首公 上有問必以公對 上以是稔公能中閒擢居言路者十餘年掌銓政直閣務首者一年皆不離工部偶以事被議解任數日事尋釋仍得原銜畱部以迄於擢侍郎越三年遂領尚書公之功名出入實與工部相終始前尚書李公元亮公爲其屬久最相器嘗因論河



道事劄切李起指坐曰此位終當屬君人以是歎李之明而不知  
公之精神特達惟 聖天子知人善任積之久以大其成者良非  
偶而致也公性爽劉生平讀書能見其大爲文章亮拔深至如其  
爲人尤長於奏議每條一疏定一橐詳略輕重悉中機要奏對

上前一無諱飾時蒙 溫旨嘉獎嘗因知貢舉覆命蒙 問嚮來

諸臣皆有條奏汝獨無何也對曰科場條例皆歷經 欽定已極

詳備諸臣果實力奉行自足不敢毛舉一二端謬矜曉事也 上

頷之良久曰汝言甚是凡事皆當如是推非獨知貢舉而已先是

西山捫頰滿清處屢窳歲久窳窳有建議別營他處者因緣爲利

竇公時爲御史兼部奉 派往會勘獨持不可因還覆狀別具議

帖呈前相國傅文忠公公卽以呈 御覽竟如公議其議大略以  
舊竄產煤本旺徒以積水民人無力疏通致艱開採非竟甘廢棄  
詳驗地勢事宜卽別定新竄未必遂有利無害莫若許就舊竄近  
下處所開鑿溝隧淤去而煤暢其餘可採之地擇情形有據者以  
時招商官不費而民不擾云居家寬而有制從不計問生產自公  
之暇則手一編吟諷晚年尤好杜陵集及金嘉魚文日錄數首以  
課子孫交遊閒不濫徵逐有與謀焉必竭誠以報周急必從厚或  
覘公以爲豐於藏及終僅給喪具而已殯歸之日道出城東門門  
有舊義學生徒數十人皆白衣冠執香而送詢之以公嘗有惠於  
學中云太常少卿仁和趙佑於公爲後進嘗從公協京畿道事公

性不喜與人談文字而獨推許佑文其嫡嗣學朱辱從遊於公既歸將葬奉狀來泣求爲之志銘佑義不得辭謹志其官階則乾隆戊午舉人壬戌進士選翰林院庶吉士歷任工部營繕都水司主事都水司員外郎本廠監督掌廣東道監察御史仍兼工部行走題掌京畿道監察御史 欽差提督兩窯廠寶源局監督總理通州坐糧廳再補福建道監察御史轉吏科給事中坐轉吏科掌印給事中 特調兼吏部文選司掌印郎中擢內閣侍讀學士超擢工部左右侍郎著刑部侍郎晉工部尙書加一級 誥授資政大夫沔光祿大夫 恩贈太子太保諡曰恭定志其事蹟則在都水有往江南董修洪澤湖隄工事在錢局有營治廨宇請加錫卯事

在科道條陳外任升調錢穀出納等事爲見例所行又議定煤窯  
事分督三殿大工事在掌選有卻選人金事爲侍郎後扈從木蘭  
二次 特命充辛卯會試知貢舉事往 西陵勘歲修工程事往  
奉天審理官犯某事尙書後有主考景山教習事病中猶有奉  
命覆理東光獄事檢按銓選事例事皆詳慎稱 旨志其氏族則  
本貫山東青州府昌樂縣里居曰閻家河會祖考曰世繩康熙丙  
辰翰林左春坊左諭德祖考曰愉康熙庚辰翰林知浙江長興縣  
行取主事考曰廷佶雍正甲辰進士歷官廣西賓州知州三世皆  
以公貴累遇 覃恩贈皆如公官妣曰劉太夫人公之字曰景韓  
號曰瑋庭行第三配吳夫人渠邱宦族女有懿德公居父母喪悉

以遺產讓兄弟獨任葬事皆夫人力贊成之前公二十四年卒側室魏氏胡氏子五人長學朱庚寅舉人吳夫人出次學澄國學生次學清次學璐俱魏出次學海胡出女四人壻曰王紹琨李於垣陳遐齡袁繼廣孫三人兆琛兆璵兆琚俱諸生曾孫一人準志其年則自乙未上距生於康熙四十九年庚寅七月享年六十有六其葬以乾隆四十一年十月與吳夫人合葬在營邱鎮北一里是於法宜銘銘曰

嶽峙青水流丹何 天寵維邦翰履慥慥音秩秩勞哉生歸乎逸是惟司空之宅後有作者視斯石

右墓誌銘趙佑撰

邁拉遜

邁拉遜滿洲正藍旗人姓佟佳祖希佛任刑部尚書父安圖任江西巡撫乾隆入年邁拉遜由廕生補吏部主事十三年擢員外郎十四年遷郎中十五年調戶部銀庫郎中十七年擢四川夔州府知府十八年十月遷山東運河道十一月調直隸永河道十九年十二月丁父憂二十年授吏部郎中二十二年正月授山西大同府知府二十五年二月丁母憂二十七年二月補吏部員外郎十一月擢戶部郎中二十八年四月補公中佐領三十一年五月擢內閣學士兼禮部侍郎六月署吏部侍郎十一月命往直隸審內務府人石位公赴深州販桃串通主人王義照捏造桃園典契

同治三年庚子年十一月  
誣知州帥家相強買官桃案擬石位公等罪如律旋署刑部侍郎  
三十二年六月直隸南皮縣民曹新城控前縣程如侵那回贖旗  
地銀 命邁拉遜會督臣方觀承查辦旋奏曹新城係由蒙古開  
戶出旗入籍南皮所典旗地久經報部給價官贖該縣私行侵用  
革職造成是月復會方觀承審蠡縣革生王樸捏民人朱大業占  
伊房基案擬王樸誣告罪七月湖北黃梅縣民瞿寶柱以乾隆二  
十九年縣境被水潰隄紳士黎明伍倡議按糧出費興修從中侵  
蝕官吏分肥赴京具控 諭邁拉遜往會督臣定長究審旋奏訊  
黎明伍侵蝕屬實署縣朱依培違例勒罰知縣和剛中收受紳士  
餽送各情分別定擬時 命邁拉遜審案竣順道盤查州縣倉穀

時奏查過黃梅廣濟蘄水黃岡等縣庫貯無虧倉穀一項黃梅有前任知縣和剛中任內給價紳士領買至今未還倉穀五千二百餘石廣濟有已買未交穀一千四百餘石黃岡有前任知縣胡廷槐任內已買未交穀八千一百餘石除和剛中胡廷槐另案詳革請將並未催徵之見任黃梅縣知縣呂世慶廣濟縣知縣楊世增黃岡縣知縣楊儀交部議處報 聞十月奏行抵河南盤查舞陽縣倉穀該縣書明阿侵用常平倉穀六十餘石請解任交撫臣阿思哈審辦又奏續查舞陽縣倉廩虧藉田穀十四石又浮收民借還倉穀七石五斗該縣管倉家人蘭姓畏罪自盡將書明阿革職看守請 旨辦理 硃批交阿思哈併案參處 諭曰邁拉遜奏



參舞陽縣知縣書明阿虧短倉穀竟有六十餘石又浮收七石零將該縣革職看守請旨辦理等語已批交阿思哈併案參處矣州縣侵虧錢糧自應嚴究重懲使劣員知所儆惕今摺內所稱該縣短少浮出各穀總計不出百石之內以全倉覈之其數無多不致遽獲重咎且覈時盤量手輕手重盈絀因之互異豈能較若畫一邁拉遜辦理此案或因書明阿係滿洲人未免意存避嫌或平日與書明阿別有芥蒂不無稍事吹求雖未便卽爲懸斷但其中如管倉家人蘭姓投井自盡一節或係一時愚昧畏罪捐生亦事之未可知者著傳諭阿思哈令其秉公研審該家人如有別項情弊務卽徹底根究按例定擬若情節僅止如此亦只與應得處分不

必苛刻深求有乖平允之道十一月 命偕刑部尙書舒赫德往  
審湖南桃源縣生員杜鳳鳴控知縣狄如渙及湖北棗陽縣監生  
控知縣永福籍兵差苛派二案均鞫屬虛抵罪如律並奏雲南大  
兵凱旋各站額設夫馬不敷應借司庫閒款雇辦詳舒赫德傳十  
二月 命邁拉遜留湖南照料滇省回兵過境三十三年四月奏  
侍衛德爾森保由雲南馳驛進京過澧州渡河家人加保鞭責船  
戶劉斌落水身死寘加保於法十月署鑲黃旗滿洲副都統十一  
月授總管內務府大臣三十四年二月奏 咸安宮官學教習曠  
班 命將管理官學之觀保等交部議處九月兼上駟院卿三十  
五年四月授鑲白旗滿洲副都統五月授刑部侍郎七月 命往

保定鞠清苑縣開設銀鋪之何彪年那用藩庫發給傾換錢糧銀兩審擬何彪年罪應如例並劾原辦之保定府知府誇喀清苑縣知縣郭玉並不詳報定擬請分別治罪 諭曰逸拉遜等查審何彪年承領藩庫傾換錢糧銀兩輒敢私行那用雖經事後追還其情罪甚爲可惡而原辦之前任知府誇喀知縣郭玉並不詳報定擬僅以口稟藩司顛預了事均有應得之罪郭玉著革職已革道員誇喀俱交刑部查審至觀音保身任藩司既知何彪年侵那作弊理應徹底根究乃於清款兌收之後遂置此事於不問亦不據實具奏藩司例得奏事若此等關係錢糧要件不上聞則應行專摺入告更有何事觀音保著革職一併交部質訊十月劾順天

府應交本年祭祀牛隻經犧牲所驗明毛色不純駁換未交者計六十餘隻相應奏參 諭軍機大臣會同該管大臣會議旋議預備祭祀之牛從前定額太寬致地方官得藉口於爲款過多選購不易遂爾壓欠逾期請裁減三十頭以資覈實仍飭此次遲延未交州縣速繳並請 旨應否議處 諭免三十六年七月調吏部侍郎九月兼署工部侍郎管欽天監光祿寺事務三十七年八月以原銜充經筵講官三十八年五月補正藍旗漢軍都統三十九年三月京察加一級四十年四月兼署禮部侍郎七月管左翼稅務九月調正白旗蒙古副都統仍兼正藍旗漢軍都統十二月奏拾匿名揭帖一紙內寫縣德阿哥與禮部郎中秦雄襲交接狀四

十一年正月 諭日前據邁拉遜奏拾匿名揭帖一紙內有開寫  
絲德阿哥賞給禮部郎中秦雄裒字畫食物並經相見送禮一節  
隨諭福隆安查訪今據奏稱拏獲曾在絲德阿哥處雇工之馬成  
蘇二訊供秦雄裒曾進見絲德阿哥致送書冊鑪瓶等物絲德阿  
哥亦賞給紗綢字扇屬實此事甚有關係阿哥等在內廷書房讀  
書理應謹慎自持不當與外人交接況秦雄裒不過一部漢司員  
與阿哥等毫無干涉並非書房行走之翰林等可比秦雄裒何所  
爲而必欲進見絲德絲德又何所爲而必欲認識秦雄裒若不示  
以懲儆恐諸皇子孫無所畏憚漸失我朝家法絲德著革退王爵  
及翎頂黃馬褂作爲閒散宗室至秦雄裒身爲司員敢與絲德往

來餽送殊屬可惡著革職卽發往伊犁不准贖罪是月署工部尙書七月奏錢法衙門題銷寶源局用過黑鉛數目不敷承辦司員科靈阿旣經查出並不同明堂官私行付查該局請將科靈阿交部嚴議 命出京王大臣詢明覆奏查取錢法衙門題彙並科鈔覈對黑鉛一項彙內開寫十七萬五百斤竟譌寫九萬一千五百斤及閱開送戶部冊亦係十七萬五百斤明係出語錯誤至寶源局與虞衡司查辦事件例用司付行查覆到時始具彙將原付黏入彙內呈堂疊押此次科靈阿係照成例辦理並無別情 諭曰此事邁拉遜未免有意搜求辦理公事不應如是邁拉遜著嚴行申飭四十二年三月擢都察院左都御史仍署工部尙書四十三

年四月兼鑲藍旗滿洲都統八月盛京修理城垣 命邁拉遜德  
歲前往會同將軍府尹勘估興工十一月奏臣往南路查勘城工  
有岫巖熊岳復州三處工程與德成意見不同岫巖形勢卑窪難  
以築城該處另有舊城可以因基修築復州城牆腳甚堅擬畱石  
根五尺熊岳南城外沙河一帶直抵城根須築攔水壩疏入 諭  
曰邁拉遜德成意見參差今派同辦城工仍執私不化會面加訓  
誨並著軍機大臣傳旨令其和衷共濟嗣據德成獨奏勘估各工  
有與邁拉遜不合之處朕因其偏執見小曾降旨嚴行申飭並諭  
知邁拉遜而其事則交將軍弘晌秉公會商安酌以期公事有濟  
邁拉遜奉到此旨自應痛加前改今日又據奏南路查勘八處城

工其岫巖熊岳復州三處復與德成意見不同且據稱已告知弘  
昫尤當聽其悉心查勘公同商辦乃復曉曉瀆奏所見益可鄙笑  
已於摺內批示矣邁拉遜德成同辦一事各持己見實屬不成事  
體俱著傳旨申飭邁拉遜原奏並著鈔寄弘昫閱看令其一併勘  
估妥議具奏至此後一切事宜邁拉遜德成俱當與弘昫公同商  
酌妥協籌辦勿再固執私見各自專具奏摺致干咎戾將此諭令  
知之旋經大學士等議奏內惟岫巖因舊基修築准行四十四年  
以疾奏准解任調理五十三年三月卒

右 國史館本傳



國朝詩林卷之十一

五

宗室賽爾赫

宗室賽爾赫字曉亭官至兵部侍郎曉亭遇能詩人雖樵夫牧豎必屈己下之固以詩爲性命者也辨唐宋之分如澠淄然身後詩爲夫已氏所編不免以中駟爲上駟矣知詩者惜之有佳句云水明殘照孤村入暮烟宋朝南渡君稱姪周室東遷帝是侯忘其全篇附錄於此

右 國朝詩別裁集小傳沈德潛撰

曉亭詩鈔四卷宗室賽爾赫撰是編爲曉亭次子鄂洛順所刻其詩氣格清曠風度諧婉而不傷纖弱長洲沈德潛嘗序薩哈岱集言於北地得晤三詩人首數賽爾赫次乃及於英廉薩哈岱則是

綱之見重當時久矣

右八旗通志鐵保錄

曉亭工詩乾隆九年 駕辛翰林院簡詞臣三十八人侍宴賦詩  
非甲科雖公孤不得與 侍命公以宗臣侍明年宴瀛臺如前

命一時榮之

右李鐸序鐵保錄汝公一字慄庵號北阡輔國將軍泰蔭布祿子襲封奉國將軍公名別裁集作  
塞當從 熙朝雅頌集作賽又別裁集公官兵部  
侍郎當從 熙朝雅頌集作累官總督倉場侍郎

國柱

上雖厭滿人之襲漢俗然遇夙儒耆學亦優容之鄂忠烈公容安不諳國語上雖督責然厚加任使未嘗因一眚以致廢棄國太僕柱胃為迂緩當校射禁庭國褻衣大冠侍衛有望而笑者上曰汝莫姍笑彼為儒士今乃能持弓較射不忘舊俗殊為可嘉也其優容如此

右錄宗室昭榷撰

按國柱公字石民一字石堂滿洲人乾隆時進士改庶吉士散館授編修累官

太僕寺卿

陽明書人集行本通編卷之二十一

五

國朝青獻類徵初編卷八十八目錄

卿貳四十八

李世傑

錢維城

莊存與

王際華

蔣元益

普福

舒常

補錄

莊存與



國朝耆獻類徵 初編卷八十八

通奉大夫前署江西巡撫江西布政使司布政使湘陰李桓輯  
卿貳四十八

李世傑

李世傑貴州黔西人乾隆九年由吏員遷江蘇常熟縣黃泗浦巡  
檢二十年遷金匱縣主簿二十一年援江賑例捐知縣畱江蘇委  
用二十二年四月署泰州知州二十五年五月實授二十七年擢  
鎮江府知府三十年擢安徽甯池太廣道三十三年丁父憂三十  
六年五月授四川鹽驛道九月授按察使時大兵征金川總督桂  
林奏委世傑駐打箭鑪總辦約哨一路軍需三十八年守禦僧格



國朝書林考卷之八十一  
宗獲小金川伏賊十六名經將軍阿桂奏 聞得 旨嘉獎 賞  
戴花翎三十九年議敘臺站功加一級四十年十二月擢湖北布  
政使仍畱軍營四十二年金川平議敘加一級四十四年擢廣西  
巡撫四十五年正月丁母憂四十六年十一月 命署湖南巡撫  
服闋後再行實授四十七年三月奏查獲滄浪鄉志有違悖字句  
將刊書之高治清父子監生斥革作序之教授翁垌解任質訊  
諭曰此辦理太過外閒刊刻書籍如果有實在違悖不法語句自  
應搜查嚴辦今閱李世傑所奏書內簽出之處如幕天席地乃係  
劉伶酒德頌中成語玉盞常明係指佛鐙而言相沿引用已非一  
日何得目爲悖妄又志中所稱曾王父字樣亦不過泥古之過其

名字內有稱弘遠弘開者尤爲鄉里無知不足深責若俱以悖妄繩之則如從前之趙弘恩陳弘謀等又將何說至書中如德洋恩普運際昇平等語乃係頌揚盛美亦干例禁有是理乎書中如此等類不一而足各省查辦禁書若俱如此吹毛求疵謬加指摘將使人何所措手足耶此事總由李世傑文理不通以致辦理拘泥失當如此朕於此等字句微疵從不冒有意推求所謂不爲己甚之素志實天下人所共聞其見者所有此次滄浪鄉志竟無庸查辦其刻書作序並案內干連人等俱著加恩寬免槩與省釋並將此通行傳諭各督撫知之九月調河南巡撫十一月諭曰豫省見在挑挖引河黃河南岸隄內前經阿桂等勘定應行挑挖之處

臣等查案卷卷一第百一十一頁  
二  
自不能不占用民田從前阿桂等籌議時如何酌量兌換之處未經奏聞是否按地給價抑或另將官地丈量換給俾小民不致失業因思南岸隄內既挑引河明歲合龍竣事其北岸河身必有涸出空地可以墾種以彼易此小民自必樂從且地畝錢糧亦均有著落李世傑身任河南巡撫一切民田廬舍設法安頓調濟是其專責若一任小民自行占踞則豪強者得以多占而懦弱無力貧民竟至無田可耕且不肖官吏人役得以藉此侵漁滋弊殊非安集均平整飭清釐之道總以南失地頃數如北給地頃數為準此事著交李世傑悉心妥協經理並著阿桂督同妥辦以副朕軫念民生之意旋奏引河占用民田應將北岸涸出地畝劃給如不

敷可於升科地畝贏餘銀內酌予價值報 開四十八年正月奏  
引河新築南隄宜種柳以衛隄根臣捐廉購買及時栽種 上嘉  
之三月以河流順軌議敘加一級四月奏請將河南府屬之封邱  
歸德府屬之考城改隸衛輝開封府屬之陽武改隸懷慶下部議  
行五月奏夏邑縣知縣李光德典史劉應連於毆死親嫂化氏一  
家三命之兇犯歐陽十不趕緊審解又疎於防範致該犯乘間圖  
逃禁卒喊拏逞兇毆死二命請將李光德等革職 諭曰此等連  
殺一家數命之兇犯一經拏獲自應立即審解決不待時況該犯  
自知罪重即拚一死必致逞惡行兇乃情事所必有今歐陽十殺  
死親嫂化氏一家三命收禁在獄又磨拷欲逃經禁卒喊拏逞兇

毆斃二命兇惡已極歐陽十著卽凌遲處死至該縣等於此等重  
案既不趕緊審辦又不嚴行鎖錮以致釀成該犯復有在獄逞兇  
之事實屬怠玩知縣李光德典史劉應連固應革職其該管知府  
平日率屬無方督飭不力非平常失察可比並著交部嚴加議處  
又奏新河工程防護最要請將儀考通判改爲蘭儀通判儀考都  
司改爲蘭儀都司睢州添設州同一千總一協同防守南陽通判  
改爲睢甯通判移駐睢甯適中地並添協辦守備一專司防護考  
城向有管河縣丞主簿外委各一請酌留縣丞外委管南岸其主  
簿應隨考城縣駐北岸甯陵向無文員應將北岸儀封主簿改歸  
並增把總一再將祥符縣丞移駐陳橋杞縣縣丞改爲蘭陽縣縣

丞專管調夫稽查下部議行是月擢四川總督前總督福康安以  
川省銅鉛廠務請派地方官專管且招殷實商民廣覓礦苗命  
世傑詳議世傑奏銅廠之附近州縣者著州縣管理其離州縣遠  
者於通省丞倅州縣中遴員管理或峒老山空卽封閉其另覓礦  
峒已得大塘與雖未得塘而礦苗差足者卽以本廠名目報解奏  
入諭曰分任屬員總理在爾妥爲之四十九年正月奏滇黔委  
員領運銅鉛到川係自雇船載應派大員督地方官代雇查永甯  
道駐瀘州銅鉛所過皆所屬應責成該道照料下部議行三月疏  
劾西陽州知州吳中於民人邢持試越楚界搶劫案不卽詳報緝  
拏請革職諭曰川省匪徒經前此大加懲創之後地方安靜何

以甫隔年餘連出此等焚殺搶劫之案自係李世傑抵任後並不照前實力整飭留心查辦以致屬員怠玩廢弛觀望不報是川省復有此等案件皆由該督平昔因循玩愒釀成事端此豈參處屬員所可了事者李世傑著傳旨嚴行申飭閏三月奏新疆阿爾古屯存米多請酌撥二千石至噶喇依備支經部議駁諭曰新疆管屯官役及本地噶喇依等應給口糧如該處米石不敷卽以稞麥支給久經特成額等奏定章程見在噶喇依存貯稞麥雜糧甚多官役及噶喇依等口糧足敷支給該督久經抵任何以並不查照原奏辦理其各屯所種地畝見據陸續升科糧石正可源源接濟非如軍興之時需糧孔急必須撥運者可比何必將別屯之米

道運往致滋糜費浮冒耶李世傑辦事尙屬細心今於噶喇依  
支給口糧一事並不詳查原奏辦理何疎忽如此將此傳諭知之  
六月奏甘省逆回滋事陝西撫臣畢沅咨調川兵二千赴鳳隴一  
帶堵禦臣飛飭川北鎮總兵富祿統兵剋日起行再川北鎮屬之  
昭化廣元二縣與甘省文縣毗連須重兵防守及大員彈壓復調  
重慶鎮標兵九百檄建昌鎮總兵魁麟馳往守禦 諭曰大勢已  
定不必張皇總以鎮靜爲要五十年正月入千叟宴五月奏承緝  
金川逃兵不力之州縣定例革職畱任限內准調不准升四川通  
省同知通判共一百五十缺無逃兵處分者止四十員此四十員  
內或甫到任或有別項處分或才具不勝繁劇表率量爲選擇不



國朝通志卷之六十一  
過得一二人實無合例之員可以升補可否令其照捐復革職畱  
任何一體捐復經部議駁 諭曰部駁甚是此案承緝逃兵不力  
本應照部議予以降革朕念人數過多格外加恩限內予調不予  
升用已屬格外之仁若如李世傑所奏准其援例捐復一體升用  
是視捐項爲重捕犯爲輕其見甚鄙將來遇有通緝要犯俱視爲  
海捕具文不冒實力查拏於吏治大有關係且此案逃兵共有七  
省若因此例一開紛紛奏請捐復更何以示懲儆李世傑率行陳  
奏意在沽名著交部議處嗣陝西巡撫何裕城亦以停升員多奏  
請捐復 上以事尙可行免世傑議處詳裕城傳八月奏楚省歲  
歉招商赴川販米臣示諭各屬將平時積貯發糶以濟鄰封儻若

不敷於常平監倉開糶又奏川省產米處四散非可旦夕成載見將附近水次各州縣常監等倉穀先碾三十萬石俟楚販到境照時價發糶得旨嘉獎十月奏浙省杭嘉湖三府歉收委員赴川採買浙省距川較遠委員待兌甚急見於碾備楚省糶米先撥十萬石以備浙糶上嘉之五十一年正月諭曰上年湖北安徽江蘇等省被旱成災屢經降旨加恩賑卹並爲之酌籌調劑令將四川江西米石接濟各省俾商販流通以平市價而裕民食該督撫均能仰體朕懷督飭所屬盡心經理實力妥辦甚屬可嘉此內如李世傑先行碾動常平倉穀按照時價發糶接濟災區不分畛域深得封疆大臣之體著交部從優議敘三月調兩江總督四月

國朝書局影印 卷八十一  
諭曰李世傑奏楚省買米委員袁純德等先後抵川見在承領  
腳價已於三月初七日赴各河次受兌至重慶換船裝載長行並  
據另片奏稱自上年十月至今除潘乾順一名承買後續有羅隆  
盛一名買米一千石嚴飭司道等實力訪查如有不肖吏胥措勒  
刁難之處當卽遵旨嚴參辦理等語所辦尙好川省碾動官倉米  
石預備楚商採買接濟民食前因該督具奏楚省商糴販者止有  
潘乾順一名朕意必係該地方官辦理不善以致楚商裹足不前  
當經降旨訓諭該督令其妥爲辦理茲據李世傑覆奏楚省委員  
請買官米見在裝載開行並查無吏胥措勒情弊該督所奏已交  
部議敘所有奏到各摺俱著發鈔五月奏請裁順慶府屬東觀鹽

場大使改設李渡場主簿下部議行是月抵兩江總督任七月奏  
初三四等日大雨傾注清黃並漲河水衝塌隄工數處清江一帶  
俱被淹自請交部議處奉 旨寬免閏七月奏本年黃運兩河漫  
口一切修理撫卹及善後事宜需費甚多請暫開捐例 諭曰納  
貲授官本非善政如川運軍糧之事需用浩繁偶一行之旋卽停  
止而自停止以來十有餘年亦從未有入再以開捐奏請者方今  
帑藏充盈足敷供億李世傑何必鯁鯁過計爲此言利之請乎朕  
思泉貨本流通之物與其聚財於上毋甯藏富於民朕卽位初年  
戶部庫銀計不過三千餘萬兩今五十年以來仰荷 上蒼嘉佑  
年穀順成財賦充足中間普免天下地丁錢糧三次蠲免漕糧兩

國朝典章考卷之十一  
次又各省偏災賑濟及新疆兩金川軍需所費何啻億萬萬卽去年河南等處賑費亦至千餘萬然見在戶部庫銀尙存七千餘萬較卽位初年又多一倍有餘朕年壽已高距歸政之期屈指九年若非上年各省荒旱賑卹所需用去帑銀一千四百餘萬兩則尙欲於此數年內設法施恩以散帑項至歸政時庫藏較卽位時自必尙有盈餘又何必於此時轉以要工費用稍爲靳惜乎況見在科目出身人員足敷任使而川運軍糧報捐之人亦尙有未經銓選者內外職官額缺止有此數若捐例一開正途必致壅滯有早歲登科至皓首不得一登仕籍者朕方爲寒儒疏通進身之階每科數科後卽舉行挑選一次又豈有令捐貲者壅其仕路乎在捐

納中原未常無人才可用而庸流卽因之並進且博得廡仕一兩年內其所得廉俸卽可贏於所出之資在國家並無實際適足以遂其壟斷之私於銓政官方兩無裨益此奏不可行將此通諭知之尋偕大學士公阿桂等奏本年黃河漫口均已盤鑲裹注查司家莊與洪澤湖毗連恐湖水暫消難免濁流漾入應首先趨堵俟用料充切分築各處再於大隄外添越隄爲重門保障得 旨諸凡皆妥如所議行十月偕阿桂等奏於玉皇閣下挑引河一俾黃流直注報 聞十月奏司家莊等處漫口合龍 諭曰本年湖河並漲以致隄工漫溢多虞曾降旨將該督等疎防治罪及開參員弁職名之處加恩寬免見屆冬令水落歸槽易於工作該督等總

宜早爲集事今雖堵築完全豈得仍邀議敘原摺著交該部知道十一月奏二套引河流行暢注可暫緩築壩惟宜將西岸上首河坡挑挖俾引河正河成吸川之勢 上題之十二月偕河臣李奉翰奏自邳宿運河至貓兒窩以下三百餘里地勢建瓴河流易減前建利運亭濟二牖不足以資肇蓄請於河城利運二牖適中處馬莊集地方添建石牖一又於亭濟牖至宿汛坡地方添建石牖一 從之五十二年正月奏狼山鎮統轄之鹽城等五營硝磺均有缺額緣硝在徐州採辦長途不無銷耗磺在山西採辦二年一次又搭買運使衙門歲需煙盒磺價銀催解不前不能適合兩年一辦之期遂致支絀今惟將下年應用硝磺先於本年採辦庶無

遺誤 諭曰此事前據陳杰於到任後查出各營火藥短少情形據實具奏已有旨查辦矣今李世傑因該鎮陳奏在先知難於掩飾方以一奏塞責爲此取巧之言大屬非是而摺內並以歲需煙藥爲詞更無此理硝磺爲軍火要需向來俱係委員採辦足額如期運送到營卽以兩江而論如安徽省亦有採辦硝磺據奏足額何獨江蘇遂形短缺不能年清年款其兩淮年例每歲不過煙盒七架大小爆竹一萬所需能幾較之京師每歲製辦煙火等項尙不及十分之三而內府花爆炸作每歲開銷僅需硝磺一千餘斤是以兩淮承辦煙盒所用硝磺爲數尙屬無幾且此項係鹽商自行採辦隨年例進貢與通海營伍毫無關涉何得以此藉口况硝磺



世宗憲皇帝御製 卷之十一  
產自民間鋪戶製造花爆售買者甚多卽如京城每逢除夕元旦  
銜節居民所放花爆晝夜喧鬧不可勝計從未聞有關礙健銳火  
器驍騎巡捕各營軍火之需此人所共知者若果於軍器所儲有  
礙國家早有定制禁止民間花爆矣又如江浙等省商賈輻輳之  
區此風尤甚而兩淮商人爭奇鬪勝煙盒花爆備極繁靡由來已  
久卽該處地方官衙門遇新年令節亦豈竟不施放花爆此等硝  
磺所用不知凡幾又從何來豈皆官爲採辦致與營伍軍火有關  
礙乎自係承辦委員採辦遲延故枴爲此語以爲卸罪地步乃該  
督不以爲怪轉以此牽涉聲敘巧爲支飾有是理乎李世傑向來  
辦事最爲細心今乃爲此奏看來該督竟係因病精神恹恍頭倒

舊亂本來又不通文理於此等事不能認真查覈輕聽承辦之藩  
司委員等巧飾之詞一任庸劣幕友率行繕摺入告李世傑著交  
部嚴加議處並著將採買硝磺不敷由於歲需煙盒之處此語出  
自何人會同徵瑞查明據實具奏毋得稍有諱飾致干咎戾各營  
火藥關係緊要乃節年解送短缺其弊自非一日李世傑一人不  
能查辦徵瑞向來細心著會同該督秉公嚴查據實奏參辦理其  
見在短少火藥務須嚴飭委員採辦足額迅速解營若再因循玩誤  
恐李世傑不能當其咎也將此通諭知之尋劾江甯布政使袁鑒  
於各屬礦價尙未解齊將運司衙門年清年款之煙盒價一併牽  
敘請將袁鑒交部嚴加議處臣不能細查輒據司詳具奏並請一

併嚴議疏入袁鑒降授江甯府知府議革世傑任旋因河臣題報  
葦蕩右營新淤蕩地產柴數目與舊案不符經部議駁諭曰該  
營產柴蕩地雖係河督管理之事但李世傑係兩江總督兼管河  
道其淤地所產柴束何以並不畱心查覈竟將十七萬柴束作爲  
定數又不詳查舊案致每畝產柴數目與雍正年間多寡懸殊看  
來竟係李世傑病後精神恍惚於地方事務不能照料周到漫無  
查察所致不特前日所奏硝磺短少一事辦理乖謬也著傳諭李  
世傑將是否實因病後精力衰頹以致辦事多有錯誤之處據實  
覆奏其新淤蕩地實在產柴數目仍著該督會同李世傑確切查  
奏辦理毋任營員蒙混具報先是世傑移督兩江時因感冒風寒

奏請解任 上優詔不許屢降 溫旨詢問尋奏就痊至是復  
諭安徽巡撫書麟兩淮鹽政徵瑞察看世傑精神病體如何據實  
覆奏並 命新任閩浙總督李侍堯於沿途察訪以 聞二月偕  
徵瑞奏查明硝磺缺額實由採運稽遲請將歷任各藩司交部嚴  
加議處 諭曰李世傑前奏硝磺不敷由於歲需煙盒之故明係  
承辦之藩司等採辦遲延冊爲此語以爲卸罪地步豈非上而欺  
朕下而惑眾而該督既有此奏轉不值以年例所需致伊等得以  
藉口所有兩淮每年例進煙盒爆竹著卽行停止至該藩司採辦  
遲延託詞支飾李世傑冒昧陳奏均應重治其罪但恐外間無識  
之徒不知伊等貽誤軍火妄謂摺內牽涉煙盒聲敘以致獲咎是

誠全無人心者不得不反覆剴切曉諭李世傑本當照部議革任但念其平日辦理地方事務尙屬畱心且究因病後精神替亂未能認真查覈所致著從寬免其革任三年不准支領養廉三月奏准徐道缺緊要必得熟練河工之員方能勝任請將淮陽道師彥公調補其淮陽道缺將成汝舟調補得旨如此不拘泥於遵旨甚是五月以前任湖南巡撫時邵陽縣知縣魯大治任聽兇犯賄和命案據詳批結部議革任上寬之尋奏蕪湖途次接提臣陳杰札稱臺匪林爽文尙未剿滅請帶兵赴閩協勦臣思臺灣逆匪斷不借江南兵力始克蕪事且本境海面遼闊與閩省處處可通此時惟督率海口各將弁嚴查自南入口海船以防潰匪潛竄

若將官兵紛紛調動江南人情恒怯竊恐沿海各處不知臺灣業將平復轉生疑畏 上是之六月偕李奉翰等奏 聞河南睢州下汛十三堡隄工漫水見派臬司康基田遊擊韓勝往豫幫辦上嘉之八月奏本月初一二日風雨交作邵伯迤上東岸隄工漫水搶護不及請交部治罪 諭曰見在高寶等湖水勢盛漲在工文武各員不能先事預防以致邵伯迤上東岸隄工有漫水之處自應照例參處至李世傑彼時正赴二套查勘引河自不能兼顧所有李世傑自請交部之處著加恩寬免十月 諭曰臺灣逆匪滋事以來運閩米石辦理甚爲安速李世傑著交部議敘十一月 調四川總督先是世傑偕李奉翰奏請於三溝開迤下添建西隄

經阿桂查明毋庸勘建 諭曰李世傑歷任督撫有年於此等事務豈竟不能見及乃亦隨同率奏殊屬疎忽前因李世傑在四川總督任內辦理地方事務尙能妥協是以調任兩江乃伊自到任後並未見其實力整頓遇事每有錯誤前於查辦硝磺一事既輕信人言巧詞支飾又曾奏江南各屬虧空於一二年內可盡行補足今皆完否亦未行奏聞今添建隄工又不權衡事理復被工員愆愆率爲此奏是其辦事竟不如前見因川省地方亦屬緊要李世傑在彼有年諳悉該處情形是以將伊調往以期駕輕就熟該省番地新疆及西藏各事最關緊要務須實力經理妥協以副委任況李世傑受恩深重年逾七旬正應及時勉力自効儻以四川

省分視兩江較節今將伊調任遂心存懈怠不肖實心任事於地方諸務又如在兩江之因循錯誤朕必重治其罪五十三年三月以失察赴閩官錢被劫委員等分賠匿報部議革任上寬之七月巴勒布聚眾搶占附藏之聶拉木濟隴上命世傑於駐防綠營並明正巴塘裏塘德爾革爾等處撥兵赴藏協勦世傑旋奏接准駐藏大臣慶林等咨挑撥成都駐防滿兵五百綠營兵一千三百屯練降番一千二百先將綠營兵一千令提督成德等帶往其餘二千暫緩出口諭曰昨因慶林等奏巴勒布聚眾搶奪附藏邊界聶拉木濟隴已有旨諭李世傑等酌量於駐防綠營並明正巴塘裏塘各番兵調撥三四千名先交成德等帶領速往協勦原



因屯練降番相距遙遠巴塘裏塘德爾革爾等處番眾距藏較近且善放夾壩若將伊等派往協勦則見在既可用其力將來運送糧米等項亦可免夾壩情事自爲一舉兩得今該督等接准慶林咨會業於屯練降番內挑撥一千二百名合之駐防綠營兵三千名並著分路起程自應令其迅速前往朕又思明正番兵尙易於調撥至巴塘裏塘德爾革爾等處慣放夾壩又久未檄調究恐其滋事儻該督等見調各兵西藏尙不敷堵勦又有續行咨調之處仍宜於駐防綠營及屯練降番內按數挑撥若屯練降番不敷撥用甯仍於駐防及綠營續撥不必用巴塘裏塘矣尋奏接奉 諭旨停止明正裏塘巴塘德爾革爾所調兵但各該土司近尙安靜

不難調集若既調復停恐番性生疑請仍前預備聽候調遣 諭  
曰前因慶林等奏巴勒布人少無馬賊眾不過三千似無能爲是  
以諭令將第二起官兵酌量停止但朕於數千里外無由知該處  
實在情形不過就慶林所奏遙爲指示初無成見見據慶林等奏  
巴勒布又聚眾萬餘在脅噶爾地方圍擾是所派屯土各兵自當  
邁進李世傑近在成都自先得該處信息該督能相機妥辦並不  
拘泥遵旨所見甚是實屬可嘉頃已有旨賞給御用大荷包一對  
小荷包二對以昭優獎矣惟所稱前調之明正裏塘各番兵一千  
名令其仍前預備聽候調遣之處見在藏內正資內地兵力協勦  
所有續派之番兵千名竟當卽速前往何必復行聽候以致遲延

平見據該督奏已撥米一萬三千三百石趕運打箭鑪挨站趕運  
直抵西藏足敷兵食之用所辦可謂盡心且郭洛克較西藏尙遠  
又經李世傑派兵護送無慮搶掠所辦甚是幸有該督在川不然  
如慶林等之張皇推諉豈不更塵朕慮乎八月 諭世傑移打箭  
鑪就近調度九月奏屢經札詢慶林賊勢未准咨覆適成都將軍  
鄂輝抵省彼此熟商將成都所帶漢土兵一千二百名仍令赴藏  
其前調之滿兵五百尙駐鑪城屯練等亦不過將次抵鑪明正等  
土兵尙未調用擬將各兵檄回本處又奏接據糧員魯華祝稟稱  
慶林已將班禪接赴前藏恐該處正資接應已飛咨鄂輝酌帶兵  
將剋日出口 諭曰所辦似是然闕之總不明晰滿漢屯土各兵

既經李世傑撤回本處則鄂輝所帶者又係何兵是否止係前駐  
鑪城之滿兵五百名抑係所撤之兵又復全行帶往該督既已錯  
辦於前則此次摺內自當逐一詳細聲敘庶朕閱之可以一目了然  
乃復含混其詞致朕數千里外爲之縈念李世傑向來尙爲能  
事之人前因其不拘泥遵旨仍請將後起各兵前往接濟所見甚  
當朕方加之優獎何以近日奏摺又全無主見錯誤含混至此豈  
不思朕前所降停止各兵之處諭旨原因慶林等奏巴勒布人少  
又無馬匹業被官兵剿敗是以不得不就慶林等所奏情形爲之  
指示令其酌量情形將各兵停止李世傑在成都得信自早雖據  
稱尙未接准慶林等咨會而糧員等業已稟報班禪接至前藏是

臣等謹將各案開列  
卷之十一  
該處正須兵力協剿李世傑當就所報情形隨時籌辦何以尙不  
催令各兵迅速前進除另降清字諭旨將慶林等不行咨會之處  
嚴行申飭外著傳諭李世傑卽將續派之滿漢屯練各兵速令前  
往尋奏慶林等咨送節次摺彙始悉該處先後情形已飛咨鄂輝  
等速進至前後兩次撥米運送口外足資官兵沿途口食仍分飭  
各臺員探買稞麥糶粃不致缺誤又奏明正巴塘裏塘爲大兵必  
經應付烏拉蠻夫均資其力將該兵暫緩調撥其德爾革爾地不  
當衝部落亦大見咨明鄂輝酌商調撥 上俱嘉之尋奏准慶林  
咨送摺彙稱列子地方有賊千餘接續過河來近薩喀已飭維州  
協副將那蘇圖將所帶屯練於鑪城駐劄俟得有實信酌量辦理

諭曰所辦甚是前因賊匪在脅噶爾退敗正慮其紛紛遠竄我兵既不值盡力窮追深入其境又不能多有斬獲使賊畏懼舊服設撤兵之後賊匪復伺間侵擾又須調派征勦殊非一勞永逸之計今賊匪復由列子渡河竟是自來送死轉可因其前來痛加殲戮俾賊望風膽落並將所搶濟隴等處地方全行收復再傳令該處頭目來營請降設誓勘定地界永遠不敢復行越境滋擾以靖邊隅此是極好機會不然我兵豈不虛往無名耶昨已有旨傳諭鄂輝成德務宜加緊進行於賊匪未退之先趕抵薩喀將賊匪迎頭截殺使賊知所畏懼再遵照諭旨相機妥辦矣至賊匪究屬無能是以那蘇圖所帶屯練營名已有旨諭令該督等以此兵仍可

無用令李世傑飭令該副將在打箭鑪駐劄俟得實信再行遣回  
正與朕旨相合其糧石一切此時自未便一律轉輸致滋糜費該  
督就近隨時探聽審度情形如有需用之處再加緊運供無虞缺  
乏輕重得宜既不致稍設張皇亦不致臨時貽誤諸凡妥當之極  
從前慶林等不將該處情形咨會內地以致該督不得確信難於  
預籌妥辦今慶林等已將摺彙隨時咨送川省距彼較近該督係  
能事之人早得信息自更可相機妥辦以副委任也尋以賊匪遠  
遁諭世傑仍回成都五十四年正月奏我岷縣屬之蠻歸岡以  
西至太平堡墾地既多戶口日增向設營弁不足以資彈壓請將  
汶川縣丞改爲我岷縣太平堡主簿新墾地歸其管理下部議行

四月奏新疆總理同知及五屯人員凡遇交代宜遵內地州縣定例得旨自應如此尋諭曰李世傑之孫李再瀛本年會試未經中式李世傑係總督中得力之人李再瀛著加恩准其一體殿試旋分禮部學習主事五月奏於打箭鑪察木多二處酌貯糧儲查打箭鑪本有米麥萬石無庸加貯察木多一處飭令臺員每歲收買於二三年內買足稞麥三千石照新疆屯防例存七易三部議行閏五月奏梁山黑夷常易三土官祿世才卽於該處正法上是之六月以前在湖南巡撫任內失察耒陽縣生員賀世盛編造逆書部議革職畱任尋奏據夔州府知府穆克登布稟五月初三有船二隻停泊河干因大雨擬次早往查該船乘夜潛逃當



國朝通志卷之八十一  
於川境追獲私鹽船一隻又會楚省拏獲二隻畱楚審辦 諭曰  
私犯過境地方官自應立時拏獲嚴辦示儆况見當嚴禁私鹽越  
入楚境之際尤宜上緊訪緝乃該府因昏暮大雨直至次早往拏  
以致私販船隻乘夜逃逸殊屬不成事體若盜犯在境亦因雨不  
卽往拏任其脫逃乎此事非尋常失察可比夔州府知府穆克登  
布著交部嚴加議處李世傑並不據實查參亦著交部議處部議  
革職 上寬免之尋奏天全州產茶請增引權課徵稅下部議行  
九月以總兵那蘇圖不勝專闖之任爲世傑所薦 申飭之尋  
諭曰本日旬到四川省秋審人犯內該督原定緩決經刑部改入  
情實者共有七起業經槩行予旬秋讞大典自應悉心斟酌俾無

寃縱今四川省所辦秋審竟失出至七起之多總督臬司何不經心至此李世傑念其年老且辦理地方事務向來尙肯留心認真看加恩免其議處十月 諭曰本日李世傑奏兇犯陳年富殺死一家三命於審明後卽恭請王命凌遲處死等語自應如此辦理昨劉峩奏王三因疑姦殺死三命歷斃一命並誤傷其父身死情節較陳年富更爲兇惡且誤傷父命倫紀攸關乃劉峩猶復拘泥請旨辦理卽此一端其辦事之不如李世傑已可槩見昨已降旨申飭該督能不自愧耶著將李世傑原摺鈔寄劉峩閱看尋因審擬張亭桂誤傷小功服叔張洪先身死擬斬決後以並非有心干犯夾簽申請經部議駁 諭曰部駁甚是無論擲傷服叔服兄倫

紀攸關均應以毆死小功尊屬按律斬決不得以並非有心干犯援請未減也且石之大小擲之遠近傷之輕重原自不同該督亦曾詳查乎外省遇此等案件州縣刑書往往意存開脫李世傑歷練封疆辦理刑名素所熟悉何於此案亦相沿外省習套並不留心察覈耶李世傑不應若此著傳旨申飭十一月 諭曰本日吏部將四川省八年俸滿之川北道明安帶領引見朕看其年力已衰不勝道員之任乃該督李世傑咨送文內出具老成端謹辦事實心考語豈該督於屬員衰邁情形竟無聞見從前大計時既不據實參劾復爲具籠統考語顯屬意存干譽李世傑向來辦事尚知認真不應出此除將明安以部屬改補外李世傑著交部嚴加

議處尋奏夏秋以後脾氣失調步履常滯懇請解任 諭曰李世傑老成歷練久任封疆今以患病未能卽愈奏請解任朕心甚爲廡念見已降旨令孫士毅馳驛前往暫行署理並著乾清門侍衛慶成帶領御醫胡增馳驛前往診視俾得安心調養迅速就痊該督自調任兩江總督陛見後迄今三載未經入覲該督自揣病體如可支持於交印起身來京緩程行走朕欲面晤垂問或令署禮部尙書俟病痊後再回川督之任亦無不可若病勢尙未輕減難勝長途勞頓亦不必定於來京川省距該督貴州原籍較近卽就近回籍調攝以冀速痊後來京總當遵諭不必勉強著傳諭李世傑於接旨後自行酌量據實奏聞并將近日是否略痊之處一併

具奏以慰廕注十二月慶成奏李世傑服藥以後脈證稍好 上命仍畱川省加意診視並賜人蔘一斤五十五年二月以河南南陽城工糜費世傑曾任巡撫未能查察部議革職 上寬免之三月陞見授兵部尙書尋 諭曰內外文武大臣特恩賞在紫禁城騎馬用資代步但年老足疾之人上馬亦覺艱難如大學士嵇璜雖經賞馬仍恐難於乘騎嗣後已經賞馬之大臣因有足疾艱於步履者著加恩准坐小椅傍縛短木用兩人舁行入直以示朕眷念大臣恩加體卹至意尙書李世傑孫再瀛病故 命世傑次子知州李華封來京以員外郎補用就近侍養五月 諭曰前經李世傑於四川總督任內將年力已衰不勝任之明安送部引見交

部嚴加議處嗣經吏部議以降二級調用復經降旨俟伊到京之日再降諭旨見在李世傑已加恩授爲兵部尚書所有部議降級調用之案著從寬改爲罰俸一年免其降調七月 諭曰江蘇句容縣糧書侵蝕錢糧漕米一案該省各上司漫無覺察錮弊相沿致奸吏蠶書侵吞銀米累萬盈千重徵累民莫此爲甚非尋常失察可比是以將總督書麟革職拏問發往伊犁效力贖罪閔鶚元知情不舉定以重辟李世傑前任兩江總督在任已歷一年於此等事務不能先事嚴查奏參其咎實與書麟相埒本應嚴加治罪姑念伊平日尙屬能事見已年力就衰染患兩般輭弱之疾亦難望其就瘥今在京供職步履維艱不能當差辦事且伊籍貴州距

京較遠李世傑著以原品休致令其回籍五十九年三月卒 賜  
祭葬諡恭勤六十年貴州巡撫馮光熊題請入祀鄉賢祠得 旨  
俞允子華封官至兩廣鹽運使

右 國史館本傳

乾隆五十有九年正月 予告兵部尙書黔西李公薨於里第承  
重孫再沂暨其孤華封具狀赴於京師且告將以乙卯年月日葬  
公於黔西州之某鄉屬銘其隧旣爲位以哭復謹就家狀所載益  
以夙昔之親聞於公擻其樹立之大者而爲之誌焉公姓李氏諱  
世傑字漢三一 字雲巖先世籍江南之某縣曾祖指揮公諱蔚伯  
隨征貴州戰歿家畱黔西遂爲黔西人祖諱攀龍未仕考諱植以

雍正己酉選拔貢生起家官兩淮富安場鹽大使富安公生四子伯世倬叔世任季世俊公其仲也公少而倜儻讀書略觀大意不屑屑章句旁及騎射拳勇博籌筭絃之事靡不涉歷年二十餘忽感奮請於富安公以貲入試常熟黃泗浦巡檢則盡棄從前之結習而專刻厲於居官鄉曲小有爭訟必爲剖其曲直而不可干以私李廉使永書時令常熟引與同堂獻事邑人頌廉明焉久之聞於制府尹文端公巡撫番禺莊公以卓異薦遷金匱主簿莊公委充巡捕官復謂布政使許公松佶曰吾觀李主簿氣局遠大憾級太卑無由薦拔今開江賑例益令以貲遷其秩乎許公亦素重公因倡同官伙助遂報捐知州奏請畱江委用得旨報可未幾補



秦州知州秦州爲江北繁劇冠公始至訟牘未結者四百餘案公將刻期讞竣幕中客相與譁曰嘻是惡能不浹月將愆而新案又增積矣公曰無爲我慮第今日敘五六案略節與新事相閒集訊時富安公與張太夫人皆就養官舍公定省外雖戲樂不一顧晝夜據案視事盡心以平兩造必得其情而各使之無所缺不五月而案皆報結焉憲司莫不歎異在秦五年繼撫江蘇者爲桂林陳文恭益稔公治行以堪勝知府薦遷鎮江府知府甲申冬奉裁汰駐防漢軍之命京口額裁三千名駐防軍不習他業全家仰給餉卽日脫兵籍並其家遣出城羣情洵洵公先期捐俸爲闔郡倡人給三月糧木棉衣一襲以次分撥職役全活無算乙酉春 聖駕

南巡擢公分巡安徽道巡道故司權關在任三年徵商寬而稅額未嘗短絀治流勾擲石傷百夫長案大吏將當以叛律公力持誅止首惡一人餘得論減丁富安公艱歸辛卯服闋補四川鹽驛道莅任一月擢四川按察使是年冬王師進剿金川叛苗公奉檄駐章谷總理南路軍糧時饋運初開章程未定公悉心經畫味爽起治軍書至夜分不寐從官易班趨事者皆倦公目光炯炯必得當而後卽安故所處分動中窾會同時總理司道或壘櫻咎譴天子更選重臣督之惟公獨當一面五年之久無纖毫貽誤西路將軍溫福公之失事於木果木也今大學士誠謀英勇公以副將軍進兵南路勢難獨畱暫撤兵以圖後舉公督餉銀數十萬兩在

軍營皆元寶募人運還無應者公下令曰與其委之於賊合聽民自取之於是隨大軍貿易者數萬人爭前負挾立盡公肅隊護其後而密檄守關官弁凡持元寶入口者皆令還官而人給賞銀五兩帑竟獲全後副將軍以大將軍分兵進勦公仍總理南路欲試公才以鑄廠缺炭檄公營辦公已默識大營前路山木甚盛自往營度先令環伐大樹紮木城設卡衛乃掘地爲大窠數十伐近樹而薪焉身自畱督將軍急返之曰君大員弗畱險地公以義不辭難對不旬月炭足俱鑄而後返命又嘗還臺計事途遇賊千餘賊邀之公祇從家丁數人收集臺夫數百激以忠義奮短刀白楮擊賊連斃賊目擒生口賊驚遁將軍益奇公才上其事得旨嘉獎

賜戴孔雀花翎凱旋敘功升授湖北布政使畱辦報銷事竣奉  
命巡撫廣西在任八月以張太夫人艱歸服將闋 命署湖南巡  
撫一年調撫河南在豫二年佐大學士誠謀英勇公塞河畢遷四  
川總督四川自軍興後倉庫虧那殆徧公潔己率屬休養而調劑  
之兩年之閒前缺盡復奉有 硃批諭旨此係李世傑一人之功  
以風厲各直省然他人卽做爲之終不能逮也公精於吏事歷任  
封圻勤苦與在軍營不異身無姬侍食不重味自失恃後雖令節  
未嘗設宴會屬吏有公事方許謁省垣一見輒督促回任令會城  
司門者報焉案牘逾期檄以李某親催帖仍令詳結時呈繳毫髮  
奸必先知之闔屬震悚莫敢訛法畱獄公馭吏未嘗有怒容臨事

國朝通志卷之十一  
三三  
未嘗有難色然頑悍自馴糾紛立解近日長封疆者推尹文端以  
德方敏恪以才論者謂公兼有之也乙巳爲 皇上御極之五十  
年公年屆七旬赴京與千叟壽宴 賜賚有加遷任奏撥川米數  
十萬石以濟吳越之饑 手敕褒美次年調任兩江總督公念兩  
江雖舊時久宦然地大物博整飭爲難則益勵精神倍於治蜀時  
適河湖交漲衝塌南岸與安徽巡撫書公麟河道總督李公奉翰  
協力籌辦漫口甫塞而大將軍忠銳嘉勇公統兵剿臺灣逆匪過  
師轉餉江南並當其衝公嚴立規條事辦而民不擾提督陳杰素  
侃強倡議調兵協剿公急檄止之曰小醜跳梁大兵進剿如摧枯  
拉朽焉用增兵且沿海居民易動難靜一聞徵調或生他變誰任

其咎仍飛章奏 聞 上是之而嚴飭陳杰不一月而臺灣平先  
時公以積勞得語言遲蹇疾奏請解任奉 旨在任調理又公長  
子漳州府知府華國負儁才有幹局以督餉卒於詔安配高夫人  
亦未幾下世公力疾忍哀視事 天子降詔慰勉公益感奮政無  
鉅細殫竭心神而疾彌甚矣 上意以蜀務稍簡且公舊莅復移  
公臥治之公至益修前政意甚安焉疾亦良已而巴勒布夷人侵  
占藏衛公一聞警報蹶然起兼程赴打箭鑪籌辦調度井井眾恃  
以安兩足遂受寒溼不可以步復請解任 特命御前侍衛慶成  
挾醫診視 賜人蔘一斤並許緩程進京投兵部尙書 紫禁城  
乘坐肩輿 召見則內侍扶掖而終已不愈始奉 旨予告又畱

京數月祝賀 八旬萬壽而後行在籍四年薨於里第距生於康熙五十五年正月九日享年七十有九貴州巡撫以 聞 上爲軫惻予祭葬如儀賜諡恭勤公曾祖祖父三世皆以公貴 贈如其官曾祖妣汪氏祖妣毛氏妣張氏皆 誥贈一品夫人配高氏 誥封一品夫人恭孝慈惠與公一心同德子二長華國乾隆辛卯科舉人官漳州府知府次華封乾隆甲午科舉人由候補知州改授員外郎孫男十人華國生再沂候選布政使經歷先公之葬卒次再濂再澣並國學生再汾尙幼華封生再涑丙午科副榜分發江蘇候補直隸州州判次再瀛戊辰 恩科舉人已酉會試未中式 恩賞進士一體殿試授主事在禮部儀制司行走先公卒

次再沛再潞並國學生再汭再沖俱幼曾孫四人之鈞之鏞之銑  
之錦孫女九人皆嫻四方名族初公以身未列甲乙科所至培養  
士類振興文教鎮江寶晉書院蕪湖中江書院皆公所鼎新新建  
士肄業其中者飛騰接跡爲兩子擇師必延文行兼優之士禮待  
資給久而益加用是子孫一走旁及姪姓公入官始學而摘發鉤  
距敏於儒生閱文移及奏記彙牘凡所指駁及簽商處必得其要  
領老幕宿儒絀服焉必至好乃手作書娓娓數百言質實之中洞  
達盡意此特公之餘事然亦見公質性之高才力之大積乎彼而  
通乎此也系之以銘曰

醴泉何源兮芝草何根水西萬里兮誕降名臣奮身簿尉兮彙積



階勳屏垣膏雨兮矢石風雲並代封疆兮孰與爲鄰盡瘁至老兮  
不媿蒸勤人思舊德兮士念前恩何時下馬兮絮酒高墳

右墓誌銘管世銘撰

李恭勤公名世傑貴州黔西人自少以父官江北鹽場大使遂入  
貲爲巡檢由巡檢官至四川及江南江西總督內擢兵部尙書加  
太子太保 純皇帝屢欲以爲大學士有尼之者言公不由科目  
例不可官內閣乃中止然治行實有絕出流輩者以此欽 純皇  
帝知人余素不識公歲戊申四月在河南巡撫畢公沅幕府值畢  
公病亟公適從江南總督調回四川道出開封素厚畢公欲入省  
之畢公知余與公次子爲同歲生也屬余迓公入坐牀側數語

公憊甚余遂延公入就近聽事將飯公坐次余頌公江南治績公  
蹙額曰子過矣余爲江南總督非所長爲四川總督庶可耳請其  
故則曰兩江地大事劇主持者非一人三巡撫一漕督一河督兩  
織造一鹺使巡漕權關復在外動皆可具摺上達以一人居十數  
大吏中遷就不可徑情直行又不可余故不能爲也四川不然舉  
十一府九廳九直隸州與諸邊內外事皆一人專之事權不分號  
令畫一政可爲也余又請其故公曰飯未至姑爲子述一二事可  
乎余唯唯曰四川自兩金川用兵以來又承制府福康安後徵調  
賦斂無藝倉與庫皆若洗磨若中落之家非有一人率先蚤夜操  
作減省衣食裒聚絲粟則元氣不復余旣與司道以下設厲禁凡

府州縣無事不得入成都卽以公事來者不得過日限不得畜音樂侈讌會不得飾輿馬衣服朝珠之香栴犀碧蟒服之緯絲顧繡者皆有禁余官總督數年未嘗讌一客成都將軍者新莅任不爲置酒則太忍置則破例乘其家口抵任日饋一烝豚一燒羊使標下守備婉告曰本欲屈入署適聞眷屬至謹以此佐家讌屬吏自布政司以下亦未始爲其一飯惟屆歲除則先飭子婦及婢媪爲饌饌至十數斛歲首五鼓朝賀畢布政司以下皆集轅門督撫制嚴重屬吏至恐不卽見自正印以上廡左右皆有官廳余因遣巡捕官遞告曰汝曹爲 朝廷出力久行且遷擢今總督爲汝發兆也遂令佐雜官坐州縣官廳以次上令府廳坐司道官廳皆食以

饌饌余則出延司道至署共食食畢出堂皇先受司道謁賀卽令  
府廳州縣等遞謁司道府廳禮畢告曰元日俗例上司同官雖不  
接見亦必肩輿到門道有遠近必日昃始歸徒苦僣從無益也況  
若曹亦有父母妻子歲首例得給假諸君何不早歸令若曹亦放  
假半日乎皆應曰諾於是元日虛文往來俗例始革迨調任江南  
日倉庫缺額者漸已填補布政司王站住力亦居多焉公尙欲語  
而飯適至遂飽餐去後六年余奉 命視學貴州嘗道黔西公先  
以病告歸足疾不得行然入州境後見書院學舍義田義冢無不  
井井李氏先隴封樹亦倍修整詢之皆公歸里後一一所繕造也  
未抵城數步公令兩僕扶掖出迓於道左余急下輿揖曰何敢勞

公公笑曰非迎學使迎不徇情面之賢者耳余遜謝別去試竣復過公畱話半日時公相福康安出四川調督雲貴將入境語次公頓蹙日間近日辦督撫行館竟有以顧繡貼地者侈風一啟他日伊于胡底耶因歎息執手別未幾公亦謝世矣書此以爲官大吏者勸

右書事洪亮吉撰

李恭勤公督兩江時福文襄王征臺灣檄調各省府庫餉銀他人無不應命惟公方持不與曰不見部文徵撥誓不敢發此餉有虧朝廷之府庫也福無如之何其嚴厲如此

右錄宗室昭捷撰

乾隆五十二年貴筑李尙書世傑督蜀令民沿城皆植芙蓉垂柳  
今皆合抱花時爛若雲錦人比之召伯甘棠云

右記余金撰

黔西李漢三世傑以巡檢至本兵謚恭勤廣順劉松齋清以拔貢  
官總兵松桃楊誠村芳以吏員取通侯並天挺異才兼資文武皆  
不由科目進身時稱黔中三奇男

右紀聞陳康祺撰

國朝官制考卷之八

三

錢維城

錢維城江蘇武進人乾隆十年一甲一名進士授修撰十三年五月散館列清書三等 諭曰歷科進士殿試一甲第一名卽授爲修撰二名三名授爲編修至散館時並無所更易伊等因已授職遂自甘怠忽學業轉荒卽如今年散館修撰錢維城考列清書三等編修莊存與考列漢書二等之末其不畱心學問已可槩見但錢維城係派習清書或非其所素習著再試以漢書候朕閱定莊存與不准授爲編修則此後一甲之人皆有所警而專心學問若有仍考列三等者其例視此越日 諭曰昨因錢維城考列清書三等後試以漢書惟詩句有疵賦尙通順著仍畱修撰之任八月



遷右中允入直南書房充日講起居注官十五年二月擢侍講學  
士九月轉侍讀學士十六年擢內閣學士十七年疏言句到大典  
一筆之下事關死生不容偶誤旬到時刑部堂官及內閣學士俱有  
手摺請於遵旨論定後大學士執筆卽各將手摺內所開本名  
裂紙寸許爲記句畢外出持摺互校庶查覈有憑卽偶有遺誤不  
難立請更正報聞十九年三月充會試副考官五月教習庶吉  
士二十年八月給假回籍省親二十二年正月授工部侍郎九月  
充武會試正考官二十三年奉旨分理五城平糶事宜疏言東  
中南三城木廠距倉近西北兩城木廠距倉遠向來車價俱同車  
戶每憚遠就近請酌廠地遠近定車價之多寡卽以東中南三城

之多補西北兩城之少庶運費無增而輓輸踴躍 詔如所請遠  
行二十四年充江西鄉試正考官二十六年調刑部左侍郎二十  
七年九月疏請申明律例二事一律載殘毀他人死屍及棄屍水  
中者杖一百流三千里其棄而不失者減一等此係發冢本條註  
云屍設在家在野未殯葬者若已殯葬者則以開棺見屍論以殘  
毀常人未埋之屍與發掘墳墓者有間故以次遞減罪止流徒皆  
蒙上文發冢見屍而言乃各省謀故鬪殺命案遇有棄屍滅跡之  
事輒援此律聲明棄屍輕罪勿論一語據爲成例遂有臨時殺死  
竊劫之盜賊在律本應勿論或愚民累累將屍移棄問刑有司因  
其本罪勿論轉專治其移埋棄屍之罪臣思此事人犯所殺者原

係罪人故寬其擅殺之罪乃殺死罪人例得勿論卽移棄勿論之屍反至流徙是爲本小末大引用牽混請嗣後移棄律得勿論盜賊之屍及姦所登時殺死姦夫並一切格殺持杖拒捕之罪人等案凡有棄屍者不得援引此例其非律得勿論者仍照本律定擬一例載本夫有服親屬皆許捉姦如登時殺死姦夫姦婦者並依夜無故入人家已就拘執而擅殺科罪若非登時以鬪殺論例於親屬殺姦分別登時非登時皆照本夫加一等定罪此各指姦夫未曾格鬪拒捕者而言若一有拒捕格鬪則無論本夫與親屬皆當依罪人拒捕論然則律所云親屬捉姦非登時殺死以鬪殺論者正引罪人不拒捕而擅殺以鬪殺論之律文所載甚明乃各省

問擬有援擅殺論者有直以鬪殺論者雖鬪殺之與不拒捕而殺同一擬抵而情罪判然甚至持杖拒捕之姦夫反以謀故鬪殺分別議擬是殺拒捕之姦夫反重於不拒捕之姦夫尤爲舛錯請將親屬殺姦非係登時者悉擬罪人不拒捕而擅殺之律以鬪殺論定擬其有拒捕一依罪人拒捕之律科斷下部議行尋授浙江學政三十四年四月疏言本年考取內閣中書部議於會試薦卷及朝考未用人員內挑取但薦卷一項挑取字畫須憑墨卷其省分坐號榜發後不難查知恐易滋弊請於揭曉日主考官官出闈知貢舉及內監試等將薦卷查出墨卷逐一彌封用印卽日奏派大臣閱取若干卷候朝考後挑選帶領引見欽定名數以

次錄用 詔如所請行五月因覆擬廣東民何長子姦污幼女致  
母服毒身死一案奉擬絞候部議降一級調用奉 旨從寬畱任  
十月 命赴貴州同湖廣總督吳達善查審威甯州知州劉標虧  
帑一案巡撫良卿明知故縱授意彌補並與按察使高集交通骫  
法又前任貴州巡撫方世儁糧道永泰曾婪索劉標賄賂各論罪  
如律詳吳達善傳三十五年閏五月維城將旋京復 命適古州  
黨堆寨逆苗香要脅眾肆劫復偕吳達善及巡撫宮兆麟等往勦  
賊賊甚眾六月香要就擒 諭部議敘三十七年丁父憂回籍維  
城工畫事所進畫冊多蒙 御題是年維城卒 諭曰原任刑部  
侍郎錢維城學問素裕才具亦優侍直內廷勤勞夙著今春以父

憂回籍因宿疾未痊遽聞溘逝深爲軫惜著施恩加贈尙書銜應得卹典該部仍察例具奏尋 賜祭葬如例諡文敏四十年 恩授其子中銑爲內閣中書准其一體會試

右 國史館本傳

稼軒十歲能詩十二三能騷賦古文書法東坡畫山水得元人王黃筆意

右昭代名人尺牘小傳梁同書撰

武進錢公維城字幼安號稼軒累官刑部左侍郎精書畫時以爲天授 高宗深重之屢 賜詩題識錢文端陳羣嘗云稼軒自幼出筆蒼潤秀骨天成通籍後尤得力於東山也所著曰茶山集女

國朝音韻彙編卷之八  
孟鈿工詩通音律適崔觀察龍見著有浣青詩草鳴秋合籟

右事略李元度撰

莊存與

莊存與江蘇武進人乾隆十年一甲二名進士授編修十三年五月散館考列二等 諭曰歷科進士殿試一甲第一名卽授爲修撰二名三名卽授爲編修至散館時並無所更易伊等特已授職遂自甘怠忽學業轉荒卽如今年散館修撰錢維城考列清書三等編修莊存與考列漢書二等之末其不畱心學問已可槩見但錢維城係派習清書或尙非其所素習著再試以漢書候朕閱定莊存與不准授爲編修俟引見時朕酌量其人才或以部屬或以知縣或歸班選用則此後一甲之人皆有所警惕而專心學問矣若有仍考列三等者其例視此十六年五月引 見仍授編修是



年恭逢 孝聖憲皇后六旬聖壽慶典特開鄉會恩科 命於次年春舉行鄉試十二月充湖北鄉試副考官十七年六月大考二等升侍講尋入直南書房十八年六月擢翰林院侍讀學士充湖北鄉試正考官九月提督湖南學政二十年四月遷少詹事六月擢內閣學士兼禮部侍郎二十一年充浙江鄉試正考官九月提督直隸學政二十二年奏直隸冒籍生員自首改正每學多至五六百名少者十五六名尙有未經查出者恐此後有將本身入學姓名令兄弟子姪頂替甚或賣與各省童生頂名呈首或本人自首於北而他人頂替於南若但據自首改回弊恐不少請將冒籍各生暫停南北歲科兩試定限一年著落本身自首卽據所首姓

名三代籍貫一面咨禮部存案一面行該省取具父師親族鄰里切實甘結地方官加具印結方准咨回該省學政入冊如查有假冒頂替照例辦理首明雖限一年咨查需日己卯鄉試應停收考錄送下部議行二十三年二月存與考試滿洲蒙古童生因不能傳遞各童生擁擠鬧堂經御史湯世昌奏參 命革存與職尋諭曰莊存與於考試童生鬧場一案既不能奏參於前及朕面召詢問又不據實陳奏是以將伊革職但各童生誼鬧究因該學政辦理尙屬嚴密不能傳遞之故今既審明情節而該學政竟因此罷黜殊非懲創惡習之意莊存與著帶革職仍畱內閣學士之任又 諭曰朕以滿洲蒙古童生皆世受豢養之人乃不知遵奉教

約恣效外省惡習此於八旗風俗大有關繫不可不嚴行根究乃派出查審之大臣等於案內情事並未嚴行窮究而議罪之處又不允當所審皆旗人故不能不掣肘而朕豈有一任其意存瞻徇而顛預了事耶當經親臨覆試隨獲挾帶如許之多因復親加鞫訊務得實情而童生海成係包攬傳遞首先倡議鬧場之犯一聞覆試輒將鬧場時帶出之卷倩人補作捏飾投遞希圖狡脫已屬刁頑至在場放鴿傳遞包攬受賄各情業經羅保等供證確鑿乃於朕前又復挾讐誣陷和安肆其狡獪抗不吐實及加嚴訊而狂悖無禮竟有何不殺之之語滿洲世僕中有如此敗類斷不可畱矣因降旨將伊正法其附和鬧場之羅保和安卽得奚納並搜出

懷挾又復強辯之納拉善俱發往拉林重地至隨從鬧場及挾帶  
草囊字片之烏爾希蘇等四十人本應如議發遣但既經訓責示  
懲俱從寬令其在旗披甲永遠不准考試滿學教授旺衍係專管  
伊等之人臨時已不能約束而大臣等調問伊尙模稜含糊不宥  
吐實著發往熱河披甲此次莊存與所錄尙屬秉公而交卷之人  
非鬧場之人可知著加恩仍准作生員尋奏請酌減各直省鄉試  
官卷中額 諭曰前據莊存與條奏各直省鄉試官卷應酌減中  
額一摺隨經蔣溥奏請將官卷裁去一併歸入民卷均交大學士  
九卿議奏矣朕昨敬閱 聖祖仁皇帝實錄內載 上諭令大臣  
子弟另編字號考試取中旣已肅清弊端又不致有妨孤寒進取

恭覽之下仰見 皇祖慎重科名嘉惠士子立法之始本爲防弊而彼時諸臣奉行者不無偏袒子姓親族之見含糊具奏分定中額未便過多遂使以憐卹寒賤之意轉成僥倖措紳之路揆之情理實未允協此議減裁者所由來也朕思中額貴有限制而立法務在均平嗣後各直省鄉試官卷於見在中額斟酌公當大省二十名取中一名中省十五名取中一名如此辦理則官卷旣免濫取之弊亦不致有妨孤寒不必去官卷之名而於制科取士兼收並採之道庶爲平允其如何酌量妥辦無致偏枯並著大學士九卿詳議具奏旋議定直隸江南浙江江西福建湖廣等大省官生二十名取中一名三十一名取中二名山東河南山西廣東等

中省十五名取中一名二十三名取中二名廣西雲南貴州等小  
省十名取中一名十六名取中二名順天鄉試滿洲蒙古漢軍照  
小省取中南北貢監照中省取中不及額者歸民卷 從之又奏  
磨勘舊例內筆誤二三字停會試一科與字句偶疵不妨寬貸一  
條前後互異請嗣後字句疵謬罰停會試一科筆誤無關弊竇者  
免議又奏場內經題向例同考官先擬考官書籤掣用請嗣後令  
考官自擬以杜同考官代士子豫擬經題之弊均如所議行四月  
擢禮部右侍郎二十四年四月奏各省優生赴京 朝考請照考  
試續後拔貢不拘人數之例一體辦理 從之閏六月丁父憂二  
十七年正月服闋補內閣學士三十三年 命在上書房行走三

國朝通志卷八十八  
三十六年三月充會試副考官六月充浙江鄉試正考官三十七年  
命教習庶吉士三十八年仍補禮部右侍郎三十九年提督山  
東學政尋調河南學政四十一年丁母憂四十二年服闋四十四  
年六月署禮部左侍郎十月補禮部右侍郎四十九年二月轉禮  
部左侍郎五十年八月 命偕禮部尚書德保重輯律呂正義五  
十一年正月 上以存與年力就衰 予原品休致五十三年十  
月卒

右 國史館本傳

乾隆乙丑莊少宗伯存與中榜眼時其弟狀元公培因寄詩與其  
兄曰他年若使登科第始信人間有宋祁之句後果中甲戌狀元

未久卽卒

右錄宗室昭榘撰

武進莊侍郎存與性廉鯁典浙江試巡撫餽以金不受遺以二品冠受之及塗從者以告曰冠頂眞珊瑚也直千金公怒曰何不蚤白馳使千餘里返之爲講官日 上御文華殿同官者將俟 上起講儀畢矣公忽奏講章有舛誤臣意不謂爾也奉書進講琅琅盡其悃同官大驚 上爲少畱頷之

右紀聞陳康祺撰





王際華

王際華浙江錢塘人乾隆十年一甲三名進士授編修十二年八月充順天鄉試同考官十三年三月充會試同考官六月大考一等三名擢侍讀學士十四年命上書房行走十五年六月充湖北鄉試副考官時廣東設兩學政八月以侍郎程巖提督廣韶學政王際華提督肇高學政十六年巖疏言廣東學政宜併一爲是廷議裁肇高一缺際華旋丁憂服闋補侍讀學士十九年遷詹事充日講起居注官二十年二月遷內閣學士六月擢工部侍郎兼管錢法堂事務七月充經筵講官二十二年五月調刑部右侍郎十月以湖南巡撫蔣炳炳審辦藩司楊灝侵肥剋扣一案未入情實

刑部秋審時蒙混照覆三法司九卿分別議處尋議革職得旨  
從寬畱任二十四年轉左侍郎二十五年四月調兵部侍郎六月  
充江西鄉試正考官二十七年疏言武闈向來挑取雙單好字號  
者視中額已多數倍其合式字號馬步技勇之庸弱者皆得濫邀  
不肖者自分無倖中之理輒串通好字號各生代倩圖利是以雙  
單好字號向列東號合式向列西號入場見字號在西者知難取  
中紛紛求出其歸號者亦無心作文終日誼譁請嗣後武鄉會試  
合式字號竟行裁去惟於考外場時悉心甄別將技藝實在可觀  
者儘數挑入好字號卽將各姓名開單出示曉諭令入內場至分  
別雙單之處仍照例密印於監箭冊姓名之上封固送入內場下

部議行二十八年三月充會試副考官八月署吏部侍郎二十九年疏陳在京各衙門議處事件經乾隆十八年議定各衙門奏參奉 旨之日卽於咨送原奏文內將職名開送議處近各部旗往往先送原奏其應開職名必待吏部兵部咨取甚至一再行催始行開送以致奉 旨處分之日或在奏參數月後非仰體 皇上整飭官方之意請無論案情大小卽將應參各員職名開入無庸重辦其關歷任處分當時未確查者於鈔送原摺後限十日內查明補送又言各部會議外省案件關文武職任處分主彙會彙各部定議後其出本向無定限事繁衙門或以次挨至一二月後具題此中實降實革案件保無泄漏或書吏乘機作弊劣員肆行不

尙皆不可不慮請各部會題案凡涉外任處分於會彙日該部卽將有無加級抵銷處查明其實行降革者俟各部會齊後主彙衙門統於三日內具題仍將出本日期交科道按月稽查 詔如所請三十年五月調戶部右侍郎十月署吏部侍郎充武英殿總裁官三十一年正月兼署工部侍郎六月教習庶吉士三十二年疏請修庶常館得 旨允行七月轉左侍郎三十三年充江南鄉試正考官三十四年十月疏言武英殿繕錄向用國子監貢生十員充補近年來國子監祇憑文考取咨送多有書法不工者查吏部原有考取繕錄以備各館咨取請將送補貢生例停止行文吏部咨送繕錄內正途出身者充補六年限滿議敘至見在繕寫之事

無多請於原額實缺內裁減四缺每月公費卽由殿給發以省支  
領之繁下部議行十一月擢禮部尙書三十五年九月 命偕刑  
部尙書協辦大學士官保戶部侍郎英廉總理平糶事尋以北城  
歠麪短少曾經報出不卽查辦 命交部察議俱降一級畱任詳  
見官保傳三十六年御史趙鋏奏鄉會闈移取書籍及舊文應行  
禁止際華等議舊文毋庸禁其移取查直省鄉闈惟順天有 欽  
頒書籍而江南等省尙沿用坊間舊本不但魚魯易譌亦多殘缺  
請通行頒發 從之三十八年三月充四庫全書總裁官四月晉  
太子少傅五月 命辦理四庫全書薈要八月調戶部尙書三十  
九年三月京察加一級十一月 賜紫禁城騎馬四十一年三月

卒 論曰王際華才品端謹學問優長久直內廷簡任部務懋著  
勤勞邇年承辦四庫全書及薈要事尤爲殫心經理且年甫六十  
正資倚畀今聞其痰涌暴厥醫治無及遽爾溘逝深爲悼惜著加  
恩晉贈太子太保並派散秩大臣一員侍衛十員前往奠醊其各  
任內革職之案俱准開復應得卹典仍著該部察例具奏尋 賜  
祭葬諡文莊四十三年 恩賜其子朝梧爲內閣中書官至山東  
兗沂曹道

右 國史館本傳

蔣元益

蔣元益江蘇長洲人乾隆十年進士改翰林院庶吉士十三年散館授編修十五年充湖南鄉試正考官尋改陝西道監察御史十八年奏河臣高斌顧琮俱已抱疾請 敕令解任調理 諭曰蔣元益奏請敕令高斌顧琮解任一摺所奏甚屬取巧用人乃政治之大端朕於中外大小臣僚凡有簡任罔不衡量審慎況在大臣畀以要職者何日不往復於懷豈待小臣提奏始加省察耶科道職司言路大臣中果有營私舞弊貪婪不職等情卽明列彈章亦分所應爾如謂年齒衰邁夙膺痼疾要於辦理諸事並無妨礙豈可輕爲棄置高斌未任河道以前向有足疾眾所共知以其老成



臣等聞用典有系 卷八十一  
練達熟悉河務是以簡任南河總督伊荏任以來數載辛勤毫無  
貽誤豈以不能輕騎疾馳遂足爲累耶且協辦則有張師載學習  
則有富勒赫卽地方遼闊亦不待高斌之輕騎疾馳也至於顧琮  
才幹雖少誠樸有餘於河務尙堪經理夏間陳世倌會面奏其不  
能動履及詢之史貽直則謂尙能照舊辦事史貽直之子史奕昂  
見任河道或因其子爲彼屬員不敢據實陳奏或利其易事不欲  
更易上官此亦人情所有隨復詢問豫東兩省巡撫儻伊等覆奏  
彼此互異自當別爲籌畫而該撫等同聲一辭謂夙疾漸愈則其  
堪膺職任更可無疑矣朕臨馭天下一秉大公毫無成見卽照察  
所及從不以用智矜明爲尙惟達聰明目公聽並觀輕重妍媸因

物付物此無不可與天下明白曉諭者若謂蔣元益受陳世倌風指敢爲此奏亦未必然卽有之亦無形迹不欲因以興大獄也此不過見策楞劉統勳奉差江南見有查辦之事度其必爲河臣而發是以豫行陳奏以沽建白之名其揣度迎合之私心又何能逃朕之洞鑒也將來策楞等查出情弊果係高斌張師載實有徇隱據實參劾自有應得處分蔣元益以微末小臣取巧妄奏甚屬不合著嚴行申飭九月 命提督山西學政二十一年仍畱山西學政任二十四年差滿回京尋擢兵科給事中二十七年 命提督山東學政三十年差滿回京三十一年四月升鴻臚寺少卿十月遷光祿寺少卿十二月擢太僕寺少卿三十二年五月升通政司

副使七月遷順天府府尹三十三年八月擢都察院左副都御史  
九月升內閣學士兼禮部侍郎銜十月兼管順天府府尹事務三  
十四年六月充教習庶吉士十一月授兵部右侍郎三十六年十  
月因濫行保送兵部郎中張萬國年力衰庸不勝簡缺知府之任  
下部議處十二月 命祭告北嶽恆山三十九年六月充浙江鄉  
試正考官九月 命提督江西學政四十二年差滿回京四十三  
年以原品休致嘉慶九年入祀鄉賢祠

右 國史館本傳

普福

普福蒙古正黃旗人姓孔格里斯氏乾隆十年六月由閒散襲勳  
舊佐領十七年十二月授兵部額外員外郎十九年十月補理藩  
院員外郎四十三年三月擢郎中五十年六月署理藩院侍郎兼  
署鑲藍旗滿洲副都統五十一年正月往西甯辦事五十三年十  
二月往西藏辦事五十四年二月授理藩院侍郎五十五年七月  
以駐藏辦事姑息奪職 命在三等侍衛上行走五十六年四月  
復授理藩院侍郎五月授鑲藍旗蒙古副都統十一月往庫倫辦  
事五十七年八月以駐藏辦事時斥駁廓爾喀差人懇賞俸祿地  
方事隱匿不奏奪職解刑部治罪 諭曰五十五年秋閒廓爾喀

國朝通志卷之八十八  
差人來藏懇賞俸祿地方事關撫馭邊徼最爲緊要普福旣經斥  
回若卽據實入告朕必嘉其得體而於廓爾喀亦必畱心另有所  
辦乃普福竟隱飾不奏其到京召見時亦未面陳殊不可解我國  
家綱紀肅清朕臨御以來凡大小臣工陳奏事件無不躬親綜理  
隨時覈辦誰敢隱不上聞況邊隘重情尤當鉅細畢陳候朕裁奪  
乃普福首先隱匿此不嚴懲何以肅吏治而儆官常嗣後各省督  
撫及新疆駐紮大臣遇有地方各邊隘事情有隱匿不奏者一經  
發覺必從重治罪五十八年四月以廓爾喀大功告蒞宥其罪釋  
之五月 賞副都統銜以爲伊犁領隊大臣六十年往喀喇沙爾  
辦事嘉慶二年八月授鎮紅旗蒙古副都統三年八月授理藩院

右侍郎往庫倫辦事四年三月 命回京供職九月調鑲藍旗滿洲副都統遷理藩院左侍郎五年七月授杭州將軍七年四月遷都察院左都御史鑲藍旗蒙古都統十月卒子達慶原任倉場侍郎緣事革職發往熱河效力贖罪尋 賞給藍翎侍衛庫爾喀拉烏蘇領隊大臣十六年閏三月卒

右 國史館本傳



舒常

舒常姓舒穆魯滿洲正白旗人父舒赫德武英殿大學士謚文襄有傳乾隆十一年由文生員授藍翎侍衛十六年擢三等侍衛十八年在乾清門行走十九年舒赫德在北路軍營獲咎命奪舒常職發黑龍江披甲二十一年復授三等侍衛派往西路出兵二十二年復以舒赫德獲咎舒常仍奪職發黑龍江二十三年復授三等侍衛二十七年擢二等侍衛三十七年授正黃旗滿洲副都統又授鑲藍旗護軍統領三十八年派往金川軍營命於溫福一路爲參贊大臣十一月疏言噶爾瑪木魯宗巴朗索三處原係賞給綽斯甲布地方理應斷還但從噶爾見在出兵助剿遽奪其



地恐致失望因諭令兩土司各自出力俟事竣後秉公剖斷並諭  
令綽斯甲布如果實心報效將來定邀優賞得 旨舒常傳諭綽  
斯甲布土司之語與朕旨適相符合著將此摺鈔寄阿桂閱看十  
二月奏攻克日旁山口東邊碉座賊番連接死守已飭參將馬應  
詔相度情形可進則進勿使有用之兵置之無用之地得 旨所  
辦甚是此時不宜冒險深入致有疎虞尋奏金酋情願退出甲爾  
壘壘轉懇綽斯甲布乞降當卽駕馭綽斯甲布令其設法收復甲  
爾壘壘又諭知投降一事斷不能允必爲各土司斬除日後禍根  
以堅彼助剿之心 上嘉之三十八年六月疏言土兵在營頗爲  
得力遇有應給之賞尤當立時頒發則受者倍覺銜恩而見者亦

知奮勇其陣亡者請給銀三兩以資埋葬 從之又奏安設寨  
並防護糧臺情形得 旨汝所辦皆中機宜好勉之三十九年四  
月以土司壅中旺爾結親率土兵二千餘名赴營協勦派令四路  
進攻會大雪兵不能進而賊來益眾舒常恐土兵傷損致挫銳氣  
再三諭令撤兵奏入 諭曰舒常見賊眾守禦甚緊恐土兵徒傷  
無益曉諭至再三土司始聽從撤回深合駕馭外番之道伊等見  
參贊大臣如此矜憐愛護益足勵其勇往之忱舒常所辦甚合機  
宜尋以前副將李天佑等捏報兵丁鄧有德陣亡摺內未將該兵  
斫柴被掠曾經錄供奏明之處詳細聲明自請嚴議 特旨寬免  
四十一年奏口外屯政已開兵番等安土樂業見在蕎麥瓜蔬一

望青蔥景象安恬救甯可卜得 旨欣覽之四十二年以舒赫德  
病故 命馳驛來京治喪六月授工部侍郎十月授倉場侍郎十  
二月承襲雲騎尉四十三年奏採買奉天陝西麥石其自津抵通  
請照二十七年例責成坐糧廳大通橋監督辦運由倉監收毋庸  
交地方官雇運並不復貯五城糶販得 旨允行四十四年三月  
奏請楊村通判務關同知所管漕務文件徑申倉場衙門報 聞  
旋授貴州巡撫十一月以黔省每歲額辦楚鉛二百五十萬斤運  
往漢口設局坐賣委員承運抵漢必俟賣完始行齎價回黔守候  
需時本任轉多曠誤疏請嗣後令前後委員交替承管以免濡滯  
又奏減貴東道糧道養廉均報 聞旋署雲貴總督四十五年授

湖廣總督四十六年正月疏請將荊州關改歸地方官管理卽於就近之荆宜施道荊州府知府二員內遴選接辦下部知之七月奏拏獲咽喉匪彭家桂所有派出官兵鹽菜口糧俱捐廉發給上以其急公嘉獎之四十七年兼署湖北巡撫四十八年以光化汛都司守備向駐襄陽去汛寫遠請移駐密邇光化之穀城縣議行十一月奏房縣九道梁應添設巡檢一員卽將安陸府照磨缺裁抵議行十二月疏言巴陵縣當長江洞庭湖交會之衝湖西向有塘汛保甲稽查惟所管江面自荆湖腦城陵磯以下至荷葉洲九十里西岸隸湖北監利東岸隸湖南臨湘水面則仍係巴陵所轄緝捕巡防恆多扞格查巴陵水道此外尙轄三百餘里請將九十

里江面於江心分界西面撥監利東面撥臨湘建設卡房以專巡緝部議從之四十九年授兩廣總督九月入 覲十一月回任兼署廣東巡撫奉 硃批汝精神頗不及前當善爲調攝勿以養子爲念諸事不可廢弛五十年三月擢工部尙書 命來京供職五月 命署江西巡撫八月奏言湖北被旱多赴江西販買糧石恐市僧過糶居奇請將常平倉穀先行開糶俾資接濟奉 硃批所辦好覽奏略慰九月疏請以南城縣伏牛司巡檢移駐新豐市甯州州同移駐渣津議行五十二年正月 命署湖廣總督兼署巡撫 諭曰湖北吏治廢弛皆係從前歷任督撫因循日久不加整頓所致舒常亦不能辭其咎見在舒常兼署督撫兩篆務宜董

率屬員認真督辦庶積年玩愒習氣日漸改觀如再不實心整理則日甚一日伊於荏苒底恐不能當其咎也尋奏接奉 上諭跪讀之下不勝惶悚惟有振作整飭俾各屬共知畏愧力挽回護於後慎之七月奏湖北早之習得 旨既已失之於前莫更迴護於後慎之七月奏湖北早稻豐收秋成大有見動支倉穀二十萬碾米解閩以濟軍需並親往湖南與撫臣浦霖籌議接濟閩兵糧石得 旨臺灣勦捕逆匪尙未蒞事所需糧石較多該督等不分畛域先事豫籌殊屬急公著交部議敘五十三年三月以楚省綱鹽積壓 命實力整頓四月奏言川鹽來路由宜昌府屬之巴東歸州見已申明例禁並札令宜昌鎮會同該府多派兵役分駐要道常川偵緝得 旨引鹽

積滯因在楚行銷繁費浮重以致不能源源轉運該督接奉前旨  
自應將向來浮費嚴查飭禁實力整頓方於釐務有裨今乃僅以  
申明例禁派委緝私爲詞並不認真查辦實爲昧良之過著傳旨  
申飭仍著將該省相沿繁費如何立法查辦之處據實具奏尋奏  
漢口商人匣費繁重自屬實在情形嗣後臣等及承緝文武各員  
惟有絲毫無染一律湔除並嚴緝奸商私販毋使稍侵官引得  
旨該督等務先正己率屬力爲整頓勿致日久玩生又踵前弊七  
月湖北荆江泛漲隄塍潰決荊州府全城被淹 命大學士公阿  
桂馳往查辦旋以荊州將軍圖桑阿奏請改建城垣奉 旨荊州  
爲古來重鎮城猶是城江猶是江從古未有被淹之事本朝百餘

年亦未聞此乃十年之間三被淹浸而此次江水竟入城內是否  
江流遷移密邇城垣以致受患著阿桂會同舒常親加履勘通盤  
籌畫期於一勞永逸旋以阿桂到彼尙需時日 命舒常先行籌  
勘覆奏尋奏荊州郡治地當孔道四面平原襟帶襄樊控扼黔蜀  
是以古稱重鎮附近惟荆門州地勢較高然相距寫遠不足以控  
制江湖此外更無移建之處且體察輿情咸以廬墓田園由來已  
久遽議遷移似非所願誠如 聖諭不如以移建城垣之資爲增  
築隄塍之用似可常保率同也得 旨自應如此已陸續降旨矣又奏查勘沿江隄工漫潰二十餘處 命解  
任畱工效力自贖仍暫醫事務九月以荊州被水由窖金洲漲沙  
增長偪逼北趨所致奉 上諭舒常才本中平因其小心謹慎且



國朝書影宋刻 卷八十一  
係舒赫德之子是以擢用總督乃兩任楚省並不實心任事於寔  
金洲漲沙偏濬其見其聞之事尙不加意籌辦致郡城被水災實  
爲辜負任使著革去翎頂仍畱工所效力贖罪十一月 諭曰舒  
常前因荊州隄工潰決業經革職所襲雲騎尉世職至舒常襲次  
已完該旗請將敕書奏繳但念伊父舒赫德宣力年久不忍將伊  
父所襲世職遽行停襲著加恩畱於舒常本身俟荊州隄工完竣  
再行來京五十四年四月 賞給頭等侍衛九月授都察院左都  
御史五十五年十二月授鑲黃旗蒙古都統嘉慶二年署刑部尙  
書三年四月署兵部尙書十一月卒諡恪僖子敷慶任三等侍衛

右 國史館本傳

國朝書獻類徵初編卷八十八補錄

卿貳四十八

莊存與

卿大夫能以學術開帝者下究乎羣士俾知今古之故其澤五世十世學足以開天下自韜污受不學之名爲有所權緩亟輕重以求其實之陰濟於天下其澤將不惟十世以學術自任開天下知古今之故百年一人而已矣若乃受不學之名爲有所權以求濟天下其人之難或百年而一有或千載而不一有亦或百年數數有雖有矣史氏不能推其迹門生學徒愚子姓不能宣其道若是謂之史之大隱有史之大隱於是奮起不爲史而能立言者表其

灼然之意鈞日於虞淵而懸之九天之上俾不得終隱焉而已矣  
大儒社公詩存與江南武進人也幼誦六經尤長於書奉封公教  
傳山石閻氏之緒學求二帝三王之微言大指閔秦火之鬱伊悼  
孔澤之不完具悲漢學官之寡立多廢懲晉代之作僭與僞恥唐  
儒之不學見給大笑悼唐以還學者之不審是非雜金玉敗革於  
一行而不知賤貴其罪至於褻帝王誣周孔而莫之或禦蓋公自  
少入塾而昭昭焉別擇矣既壯成進士閻氏所廓清已信於海內  
江左東吳子弟皆知助閻氏言官學臣則議上言於 朝重寫二  
十八篇於學官頒賜天下考官命題學僮諷書僞晉毋得與將上  
矣公以翰林學士入直上書房爲師傅聞之忽然起適然思鬱然

歎愾然而寤謀方是時 國家累葉富厚 主上神武大臣皆自  
審愚賤才智不及 主上萬一公自願以儒臣遭世極盛文名滿  
天下終不能有所補益時務以負麻隆之期自語曰辨古籍眞僞  
爲術淺且近者也且天下學僮盡明之矣魁碩當弗復言古籍墜  
湮什之八頗藉僞書存者什之二帝胄天孫不能旁覽雜氏惟賴  
幼習五經之簡長以通於治天下昔者大禹謨廢人心道心之旨  
殺不辜甯失不經之誡亡矣太甲廢儉德永圖之訓墜矣仲虺之  
誥廢謂人莫己若之誡亡矣說命廢股肱良臣啟沃之誼喪矣旅  
獒廢不寶異物賤用物之誡亡矣同命廢左右前後皆正人之美  
失矣今數言幸而存皆聖人之眞言言尤痾癢關後世宜貶須臾

國朝文獻通考卷之六十一  
二  
之道以授肄業者公乃計出委曲思自晦其學欲以借援古今之  
勢既退直上書房日著書曰尙書既見如干卷數數稱禹謨池  
誥伊訓而晉代剝拾百一之罪功罪且互見公書頗爲承學者  
詬病而古文竟獲仍學官不廢公中乾隆乙丑科進士以一甲第  
三名授翰林院編修屢遷至禮部右侍郎 誥授資政大夫周時  
有仕爲漆園吏著書內外篇者其祖也曾祖諱某祖諱某考諱某  
皆 封如公官妣氏某某皆 封夫人子幾人某某述祖以文學  
最有聲孫幾人某某綬甲亦最有聲公以乾隆幾年卒於官年幾  
十有幾以嘉慶幾年葬某山某原公它所著尙有周官記六卷公  
性廉鯁典試浙江浙巡撫餽以金不受遺以二品冠愛之及塗從

者以告曰冠頂眞珊瑚也直千金公驚馳使千餘里而返之爲講  
官曰 上御文華殿同官者將事 上起講儀畢矣公忽奏講章  
有舛誤臣意不謂爾也因進琅琅盡其指同官皆大驚 上竟爲  
少畱頷之是二事者於公爲細節謹附書銘曰  
大儒莊公旣亡粵嘉慶二十有三年綬甲始爲書測君志以告綬  
甲友其友籀其詞宜銘乃克銘君於武進之阡

右神道碑銘龔自珍撰

四庫全書  
卷之二

三

國朝書獻類徵初編卷八十九目錄

卿貳四十九

謝浴生

錢士雲

姚成烈

旌額理

馮光熊

徐績

朱椿

烏爾圖納遜

汪廷璜

劉星煒



皇朝通志卷之二十一

國朝書牒類徵初編卷八十九

通奉大夫前署江西巡撫江西布政使司布政使湘陰李桓輯  
卿貳四十九

謝溶生

謝溶生江蘇儀徵人乾隆十年進士改庶吉士十三年散館授職  
編修十八年充廣東鄉試副考官十九年七月遷侍講十一月充  
日講起居注官二十年四月轉侍讀五月擢侍讀學士六月以準  
噶爾平 命赴河南告祭中嶽嵩山七月 命提督山東學政奏  
各學增廣生員俱有定額凡遇缺出例應隨時詳補不容積壓  
二是之二十一年任滿仍畱山東學政任二十二年升內閣學士

兼禮部侍郎銜二十四年閏六月授刑部右侍郎仍畱學政任十一月劾江西巡撫阿思哈婪賄派累命尙書劉統勳侍郎常鈞會同兩江總督尹繼善往審鞫實問擬如律二十六年五月調禮部左侍郎九月密奏童生李雍和潛遞呈詞語言狂悖諭曰謝溶生身膺學政遇此等狂悖之徒自應奏聞嚴究但地方有此重案亦當知會撫臣乃汲汲據爲己有若欲自行表見且輒用限行五百里馳奏如此居心行事欲地方官與之和衷其濟能乎不能乎謝溶生著傳旨申飭尋江西巡撫湯聘劾溶生辦理此案具奏遲延任私謬戾部議降二級調用二十九年補光祿寺卿三十二年調太常寺卿三十六年奏太常寺贊禮郎讀祝官由監生官學

生出身者保送撫民同知通判亦照理事同知通判例歷俸三年  
方准保送得 旨允行三十八年署禮部尚書素爾訥等參落生  
每逢 壇 廟大祀及朔望點香輒敢任意偷安玩視不敬又失  
察家人在本寺勒索詐下部嚴議尋議革職發伊犁效力五十  
五年釋回 賞三品卿銜尋卒

右 國史館本傳

國語  
漢字  
姓名  
...

二

錢士雲

錢士雲雲南昆明人乾隆十年進士由庶吉士散館授編修充國史館纂修官十七年授山東道監察御史十八年疏守令爲親民之官案牘紛繁當改從簡易一切足以曠廢職業者尤當剔除謹陳條例數事一知府缺出應署先儘府佐府佐無員始於鄰郡酌委州縣缺出先儘試用人員次儘州縣佐貳皆無可委始准於同府州縣檄委均不得出三百里外一守令除查災會審必須正印官其餘查勘採辦俱委丞倅俾得盡心民事一守令因公赴省非有會辦要件不許過三日其附郭守令無庸每日至上司衙門伺候致荒政事一迎送上司例有嚴禁請嗣後不許供頓亦不得遠

涉一邇來官場陋習借名議事聚飲伏思年節宴會尚屬常情無故聚飲請一槩禁絕疏入議行二十年二月奏吏部月選官遇

皇上巡幸知縣以下交在京總理事務王大臣驗看改教者非年力就衰卽材質庸下亦揣分自安至選用知縣人員缺有大小才有長短酌量調換理宜斷自宸衷今王大臣於驗看時竟行酌調恐啟僥倖之端請嗣後王大臣驗看除改教職仍照舊擬改外其餘悉照籤掣缺分不必互加更調各員抵任後聽督撫酌辦

上曰所奏是然猶有未盡更調無不可然一月之中少不過一二多不過三四此數缺卽遲待數月亦不至廢事嗣後仍許更調但兩至朕回鑾引見如是則與該御史所奏並行不悖矣但調簡缺

者多遠省人錢士雲卽雲南人也故有此論若果有其事何不指  
參然其言事屬可行故并諭該部知道是月士雲復奏請將坐補  
原缺人員照題缺例發各省委用上諭吏部曰外省病痊起復  
坐補原缺人員皆經該部帶領引見其人才稍優者朕無不降旨  
交各省督撫題補或交部卽用至降旨令其照例坐補者俱屬才  
具中平第年未衰邁非有過愆是以不忍卽加擯棄令補原缺或  
可冀其駕輕就熟勉供職耳此係數年以來辦理之大槩並未  
嘗令出眾之才聽其坐老需次也今錢士雲欲於引見變通成例  
發省委用此該御史未知朕因才甄錄之本意所奏不應行但此  
等照例坐補之人大率邊省居多若錢士雲因有同鄉故舊見在



坐補而爲此奏是有心市德桑梓假建言爲徇庇之地其風斷不可開錢士雲卽應交部議處矣錢士雲另摺所奏調缺一事朕見其有可行處不以人廢言卽已批准其見在坐補原缺之人該部查明覆奏再行降旨尋吏部查奏 上曰據吏部查奏到部坐補原缺者見在止有五人此內有緣事捐復三人原不在此例其實因病痊赴部引見降旨照例坐補原缺不過冷蔚朱范勳二員而已可見朕數年以來引見此等人員辦理之大槩矣卽按例銓補亦並無壅滯多人何須變通成例錢士雲所奏究屬挾何意見耶此內滇省之人是否與伊同年交好著錢士雲明白回奏士雲具摺請罪得 旨寬免六月 上祭 社稷壇士雲監禮錯誤部議

一級調用奉 旨錢士雲著銷去加一級仍降二級調用二十一年六月補光祿寺大官署署正十月擢宗人府主事二十二年充會試同考官 玉牒館纂修官二十五年充順天鄉試同考官二十六年充會試同考官二十七年擢刑部安徽司員外郎二十九年題升督捕司郎中三十二年授湖北施南府知府三十四年調安陸府知府三十六年擢荆宜施道三十七年十月查辦監利縣民文東淮收藏逆詞奉 旨錢士雲可謂畱心地方政務傳旨嘉獎旋准部議加二級四十二年擢鴻臚寺少卿四十三年轉光祿寺少卿四十四年擢通政司副使旋擢光祿寺卿六月擢詹事府詹事四十五年正月 派稽查右翼宗學 遣祭廣西南海之

神五月擢內閣學士兼禮部侍郎九月充武會試總裁官十一月  
醫文淵閣直閣事四十六年擢兵部右侍郎四十七年轉左侍郎  
四十八年京察原品休致五十年正月與千叟宴五十一年卒

右 國史館本傳

姚成烈

姚成烈浙江錢塘人乾隆十年進士授吏部主事十四年遷員外郎是年丁母憂十七年服闋補原官二十二年三月遷郎中五月遷山東道監察御史十一月奏山西沿邊大同甯武朔平保德各府屬州縣例納丁糧每上丁一名完銀四五兩有逃亡故絕者以本姓頂補致累里甲戶族請 敕下撫臣查明各就該州縣人民實數均攤下部議行二十四年五月因雨澤偶愆奏請緩刑 諭曰御史姚成烈奏近日雨澤愆期正清理刑獄之時請將尋常處決案件審明定案之後牢固監禁暫緩奏請處決等因一摺已照所請敕部施行矣第該御史所請尋常處決人犯原指拉林逃人

國朝言行錄卷之二十一  
六  
修起琴等一案而言該犯等以行竊發遣在配逃回尙非干犯名  
義麗於十惡及強盜不赦者比少緩時日正自不妨如殺一家非  
死罪三人及妻妾謀死本夫強盜殺人各重犯仍當照例決不待  
時爲情法之正易稱明愼用刑而不畱獄若以上各犯亦令其監  
候豈非畱獄反干天和朕蒿目焦勞靡閒寢食然明罰敕法務在  
協中亦不肖以姑息爲求雨之奇術也其敕內外問刑衙門知之  
閏六月掌京畿道監察御史十二月擢禮科給事中二十七年京  
察一等六月巡視南城八月授江南常鎮揚通道二十八年調江  
安糧道三十年丁父憂三十三年服闋授江西鹽驛道旋調江南  
糧道三十四年三月以會審潁州府知府史魯璠與太和縣知縣

郭世誼交結做法案詞連廣德州知州明福畏罪自經部議失於防範降一級得旨從寬畱任七月擢安徽按察使十月擢江蘇布政使調江南布政使三十五年九月以蕭縣知縣謝宣捕蝗不力不行查參部議降二級調用得旨改爲革職畱任十月奏江南科場外簾五所向派官二十三員俱俟揭曉出闈應請照順天例收掌二員應俟揭曉其餘陸續蒞事卽行出闈下部議行三十二年四月調廣東布政使諭曰高晉奏汝不勝繁鉅之任以朕看之亦然故調汝簡處若再不勉力改過是自取罪戾矣戒之六月奏廣東駐防八旗及水師營各官兵俸餉每歲額撥各州縣米八萬六千七百餘石內有因事故停支糧米又乾隆三十三年十

二月奉文革退幼丁兵缺亦有扣除餘米自三十年至三十五年其積存二萬有奇請將此項米乘時出糶以濟民食並請嗣後積至萬石卽出糶一次三十七年八月奏常平倉穀春夏平糶秋冬買補近來地方官往往因循不買請嚴定遲延處分十二月奏議賈行鹽異鄉子弟許就近應試設額取中至截取銓選並不迴避商籍請照寄籍例一體迴避均下部議行三十八年八月奏寄籍童生已滿二十年准其與土著一體應試又知縣銓選經部驗看改教職暨不勝民社督撫奏改教職俱請照二等舉人並病痊終養起復人員例准其在本省呈明聽候派委得旨允行著爲例四十年五月奏粵東十郡及廣州通判均有額定倉穀因府倉無

須借糶撥給州縣碾放兵米秋成補還歲需運費二千六百餘兩  
第碾支平糶既經改歸州縣府倉已屬空名似可并免領解之費  
嗣後請徑歸各州縣存貯下督撫議行四十五年以嘉應州決囚  
脫逃部議革職奉 旨姚成烈究係藩司刑名事非所正轄從寬  
免其革任四十四年五月署廣西巡撫六月因江蘇藩司任內開  
造碭山等縣糧冊數目舛錯部議革職 諭從寬畱任尋奏拏獲  
糾匪騙錢之李萬春等得 旨嘉獎七月回廣東布政使任十一  
月擢廣西巡撫四十五年四月奏參武宣縣知縣陳震因委辦滇  
銅告病請休致 諭日姚成烈奏派運滇銅之武宣縣知縣陳震  
患病勒休一摺已批交該部知道矣此等派委運銅人員如果有



國朝三才集卷之六十一  
趨避推延情弊自應奏參治罪若不過患病驗明屬實祇須奏請  
勒休另委委員接辦乃該撫摺內有該員見在患病據實奏參字  
樣試思患病有何應參之處姚成烈何不度事輕重若此卽將此  
諭令姚成烈知之五月奏桂林府糧捕通判有監放兵米拘提比  
捕之責向來串票文移俱憑木刻鈐記恐滋詐僞請給關防十月  
奏錢局鼓鑄請改委鹽法道經理俾臬司得專力刑名又思恩府  
知府並該府經歷司獄所有苗疆字樣係空名應改歸腹裏又潯  
州南甯二府司獄事簡請裁汰歸經歷兼管改設桂平縣穆樂墟  
宣化縣壇落墟兩巡檢以資防緝均下部議行四十六年二月以  
廣東布政使任內失察菱塘盜匪案部議革任得 旨寬免閏五

月檢舉遺漏聲紋歲修營房扣存稅羨請交部議處得 旨寬免  
十一月奏審明上林縣兵書侯玉捏造匿名揭帖盜用空白印文  
申送撫署訐告本縣知縣陳錫齡縱子宿娼各款擬侯玉罪如律  
十二月調湖北巡撫四十八年奏通城縣額徵漕南二糧共五千  
餘石前撫臣鄭大進奏請折價解交藩庫或畱縣變價行之兩年  
民多未便嗣後請循舊制下部議行十月因漢川縣武舉胡先璘  
致死胡三懷賄囑余子美妄認正兇案不能審出實情部議革任  
得 旨寬免十一月奏裁安陸府照磨於鄖陽府房縣所屬九道  
梁添設巡檢下部議行十二月奏荆門州抗糧毆官之萬世節各  
犯全數緝拏得 旨嘉獎四十七年七月擢禮部尙書五十年正

月與千叟宴九月奏科場論題應請孝經性理遞出下部議行五  
十一年卒

右 國史館本傳

公姓姚諱成烈字申甫號雲岫浙之錢塘人世有積德曾祖樹齋  
好施舍有南陽樊氏之風公以戊午舉人乙丑進士補文選司主  
事累遷至山東道御史禮科給事中出爲常鎮道調江安糧道授  
安徽按察使江甯廣東兩省布政使巡撫廣西湖北入爲禮部尙  
書年七十一薨公性淳厚行安而節和自居家以至臨政一以仁  
慈爲務山西大同甯武等處例納丁糧有本戶故絕者累里族代  
償公奏請飭撫臣覈明丁未歸地之區就人民實數均攤完納

上可其奏積累一清迺升朱葑之兄某辦鹽虧課部臣慮寄匿葑家檄訊甚嚴或請褫葑職械送京師公不可曰葑寄匿無實據未便先褫其職命入都與兄對質可也酒帥楊文恪公嘉公能識政體粵省倉支給旗營兵米有扣除餘畱者五六年間積至二萬餘石倉米紅朽而民閒翔貴公奏請出糶嗣後積至萬石者允其出糶一次奉 旨允行官民懽呼公雖姝姝煦煦持齋禮佛於蟲蟻不忍妄傷然頗能持法安徽富人某隱納逃婦事發輸作鬼薪中丞將許之贖公不可曰恃財爲惡不可寬也有雇工強姦主婦其家掩執交僕送官姦者誣與主婦素有姦僕人怒毆殺之有司以罪人已就拘執而擅殺問擬公不可曰強姦主母反敢污蟻此罪

國朝書牘卷之六十一  
之決不待時者不得以擅殺擬也粵犯李萬春逃至桂林總督李  
公奏公往辦不逾月而萬春父子就擒人俱疑公強毅與平素柔  
道不合公笑曰非義不能成仁此孟子之所謂以生道殺民者是  
也公所到處一切考棚書院橋梁渡船登時修舉遇蠲除豁免之  
案必迅速詳題如逋負之在身計在江甯湖北兩粵任內請免版  
荒沙壓藤廢諸田數千頃又請豁免凱旋已故兵丁借領行裝銀  
萬餘兩俱蒙報允先是廣東鹽阜係浙江江西兩省商人辦治  
日久商貧欠課脫逃當事議令本地富民承認致有奸商匿其資  
詭稱疲敝請替者公謂轉運秦公曰商人辦鹽數代矣習知其利  
弊猶且消耗今忽責之於局外之人是驅之破產也愚見宜令富

商協助疲商彼皆平日彼此洞知虛實者既可調劑盈縮又可免其推諉秦不能用已而有控部者上命大臣覈訊官商伏辜秦公歎曰悔不聽姚公言致有今日也公內行淳篤凡昆季從子戚里輩卵育扶持內外無閒言有記室某庸於才每冊彙公必削改或請別薦之以省己累公瞿然曰若老矣非我焉歸且知其才庸而以薦諸人是欺友以便己也爾之八年至內召方已其用心如此子三人嗣震剛應剛懋俱經明行修克世其家

論曰余與君同年生同肄業書院同舉孝廉交五十餘年知公最深自幼卽聞公常勸人充無欲害人之心其素襟清尚槩可想見雖時際明盛恪恭奉職無所顯其才能任眞推分善氣迎人使

難事之長官難馴之吏民皆齊其心約其口帖然悅服唐權文公  
礎天下泣且弔曰善人死矣如公者殆其人歟

右傳袁枚撰

旌額理

旌額理伊拉理氏內務府正白旗人乾隆十一年授奉宸苑筆帖式十三年成進士授吏部主事十九年遷員外郎二十一年授佐領二十二年遷郎中二十四年四月京察一等十一月署鑲白旗漢軍副都統二十五年三月署兵部侍郎奏言科場鄉會試向例漢人交綠營官員旗人交都統彈壓請嗣後不論旗人漢人俱交副都統會同御史分翼彈壓按卷入號毋令濫行出入得旨允行二十六年正月授鑲白旗滿洲副都統旋命往烏魯木齊辦事二十七年正月奏言發往烏魯木齊屯田遺犯等請先給屯地十二畝與兵丁一體計畝納糧攜眷者酌給五畝自行開墾其未



收穫以前官爲養贍家口二月奏言陝甘總督楊應琚送到人戶指給地畝開墾應需馬力請將市易哈薩克馬戶給一匹折銀八兩同前奏明賞給葢房銀折交米麪一石分年完納其兵丁五百名原議每名日給米八合麪四兩外加鹽菜銀三分所給米麪尙覺不敷請將鹽菜銀兩之半折給米麪俱從之十一月奏言烏魯木齊挈眷屯田民人陸續前來其貿易人等亦接踵而至計開市肆五百餘閒開墾菜圃三百餘畝請酌量定額收租以充公用諭曰烏魯木齊安插兵民漸多貿易人等皆藉官地以謀生計理應稍收租俾公費有餘卽如所奏辦理二十八年二月授兵部左侍郎八月奏言烏魯木齊舊城初係土堡周圍一里六分見

在市坊稠密擬將城垣加高一丈六尺厚一丈添建四門再特納格爾新開屯田建造營房一千二百間築城仰懇 賜以嘉名尋欽定烏魯木齊曰迪化城特納格爾曰阜康城九月奏言前建特納格爾等處六堡兵房四千八百間僅敷兵二千四百餘名居住其陸續攜眷兵約六百名仍須造房一千二百間查羅克倫以西地名呼圖畢田畝廣闊河水充裕木植亦多可駐兵二千名其地東至甯邊地七十一里西至瑪納斯一百三十五里爲哈薩克往來要路酌於冬季興工建蓋兵房將羅克倫換班兵六百名移於呼圖畢屯田所需農具籽種口糧亦於冬閒運往俟房屋工成卽趨築城垣庶屯田三千兵聲勢聯絡且多畱地畝備給召募民

人不致兵民參雜十一月奏言羅克倫昌吉二處種地兵已陸續  
移駐其辦事官亦應遷移請將羅克倫巡檢移駐特納格爾歸烏  
魯木齊同知管轄昌吉巡檢移駐呼圖畢歸昌吉通判管轄俱如  
所請行二十九年二月調吏部右侍郎五月奏言見駐烏魯木齊  
之額魯特兵每月給銀四錢五分單丁每月三錢自給與孳生羊  
隻以來生計漸裕請將所食錢糧停其支給 上是之三十年三  
月署戶部右侍郎四月署刑部右侍郎七月調鑲黃旗滿洲副都  
統三十一年赴葉爾羌辦事三十四年調吏部左侍郎三十五年  
回京三十六年赴烏什辦事七月卒 諭曰駐劄烏什辦事侍郎  
旌額理病逝深爲軫惜著賞都統職銜仍賞銀五百兩辦理喪事

所有應得卹典該部照例詳查具奏十二月子筆帖式阿津特  
命以主事用

右 國史館本傳

國朝書目考卷之十九

四

馮光熊

馮光熊浙江嘉興縣人乾隆丁卯科舉人考授內閣中書挑軍機章京二十三年遷戶部主事二十五年升員外郎授寶泉局監督二十六年擢郎中二十九年丁父憂三十一年服闋補戶部郎中三十二年三月隨雲南總督將軍公明瑞往雲南辦事是月授雲南鹽驛道三十四年丁母憂是年十一月失察屬吏楊家駒科派累民部議革職三十六年十月奉 旨馮光熊著吏部帶領引見十一月奉 旨以員外郎用旋補戶部員外郎仍在軍機章京上行走授寶泉局監督擢郎中三十七年五月隨尚書公福隆安赴金川軍營辦事四十一年四月授廣西右江兵備道四十二年署

廣西按察使兼鹽驛道十二月調福建汀漳龍道四十五年擢江西按察使四十六年署江西布政使四十七年十月擢甘肅布政使十一月以失察疎縱要犯議處奉 旨從寬免其革職四十九年五月甘肅石峰堡逆回滋事 上以光熊未將籌備情形入告命傳旨嚴行申飭並命迅速具奏尋奏見在剿辦賊回供支係臣專責查河東各屬倉儲糧料均屬充裕無難調撥惟賊蹤無定須多備乾糧以便攜帶追勦臣已早爲預備至省城回民雜處必須嚴密防範臣仰遵 聖訓曉諭老教回民協力查拏並於各隘口多撥兵役安設卡座晝夜巡防多有擒獲 諭曰妥當但所奏略遲矣以後十日半月卽當奏聞汝曾在軍機處行走豈不知朕廑

念乎是月以江西臬司任內餽送郝頌銀兩奪職仍畱軍營帶罪效力六月初十日奏攻擾靜甯之賊經官兵擊退後竄赴梁家河距會甯不遠急宜添兵防守請酌撥蘭州防護之甘標兵五百協同堵禦報 聞尋以逆匪於白楊嶺衝犯官兵而督臣福康安遠在安隆稟請調撥往返需時遂將調到西甯兵五百檄都司穆克登額諸佛保率往擒治七月布政使浦霖奏省城內外要隘業經原任藩司馮光熊安設堆卡並派撥兵丁民夫分地防守布置均屬周密五十年正月 上諭馮光熊前畱甘省軍營效力見經完竣著該督出具考語送部引見四月福康安疏言馮光熊在部年久臣任侍郎時知其才情老練自到甘肅訪其前在藩司任內辦



事認真嗣經臣於籌議添兵時將各處營署兵房墩塘地址委令  
查勘頗爲妥協茲謹遵 旨出具考語令其赴部得 旨覽七月  
起爲安徽按察使五十二年二月調山東按察使五十四年正月  
擢湖南布政使三月調直隸布政使五十五年十一月擢湖南巡  
撫五十六年四月調山西巡撫五十七年 車駕巡幸五臺山差  
次 賞花翎黃馬褂五月 召光熊來京另候簡用六月署工部  
左侍郎尋授貴州巡撫五十八年三月調雲南巡撫六月得 旨  
馮光熊俟英善軍需報銷完竣再赴雲南新任八月署貴州巡撫  
五十九年七月署雲貴總督會桐梓縣奸民潛集私鑄 上以光  
熊身任巡撫耳目最近不能及早搜緝非實心任事之道下部議

處尋奉 上諭私鑄全案人犯均已審擬治罪馮光熊著從寬免  
其革任仍註冊六十年正月得 旨馮光熊俟陳用敷到黔交代  
後再赴雲南新任二月與提督彭廷棟同奏言松桃苗民石柳鄧  
滋事格拒官兵四散竄逸臣思松桃爲川楚接壤苗疆要地今經  
頑苗擾害必須親往督拏全獲首夥並分調附近之各鎮協兵千  
餘前赴松桃與楚省合力堵禦四月十九日奏言思州府之田壩  
坪鎮遠府之四十八溪思南府之大坪場均毗連楚苗境地且係  
銅仁府後路必應先行防禦毋使逆苗抄截臣與提臣彭廷棟酌  
派官兵協同鄉勇設卡防守並續派各鎮協兵四千交彭廷棟相  
機進剿期於一舉殲除以彰 國憲得 旨據馮光熊奏到情形

賊匪滋擾銅仁該撫添調多兵得有勝仗是貴州境內防範較嚴  
兵威壯盛督辦有人可以無虞滋蔓三十日福康安疏言臣行抵  
銅仁郡城見離城迤北二三十里外卽有苗匪出沒無定亟宜厚  
集兵力剋期剿淨馮光熊先來銅郡籌運軍糧相度山寨添設營  
卡俱爲妥協同日光熊疏言前因松桃駐守兵少臣曾添兵千餘  
以備調遣茲苗匪圍擾松桃正大等處甚急又添調兵二千前往  
策應臣駐劄銅郡籌撥糧餉見在據報松桃正大各城均各防護  
無虞尋奉 上諭貴州苗匪滋擾馮光熊辦理一切軍需事宜尙  
皆妥協卽雷貴州巡撫任俾令一手經理三月奏言查銅仁府城  
及田見坪係軍需糧運總匯後路且爲正大松桃門戶東南一帶

偏近楚苗山徑叢雜奸匪潛伺臣督飭文武酌撥弁兵偵察隘口  
詳加盤詰遇有可疑立即擒治 諭曰馮光熊等或畱防後路或  
督辦軍機均爲妥協著賞給大小荷包五月同福康安奏黔省見  
存銀兩不足於用將來查辦善後畱防官兵賑貸難民需用甚夥  
請於鄰近各省撥銀一百萬兩解黔接濟 允之十月官兵生擒  
首逆吳半生福康安等 錫賚有差馮光熊等交部從優議敘十  
一月同福康安奏集兵六省費用較繁請再於附近各省撥餉銀  
各一百萬兩分解黔楚以備支放 從之十二月疏言銅仁松桃  
被難民人蒙 恩賑卹計已四月允稱得所惟賊氛已靖逃亡漸  
次投歸時屆歲寒彌形窘迫請再加賑兩月得 旨允行嘉慶元

年五月五日 上以天中佳節眷念勤勞軍營大臣均如內廷臣  
工例賚予有加錫光熊香囊六小荷包一扇套一二年正月奏言  
苗疆底定難民陸續歸業俱經臣照例撫卹安堵如常而銅仁正  
大等處必應改建石城以資保障報 聞會南籠府狃苗起事光  
熊奏言南籠爲苗疆要地路通滇南粵西亟須撲滅無俾蔓延臣  
卽日起程相機剿捕並知會提臣於見議撤回兵內量爲抽撥督  
率起行得 旨狃苗焚搶不可不速行搜捕此時馮光熊已往南  
籠但貴州苗疆關係緊要一切調度機宜恐馮光熊一人照料難  
周勒保卽速回黔省二月奉 上諭馮光熊帶兵四百前往南籠  
務將籌辦情形速行覆奏尋奏南籠僻處西南與滇南粵西接壤

山高路險苗種不一狎苗向雖刁悍然衣冠習俗久與齊民無異緣府城兵少外營相隔寫遠是以敢於啟釁第恐輾轉連結或致蔓延當飭毗連之永豐州等處鼓勵弁兵嚴守要隘臣沿途催調前派官軍迅速策應並示諭遠近各寨苗民毋爲煽誘自取誅夷奉 上諭南籠苗匪不過烏合之眾兵威壯盛自無難立就殲除嗣以勒保奏言星夜馳赴南籠會同馮光熊等速籌剿辦以期及早綏靖得 旨前據馮光熊等奏酌調附近官兵帶令前往並知會珠隆阿等帶領湖南應撤之兵督勦諒此烏合之眾易於撲滅勒保須會同馮光熊悉數殲除勿任別有勾結此爲最要尋奏南籠郡城數被侵擾臣催集官兵廣募鄉勇勸諭良苗協力剿賊已

據阿積寨狃苗岑有明等擒獲匪苗韋阿三等四名韋有才等擒  
集阿半等十名臣當將各犯正法獎賚有明等以示鼓勵 諭曰  
馮光熊奏擒獲狃苗夥黨集兵撲剿情形可見狃苗中安分守法  
能知效順實不乏人亟宜加之獎勵該撫仍當督率兵弁上緊剿  
辦以期一鼓集事二十七日疏言狃苗起事首犯南籠因城守甚  
堅未能逞志遂至焚掠由安姑達新城山險箐深所在結卡臣飛  
飭附近營兵三千令鎮臣張玉龍進攻安姑一帶險要行抵廖箕  
適與賊遇晝夜轉戰斬首五百餘級臣將奮勇弁兵分別犒賞招  
集難民俾無失所糧餉火藥均足供支奉 上諭曰狃苗負隅屯  
聚馮光熊珠隆阿等督率將弁兵丁分路進剿殺賊三四百人將

賊棚盡行燒燬所辦尙好會雲南巡撫江蘭率兵來援得旨江  
蘭奏援兵已入貴州著傳諭勒保馮光熊等上緊籌畫苗匪殲  
淨地方甯謐迅速戴功以副委任三月同珠隆阿奏言狃苗倉猝  
糾合本無難迅卽殲除緣兩年用兵節經徵調南籠防兵旣少外  
營弁兵未能卽至遂至蔓延見在苗眾兵單勢難卽就殲滅臣等  
札商楚營總統於應撤滇黔兵內再酌撥數千名合力掃蕩庶可  
速竣上諭前據馮光熊奏狃苗糾眾不過數千屢經官兵勦殺  
何以各路屯聚之賊仍復不少可見馮光熊等所言不足憑信並  
以苗眾兵單又欲於湖南添撥兵丁助勦看來馮光熊究係書生  
又已年老調度機宜不能得當馮光熊於勒保到後卽回駐省城



彈壓地方辦理軍需不必再畱軍營旋以勒保奏言臣方攻剿巴隴而木山寨苗匪潛赴安順妄冀劫糧適續調官軍已到馮光熊卽檄副將康世貴等帶兵迎擊殲戮五百餘人又歸化廳被賊圍攻馮光熊令都司周廷翰率兵往援節次攻剿苗匪潰竄城內兵勇開關夾擊殲賊無算歸化圍解 上以勒保將沿途苗匪痛加殲洗苗寨紛紛乞降而馮光熊督率將弁解通歸化圍城辦理可嘉賞光熊嵌松石金盒一珊瑚豆黃瓣大荷包二小荷包四五月逆匪屯踞壩陽時肆劫掠光熊令副將王格都司保德等襲之擒其渠餘眾悉潰六月壩陽擊敗之苗竄匿長寨之磨幔山箐光熊督兵往剿焚其巢又以獨峯山嶺賊匪恃險負隅檄定番州州判

崔琳率兵進擊斃賊無算山梁悉平適安順屬之龍潭大坳廣順屬之班家羊武等處苗民請降者一百六十餘寨光熊皆諭之六月賊復踞磨幔山箐光熊令王格等分兵三路會剿賊潰走官軍奮勇追奔斬首五十八級生擒十二人焚燬苗寨三十餘處附近苗民聞風投誠者四百餘寨事聞得 旨所辦亦好七月奏歸化廳所屬白岩三角寨苗寨林立憑恃險阻必先加以剿除大兵始能會合臣飭副將王格等剋期進攻於十二日期抵賊卡乘其不備殺賊數十人賊眾竄踞高堍用礮抵拒賊目然礮礮忽自裂眾皆驚潰守備□國琦乘勝追擊生擒賊目二人斬獲甚眾投出老幼悉令安業奉 上諭馮光熊督同鎮將分路破賊擊殺多名賊

國朝通志卷之六十一  
三  
敵自裂此皆仰賴 天神助佑俾苗眾自相驚潰叩謝之餘彌深  
欽感八月奏言督臣勒保會飭各鎮將相機進剿官軍奮勇多得  
勝仗統計播東播西兩路剿撫兼施路徑漸就通達見在駐兵江  
壠其六馬朵萬各隘均可控禦無虞奉 旨馮光熊於江壠一帶  
後路派兵防守糧運無虞阻滯所辦甚好著賞玉喜字搬指一黃  
辮大荷包二小荷包四火鑷一十月大軍收復永豐冊亨等城生  
擒首逆王抱羊狃苗平是月與勒保奏善後事宜四條一隨征出  
力打仗武舉武生及鄉勇等酌分就近營分充補弁兵餘丁以資  
熟習而束游惰一招集難民給予棲止牛具各費以俾復業而廣  
皇仁一籌備糧餉以利兵民就食一清釐田土卽以靖苗漢紛

爭下軍機大臣會部議行十一月官兵搜捕餘匪光熊奏言賊目楊阿三糾眾屯光明山密派將弁潛襲賊巢生擒楊阿三及其黨一百二十八人 上諭馮光熊廓清安順後路擒獲賊目楊阿三等所辦好著賞白玉喜字牌一火鏢一黃辦珊瑚豆大荷包二小荷包四尋與勒保等奏將黃草壩之者安亭納蘭寨等處梗路苗寨全行勦淨議請撤兵得 旨所辦是三年二月奉 諭曰此次鄂輝將樓下河一帶賊巢悉行勦洗卽會同馮光熊查辦撫綏善後各事宜所辦甚屬可嘉鄂輝馮光熊著各賞大吉四喜白玉牌一黃辦大荷包二小荷包四嵌玻璃盒一以示獎勵三月奏苗疆善後事宜四條一申明民苗典買田產以杜盤剝侵凌等弊一釐

定民苗村寨毋許混雜並嚴禁差役擅入苗寨句攝公事以杜藏  
奸滋事一酌定夫徭工價以資窮民口食一酌設苗弁以資管束  
各寨下軍機大臣會九卿議行五年二月 上諭貴州巡撫馮光  
熊聲名素好辦理地方事務認真但年近八旬精力究恐不及所  
有兵部侍郎員缺卽著補授五月 上諭馮光熊雖係侍郎但年  
近八旬加恩在紫禁城內騎馬六月擢左都御史六年九月卒奉  
上諭左都御史馮光熊由內閣中書在軍機章京上行走曾隨  
往軍營辦事洊擢司道巡撫升授左都御史宣力有年尙屬勤慎  
茲因年老病故殊堪軫恤著加恩賜祭一壇所有任內降革處分  
悉予開復長子克鞏原任雲南麗江府知府捐升道員緣事奪職

嘉慶十四年 上五旬萬壽迎 駕 恩賞知縣次子克肇見任  
福建福甯道長孫建孫二品廕生候選通判

右 國史館本傳

國朝詩林卷之二

三

徐績

徐績正藍旗漢軍人由乾隆十二年丁卯舉人捐納通判揀發東河二十二年補山東兗州府泉河通判旋升濟甯知州二十七年因查拏逆犯楊塾辦理迅速引見以知府用尋補曹州府知府三十年調濟南府知府三十三年擢濟東泰武道三十四年二月擢山東按察使三月丁父憂十月命以按察使銜前往哈密辦事賞戴花翎三十五年擢工部右侍郎調烏魯木齊辦事大臣三十六年奏瑪納斯在伊犁塔爾巴哈臺之閒地甚寬廣該處若添駐滿兵於聲勢可以聯絡上是之是年擢山東巡撫三十八年三月聖駕巡幸天津召對賞穿黃馬褂御製詩賜之



日新疆宣力數年更簡授濟東安撫行詎曰繭絲惟保障况茲路  
熟就車輕小廉大法視斯率察吏安民篤以誠風化休言夙所悉  
務知則閩學知明四月奏請嗣後山東藩司到任委各府盤查所  
屬常平倉穀定限三月題報五月奏查東省各屬今春出借及向  
來民欠常平倉穀例應於麥秋二收之後分別徵還但民間見穫  
者麥應完者穀若令糶麥易穀還倉難免輾轉虧折或因此輸將  
不前應請乘茲麥秋豐稔卽令民戶將應完穀石交麥六斗抵穀  
一石還倉如有情願還穀者仍聽其便庶農民易以完納倉貯日  
漸充盈惟麥性不耐久貯而明春出借仍可徵穀還倉一轉移閒  
民無糶糴之煩倉有實存之數洵屬公私交益疏入均報 聞三

十九年三月京察各省督撫 諭曰徐績宣力封疆克稱厥職著  
交部議敘六月奏改齊河茌平爲衝繁難兼三要缺在外揀選昌  
邑爲繁難中缺曲阜爲簡缺均歸部選 從之九月壽張逆匪王  
倫滋事績統兵赴剿被圍於臨清城南總兵惟一引兵救援敗之  
上慮績未嫻軍旅 遣左都御史阿思哈率兵往會之隨大學  
士舒赫德等分路進剿 諭曰徐績爲封疆大員地方有此奸民  
作亂不能早爲覺察自不爲無罪但此際賊勢鴟張該撫已心存  
惶懼儻再加以嚴飭恐其愈無主張轉於事無補且因賊匪滋事  
卽將巡撫更換治罪適足以長刁民頑獷之風俟事定後其功過  
自不能掩十月解山東巡撫任 命緝捕餘黨自效績擒王倫弟

王柱王林等正犯二十餘名 上以績咎止失察邪教平日辦事頗能黽勉授爲河南巡撫仍帶革職畱任所有從前賞給之孔雀翎亦不准戴用以示懲儆四十年奏雲貴二省文報向由襄城至許州入新鄭行走查襄城另有由長葛縣石固鎮至新鄭一路較至許州實爲便捷嗣後雲貴文報請改由石固鎮行走酌撥許州襄城新鄭各驛馬匹責成長葛縣經管下部議行四十二年奏按察使趙銓健忘精神不能周到 諭曰徐績旣知該臬司不能勝任自應據實具奏勒休乃於應否去畱不置一辭殊屬非是徐績著交部嚴加議處部議革職 上從寬畱任尋以辦理巡撫事務時形竭蹶命來京候旨四十三年授禮部左侍郎四十七年因

粵祭安設禮器錯誤褫革 命自備資斧前往和闐辦事十二月  
賜三品頂帶五十二年奉 旨回京署正紅旗漢軍副都統五  
十四年授正黃旗漢軍副都統五十九年擢正紅旗漢軍都統六  
十年 召見 詢問前任都統弘昉事蹟於其聲名狼籍之處未  
經實陳 上責其隱飾褫職仍 賞六品頂帶前往和闐辦事嘉  
慶三年擢三等侍衛調烏什辦事大臣四年五月奏和闐產玉之  
哈拉哈什桑谷樹雅哈琅圭塔克四處請停止採辦十一月奏請  
烏什裁撤屯兵地畝賞給伯克均 允所請五年奉 旨回京  
賞戴花翎授大理寺少卿遷光祿寺正卿六年擢宗人府府丞十  
年以老乞休 上允之十二年丁卯科重與鹿鳴宴 恩加二品

國朝通志卷之六十一  
三  
銜十六年子錕任福建甯鎮總兵 陛見時 恩准回旗終養  
績以精力尙健願就養任所錕復據情具奏 諭曰徐績曾任大  
員勩勵伊子辦公報效不令終養尙屬能知大義但念徐績年逾  
八旬南方炎熱風土不宜徐緄著調補直隸正定鎮總兵俾得就  
近迎養是年卒子錕見任直隸古北口提督孫達充阿二品廕生  
見任九江府通判達興阿 恩賞六品筆帖式

右 國史館本傳

朱椿

朱椿江蘇婁縣人由監生捐納通判效力江南松江太倉二屬海塘工竣議敘授湖北荊州府同知乾隆十二年遷浙江金華府知府十六年擢溫處道任內卓異屬員升轉他省別犯贓款降二級調用旋准捐復二十八年補湖北鹽法道三十五年擢廣西按察使四十年授雲南布政使四十一年六月奏滇省投誠土夷滋生繁庶國家經費有常勢難增給口糧請飭令於安插地方或佃種備田或小本貿易其年力盛壯者酌挑入伍 上嘉其議七月奏委運京銅人員請由道府公舉移司覈詳督撫濫舉者一併查察從之十一月調廣西布政使四十二年奏南甯太平鎮安泗城

國朝典章考卷之二十一  
等府向募客民充當書役或有藉端滋事遠颺異地見飭屬令另募土著充當其隻身流寓者槩勒限退役回籍下部議行四十四年十月奏思恩府屬有上林縣一缺自唐宋以來並設兩知縣印相同不足以覈實昭信請改鑄土上林縣印十二月奏修理衙署所借官項例於本任俸內分年扣還粵西苗疆煙瘴佐雜官調回內地與推升者均有一定年分該員知離任日近任內扣項無多率請借項修署應請分別定限三年調回者限在任一年內請修三年候升者限二年五年者限三年並請雲貴川廣閩省之苗疆煙瘴等缺均照此例四十五年六月奏請士民告官之案照例限四月完結如逾限不結照命盜雜案例接扣二參如再不結卽照

易結不結例革職九月奏永福等七縣每年額收變價官租遇補  
還常平倉穀時轉赴市採買徒多運費請嗣後除無需採買之年  
卽將官租劃抵均如所請行四十六年正月雲貴總督福康安等  
奏請清釐滇省積欠鹽課將舊欠無著銀三十二萬餘兩在通省  
養廉內攤扣歸款 上以此皆係歷任之督撫藩司等經理不善  
所致朱椿曾任雲南藩司錢糧是其專責此項之積欠銀兩自應  
著落分認賠補十月奏向例州縣缺出正印乏員准於州同州判  
府經歷縣丞內暫行委署但必已補實缺方可委用若初到試用  
佐貳人員卽署正印實屬過優請嗣後祇准已經補缺之佐貳遴  
委其試用初到人員槩不准委 從之十二月擢廣西巡撫四十



七年六月奏盤獲廣東崖州回民海富潤鈔錄回字經卷及漢字  
天方至聖實錄年譜等書見在逐一嚴訊從重究辦 諭曰所辦  
殊屬過當就見在簽出字句大約鄙俚者多不得竟指爲狂悖若  
必繩以國法將不勝其擾著毋庸辦理嗣後各省督撫遇有似此  
鄙俚書籍俱不必查辦又奏宣化柳城武緣天保奉議五州縣開  
墾老荒水旱田八十八畝有奇又墾田五十四埜報 聞七月  
諭曰朱椿查辦回民海富潤攜帶經卷等書一案不待接奉諭旨  
卽分咨各省一體查辦著傳旨嚴行申飭伊此事辦理錯謬本應  
降調朕因其初任不諳非有意邀譽沽名者比是以免其議處嗣  
後斟酌事理輕重畱心妥辦旋據湖北巡撫姚成烈奏稱接據朱

椿來咨當將海富潤案內牽涉之袁二等拏訊因奉 旨毋庸辦理隨當堂省釋 諭曰袁二本係安分回民年逾七旬無辜受累可見各省因此滋擾者不少皆朱椿辦理錯謬所致著交部察議九月劾部選廣西南甯府同知程德炯藉病遷延規避遠缺得旨程德炯係部選人員理合依限赴任乃託詞患病至九月有餘顯係有心規避程德炯著革職發往軍臺效力贖罪至朱椿前於回民海富潤一案辦理錯謬因降旨察議經部議以降二級調用不准抵銷實所應得今於程德炯規避遠缺卽據實奏參尙屬留心所有部議降調著加恩改爲革職畱任又奏民間烏槍例應查禁惟廣西各屬猺獞人等類多山居時有虎狼出沒必須烏槍防

御請毋庸收繳 從之尋因前署湖北漢黃道任內失察吳碧峯  
刊刷瞿罕所著體孝錄孝經對問語多悖逆並不實力稽查部議  
降二級調用得 旨寬免四十八年三月授兵部右侍郎五月遷  
左都御史七月奏思恩府新設督捕通判係桂林府糧捕通判裁  
改請嗣後思恩府督捕通判缺出應照桂林府糧捕通判例歸部  
銓選得 旨允行四十九年二月卒

右 國史館本傳

乾隆四十有八年四月吏部疏請考察行省官 皇帝若曰巡撫  
廣西兵部侍郎椿宿齒舊臣朕憫煩以封疆之事其以右侍郎還  
部公奉 詔裝未行五月 上復擢公都察院左都御史趣行還

朝入見 乾清宮 天子進勞公且告以將宴千叟於庭遲公  
來以與其列公頓首稱謝會九卿入啟事公夙興得寒疾不能朝  
上傳旨慰問令安意親醫藥久之疾少閒強起朝明年正月既  
望赴良鄉送 駕還病遂大作二月戊寅薨於宣武門私第春秋  
七十有五其年喪歸自京師又明年十二月某日葬公南匯縣長  
人鄉沈莊之南原於是孤子煥泣而請文墓隧之石錫熊室於朱  
故少而識公自比歲朝京師公數就邸舍與語意款款不自休稔  
知公爲鉅人長德於其銘不敢以辭按狀公諱椿字大年號性齋  
朱氏之先自浙江遷上海再遷南匯之沈莊明季有山西布政使  
參議諱正色者以進士起家有聞於時是爲公五世祖高祖太學

生諱之驥曾祖縣學生諱竦祖鳳翔府知府諱琦始自沈莊徙郡  
西郭外故今著籍爲婁縣人父貢生諱毓滋才而蚤世母陳夫人  
繼卒僅遺公一子鳳翔公致政歸見公儼然懷抱間哀其孤露訓  
鞠甚備而公亦能勤身發閭恭儉自剋以庀其家而施之於官所  
至不爲赫赫名比去輒思慕之至於今不衰惟 天子亦以任公  
晚不及究其用爲可惜也公弱冠以通判效力江南海塘工成敘  
癸第一授湖北荊州府同知大府檄公入黔採木部送入京擢浙  
江金華府知府進浙江按察司副使分巡溫處道以祖母陳太夫  
人憂歸服除補福建興泉永道註吏議鑄級尋復原官爲驛鹽道  
於湖北者七年以薦當入 覲未至擢廣西按察使再遷雲南布

政使甫一歲復還治廣西 上滋欲嚮用公乾隆四十六年遂以  
兵部侍郎都察院右副都御史卽其省爲巡撫公精吏事性敏而  
好勤所爬梳理析皆中支節而不冒爲錙銖鏗刻以矯激取譽故  
興除利害甚眾竝長久可施用待屬吏和易而遇事可否一以意  
未嘗少有假借至其視百姓拊摩教誡若己子弟則人人莫不以  
爲可親在貴州伐木萬山中蹈蛇虺虎豹之居叢箐灌莽人跡所  
不至從吏皆失色避去公徑往不懼事卒以集其在金華溫處兩  
遇 天子行幸浙江公先驅除道部夫水陸數萬明約束戒期會  
竟事無譴詘失次者 上以是知其能黃州水溢爲菑公攝其道  
印請粟以振親巡而戶賦之吏不能侵民以胥飽其在粵西最久

務與民休息鋤其奸莠而右助其善良者不事條教繁瑣諄諄以  
至誠化誨自秉臬建節其爲治皆然數年之間獄訟稀簡年穀  
時熟粵人頌其功莫名其用也公行內修幼育於祖母事之曲盡  
其歡旣歿毀至骨立嘗假歸省祖父墓攀樹長號哀動左右平生  
寬厚長者與人交煦煦然下之未嘗以貴故稍替閒作制舉義及  
歌詩皆可觀通習國書旁及烏占風角之術亦能得其祕奧惟公  
以孤童奮起卒致顯顯出事 天子四十餘年純衷不欺終始若  
一用克上膺知遇 恩寵稠渥所以照臨其家而大庇於其子孫  
嗚呼可謂盛矣公娶夫人許氏繼室夫人陳氏皆先公卒今嗣以  
梓子二人長卽煥中書科中書次照尙幼女六人適舉人王憲曾

布政司經歷王翰婁縣學生趙日熾吏部筆帖式嵩山太學生海常王芾其銘曰

有煒烈光興自鳳翔孰亢而宗克顯以融公德不回允惠且哲起二千石終秉旄節公敷其政不競不綈不棘不徐輿人之驅天子命公填撫南服清靜甯一南人載福袞衣來歸鶴立長身百僚聳觀黃髮是詢祝噎在廷公不少待帝念國叟省章感喟甘棠蔽芾桂管餘思民功曰庸永世有辭雙桓莪莪新宮墨食我銘斯藏視後不泐

右墓誌銘陸錫熊撰



皇正人考不系

三

烏爾圖納遜

烏爾圖納遜正白旗蒙古人圖博特氏領侍衛內大臣拉錫之孫由閒散於乾隆十三年授藍翎侍衛二十三年命偕副都統福祿散秩大臣永慶帶索倫兵往軍營隨征準噶爾二十四年於呼爾璜協剿有功恩加優敘旋擢三等侍衛二十五年凱旋賞雲騎尉世職三十七年隨征金川九月與侍衛明亮攻甲爾木山賊卡因雪電輒棄已占山梁經副將軍阿桂奏劾降四等侍衛十二月奉諭派爲阿桂一路之領隊侍衛三十八年二月領侍衛內大臣公豐昇額領隊大臣舒常奏分兵三股一由達爾圖大礮正面進攻一由大礮東面進攻派烏爾圖納遜與提督馬彪帶兵

接應爲一路一齊衝上山梁斃賊無算 上嘉之十一月復攻得  
沙壩山梁 恩賞荷包三十九年偕舒常兵撲達爾圖大礮殺賊  
甚多四十年二月參贊富德奏遵 旨抽派南路兵赴宜喜其丹  
東吉地兵派烏爾圖納遜帶往四月攻獲薩克薩谷山梁七月攻  
噶西喇嘛寺賊俱遠遁十一月經明亮舒常派於噶爾角堵截布  
里溝內來援之賊四十一年蕞功 賜緞六端銀百兩旋兼公中  
佐領四十三年擢鑲紅旗蒙古副都統四十六年撒拉爾逆回蘇  
四十三滋事隨大學士公阿桂赴剿五月在龍尾山堵截回匪數  
十名閏五月復向華林山攻擊并接應進撲賊營之兵六月阿桂  
令侍衛章京等帶屯練降番及阿拉山兵先伏華林山卡派烏爾

圖納遜等帶兵來往策應乘勢殲賊淨盡四十七年授察哈爾副都統旋擢察哈爾都統四十九年六月授綏遠城將軍復調察哈爾都統十月會同直隸總督劉峩奏張家口駐防營房四處惟乾隆六年所蓋之二百八十間俱多坍塌且基址低窪不堪經人請於軍臺筆帖式住房後起至三翼公所止本係駱駝馬廠地基建房如數卽飭口北道勘估興工其舊址卽改爲駱駝馬廠報聞五十年十二月會同山西巡撫伊桑阿奏宗室德齊奉恩將軍恆林各進上地廠經軍機大臣奏令照納木謹進地方例查丈定擬茲勘得廠地坐落殺虎口外阿布達里地方共三百五十頃十一畝一分并續丈民人私墾地一百四十頃八十四畝六分均照數

入官自五十年升科每畝徵銀一分四釐其廠內有民人建房一百七十間窯二十九間仍令居住於遊牧毘連處創溝砌石爲界且設立鄉約編查保甲其承種民人給與執照奏入 命交原議大臣等議行五十四年以侍衛齊巴克扎布控告哈爾總管伊呼庫剋扣俸餉苦累兵丁經尙書慶桂等往訊得實交大學士公阿桂等議將烏爾圖納遜革職得 旨烏爾圖納遜身爲都統於伊呼庫斂扣俸餉不但未畱心查辦且特保舉本應照部議革職並革去世職姑念其在乾清門行走有年於此案尙無入己情事伊所有雲騎尉世職係從前打仗出力所得仍著加恩賞在乾清門二等侍衛上效力行走旋 諭曰烏爾圖納遜著賞給副都統

職銜派往喀拉沙爾換回德爾格楞貴五十五年署察哈爾都統  
五十六年授察哈爾都統六十年調綏遠城將軍嘉慶元年二月  
擢理藩院尙書兼鑲白旗蒙古都統十二月奉 旨理藩院帶領  
引見絲頭牌烏爾圖納遜冒昧錯遞實屬無用著交部察議尋議  
罰俸二年三月 諭曰喀什霍卓前因捏病未至盤山經御前大  
臣奏參朕尙曲加矜宥僅予罰俸迨朕回蹕伊仍託病不去迎駕  
且至今未出當差經派烏爾圖納遜阿蘭保往召伊仍稱有疾不  
出復派烏爾圖納遜阿蘭保傳旨將喀什霍卓之公爵侍衛全行  
革退鎮拏赴闕交御前大臣等嚴訊伊無可置辨惟認糊塗喀什  
霍卓以外番回部膽敢如此謬戾若不加以懲創何以示儆著卽

責三十板交刑部監禁至烏爾圖納遜阿蘭保以尙書都統大員一任喀什霍卓狡展不赴命召其無用已極阿蘭保著革去副都統作爲頭等侍衛在御前行走烏爾圖納遜著革去尙書都統卽降補阿蘭保所出正黃旗蒙古副都統同齊里克齊出牧效力時用兵勦辦三省邪教旋奉 命帶黑龍江頭起官兵於八月起程九月抵襄陽十月 諭曰黑龍江官兵著交烏爾圖納遜帶領駐劄保豐馬儀賊匪被勦緊急仍欲折回湖北邊界卽可迎頭截擊十一月經廣州將軍明亮等派令由興安大路赴紫陽一帶迎勦十二月奉 上諭賊匪因官兵截勦緊急搶渡漢江經烏爾圖納遜等馳馬衝入江心抄殺而明亮等分頭迎擊賊一千餘名著

各賞白玉喜字搬指并大小荷包等件旋因歲除復 賜荷包俾  
霑嘉祉迅勉成功尋烏爾圖納遜奏見借明亮由廣元帶兵向北  
抄擊以免賊擾棧道繼又駐甯羌州堵禦三年正月 諭曰烏爾  
圖納遜著補授綏遠城將軍伊見在軍營帶兵著永慶前往署理  
三月奉 旨賊匪偷渡烏爾圖納遜何以安坐甯羌不思帶兵並  
力堵截著勒保查明奏參尋烏爾圖納遜奏甯羌爲南棧門戶所  
帶山西兵五百勢力又單未便輕動賊係由南江過江一路東竄  
奉 上諭烏爾圖納遜心懷畏怯罪無可追著卽革職作爲兵丁  
交宜縣德楞額差遣三月陝甘總督宜綏奏烏爾圖納遜帶兵三  
百名至洋縣遇賊首阮正通帶領二千人直逼縣城經烏爾圖納



遜奮勇迎勦適知縣顧沂副將官信亦帶兵抄出來攻斃賊百餘  
名生擒十八名賊卽翻山竄逸因奉 旨將兵三百畱於洋縣伊  
卽輕騎來營聽候差遣六月以烏什大臣雅爾泰獲咎 賞給三  
等侍衛由軍營馳驛前往辦事四年五月 命回京六月奉 旨  
補授理藩院尙書鑲白旗蒙古都統五年五月 命在紫禁城騎  
馬六年五月 諭以烏爾圖納遜宣力多年行陣亦屬奮勉今年  
邁多病著加恩原品休致六月卒長子祥安襲雲騎尉三子祥慶  
蔭五品補太僕寺員外郎

右 國史館本傳

汪廷璵

乾隆四十有八年夏六月十有九日工部左侍郎持齋汪公卒春秋六十有六公素康強無疾是日黎明猶偕諸大臣入朝啟事畢入署蒞務如常還寓猶手一編初昏就寢少選呼之不應則已逝矣公之將誕也祖榮祿公夢紫衣僧持錫杖求宿及生狀貌如夢觀其恒化之際豈所謂夙根不昧得大自在者耶孤子編修學金扶襯南旋以明年某月日葬公於州城北二十四都琅港之原屬大昕爲文誌公之墓大昕初入館公已爲學士公忘分引進之嗣後講筵書幄皆獲隨公步武又同居西苑賜園有年知公行事爲詳謹按公諱廷璵字衡玉別號持齋世爲新安右族四世祖

始徙太倉後析州爲縣始占籍鎮洋焉曾祖壽堯祖溥父之恆種  
德蘊素積厚而光以公貴累 贈榮祿大夫妣皆一品夫人公幼  
而穎悟初補博士弟子員學使桐城張公廷璐奇其文曰它日名  
位不在吾下公初名璿張公易以今名且加廷字欲引爲昆弟行  
也辛酉舉鄉試丁卯考充咸安宮教習試卷進呈 欽定第一人  
並 諭閱卷大臣曰來科會元得如此文可矣戊辰會試中式  
殿試讀卷日公名在第五 天子親擢第三人及第授翰林院編  
修卽充會典續文獻通考兩館纂修官庚午充河南鄉試正考官  
辛未散館 御試一等壬申春 特開鄉會試恩科充湖南正考  
官復 命甫踰月 御試翰詹諸臣於正大光明殿以納涼賦爲

臆作者多規撫上林子虛鋪陳宮殿苑囿公獨以宵旰憂勤民事立言特擢一等一名超授侍講學士充日講起居注官又充會試同考官又充武會試副總裁官一歲之中恩命頻仍而公益以銳進爲思持重謙抑無幾微矜炫意癸酉充福建正考官事畢請假歸省二親尋奉命督學福建公訪知閩省多頂冒之弊由於童生眾多一縣或者數場遂有一人重疊與考以啟弊混公檄令每郡添設考棚併爲一場考之夜分卽起點名稽察嚴密此弊遂革丙子丁外艱回籍己卯服闋入都再奉督學福建之命時公需次補缺未與開列卽承簡用尋補侍讀學士讀學班在講學之右惟見任得轉補公以候缺得之亦異數也時功令初用

詩帖生童狃於土音匙諧律度公親爲講究聲病由是能詩者漸  
眾壬午冬任滿還 朝癸未 御試翰詹公列二等一名 特賜  
文綺二端尋擢少詹事甲申入直上書房侍 皇太子講席公謹  
慎嚴肅非禮不動開陳經義詞達意周是冬 賜紫貂裘一襲每  
歲終 賜御書福字及鹿尾黃羊冰魚文雉諸物首歲與宴重華  
宮慶和 天章則有如意端硯之 賜端午則有紗葛宮扇香囊  
立春進帖子則有絹紙湖筆硃墨 賜資便蕃歲以爲例乙酉充  
湖北正考官丙戌遷詹事再遷內閣學士兼禮部侍郎戊子奉  
命督學江西辛卯還 朝壬辰充會試副總裁官放榜後復扃門  
閱墨卷備取中書學正若干名所甄拔率多績學之士甲午教習

庶吉士丙申以金川平定奉 命之山東江南浙江祭告嶽鎮及  
先代陵寢禮成請假歸省時胡太夫人年逾八十神明不衰公衣  
錦稱觴門外列八駟鄉閭稱爲盛事丁酉充江西正考官未撤闈  
又奉督學順天之 命三輔密邇輦下歲時得與朝賀公屢蒙  
召對暇日仍至 上書房戊戌擢工部右侍郎仍畱學政之任時  
承德府初建 文廟兼設考棚公於 大駕避暑前趨往考試畢  
率生徒迎 駕翌日隨 駕詣 文廟行釋奠禮特被宮紗文綺  
之 賜熱河士子鄉試另編字號自此始其冬丁胡太夫人艱戴  
星南奔喪葬盡禮辛丑公子編修君登進士與公甲第恰同稽諸  
故事四百年來惟王文肅公與子緱山兩世皆第三人登第科名

盛事均在吾州海內所未有公在里門對賀客不色喜寓書編修  
以敦品飭行無忝科名未嘗稍有夸耀也壬寅入都仍署工部  
左侍郎入直上書房兼四庫全書總閱癸卯奉命如盛京恭送  
冊寶方諏吉啟行而公已長逝矣公平生持躬以謙接物以誠治  
家以儉服官以勤無輿馬服玩之好無絲竹宴遊之樂風度凝重  
言笑不苟自登上第歷官卿貳皆九重親擢不由援引向來翰  
詹御試首選不三四年已陟八座公爲學士十餘年再試優等  
始得序遷其安於平進如此久直禁近小心慎密退食之暇校勘  
圖史蕭然如諸生時性不妄交卽素相知形迹亦落落嘗曰聖人  
稱善交必曰久敬燕昵謹浪交道之媿也爲文以典重條暢爲主

不蹈纖穠艱澀之習主持文柄幾無虛歲同朝莫能及焉公初娶  
凌夫人文學□□之女繼娶王夫人壬戌進士兵部郎中廬州府  
知府成之女賢明善治家公得一心奉公無內顧憂者繫夫人之  
力子一人卽編修君由庚寅 恩科舉人授內閣中書協辦侍讀  
事辛丑進士及第授翰林院編修充四庫全書分校議敘遇缺開  
列先用女三人長許字項侗旄早卒次適顧增光季適錢東璧大  
昕長男也孫二人彥博甲辰 召試 欽賜舉人內閣中書彥國  
縣學生女一適陸受秩銘曰

泰山北斗眾所尊景星卿雲爲世珍維公巨手燕許胸羅三倉  
二酉文筆落堯典生民篇魏科直上鼇峯讀書中祕譽益振



九天給札集眾仙揮灑千言日未曛 御筆親擢第一人嘉爾規  
頌思不羣學士峻擢與命申校文棘闈玉尺掄先民圭臬分荆循  
其於視學尤精勤三物六行誨之諄屏除譁囂還樸清虎闈入直  
尊所聞規行矩步禮法遵經師人師並一身桓榮稽古榮則均宮  
端進秩參閣綸四庫甲乙預討論三館吉士教育殷冬官作貳卿  
月新程功執度法不愆廿載內直溫樹春一條冰掾頭銜勻玉堂  
才子宮花鮮科名接武嘉話傳年過六十髮未宣忽焉解脫返自  
然不朽何必非千年瓊港之水九曲蟠宰木鬱然吉且安昔聞下  
馬董相墳誰其嗣之平陽阡

右墓誌銘錢大昕撰

劉星焯

劉星焯江蘇武進人乾隆十三年進士改庶吉士十六年散館授編修十七年三月充順天鄉試同考官六月大考二等八月充會試同考官十八年七月充河南鄉試正考官十月遷侍講十九年四月充日講起居注官六月提督廣東學政二十一年奏肇慶府鶴山縣立縣之初有廣州府民一百五戶呈請修城入籍奏准應試易滋冒考之弊除已移注鶴山准其應試外餘必查有產業呈縣注明方准仍移知原籍以防重考其廬墓田糧在原籍不願遷者仍歸原籍應試從之是年丁母憂二十三年服闋二十四年正月補原官九月提督安徽學政二十五年轉侍讀奏歲科兩試

童生請兼試五音六韻排律詩一首詩文並優者列在前茅文可入教而詩律未諧者量爲節取並飭學官月課一體限韻課詩下部議行時福建學政汪廷瑣奏准將各省新進童生試卷同考列一等生員試卷解部磨勘星煒以童生試卷繁多若俱由塘馬遞送恐不便於郵政請將歲科試各項文冊照例隨本送部其生童各卷令學臣自備車腳專差承役解送 上允之二十六年遷左春坊左庶子尋升翰林院侍讀學士二十八年 大考二等二十年 命在上書房行走三十年正月擢內閣學士兼禮部侍郎銜九月遷禮部右侍郎三十一年九月充武會試正考官十月調工部右侍郎三十三年六月充江西鄉試正考官七月轉左侍郎

三十七年卒

右 國史館本傳

國朝書狀頁改刀編  
卷八十一 御製四十七

臣等謹將各省表冊  
卷之十九

聖

國朝耆獻類徵初編卷九十目錄

卿貳五十

蔡鴻業

顏希深

金簡 子縉布

趙鋐

德明

周於禮

譚尚忠

全魁

李綬

覺羅巴彥學

羅典

何逢儔

綽克托

同治元年庚子春正月十一日

國朝耆獻類徵初編卷九十

通奉大夫前署江西巡撫江西布政使司布政使湘陰李桓輯  
卿貳五十

蔡鴻業

蔡鴻業江蘇華亭人乾隆十三年進士以刑部主事用十九年升  
員外郎二十一年遷郎中二十六年三月擢廣東糧儲道二十七  
年授都察院左副都御史二十八年正月擢刑部右侍郎四月充  
殿試讀卷官三十年廣東總督楊廷璋巡撫明山奏參鴻業任糧  
道時失察家人舞弊鞫實革職三十一年起爲甘肅鞏秦階道三  
十二年擢按察使三十三年遷布政使三十四年奏新疆開闢以



來設有佐雜各官遴委調用似宜酌籌變通查烏魯木齊設同知  
通判各一人倉大使一人特訥格爾設縣丞一人呼圖壁迪化城  
二處各設巡檢一人伊犁設理事同知一人綏定惠遠二城各設  
巡檢一人皆係實缺五年任滿惟伊犁理事同知由欽差大臣奏  
派其丞倅以下各官例於甘省佐雜內遴調第甘省無多佐雜每  
遇新疆缺出求其入地相宜品級合例者甚難其人定例署職各  
官按銜缺大小分別試用一二年果能稱職該督撫保題實授又  
銜大缺小者准其借補照原銜升轉等語是內地佐貳雜職原可  
通融借補新疆員缺緊要尤宜慎選賢能不拘品級應請嗣後凡  
遇新疆缺出除同知通判及雜職品級相當者照例調任外其縣

丞以下僅一時無合例之員而其人實係練達有爲卽銜小缺大亦准借署至俸滿優敘仍照原銜升轉庶要地得人而升轉亦不至越級再查伊犁開展烏什塔爾巴哈臺葉爾羌喀什噶爾庫車喀喇沙爾庫爾喀拉烏蘇等處辦理糧餉由陝甘佐雜內派往乾隆二十七年經駐劄大臣阿桂奏請此項官員如果行走勤勉三年期滿照苗疆例保題以應升之缺升用奉 旨准行在案查新疆實缺人員定以五年而派往人員僅止三年爲期久暫似未盡一請嗣後派往新疆各員亦照實缺之例定以五年更換果能於五年中勤慎辦公該管大臣一體保題升用庶調任者可得勝任之員而派往者亦倍加奮勉於要地似有裨益部議如所請又奏

甘省地土磽瘠民無蓋藏每歲籽種口糧皆仰給於官倉但借領  
官糧有非本地所產色樣不一民間隨宜種植每屆徵收若令賣  
易交官每多觀望歷任督臣奏請抵色交收奉 旨允行第各督  
臣止就一年中情形通融辦理並未請爲定例查通省田禾色樣  
互異到處皆然請嗣後民借糧石祇論原借色樣一律徵收至一  
米二穀向來定例如原借小麥等項願以糜粟等多納者准以一  
穀抵交一米或原借係屬糜粟願以小麥等交納者准以一石抵  
交二石既不礙於收支小民亦易輸納下陝甘總督議行三十五  
年丁父憂三十七年服闋四十二年卒

右 國史館本傳

顏希深

顏希深廣東連平州人由貢生捐同知乾隆十四年選授山西太原府同知十七年遷山東泰安府知府二十五年調濟南府遷山東督糧道二十七年五月遷四川按察使入 覲 諭曰顏希深母年老尙欲隨任赴川伊亦不敢奏請改補近地母子俱知大義情實可嘉轉用惻然顏希深著調補江西按察使十二月疏請卓薦保舉赴部引 見人員照各省路程定限逾者查議部議 從之又奏言江西考覈運滿守備千總由糧道山東則由藩司五年軍政江西衛所守備千總糧道與藩司各出考語冊送漕撫二臣山東惟運糧千總歸糧道出考衛守備俱歸藩司辦理臣思衛所

千總守備所司僉丁押運監造諸事悉糧道專管稽察最爲切近  
藩司衙門衙弁交涉事少請嗣後俱照江西例辦理部議運弁甄  
別藩司會同糧道考覈五年軍政如希深請他省均視此得旨  
允行二十八年六月疏言正六八等月例不行刑但接奉決囚部  
文轉行甚急若至州縣適當正六八等月勢必停畱匝月州縣衙  
署逼近監獄釘封文到闕動耳目恐致疎脫臣思臬司爲刑名總  
匯州縣道里按籍可稽請嗣後臬司奉到部文計出停刑日期專  
差馳遞到日州縣可卽奉行下部議行十月遷福建布政使疏請  
督撫二司交事俱由驛遞上責之三十二年正月調江西布政  
使二月丁母憂三十四年服闋仍授江西布政使三十五年十月

奏各省鄉試外簾例設受卷彌封謄錄對讀掌卷五所調用州縣  
官十餘員撤棘始出州縣官身膺民社八九月間正值徵收漕糧  
請嗣後所管事竣陸續出闈回任下部議行三十六年丁父憂三  
十八年九月服闋來京 命馳往四川角木交一路同鄂寶辦理  
糧務十二月補河南布政使仍畱軍營三十九年二月疏言木池  
糧臺因限於山勢營盤不能與糧臺毗連實存駐守兵四十名臣  
札商參贊舒常添撥五十名將糧臺山地開平安營防護其後路  
各營臣會同黃巖鎮臣李時擴曉諭官兵畱心守禦督將備官操  
演不但技藝熟練而槍聲遠近相聞亦可牽控賊勢 上深嘉之  
四月疏言軍報最忌洩漏律有鋪司拆動原封之條該管官無處

分明文懇 敕部嚴定處分報 可五月疏言綽斯甲布偏近賊  
境糧運緊要前奉 諭旨令習練夫役持械防護臣見操演兵夫  
飭糧員置戈矛令壯夫結隊護運使賊無從窺伺又疏言角木交  
一帶密箐深林賊借以藏身臣飭斬伐林木使附近賊礪有徑可  
通處毫無遮蔽所伐木周布夫役柵房安柵借備竊發其呀哨周  
叟等站亦一體辦理兩疏入 上嘉之六月 賞戴花翎時木池  
站不戒於火燬火藥五萬一千餘斤希深具疏請罪並請與鎮臣  
李時擴等分賠四十二年二月擢湖南巡撫六月奏湖南正佐各  
官多調署別缺更有苗疆人員亦署內地缺吏目典史例不出差  
湖南則屢差委更替見俱查明釐正以專責成 上是之八月奏

請於省城設普濟堂收養老民四十三年三月遷兵部右侍郎四十四年轉左四十五年二月署貴州巡撫三月調署雲南巡撫四月署貴州巡撫七月卒

右 國史館本傳





金簡 子繼布

金簡內務府漢軍正黃旗人原任武備院卿三保之子由筆帖式於乾隆十五年升內務府主事十六年升員外郎三十年升郎中三十五年升奉宸苑卿三十七年授總管內務府大臣三十八年三月 命辦武英殿監刻各事宜十二月充四庫全書處副總裁三十九年升戶部右侍郎管理錢法堂旋授鑲黃旗漢軍副都統賞戴花翎四十年四月奏京局鼓鑄每年七十五卯錢九十三萬七千三百五十千除支用外每年餘二萬餘千加以節年餘存連閏扣至年底除預支放次年正月分餉錢外尚餘錢十萬餘千卽遇閏儘可將餘錢抵放請裁去閏月四卯俾餘錢得歸實用報

允四十二年調戶部左侍郎四十三年閏六月 命辦四庫全書彙要八月署工部尙書十月盛京將軍弘昉奏盤查庫項虧短命金簡前往會查奏平允庫項共短銀一萬四千九百餘兩訊明前署關防拉薩禮及見任關防彝倫更換口袋偷竊銀兩並樓軍等進庫零星竊銀諸弊實拉薩禮彝倫於法餘分別定罪有差十二月奏請酌定盛京銀庫章程一支放俸餉應令正副關防先將數目報明將軍戶部兩衙門每年十月將軍會同侍郎盤查一次咨在京戶部存案一副關防等進京請領三省俸餉運回車價向於領出銀內提用報明在京戶部尙書轉咨請嗣後運腳由部支領作正開銷毋得提用滋弊一開庫收支應於各樓軍出庫時

切實搜檢一庫內各官應量予養廉並約定辦公經費在餘平項  
下開銷一銀庫事務請令將軍兼管部議如所請四十四年上  
以四庫館總裁金簡無閱書之責令專司考覈督催事務四十五  
年三月轉補戶部右侍郎仍管錢法堂四十六年命總理工部  
事務十月奏臣奉命改釋道金元三史人地官名以次分帙呈  
進請將欽定三史國語解重加編次刊於原史之前並請御  
製序文冠首報允四十八年四月京察加一級七月擢工部尙  
書旋授鑲黃旗漢軍都統十二月命紫禁城騎馬四十九年三  
月奏盧溝橋據永定河上游水自石景山發源每屆河流盛漲直  
趨橋下勢甚浩瀚橋孔十一惟偏東三孔尙有淺流餘皆淤涸擬

於中泓五孔量加挑挖以期宣洩仍請三四年疏濬一次歸入永定河歲修案內一體辦理得 旨俞允五十年正月與千叟宴三月四庫全書告成議敘加二級又承辦辟雍告成議敘加一級是月 諭修葺明陵派金簡董率經理尋奏馳赴昌平徧閱明陵明樓享殿宮門配廡並多坍塌應一體修葺查諸陵惟思陵規制頗狹似應加築月臺並將原建享殿改造五間宮門改造三間用彰恩施優渥奏入如所議行五十一年京察議敘加一級五十二年二月湖廣總督舒常奏新選湖北宜昌府知府曹沂不勝外任命將保送不愼之工部堂官交部議處部議降調得 旨從寬畱任五十四年二月京察議敘加一級三月工部保列京察一等

並無漢員 上以有失公允交部察議部議降畱五十五年四月  
巡視通州漕務御史五泰奏通州生員苑惟新因胞弟秉鈞見充  
坐糧廳水腳頭役應領雇夫銀該廳扣多領少經承祝墉等侵漁  
舞弊 命偕侍郎蔣賜棨赴審尋奏審明所扣銀兩係歸還墊項  
俱有著落礙惟新衣頂擬罪如律五十六年六月因編入漢軍之  
安南黎維祈聽信屬人黃益曉等唆使稟請歸國 命金簡查明  
辦理尋奏除黃益曉外尙有不冒領餉隨同告歸之黎光霽等請  
分別發遣以示懲創報 聞五十七年調吏部尙書五十八年七  
月 上以金簡奏英吉利貢使到京將貢品安設正大光明殿並  
派西洋人修理鐘表不將如何安設放法分晰具奏飭之五十九

年十二月卒 諭曰吏部尙書金簡供職年久勤慎小心前因患病不時遣侍衛等往視並派御醫診治 賜人蔘一斤俾資培補以冀速痊茲聞溘逝殊爲軫惜賞給陀羅經被以爲飾終令典並派令皇孫繇勲帶同侍衛十員前往奠醊所有應得卹典著該部察例具奏尋 賜祭葬如例諡勤恪子縕布見任工部尙書

右 國史館本傳

縕布

縕布內務府漢軍正黃旗人父金簡官至吏部尙書自有傳嘉慶四年奉 旨入滿洲正黃旗並 賜姓金佳氏於乾隆二十九年由拜唐阿擢藍翎侍衛三十七年授護軍參領四十年擢護軍統

額四十八年授秦甯鎮總兵兼管內務府大臣四十九年奏言  
陵寢風水外圍一百五十七里原設二十四汛經總兵黃大謀奏  
請添設九汛每汛建房四間自屬益加周密但每汛舊有兵房二  
間已敷弁兵栖止其新添九汛亦照舊式每汛止建兵房二間所  
有原請添設汛房八十四間應請減蓋六十六間以期工歸實用  
下部議行六十年授總管內務府大臣來京供職嘉慶二年七月  
授鑲紅旗漢軍副都統十月以監修 乾清宮工程辦理妥速  
上嘉之交部議敘四年正月管理奉宸苑造辦處事務調正藍旗  
滿洲副都統二月擢工部侍郎充武英殿總裁官 賜紫禁城內  
騎馬五月 賞戴花翎奏請添設養育兵丁先動正項給餉再於



直隸旗租內歸款奏入經部議駁 諭曰國家定八旗內務府兵

制經費有常原不得意爲增益緝布於具奏後並不靜候覈擬輒於他事召對時兩次懇請降旨特准必欲卽行其言緝布視朕爲何如主而敢以此等伎倆嘗試乎若所言果當朕於披覽時卽可允准又何必交議縱使交議後部臣等議駁朕亦可特俞所請在部臣等原不得操准駁之權又豈有伊面懇之理乎緝布例外乞恩爲一己沽名之地著交部議處七月因內務府呈遞清字摺內 孝聖憲皇后徽號繕寫錯誤奉 旨革去總管內務府大臣並工部侍郎正藍旗滿洲副都統拔去花翎仍 恩賞四品頂帶留佐領職在造辦處司員上行走十月授正紅旗蒙古副都統十一

月 諭曰縕布於書寫 徽號錯誤祇係未經看出尙無別項獲  
咎實蹟著加恩仍授總管內務府大臣並管理三山及暢春園事  
務十二月仍 賜紫禁城內騎馬五年二月授兵部右侍郎調正  
紅旗漢軍副都統管理織染局事務三月調鑲紅旗滿洲副都統  
閏四月轉左侍郎管理茶膳房雍和宮事務五月 賞戴花翎六  
年擢工部尙書授鑲紅旗漢軍都統十二月 諭曰縕布之父金  
簡曾賞給黑狐端罩一件縕布亦著加恩准其服用七年管理太  
醫院 御藥房事務七月因承辦 孝淑皇后奉安事儀會奏摺  
內措詞不經 上以縕布所管事務較多近來多病精神不能周  
到所有伊管理之茶膳房暢春園太醫院 御藥房織染局等處

事務俱毋庸管理仍帶革職畱任八年充文淵閣提舉閣事十月  
以萬年吉地工程堅固交部議敘尋諭曰緼布雖未經手工  
程但管理時日較久著加一級從前降革畱任之案著該部查照  
抵銷十二月署戶部三庫事務九年六月署戶部尚書兼崇文門  
副監督十一年五月清漪園官物被竊事覺交部議處部議上  
得旨降二級從寬畱任七月因失察匪徒潘玉毆母案上以  
此等兇悖之徒何以挑在內廷應役交部議處尋奉旨加恩降  
一級畱任七月管理織染局事務十三年四月命閣庶吉士散  
館試卷聽宣遲到諭曰緼布既經開列閱卷卽應早至聽宣乃  
仍照常入直遲逾多時實非敬事之道伊近日精力衰頹著退出

內務府大臣毋庸交部議處卽令在城專辦本管該部事務七月  
因清夏齋滲漏工程未能堅固交部嚴加議處尋奉 旨降四級  
從寬畱任十四年六月以病 賞假尋卒孫善甯承襲世管佐領  
右 國史館本傳



趙鏞

趙鏞正黃旗漢軍人由蒙古隨印外郎中式乾隆庚午科繙譯舉人十八年授戶部筆帖式旋授內閣中書二十七年授內閣典籍二十八年授內閣侍讀二十九年授公中佐領三十二年授兵部郎中旋授河南道監察御史疏言近來在京各衙門來往文移俱不填寫日期恐吏役人等不免有稽畱改移之弊吏兵二部銓選裁缺等事尤關緊要不可不剔除弊竇以昭慎重並請嗣後各部院八旗都統衙門一應文移俱填日期其有不填日期及收到文書之衙門代填者許科道等查參 上是其言如所議行三十四年二月疏言通州西倉堆積木料甄瓦甚多查係乾隆二十九年

經查倉王大臣等奏准拆空廠四十九座交內務府工程陸續應用所贖伏思倉廠重地甄瓦久貯尙屬無妨若木植久堆恐雨水淋漓益增黻爛且在倉內火燭堪虞仰懇 聖恩飭下內務府令該承拆廢廠監督等揀其尙可應用者卽行運用外其黻爛者速令變價入官庶物歸實用而倉廠亦復肅清矣 上命三和英廉查奏辦理三十七年補戶科給事中四十年補戶科掌印給事中四十二年奉 上諭給事中趙鏐所譯經文甚好著加恩在經館提調上行走四十五年擢鴻臚寺卿旋授通政使司副使四十七年擢通政使四十八年奉 上諭見在滿洲內閣學士出有二缺趙鏐本係漢軍向來滿洲員缺俱可補用且其繙譯亦好在館效

力有年卽著補授一缺尋調漢內閣學士四十九年補鑲紅旗漢軍副都統五十一年擢工部右侍郎五十二年轉左侍郎五十三  
年調兵部右侍郎五十五年轉左侍郎五十八年以武舉弓力不符降三級畱任嘉慶二年失察庫貯被盜降一級畱任是年八月  
奉 旨賞戴花翎三年七月病卒

右 國史館本傳



國朝書局刻本  
卷九十一  
三

德明

德明正藍旗滿洲人溫都氏乾隆十六年由官學生補庫使二十五年補兵部筆帖式旋擢太常寺贊禮郎二十八年兼顏料庫司庫三十三年擢太常寺寺丞三十六年超擢太常寺少卿三十八年遷禮部右侍郎仍管太常寺事三十九年署鑲白旗滿洲副都統四十年兼公中佐領四十一年二月緣贊禮錯誤罷任仍在贊禮郎上行走五月諭曰德明既派爲贊禮郎著照喜起舞大臣例贊禮時令戴二品翎頂四十二年復授太常寺少卿四十三年晉太常寺卿尋兼公中佐領四十四年三月遷內閣學士仍管太常寺事十二月授鑲白旗漢軍副都統四十五年再任禮部右侍

郎仍管太常寺事四十七年兼管樂部事務四十八年二月調鑲  
藍旗滿洲副都統十一月充經筵講官五十年監督左翼稅務五  
十四年轉左侍郎五十六年調吏部右侍郎五十七年正月轉左  
侍郎七月復監督左翼稅務五十八年三月晉禮部尙書尋兼鑲  
藍旗漢軍都統五月稽察左翼宗學五十九年四月調正紅旗滿  
洲都統兼管鴻臚寺事十一月奏鴻臚寺額設鳴贊十四員遇給  
假事故人數不敷請照太常寺設學習贊禮郎例添設鴻臚寺學  
習鳴贊四缺恭逢 大典不但人數敷用遇缺更得熟手充補得  
旨允行六十年調正紅旗漢軍都統 賜紫禁城騎馬晉太子  
少保十月奏參朝鮮齋咨官李光稷赴前派往朝鮮正使副都統

張承勳宅投稟有干例禁請 敕部行文該國王嚴飭約束嘉慶  
五年二月禮部奏清明致祭禮開列名單直書 皇子名於禮制  
未協奉 旨察議德明自請 召見並陳前辦成案 上免部臣  
議以德明違 旨奏請獨見又於呈遞事件不照例交奏事官員  
擅進乾清門自行呈遞交部議處尋議革職 恩旨改革職畱任  
是年七月卒 諭曰禮部尙書德明熟諳典禮小心勤慎贊引  
皇考行禮多年我 皇考壽躋上晝凡遇親行鉅典所有一切儀  
注德明能仰體 聖意斟酌協宜諸臻妥善朕親政後俾伊經理  
大事儀文恪勤匪懈上年曾特加太子少保銜以示優眷其精力  
尙強正資倚任今因病溘逝殊爲軫惜德明著加恩晉贈太子太

保遣散秩大臣繇勲帶領侍衛十員前往奠醊其任內降革處分俱著開復應得卹典仍著各衙門具奏 賜祭葬如例諡曰恪勤子和爾僧額見官吏部員外郎

右 國史館本傳

周於禮

周於禮字立崖號亦園雲南嶠人乾隆十六年辛未進士官大理寺少卿書法東坡有敦彝堂集

右傳略吳修撰

少卿性耽吟詠又嗜書法爲侍御時暇輒行琉璃廠書肆見有佳者隨時售之宋元石刻既多真蹟尤不少取褚顏蔡蘇黃米六家先勒於石旋以疾終所居聽雨樓在繩匠胡同爲明嚴介溪別墅國初徐健庵尙書居之繼歸於溧陽史文靖公其後分爲數處畢君秋帆得之爲燕會觴詠之地及秋帆出爲觀察遂歸少卿迄今三十年是樓不知誰屬石刻亦無可攷

右湖海詩傳張維屏錄

公性明敏決獄必準情法多所平反虛心易氣不執己見在諫垣時言皆持大體文章簡質有法度

滇南詩略

周廷尉立崖借諸名士小飲屏閒有畫碧桃白頭翁一幅爲題賦詩眾苦綴合不易立崖先成落句云蟠桃合有三千歲青鳥飛來也白頭座客歎服

炙硯瑣談

右正雅集苻葆森錄

按周公一字按遠著有聽雨樓集

譚尙忠

譚尙忠江西南豐人由乾隆十六年進士分發戶部學習十九年期滿奏畱補主事二十三年升員外郎二十四年京察一等記名二十五年記名御史旋升郎中二十六年授御史仍兼戶部行走二十七年授福建興泉永道二十九年以廈門洋行陋規案內爲總督楊廷璋貼墊買物銀兩部議革職得旨送部引見以員外郎用三十年補刑部員外郎三十四年授廣東高廉道三十五年九月擢河南按察使三十八年調廣東按察使丁父憂回籍四十年接丁繼母憂四十二年服闋四十三年正月補甘肅按察使七月擢山西布政使四十四年六月撫臣巴延三奏有匿名揭告



高平縣民任天祥等傳習白蓮教者當委尙忠馳詣確查實係良民毫無不法形跡仍將該犯等押帶省城候訊 諭曰匿名揭帖出於挾仇陷害者居多本有立案不行之例今任天祥等各家經譚尙忠查明實係被人誣陷復又押帶來省其意何居若如此辦事則凡溫飽良民一經奸徒捏陷雖審明誣屈仍不免拘解往來卽事後得釋其人已傾家蕩產矣徒使善良受累無窮而奸匪轉得逞其私願錯謬不太甚乎任天祥等著卽行釋放並查明各家赴省往回川費令譚尙忠三倍罰出以示薄懲十二月護理巡撫印務四十五年正月卸事回任四十六年二月以前在廣東臬司任內失察沙灣菱塘盜案部議降二級調用得 旨從寬改爲降

四級畱任五月 恩詔開復十一月擢山西巡撫四十七年正月  
奏晉省寶晉局秤餘鉛錫僅存六百五十餘斤請於正項搭鑄錢  
文俟下次採買清還以資調濟又奏甘省冒賑案內籍隸晉省各  
員在任時捐納監生及官職之子弟郭昌泰等請一併斥革俱報  
問是月調安徽巡撫五月奏已故貢生方芬所著濤浣亭集詩  
語多狂悖請從重辦理 諭曰方芬不過書生遭際兵火遷移逃  
避爲不平之鳴並非公然毀謗本朝者可比若卽坐以大逆則如  
杜甫詩中窮愁之語最多卽孟浩然亦有不才明主棄之句豈得  
謂之狂悖乎此等失意之人在草澤中私自嘯詠者甚多若必一  
一吹求繩以法律則詩以言志反使人人自危將何所措其手足

朕凡事不爲己甚豈肯於語言文字遇事推求各督撫其仰體朕  
意六月劾奏亳州知州楊旸迪拏獲豫省混元邪教不卽嚴究黨  
與冒昧解赴豫省請 旨革職 從之是月吏部奏參選授江蘇  
沛縣知縣吳對告假回安徽本籍因沛縣被水託病在籍呈請咨  
部開缺顯係規避災區請 旨革職 諭曰吳對規避災區著從  
重改發烏魯木齊以爲昧良者戒吏部辦理此案甚屬公當並非  
堂官攬權故示風勵者可比國家綱紀肅清部院臣工儻有挾私  
蒙混舉劾不公者斷不能逃朕洞鑒吳對規避顯而易見譚尙忠  
如將該員立行奏參朕必嘉其公正乃視爲尋常事件全不留心  
體察卽此一端已不勝巡撫之任著卽加恩降補福建按察使以

觀後效四十八年二月以秋審失出降三級畱任四十九年正月  
署布政使四月回本任十一月升雲南布政使五十二年閏七月擢  
雲南巡撫十月署雲貴總督十二月回本任五十二年三月奏開  
化府屬之三家廠銀礦見開槽硎十口惟一出口出礦較旺餘俱無  
可開採請每年以一千五百兩爲額課徵解藩庫充餉仍飭廠員  
覈實妥辦不得因已經定額稍萌欺隱又奏滇省題銷考棚經費  
以歲科四試爲限計需六年之久學政已易其二展轉遲逾非慎  
重公項之道請嗣後九棚考試於每棚事竣一月內將用過經費  
造冊送司彙報題銷六月奏滇省自乾隆二十年與粵省銅鹽互  
易以來遞年積壓銅本未歸款者九十萬有奇請自本年爲始將

粵省之鹽停運三年俟銅本歸清再行奏請至粵省需銅仍令該省官員辦運先後下部議行四月奏審明訪獲藩司革書顧麟向結黔人章煥崔升等偽造巡撫印信假冒撫署官親局騙未經中式之開化武生傅殿揚得贓八百餘兩請將顧麟卽行正法章煥等發煙瘴充軍 從之八月劾奏署鶴慶州事恩安縣知縣韓培政務廢弛詞訟延擱請 旨革職報 聞十一月劾奏通海縣知縣徐維城私設馬櫃房徵收騾馬稅錢累民肥己請革職審訊尋審明將徐維城從重發烏魯木齊效力贖罪以爲藐法營私者戒 從之又劾奏前任祿勸縣知縣檀萃虧缺廠銅請 旨革審諭曰該省銅務甫經清理趕復原限該廠員等自應從此年清年

款毋致再有遲逾乃前任祿勸縣知縣檀萃虧銅至一萬五千斤之多以致不能按期撥運若似此積壓遲延必致復誤原限又須大加整飭該管督撫司道等平日所司何事不可不嚴行懲治除交部分別議處嚴議外所有此項虧缺銅斤如該參員力不能賠卽著該管知府分賠一分司道督撫分賠一分尋議奪俸一年五十三年正月劾奏疎縱越獄劫盜張禧等五名之永北經歷曾守約革職拏問署永北同知彝良州同徐挺革職五十四年四月劾奏開化府同知萬廷石迂庸不職請勒令休致閏五月劾奏署賓川州知州羅平州知州陶棻估變原任江蘇豐縣知縣胡甯家產三千七百餘兩屢催不解離任又無存庫移交請 旨革職先後

報 聞又奏通海等五州縣連次地震請照乾隆二十八年江川等縣之例分別賑恤得 旨允行是月奏請 陛見時提督烏大經亦請來京 諭曰滇省地處邊陲最關緊要督撫提督大員不可輕離譚尙忠可俟烏大經回滇再行起程進京七月劾奏祿勸縣知縣袁筠欠解鹽課薪水等銀四十二萬六千餘兩上年借發各井薪銀三十七萬四千五百餘兩又六萬九千八百餘兩俱照數於一年之內徵解全完得 旨嘉獎五十五年三月 上因川省錢法敝壞飭陝楚滇黔一體嚴查尙忠覆奏請將字跡稍清輪郭完整者以二文作局錢一文行使仍嚴飭各廠不得偷漏銅鉛以清私鑄之源得 旨祇可如此辦理去其已甚可也四月劾奏

狼鹽竈戶以硝石攙和鹽斤提舉方潤漫無覺察請於竈戶遣罪  
上減一等擬以滿徒 從之六月奏滇省清釐錢法視報繳錢數  
之多寡搜獲私鑄之有無以定各屬員功過數年以來通計收過  
小錢不下數十萬金隨時交局改鑄制錢還款見在市用小錢實  
已減少仍督令各廠訪偷漏者毋得始勤終怠報 聞五十六年  
三月奏各屬收繳小錢與其運省改鑄多糜腳費莫若於適中處  
所就近銷燬改鑄大錢較爲便捷 諭曰上年孫士毅奏川省地  
方閒有機和小錢之弊請定價收買銷燬節經降旨通諭各督撫  
一體收買查禁乃奏行未久江蘇江西二省仍有收藏小錢之事  
經長麟等嚴摺懲治可見小民趨利若鶩地方官又不認真查辦



或局錢不能如式以致奸民隱射積習難除是收買小錢不特有名無實更恐弊益滋弊蓋奸民恃有官買之例紛紛呈繳卽將所易之大錢私行銷燬輾轉更換希圖獲利官局不肖書吏或將收買小錢復行轉售弊中生弊而小錢終無淨盡之時卽定例禁嚴亦復何益試思小民私用小錢已干法紀今旣宥其應得之罪祇令將小錢呈繳已屬格外加恩又何必將大錢換給致滋弊竇乎嗣後著督撫轉飭地方官出示曉諭再行酌量勒限令民間將所有之小錢就近赴官呈繳免其治罪不必換給大錢若此次告誡之後仍復私自收藏攙雜使用一經查出卽按律懲處決不再爲寬貸如地方官奉行不實唯該督撫是問此弊各省皆所不免而

雲南尤甚富綱當與譚尙忠上緊嚴查實心整頓以清弊源七月  
奏雲南見止省局二十鑪東川局十鑪較前所設鑪座僅存四分  
之一其匠役既少防範易周自屢經查辦以來滇省局錢實係一  
律整齊分兩足數與民間私鑄小錢迥別省城及附近各屬俱已  
行使局錢惟離省較遠處所小錢未能收繳淨盡然亦多係體質  
完整堪以行使之錢見飭各屬徧行出示勒限收繳並與四川督  
臣札會將昭通一帶兩省接壤山深箐密之區一體派員嚴密查  
拏務使奸徒無所托足得 旨此事屢有旨詳酌妥爲之是月藩  
司費淳奏請給價收買商銅以杜私鑄 諭曰銅斤爲民間動用  
必需之物若將各廠餘銅槩禁商民售賣則民間所用之銅從何

而後出銅價因此昂貴必致將官錢私燬改鑄銅器卽錢價亦必因之倍增富綱譚尙忠久任滇省於銅務自所熟悉著伊二人悉心妥議據實覆奏想該督撫意亦與朕大略相同也十月覆奏滇省各廠餘銅向俱給價歸官收買以供京外局鑄嗣蒙 皇上軫念商民施恩逾格准令廠民於辦獲銅斤內分別以一成二成通商旣以調劑鑪力更裨民間動用 聖謨深遠無微不至是以歷年商民踊躍歲獲銅斤日臻充裕實屬千載一時今藩司費滄奏請通商銅斤悉歸官買固爲防杜私鑄充裕官銅起見不知銅斤爲民間必需之物無論外省器用半資滇產卽滇省沿邊一帶夷人習尙皆用銅鍋銅罐以供炊爨若將商銅悉歸官買於民夷器用

既多未使而不法之徒冀圖漁利必致銷燬官錢改鑄銅器因之  
錢價增昂恭讀 諭旨至聖至明倍深敬服奏入報 聞五十七  
年間四月滇民那耀宗在步軍統領衙門呈控伊兒那顯宗謀占  
家產誣爲朱亦甫之子歷控院司不卽審辦 欽派刑部侍郎姜  
晟前往會審訊明實係虛誣照例發遣遠充軍 從之八月奏三  
家廠地方銀礦廠砂衰竭無可抽收請卽行封閉所欠額課應令  
經管各員按數分賠得 旨允行五十八年三月授刑部右侍郎  
六十年六月充湖北正考官二月以任雲南巡撫時於錢法銅務  
不能實力整頓罰交巡撫養廉銀三萬兩嘉慶元年與千叟宴六  
月調吏部右侍郎兼攝 行在刑部印鑰二年八月轉左侍郎十

一月二十八日卒六年五月奉旨入祀鄉賢祠子光祿正二品  
詹生籤掣刑部主事光祐四川通判光祥癸丑進士改庶吉士見  
任湖北施南府知府

右 國史館本傳

嘉慶二年十一月二十八日吏部左侍郎譚公以疾卒於位年七十有四諸孤既以喪歸葬於南豐某山之原越十年以狀來請於用光曰先大夫銘幽之文久未備非敢緩也未得其人也親故知吾家世者莫子若又素習爲銘章其不可以辭嗚呼公吾父執也其曷敢以不文辭按狀公諱尙忠字古愚姓譚氏南豐人也明永樂中工科給事中青是爲公十五世祖曾祖某祖某父某皆以公

贈榮祿大夫妣皆 贈一品夫人贈公生子四人而公居長乾隆十六年成進士由戶部主事歷員外郎郎中改監察御史出爲福建興泉永道緣事奪職旋授刑部員外郎復出爲廣東高廉道擢河南按察使丁贈公憂又丁繼母符夫人憂服除授甘肅按察使遷山西布政使擢山西巡撫調安徽巡撫復緣事降爲福建按察使再起爲雲南布政使擢雲南巡撫入爲刑部右侍郎公爲人質實剛毅而明敏居官任事事舉而未嘗以才見及其有所可否斷斷不稍假借入居郎署出履封疆廉介以自守而惠澤播於民高宗嘗以他事治寶泉局積弊因得公前爲戶部員外主局時無私狀故公由福建罷職而命爲刑官其在甘肅值捐監例以銀

折糧守土者因緣爲奸公不詭隨於眾故監糧之獄興而公名益顯其在山西奏免富民充商派辦洋銅之弊而令以五年採買之費交鋪戶生息而官爲買銅由是富民得保聚其家而鼓鑄之銅益裕又嘗欲以山西鹽課歸於地丁而免富民充商之累未及行其後渭南蔣侍郎兆奎巡撫山西卒成之其在雲南定鑄錢輕重悉依銀一兩易錢一千舊制令以私錢作廢銅以廢銅七斤易制錢一千而嚴緝其犯法者由是私錢一空民大便之讞獄決囚務得其實命屬吏毋遲於聽斷而有所疑者與大吏爭必平反乃已

高宗稔知公乙卯旣命公主湖北鄉試旋調爲吏部左侍郎嘉慶二年與千叟宴 御賜如意竹杖各珍物公配湯夫人有賢德

先公卒得年六十八生子男子三人繼室朱夫人皆封一品夫人後公卒得年四十九生子男子四人其卒也皆以耐子長光祿監生先卒次光祿成安縣知縣次光祿刑部主事湯夫人出次光祿祥癸丑進士禮部儀制司郎中次光祿四川夔州府通判次大官太官礪朱夫人出女三湯夫人出者二朱夫人出者一皆適名族孫幾人朝賀某科舉人爲某縣知縣朝□某科舉人南豐居萬山中山川雄厚人謂生其間者類多碩人長德蓋自李恭毅公湖歿後人皆以屬望公公於詩文字無弗善所訓戒諸子語及爲人作行楷書人爭傳述之用光幼時嘗見公至吾家竊驚異其狀貌公卒爲名臣矣用光不足盡知公而以所見聞審者述之爲銘銘曰



顯允譚公受知 高宗本其誠樸以奮厥庸闡粵海疆訟焚盜桀  
孰草雉之公以根拔繩繩負檐匪盜繫氓時其寬猛關無滯行孤  
兒懷橘送公道左冤雪覆盆謂公生我再躡而升終撫滇疆法十  
六條肅我戎行豐頤修髯目光如漆款關南蠻望公屏息推其友  
愛以爲睦嫺顧視公家依然清貧我 皇知公股肱方寄一疾不  
瘳羣士愴喟鄉邦之望 兩朝之知我銘幽宅以示來茲

右墓誌銘陳用光撰

公諱尚忠字因夏南豐譚氏其先世多聞人矣及公成乾隆辛未  
科進士授戶部主事三徙爲山西道監察御史出爲福建興泉道  
又入爲刑部員外郎再出爲廣東高廉道三遷至安徽巡撫降福

建按察使再遷至雲南巡撫入爲刑部右侍郎調吏部左侍郎嘉慶二年十一月二十八日薨於位公之在戶部也嘗司寶泉局及高宗純皇帝察局中事惟公無纖毫私染在興泉時以洋行事例降官而上又察知其不汙故復進用其在封疆爲大吏室中澹如寒士遇屬員甚有禮藹然親也獨不能少入之以財利天下論吏清儉者必舉譚公爲首然公遇事奮發則執誼不可回其爲安徽巡撫以忤和珅致降爲福建按察使在福建復屢以事與督撫爭至督撫同官事尤相牽而爲撫者每委曲以就督公在雲南獨能持正裁之且謂曰公自爲其德吾自任其怨可也其丰采峻厲如此故公雖和平廉潔而非煦煦曲謹者也其教子有曰人當

先約其身身約則心約心約則事不踰閑然後可以擴充爲有本  
之事功矣故公所至興利去害必究其原委曲折之盡則斷然行  
之使所莅必蒙其澤而後已去則民多涕泣送之 高宗純皇帝  
嘗稱爲正人可任事 今上亦絕重之而公遽歿矣公在安徽姚  
誦主敬敷書院時接談譙食設五器而情厚有餘及聞公薨而悲  
今又十年矣公子光祥以庶吉士改禮部主事自京師移書至曰  
先公旣葬矣而碑未立某夙奉公教宜爲文至其家世及夫人子  
姓之詳則編修陳用光誌之矣故不具銘曰

公居士林文學惜惜接物以情不爲阻深秉節當官蔑敢私干進  
者宜之退者弗怨歷邇及遐隴坻海嶠攘扶奸蠹鼙鼓樂晚爲

侍從公望在眾殂未及登刊石載頌

右神道碑銘姚鼐撰

粵東百餘年來大吏遺愛在民而去思最深者莫如李恭毅公湖  
次則譚公尙忠譚公爲按察嚴治盜賊尤加意懲治匪徒之害民  
者訪拏確實卽以重枷枷斃於是匪徒斂跡而良民感恩蓋粵東  
之患莫甚於盜賊然其始不過凶頑之徒耳彼習見犯法者未必  
卽罹於法也乃無所畏矣卽罹於法而罪名不至死不過軍耳流  
耳彼又習見軍流之犯往往脫逃而歸也乃益無所畏矣至於無  
所畏而糾眾行劫擄人索贖放火搶奪諸惡皆作而鄉民受其毒  
害有吞聲飲泣而莫敢控告者譚公重枷之法行速而眾著使匪

徒皆知凶橫者旬日之間可枷斃也庶幾聞風而知畏耳故大吏不必求爲民興利也能實心爲民除害而無形之利已溥矣

右聽松廬文鈔張維屏撰

全魁

全魁尼奇哩氏滿洲鑲白旗人乾隆十六年進士改庶吉士十七年散館授檢討十八年擢侍講二十年 詔偕編修周煌冊封琉球國王尙穆二十二年復命奏渡海泊舟姑米山遇風禱 天妃靈應事請加 天妃封號別頒 諭祭文與 海神並祀 從之尋以失察隨從兵役滋擾所過地方部議革職 上念其出使外洋遭遇風險 加恩寬免旋偕周煌進所纂琉球國志略 命武英殿排印頒行二十三年充日講起居注官二十四年升國子監祭酒二十七年擢內閣學士兼禮部侍郎銜三十年 命提督安徽學政三十三年任滿回京三十四年教習庶吉士三十五年充

浙江鄉試正考官三十六年四月充殿試讀卷官八月充順天鄉試副考官十二月命祭告長白山及遼太祖陵三十七年上御勤政殿聽政諭曰全魁於覆請折本事件全不記憶甚屬不堪著革去內閣學士在乾清門當差三十八年二月補詹事府詹事復充日講起居注官五月遷通政使四十年授盛京禮部侍郎四十三年十月兼管奉天府府尹事務十一月調盛京戶部侍郎四十五年疏言牛莊蓋州熊岳復州金州岫巖六城所屬官山前准旗民放蠶輸納稅課試收二年再爲定額茲查四十三四兩年稅課遞增見雖已屆二年期滿若卽定額恐地方官不再廣募放蠶之人或將續增蠶戶隱匿不報請再試收二年查明增減數目

覈實辦理 上允之四十七年 諭曰朕明歲前往盛京恭謁

祖陵一切橋道備辦各事宜皆諭地方官經理全魁人本拘緩恐料理未能周到著不必兼管奉天府事務四十八年緣事降三級調用五十年補侍講學士五十一年充順天武鄉試正考官五十二年京察降三級調用五十六年卒

右 國史館本傳



圖書集成  
彙編  
考索典  
卷之二十一

三

李綬

李綬順天宛平人乾隆元年舉人七年會試列明通榜選直隸萬全縣教諭十六年成進士改庶吉士散館授編修二十年二月轉湖廣道監察御史三月疏言查會典內開恭逢上親詣行禮不陪祀官員分左右翼迎送見在迎送官除御史四員鴻臚寺官四員外祇有修撰編檢等官其餘槩不到班請照陪祀例查取職名無故不到者議處下部議行二十一年二月奏湖北枝江縣知縣黃文瑗因迴避本籍五百里以內調任棗陽縣吏部書吏王姓向文瑗親戚候補中書方應奎訛索銀兩經本部尙書王安國訪聞移送刑部嚴審不承卽將王姓釋放查事關書吏詐贓既經訪聞

移送正當跟究確實遽行釋放非有心徇隱卽故勘平人 命吏  
刑二部明白回奏旋奉 諭曰吏部回奏書吏王明一訛索銀兩  
一案既稱係王安國訪聞咨刑部審訊及該部刑訊不承行文咨  
明吏部如何訪獲王安國卽當詢明得自何人交與刑部三面質  
對何患不得實情乃吏部堂官僅稱本部原係訪聞無從再行咨  
送未免有將就了事之意御史李綬職司糾察據實直陳甚是此  
案仍著王安國將得自何人之處據實交與刑部再行嚴審定擬  
具奏旋經刑部審實定案 命將綬交部議敘先是浙江巡撫周  
人驥因諱災革職發軍臺效力是年十月 特旨起人驥爲廣東  
巡撫李綬奏人驥匿災殃民情罪較重若罷斥未久仍于原官恐

無所示警 諭曰朕因一時無人故令周人驥署理周人驥不過  
報災不實亦非竟匿災不報李綬卽據實直陳朕所嘉予周人驥  
仍遵前旨行二十五年四月奏六部司員缺有繁簡刑部爲刑名  
總匯從前奏定遇三缺以二缺咨吏部一缺畱本部題補乃因積  
缺滿漢接算畱缺亦可通融甚至已咨之缺又將別缺抵換總緣  
未將滿漢缺分別辦理遂致滋弊請嗣後各自接算分別咨畱下  
部議行七月充河南鄉試副考官二十七年提督湖南學政二十  
九年正月奏請學政按臨提調官應將府縣原取各卷解送磨對  
其府州縣及院考保結廩生不准節次更換下部議奏湖南士子  
畱心經學者少禮記一經多誦習坊閒刪本較全經不過十分之

四五請 敕禮部行文銷燬並轉飭各省學政考官經題不得盡  
出素擬下部議行三十年遷奉天府府丞三十一年三月奏盛京  
宗室學生十九覺羅學生四十資稟可造但學中向無一定規條  
見在量其資性限以功課並令習清書者兼讀漢書習漢書者兼  
學清語輪日繙譯作文作詩射箭每人設功課簿逐日登記開二  
三日府丞親往稽查將軍府尹每月考覈一次得 旨嘉獎又奏  
請添設宗室覺羅二學副管長得 旨允行八月奏奉天舊有瀋  
陽書院經費無著懇借給帑銀八千分派承德等十二州縣發當  
商照例起息以資師生膏火仍分十年繳還帑項錦州並請設立  
書院下部議行三十三年京察 諭李綬不必來京引見三十四

年丁母憂三十五年因湖南學政任內保舉教職鄧世讓不實部  
議降調得 旨李綬著於補官日降二級調用三十七年服闕補  
通政使參議三十八年仍擢奉天府府丞四十年六月奏奉天滿  
合字號生員向歸府學總管前任府丞吳綬詔奏准撥歸各該生  
居住州縣學管理幫增補廩出貢辦理參差不齊請定章程以防  
弊端一格眼冊應由提調官彙送一試卷應歸提調衙門備辦一  
考試滿合生員錦州府屬四學歸治中提調一凡遇考試府屬四  
學教官應赴省送考下部議行四十一年二月同盛京工部侍郎  
兼管奉天府府尹富察善等奏參蓋平縣學訓導周蒲先因赴任  
時在途翻車壓傷病廢四十年舉行計典該員不能赴省倩年貌

相做之薊州生員姚鐸頂認驗看因其精力尙健未加盤詰卽令  
回任本年考期將屆該員復令姚鐸頂認送考謁見臣李綬言語  
錯亂少加盤詰莫知所對當知會臣富察善等究出前情將訓導  
周蒲革職與案內人犯送盛京刑部嚴審定擬並因計典驗看未  
能究出情弊請交部嚴加議處 諭曰訓導周蒲著革職及案內  
有名人犯一併交與盛京刑部嚴審定擬具奏富察善李綬俱著  
交部分別議處部議降一級得 旨從寬畱任周蒲因病斃於獄  
四十四年三月奏奉天各屬碑碣有違礙字樣應行磨毀改刊者  
計一百六十六件 諭曰上年諭令李綬將奉天各屬所有神祠  
墳墓碑碣及村堡隘口門扁等項詳細查明如有違礙字樣卽行

磨毀改刊嗣據該府丞陸續奏明應行磨毀改刊者一百六十六件並據福康安奏稱接准府丞會辦咨文委員查驗並於巡視城工之便畱心詢訪親詣查勘等語見在曾否通行辦完未據續奏朕昨歲在盛京見李綬人尙能事欲俟辦完此事加恩擢用並曾命軍機大臣傳諭及之想彼辦理此事益當奮勉著傳諭福康安卽將李綬曾否辦竣之處詳細具奏並諭令李綬卽行據實覆奏四月奏應行磨毀改刊各碑辦理完竣報 聞六月轉通政司副使四十五年遷大理寺卿四十七年四月擢內閣學士兼禮部侍郎五月稽察中書科事務四十八年五月充文淵閣直閣事八月提督江西學政四十九年四月奏考試瑞州各府查出槍冒文章



李九舉等當飭各該府嚴審並咨督撫照例辦理 諭曰李綬到任甫及半年僅考過五府而拏獲生童槍冒等弊前後已有十案豈此等情弊李綬到任後始有耶該省士子遇考舞弊已成習慣前任學政胡高望在任三年按歷各府歲科兩次查閱所奏考試情形之摺俱稱生童遵守場規尙無槍冒代倩情弊等語胡高望身任學政乃於士習文風毫無整頓每考一處竟視爲照例辦理之事全不畱心覺察著明白回奏至郝碩係該省巡撫於各府士風尤宜隨時整頓乃竟諉爲學政專責毫不加意體察並著明白回奏李綬摺均著鈔寄閱看是月授江西巡撫旋諭曰前已有旨將李綬補授江西巡撫但該省巡撫兼管提督事務李綬係翰

林出身未能諳習營伍著調任湖南巡撫六月諭曰據伊里阿奏湖南茶陵州攸縣因溪河猝漲淹及廬舍並損傷人口殊爲可憫且兩邑田禾正值吐穗結實之時亦難保無淹損前據李綬奏稱於初一日自江西起程此時自己行抵湖南著傳諭該撫督率屬員詳細查勘所有被淹之房屋人口務察確數加意撫恤其被淹地畝並卽勸諭農民速行補種晚禾雜糧如有需借給籽種口糧者亦卽據實奏聞是月抵湖南巡撫任旋奏茶陵等州縣沿河被水所有坍塌房屋給資修理衝壓田畝諭令及早翻犁播種猝被水患貧民先行撫恤一月口糧銀穀兼放報聞八月調湖北巡撫又奏湖南驛站衡陽至宜章一路爲由粵入楚孔道未設驛

馬健夫馳送公文多致遲誤請於差務較減之衡陽零陵二縣各抽馬二匹馬夫一湘潭衡山等五站各抽馬二匹馬夫一橋頭驛甯鄉縣等四處各抽馬一匹馬夫一擬於距衡陽六十里之清泉縣小塘鋪撥給馬四匹馬夫二耒陽永興郴宜章四州縣各給馬四匹馬夫二責令各州縣經營稽查下部議行十月抵湖北巡撫任五十年正月與千叟宴旋遷兵部侍郎五月調工部侍郎五十二年二月擢都察院左都御史九月諭曰據李綬奏伊次子李文杞原任河南縣丞告病回籍今已病痊理應赴部候補但伊父年老懇請改捐司務俾得在京供職等語李綬年逾七十伊子李文杞著加恩免其改捐卽以司務補用五十三年二月湖北宜昌

府知府曹沂由工部司員保舉因不勝知府任將保舉不慎之工部堂官議處部議降二級調用得旨從寬畱任三月辦理萬壽慶典各事宜六月命閱貢監考職試卷違例多取部議降二級調用諭從寬畱任五十四年三月充上書房總師傅八月賜紫禁城騎馬五十五年六月恩詔開復降革處分八月以辦理萬壽慶典議敘加二級五十六年卒

右 國史館本傳

乾隆辛亥正月左都御史李公卒於位越歲正月元配馬夫人繼卒癸丑五月孤子之棫等乞寶公東臬相地於黃莊甲寅六月奉公及夫人柩合窆而乞劉公石庵書誌銘劉公謂必余撰文乃親

書因以文屬余余文何足當石庵書石庵又何取乎書余文正以  
余嘗校勘公年譜當不失實云爾公諱綬字佩廷號杏浦又別號  
竹溪然學者惟稱杏浦先生也先世自山東遷宛平曾祖諱進會  
祖諱龍均未仕父諱孔嘉官雲南永昌府知府皆以公貴 覃恩  
贈一品公生而俊邁有幹略年十七永昌公以罷官滯滇中卽能  
奉母牛太夫人歸里營大父葬事豐儉皆中禮治家嚴肅而門庭  
雍睦兄弟互相切劘兄璧齋弟梅村相繼取科第其餘幼弟諸姪  
婚宦皆藉以成就而收恤徐氏孀妹卒教其子朗元登科入仕尤  
士大夫之所稱平生貞不絕俗不欲嶢嶢露圭角而義所當爲未  
嘗不爲如官奉天府丞時奏燬前明違礙碑碣官湖南巡撫時奏

賑茶陵水災奏增衡郴諸路驛馬奏稽察西洋教皆蒙 俞允官  
御史時奏吏部胥魁受賂奏浙江巡撫匿災並邀 褒嘉尤不愧  
風憲矣性喜讀書暮年尙手錄文選作詩不下數千首皆付子孫  
藏弃不欲與才士爭名然文章具有法度一典鄉試兩督學政兩  
任奉天府丞所甄拔皆得人其奏定盛京宗學章程增設副管司  
察覈并奏修瀋陽書院聚諸生講肄教士亦具有規程卽公所學  
可知矣公生於康熙癸巳雍正乙卯中式副榜乾隆丙辰中式舉  
人壬戌中式明通榜授萬全縣教諭辛未成進士改翰林院庶吉  
士壬申授職編修乙亥授湖廣道監察御史庚辰充河南鄉試副  
考官壬午提督湖南學政乙酉授奉天府府丞辛卯以保舉教職

國朝通志卷之九十一  
三  
鐫秩壬辰授通政司參議癸巳再授奉天府府丞己亥授通政司  
副使庚子授大理寺卿壬寅授內閣學士癸卯三月兼文淵閣直  
閣事七月提督江西學政甲辰五月授江西巡撫旋調湖南八月  
調湖北乙巳正月授兵部侍郎五月調工部十一月兼署兵部丙  
午兼署吏部丁未授左都御史己酉入直上書房 賜紫禁城騎  
馬凡長風憲四年卒年七十有九富貴壽考公可謂兼之矣配馬  
夫人荏平縣知縣諱曷之女少公三歲年十七歸公紡績佐讀早  
同辛苦家庭孝友得夫人之助爲多至公撫徐氏孤甥夫人約以  
婚姻而自督之誦讀訓責之嚴與諸子無異稍或懈弛輒泣涕霑  
襟屢陳其母之苦務使感動而後已夫收恤親黨己稱古誼不棄

貧賤字以愛女又加人一等至策勵譙訶不避嫌怨卒使有成此  
眞士君子之所難矣用心如是宜與公同以 恩榮終始也公子  
二人長之棫官郴州知州次文杞官工部司務卽由永城縣丞  
特旨改京秩侍養者也女七人適徐朗元宗室書昌韓燕韓燮汪  
應鈴趙德芻孫源濤孫七人烜已酉拔貢生官深澤縣教諭烜監  
生燿附學生炳煥煩熊並幼曾孫二人甯城承基似續蕃衍亦足  
見公及夫人之遺澤焉銘曰  
公所自敘事皆有稽我括爲誌譬竝矩而重規君子書之庶幾曰  
是無愧詞

右墓誌銘紀的撰



國朝... 卷之十一

十一

覺羅巴彥學

覺羅巴彥學鑲白旗人乾隆十六年進士授兵部主事二十九年遷右中允三十二年轉左中允三十三年二月遷侍講四月大考翰詹並分別考試滿洲由別衙門升用翰詹等官巴彥學列一等擢侍讀學士兼公中佐領八月充順天鄉試同考官三十六年遷詹事 命在上書房教習清文三十七年遷通政使三十八年擢左副都御史四十七年六月 國史館進呈刑部侍郎任克溥列傳 上以所陳各事宜切中利弊見在是否尙有如克溥所陳諸弊 諭大學士九卿等各據所見奏聞七月巴彥學奏鄉試會試規條定制已久未便輕議更張頭場制義代孔孟立言二場排律

立體精嚴均難擄摭浮詞惟頭場性理論可填寬泛語不肖之徒  
每藉以暗藏關節請嗣後鄉會試將排律移置頭場性理論移置  
二場並請飭內策監試及主考同考各官須將頭場卷闈薦畢再  
分二三場既閱二三場不得復薦頭場儻考官有意遲延藉口畱  
心二場以爲取巧地步一經查出卽指名參處奉 硃批此奏深  
切時弊依議行尋 諭曰大學士九卿科道等將從前任克溥條  
陳諸弊會議具奏摺內稱見在綱紀肅清前代秕政俱已革除淨  
盡惟在大小臣工實力奉行自不致有因循廢弛之弊此語朕疑  
信半焉亦惟日慎一日所其無逸耳至副都御史巴彥學有請更  
定科場詩論以杜關節以端士習之奏所言實爲深切時弊不虛

展降旨之意已依議行矣蓋詩題係朕所出且律句謹嚴難以揣摩又若頭場詩文既不中選則二三場雖經文策問閒有可取亦不准復爲呈薦僕同考官仍蹈故轍監試官卽可指名參處如此亦防弊之一端巴彥學此奏殊可嘉尙四十九年四月充殿試讀卷官五十四年正月元旦上御太和殿受朝有越至甬道行禮者命將都察院堂官交部嚴議降二級調用得旨從寬畱任五十五年恩詔開復降調處分五十九年卒

右 國史館本傳

臣等謹將所擬章程  
分列於左

三

羅典

先生姓羅名典字徽五號慎齋湖南湘潭人少偶儻負奇節狀貌瑰偉家屢空篤志於學文思雋異警拔學使斐園阮公學士句山陳公皆海內文章宗匠每見先生文字輒嘆金嘉魚復生乾隆丁卯舉省試第一辛未成進士入詞垣遷江南道監察御史轉吏工二科掌印給事中晉鴻臚寺少卿充會試順天鄉試同考官者再兩主河南鄉試一爲四川學政先生立朝二十餘年清耿無所阿居言路不捕擊沽直聲通達治體平心持法論奏必本忠誠大學士劉文正公座主也遇大措置賢事有疑輒相諮嘗曰羅君益我不但爲吾老友精衡鑒校士優劣錙銖不差然性詳慎中州試卷六千

餘手親評點兩次操文柄知名士甄拔無遺視學四川則以學政職不專衡文汲汲造士育人材按試諸郡至則詣明倫堂集師生講經書聲響如鐘所講明白曉暢近裏切己鍼頑砭愚聽者悚然心動試畢進諸生規誨之娓娓無倦容卽未列高等生以疑義叩訓示無所吝樂易懇懇朗如霽月而和如惠風蜀中士習文風日蒸蒸日上暨今五十餘年數學使賢必首舉先生乙未扈 蹕熱河純皇帝召見奏對稱 旨嘉獎者再 諭諸大臣曰羅典是正經老實人會先生以太恭人春秋高請終養大學士金壇于公語補山孫公曰君與慎齋善 上方鄉用曷語慎齋少畱先生曰某旣以終養請俸一時榮遇中輟則前請者僞也不嫌於中何以事

聖明卒請而歸承色笑年餘太恭人壽終蓋不以一歲九遷易  
高堂一日之歡也先生雖以制藝名一世而精神專注則在經其  
治經也以古人簡質文字無閒廢卽經詁經字比而句梳之旣皆  
有確切注腳則通之一章又通之全篇全經有所窒則廢寢食夜  
以繼日必得其融貫而後安注易始京寓之凝園名曰管見壬寅  
詩管見成戊午今文尙書管見成春秋管見成於甲子年八十六  
矣攝心志觀義禮加以閱世之深洞澈於天人之微事物之變周  
情孔思立說時出新義要其精者實闡古人不傳之祕先是尙書  
漢三李公官蜀耳熟先生名撫湖南延主嶽麓書院講席朗夫陸  
侍郎杜蘇姜尙書志同道合倍禮重焉學使雪門姚侍讀南園錢



通政叅齋張閣讀數先生尤心推服執後輩禮甚虔先生立教務  
令學者陶泳其天趣堅定其德性而明習於時務晨起講經義暇  
則率生徒看山花聽田歌徜徉亭臺池塢之間隱烏皮几生徒藉  
草茵花先生隨所觸爲指示憶甲辰冬夜偕彭薄墅向魯齋陶士  
升周運若秦竹潛李白橋吳桃溪羅麓西諸友同侍有叩禮有犯  
無隱之義者先生曰汝知聖人勿欺之訓乎勿欺者先毋自欺古  
之人有其善而陳爲其難而責有感格之實者存焉否則折檻引  
裾未能信其無欺矣又有言居官不貪庶幾良歟先生曰難言也  
不貪榮利白好者勉焉不貪於名君子或未之能有貪名心則察  
察爲明儼儼爲潔煦煦爲仁其或假託聖賢以誤世且但不貪則

恬澹寡營而已國計民生奚賴焉先生之以中道裁狂狷多類此三十年來大湖以南人材輩出登甲第內外蒙擢用暨孝廉明經以品行才猷文學著名者數百人門牆之盛爲從來所未有先生內行修潔撫弟姪篤恩誼作族譜聯合宗人生平寡嗜好謹細微積精誠而致剛健不服藥不事導引以心之常用形骸之常運爲養生方年九十無病而終撫臣請於 朝祀鄉賢子紹祁端謹有品事先生嘗先意承歡孫四皆力學能世其業

贊曰余至川邊老生言羅學院將試保甯閩中縣誤童爲盜榜治之繫其父與師生童大譟聚訴之府府惶遽牒鎮將以兵捕諸生百餘人繫獄眾洶洶學院至則檄府某日歲試出諸生與試府澌

鎮將見學院稱憑府牒捕叛今使者釋之將縱叛耶羅學院正色  
曰諸生叛耶倡亂者誰屯聚何所且公同城果叛則捕不需時不  
得俟府牒非叛安可以府牒擅發兵諸生試仍可歸案訊吾行入  
告矣鎮將心折不敢違川北距省數百里聞鎮將以士譁用兵大  
駭制府某公言學使機警慎重決無事數日事定喜曰吾固知學  
使能了此論者謂先生倉卒定大難不動聲色儻再登朝建樹必  
更烜赫惜終不起然先生杖履優游出餘緒培英育才在嶽麓掌  
教期滿前後撫臣四奏訓迪著成效 聖恩予紀錄八次則名山  
講論卽謂爲老儒臣之鼓吹 休明贊助 醲化詎夸也歟

右傳嚴如煜撰

慎齋先生諱典字徽五湘潭人乾隆辛未進士翰林院庶吉士授編修改江南道監察御史晉工科給事中轉吏科掌印給事中擢鴻臚寺少卿歷充丙子河南副考官壬午河南正考官己卯順天鄉試癸未會試同考官四川學政先生頎而碩膚貌奇偉吐聲若鐘性嚴毅常面折人過爲御史侃侃不阿彈劾無所避爲督學訓士嚴然時引大體護士類按試保甯縣卒與某生有隙誣以事令繫之獄諸生詣縣爲解不得課於府府引聚眾律牒鎮將以兵捕繫百餘人先生聞檄府悉召入試事遂已始川督聞保甯以士譴用兵大駭旣而曰學使必能了此爲鴻臚一年母老乞養歸尋以聘掌嶽麓書院大修學舍增其膏火弟子著籍者歲常數百人

自爲御史益治經著凝園讀易管見凝園者京師寓邸也其後注  
毛詩今文尙書春秋成皆以凝園冠之先生於經字梳句比澄心  
研理不主故常釋經多新義其教學者讀書爲文亦然故事嶽麓  
掌院六年具題輒予議敘先生凡四具題歷二十有七年年九十  
卒祀鄉賢

右傳周樹槐撰

羅典字徽五號慎齋湖南湘潭人乾隆丁卯鄉試第一辛未成進  
士改庶吉士授編修累官鴻臚寺少卿督學四川進諸生講授經  
義勛以敦品力學上習文風爲之一振以母老陳請歸養主講嶽  
麓書院凡二十七年門下士中鄉會試者不下數百人性剛而介

任工科時值大工作總役希冒銷賂以三千金典弗納仍痛懲之  
按款覈銷無虛冒者爲學政時盡革陋規爲山長時脩脯所入除  
給饗煖外悉以增葺書院嘉慶丁卯重宴鹿鳴越明年卒年九十  
祀鄉賢

右述聞謔瑤錄

臣工 言月多不才 録

臣

何逢儔

公諱逢儔字敬儒先世居福清至君懷遷郡城之南曰南臺公祖也父蓼言侯官縣學生餼滿入太學二世以公貴得 誥贈如公官公由進士學習戶部授湖廣司主事丁太學公艱服闋升員外郎轉吏部文選司掌印郎中遷四川道監察御史出爲江西驛鹽道擢湖南按察使復入爲文選郎中卒官吏部左侍郎年四十七公在戶部尙書蔣文肅公甚重之在吏部莅事明慎吏不敢欺相國傅忠勇公喜曰紓吾一臂力矣刑部司員缺移咨吏部故事滿二缺有扣畱之例刑部咨畱踰期公守選法不許刑部怒劾公上命二部長官治其事以公守者選法卒無以罪也 上喜公有



守欲試以吏事由江西驛鹽道未二旬按察湖南坐新甯知縣懼罪自縊 召入爲文選司郎中一歲超遷刑部右侍郎公以屢沐

上恩縫之薄而擢之驟也感激涕零旣轉吏部蹊戶益熟口講指畫僚屬仰成然而精神耗竭疾甫動醫者謂其發甚深於法難治而公猶趣事不少衰子弟勸乞假調理者公訶曰捐糜頂踵自吾夙分汝曹欲吾假偷安耶嗚呼 予告賜休沐古今常典所以恩恤臣下使爲可繼又無貽愆職事也公豈賢知之過而不察斯義者願以受 恩深重未旨援常典以自恕至於疾進不衰自知報稱日短但使喘息稍延必欲毫髮畢諸公而目始瞑殆與古之袒背衛王馬革裹屍者雖所處常變不同其爲致其身以事君一

也公世農家自遷南臺去其田廬君懷公始泐跡市販逐什一之利然教蓼言公甚刻苦凡作文塾師稱善公輒易書懷之徧質士人果善也則喜歸以酒食相犒不則哭而扶之或終日不食蓼言公卒以儒顯名教授弟子甚盛及公既貴郡人咨嗟太息樂道其事以相勸曰是非偶然也公七歲能文十四籍侯官學生以五經舉鄉試既貴後公事稍閒卽手書一編或與客談詩文揮毫應四方求書者略無倦色公官僅卿貳而 聖眷特深年未及艾丰采殊異人方以公輔期之聞其喪莫不歎惋昔賈生宣室前席見知明主矣未及大用薛收馬周寢大用矣享年不永古今同轍所以深賢知之憾也公與余鄉試同年凡至京師者公必垂問惓惓之

意有加此深可念者顧公初官京師而余出令夏津及余罷官復至京師而公適以憂歸蓋不相見者近二十年而公遽薨嗚呼人生聚散存沒之感如是者多矣亦何足道惟念公之樹立瓌偉決不可沒丰采著於朝廷恩義存於知舊冊牘有徵人心眷繫更閱歲月耿耿如新此則所謂死而不亡者也夫人齊氏例封夫人國學生宗興公女生男子一西泰以侍公京師未獲歸試援例國學生局度凝遠庶幾繼公之志者女子三長適某次許某次未許字某年月日西泰將以公葬於某山某原先期持所著公行狀請銘銘曰

方怒以翔俄翁而藏孰爲風其燎使揚其光孰爲度其幅使

長豈人知之所與蓋天命之有常念世德之可嗣在後人而不忘

右墓誌銘朱仕琇撰

按何公乾隆辛未進士

國朝通志卷之三十一

三十一

綽克托

綽克托滿洲正紅旗人姓費莫刑部侍郎噶世圖孫由軍營筆帖式洵升吏部郎中乾隆十七年任坐糧廳失察胥役受賄降級畱任尋以剛愎徇縱被參褫職二十一年起授吏部主事遷員外郎二十二年記名以御史用二十七年擢副都統二十八年赴烏魯木齊辦事二十九年授參贊大臣駐劄塔爾巴哈臺十月疏言哈薩克額爾類等遣愛托和卓人覲貢馬請酌賞緞匹送出卡外得旨所辦甚是著諭烏魯木齊將軍大臣等嗣後哈薩克等有懇入覲者或係蘇爾統等大頭目及有奏請要事仍准其伴送前來若僅微末回人希冀賞賚俱照綽克托所辦飭諭遣回三十

年三月奏駐兵雅爾日期並言自伊犁行抵雅爾官兵馬匹無損糧餉器什亦俱運到 上嘉獎交部議敘四月擢刑部右侍郎三十一年補滿洲正紅旗副都統以錯擬佐領缺降一級畱任三十四年八月署兵部左侍郎三十五年七月補刑部右侍郎仍辦兵部左侍郎事三十六年九月兼辦刑部左侍郎事十一月實授兵部左侍郎三十七年四月調補刑部左侍郎十一月 命考試八旗繙譯童生三十九年以參贊大臣赴烏什辦事四十年十月以收禁邊外商人烏槍降一級畱任四十一年擢工部尚書四十二年二月轉吏部尚書授鑲黃旗漢軍都統因前高樸在葉爾羌累民採玉私賣婪贓不據實奏參革職逮問四十四年四月 諭曰

綽克托革職問罪之處雖所應得但念伊究係漫無覺察非自獲罪愆尙可棄瑕錄用著加恩補授吏部侍郎仍帶革職畱任八年無過方准開復尋授鑲紅旗蒙古副都統遷鑲藍旗蒙古都統十二月擢工部尙書兼吏部侍郎四十五年五月署兵部尙書十一月兼署都察院左都御史復授參贊大臣赴烏什總辦回疆事四十六年與伊犁將軍伊勒圖合疏烏什年獲銅斤請照舊鑄造議如所請詳伊勒圖傳四十七年 上以哈密通判經方虧短庫項無支數可查令口外各廳州縣庫項收支數目隨時詳報總督稽覈報銷綽克托疏言新定回疆時烏什葉爾羌喀什噶爾及庫車喀喇沙爾諸處每年錢糧奏銷俱冊送陝甘總督咨部但由督



國朝三朝通志卷之九十一  
臣查覆數千里往返動輒經年乾隆三十八年 特旨令新疆各處辦事大臣自行報銷不必咨督臣代奏遵辦以來回疆每歲奏銷較爲簡便且管理糧餉司員三年限滿必徹底清理始受交代臣等逐加查辦方敢具奏從無虧短迴與內地州縣官不同請嗣後除吐魯番迤東設有府廳州縣管理錢糧者應造奏銷冊由督臣覈轉外其烏什葉爾羌喀什噶爾諸處仍遵前 旨由各處辦事大臣具奏咨部並移督臣查覈 上從之四十九年烏魯木齊都統海祿請減口外車輛雇價綽克托奏喀拉沙爾以西戈壁多車輛少若照新定六錢例不敷雇覓請照前一兩六錢支給 上命軍機大臣酌中妥議議定嘉峪關以北路每百里給一兩二錢

以南一兩四錢是年色默爾罕有已誅叛回布拉呢敦之子薩木薩克潛遣人與喀什噶爾回眾通布魯特散秩大臣阿奇睦之弟額穆爾潛畱其人經伯克鄂斯滿訪知又伯克阿禮木受薩木薩克私書亦恐鄂斯滿查出並告鄂斯滿與薩木薩克通綽克托審明誣告令阿奇睦阿禮木與鄂斯滿和息奏入 上以綽克托不能安速剖斷命逮阿奇睦等來京綽克托並逮其親屬時阿奇睦之子燕起疑懼潛遁綽克托遣調伊犁烏魯木齊烏什兵追捕

上以綽克托舉動乖張革職逮問停調兵尋爲葉爾羌鐵拜擒送九月 恩免綽克托仍令在家思過五十年十二月署正藍旗滿洲都統 賜紫禁城騎馬五十一年五月 賞戴花翎閏七月署

兵部尙書九月授戶部尙書十月補鑲藍旗漢軍都統充經筵講  
官五十二年十二月充繙譯鄉試正考官尋以覆試武舉弓石不  
符未曾勘出降一級畱任五十三年四月轉署吏部尙書七月兼  
署兵部印務九月回戶部辦事十一月署吏部尙書五十四年四  
月以疾給假七月卒 諭曰戶部尙書都統綽克托老誠謹慎宣  
力有年今春因患病懇請解任特諭令其在家安心調理不必開  
缺並派御醫前往診視以冀就痊茲聞溘逝殊堪憫惜其任內降  
革罰俸處分槩予開復所有應得卹典著該部察例具奏尋 賜  
祭葬如例謚恪勤子景慶見任步軍統領衙門主事

右 國史館本傳

國朝書獻類徵初編卷九十一目錄

卿貳五十一

謝墉

趙佑

翁方綱

吉夢熊

錢載

博清額

伊齡阿

成德

戈源

國朝書獻類徵初編

卷九十一 卿貳五十一 目錄

五言月夜行不盡  
一

國朝書牘類徵初編卷九十一

通奉大夫前著江西巡撫江西布政使司布政使湘陰李桓輯  
卿貳五十一

謝墉

謝墉浙江嘉善人乾隆十六年 聖駕南巡墉由優貢生 召試  
第一 賜舉人授內閣中書十七年會試中式進士改庶吉士十  
九年散館授職編修二十二年因撰擬原任閩浙總督喀爾吉善  
碑文措詞失當奉 旨交部嚴加議處部議降二級調用二十四  
年九月 諭曰原任編修謝墉前因撰文譌錯部議降調見未得  
缺念其事非大咎時歷二年著加恩准其開復十二月 命在上

書房行走二十六年充會試同考官二十八年充日講起居注官  
二十九年十二月遷侍講三十年四月擢右春坊右庶子充福建  
鄉試正考官十一月遷翰林院侍讀學士三十二年十月遷內閣  
學士十一月丁父憂三十五年二月服闋赴補閏五月補原官仍  
在上書房行走三十六年十月 命教習庶吉士三十七年四月  
充殿試讀卷官三十八年五月授工部侍郎八月轉左侍郎十二  
月充經筵講官三十九年授江蘇學政四十二年二月奏廩生有  
恃符滋事經地方官詳請戒飭被責者遇出貢之年應扣除另選  
陪貢考充下部議行十月任滿回京四十三年正月調禮部左侍  
郎三月以隨同尙書永貴指名保題主事李淑芳議革職 諭從

寬畱任是月充會試知貢舉奏填榜放榜應飭原派之副都統同  
入聚奎堂彈壓得 旨嘉允四十四年充四庫全書館總閱是年  
充江南鄉試正考官四十五年三月會試充知貢舉奏本科房官  
劉紹錦丁父憂禮部移會到臣惟時試卷未騰送卽知會內簾出  
闈因思考官有應行守制之事若文到至公堂在送卷之先原不  
妨知會內簾若已經閱卷仍令出闈難保無漏洩情弊應請嗣後  
凡在十五日以後者文到禮部暫行押住如屆十三四等日禮部  
文到時以已未送卷爲率酌定移知內簾與否下部議行是月調  
吏部右侍郎四月 恩詔開復處分旋充國史館副總裁五月充  
殿試讀卷官十一月署廣西全州知州彭日龍因縱令革役復充



襖職赴部呈請捐復議與大學士公阿桂不合因見議不准捐復  
之山東商河縣教諭侯華案對較時候華案未呈堂阿桂疑有請  
託經奏聞飭軍機大臣傳集查詢謝墉並細覈兩案情節其  
不准彭曰龍捐復一節尙屬平允復傳訊侯華案堅供並無囑託  
但謝墉身係堂官於候華案不能避嫌彭曰龍案既有所見商諸  
各堂不允何妨兩議具奏乃始而爭執辯論繼復依違畫諾請交  
都察院議處尋議降調諭從寬改爲革職畱任四十六年充會  
試正總裁復充殿試讀卷官四十七年轉吏部左侍郎四十八年  
充江南鄉試正考官旋授江蘇學政四十九年上南巡賜詩  
曰江浙均爲文物鄉飛鴻博此任難當雖然尙藻豈其避必也寫

經以是褻雅正清真茲已解抹塗勦襲亦應防士風澆則民風順  
敦化甯云虛飾庠五十年四月奏提督藍元枚咨營屬武生陳南  
圖滋事誤操汰革名糧交學收管查武生在營滋事若准咨回本  
學是營伍去一惰兵學校增一武劣殊非整飭膠庠之道且恐在  
營效力之武生等罔知警畏於營伍亦有關係臣卽飭學將該武  
生斥革請嗣後在營武生遇有過犯准營員徑行按律辦理一面  
咨學臣斥革 硃批此奏是下部議行五十一年十一月任滿旋  
京 召詢賑濟及湖河水勢情形 命據實條奏以聞尋奏偏災  
賑濟請除錢米統用銀兩其銀由藩司印封頒發州縣按戶散給  
銀在五十萬以上請派近信大臣一員前往查察又湖河水勢全

賴以清敵黃訪聞向來洪澤湖蓄水刷沙足資抵禦近年黃水過  
強湖身日漸淤高有昔如釜今如盤之說請酌加疏濬 諭曰據  
謝墉奏賑濟暨水勢情形一摺朕詳加披閱內有礙難施行者如  
所稱賑濟除去錢米統用銀兩按照戶口定爲一次給發等語自  
古救荒本無善策惟平時於常社倉詳悉講求務期積貯充盈以  
備歉收賑卹之用蓋荒歲收成失望米糧價值自必昂貴小民嗷  
嗷待哺非散給米穀不足以充飢腹朕軫念窮黎每遇各省奏報  
偏災不惜千百萬帑金加恩賑卹仍恐各該省倉貯不敷給賑屢  
經降旨截留漕糧並諭各該督撫於鄰近豐收省分設法採買糧  
石運往災區源源接濟所以籌畫民食者無微不至而銀米兼放

原屬不得已之計如謝墉所言除去錢米統用銀兩則小民計口給銀所得無幾勢必不能於穀貴之時市易升斗以資養贍且災歉之區米難購運是名爲賑饑而於小民生計轉無裨益又所稱賑銀在五十萬兩以上者請派近信大臣一員前往查察等語地方辦理賑務原難保不肖官吏侵漁中飽惟在督撫司道督飭所屬層層周密稽查自不致滋生弊端若再簡派大臣前往該督撫皆不可信矣如果派往之人公正實心於事不爲無益而一省州縣鄉村亦必不能分身周歷設其人於外省情形不能熟悉徒生枝節轉致掣肘紛更甚或扶同瞻徇一味模稜地方官徒增酬應之煩而於賑務究不能查出弊竇是簡派大臣仍屬有名無實此

皆揆之事理斷難准行其餘所言或有可採仍著大學士九卿詳  
議具奏五十二年三月 諭曰據謝墉條奏洪澤湖淤墊日高前  
之如釜者今已如盤請加疏濬一摺經大學士九卿議駁在案茲  
李世傑等奏洪澤湖水下注清口暢出因將原摺交與謝墉閱看  
據稱本未諳悉河工前年在江蘇接見汪兆棠言及洪澤湖日漸  
淤高是以據傳說之言具奏本年汪兆棠陛見來京復與講論仍  
如前說等語前年湖水甚少清口不能暢出朕屢訓諭籌畫以期  
濟運禦黃仍卽以盈虛消息事理之常慮及必有盛漲之時亦預  
行諭飭該督等加意防範上年湖水大漲果不出朕之所料是上  
年清水短少實是意中所知謝墉既未親至其地目擊情形何以

率行入告見在洪澤湖水勢日長清口暢出已非如盤之明驗謝  
墉復稱得之汪兆棠所言而本年汪兆棠來京陛見經朕面詢該  
處情形亦奏稱清水暢順並未有淤墊如盤之說謝墉身爲卿貳  
汪兆棠究係司員體制所關自不值令其來京面爲質對但謝墉  
既有此說不可不詳加覈辦著該侍郎自行前往洪澤湖會同李  
世傑等周圍履勘測量湖中淺深實在有無淤墊秉公據實具奏  
墉往勘知所奏錯誤同督臣李世傑等會摺覆奏自請議處 諭  
曰據謝墉李世傑等奏會勘洪澤湖水勢深至八九丈及十丈不  
等淺者亦在一二丈之間實無淤墊謝墉前此未經身履其地乃  
以傳聞不實之言率行陳奏懇交都察院議處等語洪澤湖水前

年因上游河南安徽等省雨澤稀少淮流未能暢發以致湖中存  
水較少當經諭令畢沅前往桐柏山疏濬淮源虔誠祈禱上年朕  
卽以盈虛消息事理之常淮水必盛漲發令該督加意預防自去  
年以來湖水充裕自由河神默佑來源旺盛得資濟運謝墉所奏  
乃係前年水短情形且治河如聚訟原無定論該侍郎得自傳聞  
據以入告尙非無因茲旣勘明水勢深通並無淤墊所有自請議  
處之處著加恩寬免五十三年七月 諭曰本年三四月閒據阿  
桂奏外間傳有謝墉抽身便討吳玉綸倒口卽吞之語朕卽以阿  
桂若僅奏謝墉聲譽不好伊二人前在吏部時原有齟齬而吳玉  
綸則並無芥蒂其言似非無據學政爲掄才所關旣聞有舞弊營

私情事安得置之不辦隨降旨令李侍堯閱鶚元各將謝墉吳玉綸在任聲名究竟如何之處就近訪查據實具奏旋據閱鶚元奏謝墉初任江蘇學政聲名實屬平常其復任時尙知悔過頗爲謹飭而李侍堯則稱吳玉綸在學政任內聲名狼籍至今閩省士子猶懷忿恨上年因吳玉綸條奏科場該省之人無不傳爲笑柄以吳玉綸卽係作弊之人如何亦說防弊但事隔年久實無憑據等語適吳玉綸在熱河扈從隨卽面加詢問據稱因伊會條奏西監應行補捐一事是以爲眾所怨昨謝墉帶領引見來至熱河亦面加詢問據奏伊因考試過嚴未免取怨於人及詰問以因何有抽身倒口之語伊二人則皆奏係寄園寄所寄小說所載陳言想係



怨之者因而附會等語辦理科場本當嚴密如果恪遵成法自矢  
潔清士心正當翕服卽或有被遺之人爲之散播謠言亦何至憎  
茲多口至吳玉綸條奏捐監係四十六年之事而其簡放福建學  
政已在四十八年以後相隔甚久尤爲兩不相涉若云出自寄園  
寄所寄則古今書籍所載陳言甚多何以不取而附會他人獨於  
謝墉吳玉綸二人曲加附會不謀而合但此事旣經閱鶚元李侍  
堯就近查奏並非無因卽將伊二人革職交刑部審訊治罪亦不  
爲過姑念阿桂所奏究係傳聞而李侍堯等亦皆因事隔年久查  
無確據朕從來不爲己甚何必遽興大獄但伊二人俱係大員朕  
特簡學政乃聲名如此平常朕甚愧焉謝墉吳玉綸何以復勝卿

試之任均著降爲內閣學士其職不過專司批本並無應辦緊要之件伊二人學問尙可是以特予從寬降補此皆朕格外矜全伊二人務當痛自愧悔勉爲湔濯如再不知悛改必加倍重治其罪五十四年京察 上以謝墉聲名平常交部議處部議革職奉旨謝墉學問較優在上書房行走多年革職從寬畱任三月上書房行走曠班 諭曰謝墉在學政任內聲名平常本係獲罪之人前京察議處時吏部議以革職念其學問尙優是以從寬畱任仍令在上書房行走伊更當知過感奮乃仍復偷安七日不到更屬有乖職守著降爲編修不必復在上書房行走著在武英殿修書處效力贖罪五十六年 命仍直上書房六十年正月得 旨謝

年力就衰著以原品休致四月卒嘉慶五年二月 諭曰原任  
侍郎謝墉在上書房行走有年勤慎供職朕自幼誦習經史係原  
任侍郎加太師銜奉寬授讀及長而肄業習詩文蒙 皇考特派  
謝墉講論頗責其益茲因謝墉在學政任內聲名平常是以 皇  
考將伊降為編修但念謝墉究係內廷舊臣學問優長且在上書  
房供職時並無過失著加恩追贈三品卿銜該部照例給予卹典  
以示朕眷念施恩至意並 賜祭葬如例子恭銘乾隆五十二年  
進士改庶吉士散館歸班呈請改補八品京官嘉慶五年九月  
諭曰本日謝墉之子恭銘前來行在接駕例應選補國子監學正  
學錄及司務等官但念謝墉在上書房授讀有年伊子謝恭銘著

加恩以內閣中書補用三子錫楨由考職主簿充四庫館續辦三分全書總校乾隆五十二年 欽賜舉人嘉慶三年七月遵川楚例捐納雙月郎中五年四月在 實錄館行走七年十二月 高宗純皇帝實錄書成議敘以本職卽用八年十一月銓授戶部山西司郎中

右 國史館本傳

公姓謝諱墉字崑城號金圃又號東墅先世會稽郡人系出晉太傅廬陵郡公後遠祖諱琛一遷嘉善縣之楓涇鎮曾祖諱元一祖諱春芳父諱永輝皆以孝友文學傳其家並因公貴累 贈封爲光祿大夫吏部左侍郎公少穎異舉止端雅如成人讀書不忘究

心實學經史百家靡不綜覽乾隆十五年以優行貢太學十六年  
南巡召試第一 賜舉人授內閣中書十七年 賜進士出身  
改翰林院庶吉士授編修辦翰林院事謨翰林院文與繙書房措  
詞並誤落職二十四年獻平定回部饒歌復原官在上書房行走  
充日講起居注官丙子庚辰順天鄉試癸未會試皆同考官乙酉  
福建鄉試正考官洊升授翰林院侍講右春坊右庶子翰林院侍  
讀學士內閣學士兼禮部侍郎以父憂去服闋拜前官授工部侍  
郎充經筵講官三十九年提督江蘇學政 上東巡狩時兩金川  
蕩平 御製告成太學碑文 特賜先睹於是謨平定金川說得  
旨嘉獎四十三年春調禮部左侍郎會試知貢舉吏不敢欺士

皆稱便秋充江南鄉試正考官四十五年復充知貢舉調吏部右侍郎國史館副總裁冬吏部有捐復事公議與大學士阿公不同上從公議四十六年充會試正總裁殿試讀卷上擢錢棨爲一甲第一錢公鄉會兩元皆出公門至是成三元稱盛事四十七年轉吏部左侍郎四十八年充江南鄉試正考官卽授江蘇學政五十一年旋京召問時政公疏言洪澤湖形勢日淺昔如釜今如槃偏災賑卹請改本色爲折色銀由藩司印封給發以防吏弊上諭以折色不能應饑民之急河務命公親往履勘勘知前奏誤請議處奉旨寬免先是大學士阿公以公被江南傳聞考試不公對語嘲誚入告至是召對訓飭降補內閣學士兼禮部

侍郎五十四年京察以前事革職畱任 上書房各官曠課 上

以公在 內廷久尤切責降補翰林院編修冬復 命在上書房

行走和詩 賜福字 恩遇如前公病溼 上遣太醫院堂官臨

治六十年得 旨以原品休致時公疾日篤 今皇帝暨 皇子

皇孫遣中使存問公尙敬詢 起居伏牀叩首稱謝四月卒距

生於康熙五十八年九月春秋七十有七累階至光祿大夫公至

性孝弟居親喪哀毀骨立及通顯每遇晉階輒以悲繼喜逢諱日

未嘗不涕泗交頤也公事貴以禮待下不驕大學士傅文忠公以

禮聘授館額駙尙書忠勇公暨文襄王皆沖齡請業公九掌文衡

而江南典試者再督學者再論文不拘一格皆衷於典雅經義策

問尤急甄拔丁酉拔貢科所選皆孤寒尤重江都汪中容甫汪強  
記博聞才氣橫發貧困未知名於時公語人曰予之上容甫爵也  
如以學子於容甫北面矣其不惜自貶以成人名如此公再督學  
元始應童子試公獎勵極力居公第讀書數年高郵李進士惇嘉  
定錢進士塘山陽汪侍講廷珍儀徵江侍御德量通州胡學士長  
齡陽湖孫觀察星衍甘泉焦明經循金匱徐孝廉嵩等識拔不可  
勝數是以江淮南北懷經握槩者靡不服公之學願得若公其人  
者再葺爲幸公所著安雅堂文集十二卷以經史小學爲本雖心  
好沈博絕麗之文而擇言必雅 國家有大慶大功雍容揄揚擬  
諸雅頌安雅堂詩集十卷格律凝重直溯盛唐東野少作及存藁



四書義二卷典麗獨絕尤深文律六書正說四卷發明三代造字  
本義詮證秦漢諸儒之說刊正二徐鄭樵戴侗楊桓周伯琦等謬  
誤尤好鐘鼎古文獨追象形象事象意之本謂許慎篆文乃沿秦  
石刻結體校以商周尊彝岐陽石鼓則形事意三者皆所不及指  
微抉奧令人解頤形聲轉注假借三事亦博探倉雅出入經訓故  
公之爲小學也依据許氏而更溯其本又嘗校正荀子楊倞注逸  
周書孔晁注合之盧學士文弼所校錢板貽學者公初娶費夫人  
贈一品夫人繼娶金夫人 封一品夫人子五昌鑒庚寅舉人  
蚤卒恭銘庚子舉人丁未進士改翰林院庶吉士候選八品京官  
揚鎮 欽賜舉人應鏘捐職州同知卒慶鍾太學生女二孫八江

宇澄淮河漢濟泗伏保乾隆六十年十二月二十日公子恭銘等  
葬公於嘉善縣四中區藏字圩夫人耐焉時元督學浙江敬勒銘  
曰

吳越之閒靈秀所鍾仁惠之後必大厥宗懷毓純篤實生我公我  
公孝弟稟於幼冲推以事君迺克竭忠帝曰汝才既博且鴻  
用汝於文黼黻邳隆臣殫厥學賡拜禁中五花書鳳九章繪龍  
其文皦皦其光熊熊秉鑑景徹物無遁容氣伸雋異淚感孤窮士  
敦經術皆公之功惟帝育臣千石代農惟帝教臣協恭和衷  
惟帝愛臣恩周始終臣形雖阻精誠尙充詩書雜誦子孫其逢  
林泉岡道佳城穹窿雲飛桓表日冷高松蠹書漆簡題湊共封敬

勒貞石納諸幽宮

右墓誌銘阮元撰

謝金圃少宰督學江蘇者二乾隆丁酉值拔貢歲少宰按部至揚州遴選極精慎之慮於江都得汪中容甫於興化得顧九苞文子二君以經學重揚州之士知屏俗學咀茹六經自少宰得二君始也於泰州得陳變理堂於儀徵得江德量成嘉程贊和中之於高郵得宋繇初守端於甘泉得郭均職民於寶應得劉玉麟又徐皆升高能賦作器能銘自有選拔以來未有此盛初高郵擬拔李惇孝臣孝臣通三經之學善天文律算其名與容甫並稱適賈田祖捐深卒於旅寓稍孫耆高郵老儒深於治經汪李之學所從出也

稻孫貧不能斂李亦貧爲乞諸同人助以成殯遂不及與選拔之  
試乃選宋君孝臣經學醇儒篤於行誼少宰重之尤在是容甫素  
放言好臧否人少宰獨服其學以汪惡礮命司礮者俟汪遠始發  
聲又薦其才於兩淮漕使已入其署中矣適少宰月課書院諸生  
徒漕使以不與謀詰汪汪恚振袂去明日漕使晤少宰告以故少  
宰正色曰予之上容甫爵也如以學則予於容甫北面矣予何敢  
令容甫課容甫聞之爲泣下也少宰以乙卯夏四月卒於京邸冬  
十一月喪歸墓銘行狀當世大人先生自詳說之其遺事僅著於  
揚州者或未徧知謹書以附諸後

右書事焦循撰

嘉善謝金圃侍郎壻督學江南憐才愛士江都汪秀才中初出貢  
許其才學足爲侍郎學政師雖自知素明者恐未易毅然出諸口  
公於是乎不負所職矣

右紀聞陳康祺撰

趙佑

趙佑浙江仁和人乾隆十五年舉人十七年成進士改庶吉士二十二年散館授編修二十五年充順天鄉試同考官二十六年充台試同考官十月改京畿道監察御史二十八年命稽察豐裕倉二十九年四月署掌湖廣道監察御史八月署掌江南道御史三十一年四月署戶科給事中八月丁母憂三十四年服闋補福建道御史十二月命稽察通州西倉三十五年正月擢工科給事中九月充武會試同考官十月命監視黃村賑廠三十七年遷鴻臚寺少卿六月轉光祿寺少卿三十九年轉通政司參議八月充順天鄉試同考官十月擢太常寺少卿四十一年稽察左翼

宗學四十四年十月轉大理寺少卿四十五年六月擢太僕寺卿旋充山東鄉試正考官四十六年授山東學政奏請重修曲阜縣沂河旁先賢有子墳墓並肥城縣西北七十里莊祠廟以七十二世孫守業承襲五經博士奉旨允行四十八年六月遷太常寺卿五十一年六月轉大理寺卿五十三年充江西鄉試正考官復稽察右翼宗學五十四年二月佑以翻車傷手上特命太醫院官診視尋愈六月充江西鄉試正考官旋授江西學政五十五年十二月奏曰江西人文較盛而考試弊竇亦較多士子以積習爲安臣於歲試嚴行整飭各生童頗知行險作奸之有害無利不敢輕圖僥倖而外來招撞棍徒亦就斂戢惟生員有越號犯規之

人其意固以生員錄科有棄取無下等遂至積玩不悛臣查出後雖訊無別情仍分別四五等停廩戒飭至武生習尚健訟甚於文生皆由武生例係歲科併考三年僅赴學院衙門一次其平日玩視月課教官復庸懦無約束以致違抗多端臣於每府科試取齊時飭將歲取新舊武生到棚面課一次使教官得循教奉行臣亦觀察其邪正詳加訓飭有弓箭合式者准作錄遺以示鼓勵奏入上曰毋久而懈可也五十六年十二月署江西巡撫姚棻奏曰學政趙佑性情耿直待士頗嚴批閱文字亦少許可所到之處懲懷挾拏槍冒斥劣生凡生童傳遞代倩等弊查出立予重懲均知斂跡聲名甚好士子輿論俱爲畏服報聞五十七年擢都察院



左副都御史調安徽學政五十八年調福建學政六十年以福建  
吏治廢弛入奏 諭曰趙佑由安徽學政調任福建已及三年該  
省吏治廢弛自必早有見聞趙佑係副都御史職司糾察三年之  
久何並無一字奏聞及朕降旨查辦始爲此奏以爲見長地步大  
負委任著交部議處尋部議降二級調用得 旨改降三級畱任  
嘉慶元年正月 命稽察右翼覺羅學充武殿試讀卷官旋授工  
部右侍郎二年八月轉左侍郎十二月調吏部右侍郎三年三月  
轉左侍郎八月充順天鄉試副考官尋授順天學政四年十月擢  
都察院左都御史五年二月卒遺疏 聞 諭曰左都御史趙佑  
服官有年勤謹供職茲聞溘逝殊爲軫惜所有應得卹典該部察

例具奏尋 賜祭葬如例入祀鄉賢祠子日熙正三品廕生前任  
江蘇長洲縣知縣

右 國史館本傳



翁方綱

雍正十一年癸丑八月十六日先生生於乾隆九年甲子先生年  
十二是年六月補順天府學生簪花日大雨家無雨衣以油紙覆  
衫上十二年丁卯先生年十五是年鄉試中式舉人十七年壬申  
先生年二十是年會試中式進士會榜在九月 殿試改庶吉士  
先生自編復初齋詩集於是年始十九年甲戌先生年二十二是  
年散館授編修二十四年己卯先生年二十七是年秋奉 命典  
試江西二十七年壬午先生年三十是年奉 命典試湖北二十  
九年甲申先生年三十二是年秋奉 命視學粵東三十六年辛  
卯先生年三十九自甲申秋至辛卯秋視學役竣凡三任八年三

國朝詩集卷之十一  
十七年壬辰先生年四十是年春二月還都三十八年癸巳先生  
年四十一是年冬得宋槧蘇詩施顧注本因以寶蘇名室四十一  
年丙申先生年四十四是年冬奉 命充文淵閣校理官四十二  
年丁酉先生年四十五是年除夕前一日 賜柑橘橙有恭紀詩  
四十三年戊戌先生年四十六是年七月十八日 賜荔枝有恭  
紀詩四十四年己亥先生年四十七是年秋奉 命典試江南四  
十五年庚子先生年四十八是年秋扈 蹕灤陽四十六年辛丑  
先生年四十九是年擢國子監司業閏五月擢司經局洗馬四十  
七年壬寅先生年五十是年 贈會祖父母行焚黃禮敬述有  
詩自註云四品以下向無貲贈會祖例茲出 特旨益異數也四

十八年癸卯先生年五十一是年正月蘇詩補注刻成八月奉  
命充順天鄉試副考官四十九年甲辰先生年五十二是年春閏  
三月遷少詹事秋扈 蹕灤陽五十一年丙午先生年五十四是  
年秋奉 命視學江西五十二年丁未先生年五十五是年嗣君  
宜泉太史樹培中式進士改庶吉士五十四年己酉先生年五十  
七是年冬視江西學役竣還都五十五年庚戌先生年五十八是  
年春扈 蹕山東奉 敕充曲阜釋奠分獻官冬十月 上御乾  
清門先生以學士承 旨嗣君宜泉太史以檢討侍班有敬述詩  
五十六年辛亥先生年五十九是年春隨 駕往盤山冬奉 命  
視學山東五十八年癸丑先生年六十一是年五月登泰山有登

岱詩五十九年甲寅先生年六十二是年春扈從天津先生藏書  
三萬卷是冬有白題三萬卷齋詩嘉慶元年丙辰先生年六十四  
是年春正月四日 賜千叟宴先生有恭依 御製詩韻詩二首  
自注云筵上蒙 賜 御製詩一卷錦綺十卷綵箋二卷玉嵌如  
意一柄紅琥珀朝珠一串湖筆五珠墨二周提梁卣硯一金合一  
齊戒牌一荷包二對杭緯二匣金字壽杖一四年己未先生年六  
十七是年春授鴻臚寺卿六年辛酉先生年六十九是年寓馬蘭  
峪温肄三傳三禮久不作詩冬爲季子樹崑締婚李氏九年甲子  
先生年七十二是年畱題馬蘭峪寓齋詩有三載枝棲荷 主恩  
暮春悵別緒誰論之句又有蒙 恩家居以退圃自名其齋詩夏

重赴泮林宜泉太史隨侍有敬拜宮牆詩十二年丁卯先生年七十五是年秋奉 旨賜三品銜重與鹿鳴宴有紀 恩述懷詩十五年庚午先生年七十八是年宜泉太史下世先生有哭培兒詩十九年甲戌先生年八十二是年四月 賜加二品銜重與 恩榮筵宴有恭紀詩二十三年戊寅先生年八十六是年月日先生卒屏欲撰先生年譜而未得其詳先生既歸道山凡家傳墓誌屏未獲見茲就詩集中舉其大略而詩集僅刻至第六十六卷亦闕而未全俟他時訪得其詳擬補成之

覃谿先生精心汲古宏覽多聞於金石譜錄書畫碑版之學尤能剖析毫芒如肉貫鼎生平論詩謂漁洋拈神韻二字固爲超妙但



其弊恐流爲空調故特拈肌理二字蓋欲以實救虛也復初齋集中詩幾於言言徵實使閱者如入寶山心搖目眩蓋必有先生之學然後有先生之詩世有空疎白腹之人於先生之學會未窺及涯涘而輕詆先生之詩是則妄矣

右聽松廬文鈔張維屏撰

覃谿年甫及冠已入詞垣而精心績學宏覽多聞所著兩漢金石記剖析毫芒參以說文正義幾欲駕洪文惠而上之近年研精經術嘉慶己未予入京師見其方考禹貢顧命兩篇諸儒同異相與辨難斷斷竟日詩宗西江派出入山谷誠齋閒雖嘗倣趙秋谷聲調譜取唐宋大家古詩審其音節刊示學者然自作亦不能盡合

也書法初學顏平原繼學歐陽率更隸法史晨韓敕諸碑生平雙  
鉤摹勒舊帖數十本北方求書碑版者畢歸之

右湖海詩傳張維屏錄

先生詩多至六千餘篇自諸經注疏以及史傳之考訂金石文字  
之爬梳皆貫徹洋溢於其中雖瓣香在少陵東坡初不以一家執  
也蓋真能以學爲詩者歟好宏獎後進一篇之美稱道不去口晚  
歲罷官家居歸然爲海內魯靈光著有精義考補復初齋全集等  
書 本朝耆舊重賦鹿鳴者多矣若重宴瓊林則惟乾隆辛未黃  
侍郎叔琳庚辰史文靖公貽直庚戌嵇文恭公璜繼之者先生自  
先生以後惟咸豐王子潘文恭公世恩而已

右事略李元度撰

國朝乾隆以前凡新進士用館職例擇年少者十數人學習國書庶常館課及次科散館皆以清書第甲乙翁學士方綱散館時上以繙譯陶潛桃花源記命題是日午刻學士已脫橐適聞駕出上步自西階至其跪所取卷閱之間姓名至再諭曰牙拉賽音漢語甚好也次日御定一等一名嗣是纂修祕籍掌握文衡雁役不與遂寔然爲北學領袖矣其受知遇實始此

新進士釋褐於國子監祭酒司業皆坐彝倫堂行拜謁簪花禮故事三鼎甲皆簪金花外有備用一枝爲總理監事所攜歸乾隆辛丑長洲錢棨適占三頭於是總理監事者爲漳浦蔡文恭公新司

業則翁覃谿學士方綱也文恭戲謂今科狀元是翁公上年所得  
士此花應歸翁公學士因攜歸櫝藏之鐫銘其上並撰三元考三  
元喜宴詩四律京師士大夫及四方詩人和者數百家鋟梓爲三  
元詩集

順天鄉試考官凡籍隸畿輔者例不開列乾隆癸卯覃谿學士以  
洗馬奉命充副考官尤爲異數嗣後紀文達公亦會主京兆闈  
嘉慶十九年甲戌上問戶部尙書潘世恩今科會試有重赴瓊  
林宴者乎世恩對有王申進士翁方綱王申今無正科見在禮部  
奏請於甲戌補重宴上領之二月十八日禮部奉旨翁方綱  
賜三品銜重與恩榮宴

黃秋盦易得漢石經尙書論語三段翁覃谿借摹於石因用洪文  
惠摹石經於越州蓬萊閣事自題扁曰小蓬萊閣

翁覃谿學士乾隆甲申奉命視學廣東至辛卯秋役竣凡三任  
八年嘉道而後學臣無此久任者

粵之雷州亦有西湖坡詩所謂西湖不欲往暮樹號寒鴉者也其  
地相傳有西湖平狀元生之語郡人因構書舍於湖上顏曰平湖  
覃谿學士按臨雷郡有句云可笑此郡士不愧文不工但祝西湖  
平結此一畝宮

乾隆閒番禺縣學生王健寒年九十九尙能入試握筆爲文翁覃

谿記以詩

京師爛麪胡同昔稱嬾眠故覃谿移居詩有街坊爛麪名元好不  
敢隨人作嬾眠之句

覃谿學士辦香坡公每歲於十二月十九日輒集四方名士於蘇  
齋爲公作生朝後得 本朝王文簡像亦如祭坡公例惟每祭文  
簡必徧詢坐客謂漁洋品古今五言詩以盛唐爲宗盛唐五言又  
以三昧集王孟諸家爲宗而先生選五言詩於唐止取五家有韋  
柳而無王孟諸家何也請下一轉語方許同列拜跪

人但知南昌學藏注疏以爲西江文物之幸按大興翁覃谿先生  
方綱督學江西時嘗合平生所見錢唐黃氏如皋姜氏金匱錢氏  
岑煒平石經一十二段殘字六百七十有五勒於南昌學宮詳見

復初齋集及兩漢金石記 昭代魁儒後先持節古今瓌寶萃於  
一區固地運使然亦可見乾嘉時承平氣象二三公卿振興風教  
乃如此

相傳翁覃谿學士垂老康彊目力尤勝六七十時猶能於鐙下作  
細書閱蠅頭字不假鑿鑿每歲元旦必用西瓜子仁書四楷字五  
十後曰萬壽無疆六十後曰天子萬年至七十後猶能寫天下太  
平云可謂異稟按翁氏家事略記載英和按云先生每於一粒胡  
麻上作一片冰心在玉壺七字則尤爲神契矣

右紀聞陳康祺撰

吉夢熊

余同歲生吉瑋堂稱厚重君子尊考香畹先生以庶常早世蒙覆  
育者仲父通政渭厓公也閒述其行誼至悉君既卒而公孫鍾楷  
持冊來吳門屬製公傳奚敢辭按公姓吉氏諱夢熊字毅揚渭厓  
其號潤之丹陽人由優貢充官學教習乾隆壬申春秋試聯捷成  
進士選庶吉士甲戌散館授編修尋入御史臺轉兵科給事中歷  
鴻臚光祿太僕三寺少卿擢順天府府尹中間會再補同卿暫遷  
內閣侍讀學士終於通政使司通政使此公任職之大略也公在  
諫垣多建白如陳經筵事宜責講官覈實毋具文授宋程朱二子  
爲式天津五閘資農田蓄洩而啟放失時橫潦積困疏劾直隸總



督某漠視災區巡道某執拗債事風采凜然比巡視通漕釐革弊  
端胥吏咸懾又奏稽察剝船疏濬河道俾運穀增數速竣 上聽  
之薊之軍糧曩自西沽抵五里橋水淺恆懸閣高岸公請改陸運  
赴易州得早給兵與旗丁並稱便其尹京兆也絕苞苴平案牘兼  
施威惠釐穀肅清當酷暑捕蝗不冝張蓋大雨經旬民皆病涉措  
設多方而事集行旅頌德受代者乃諸城劉文正公統勳之弟文  
正遇公迎謂曰我敬君廉明爲從來府尹第一已飭余弟做君舊  
規勿更變蓋治績夙彰見重名相如是前後奉 命上書房授經  
閱年久從未一假沐所啟迪胥誠正修齊治平之義諸藩邸亦嘉  
其愨嘗總閱四庫書區門類讐譌缺罔弗精審而更善衡鑒凡三

與分校一典省闈均得人姜尙書晟孫相國玉庭其最也兩督閩  
學箴健訟拔寒儒有祖司寇之望陳侍郎霞蔚等半躋顯秩先是  
因艱歸主揚州安定講席教誘勤懇不獨時藝自作詩文恥蹈槃  
峴之習言必有根據扈從廣和屢荷宸獎著研經堂集冢孫鍾  
穎刊以行雖然此猶外跡也至內行肫摯孝友備敦尤卿大夫之  
所難公在家值鄰舍火延熬及居室室隘甚時母適歸甯公急負  
父毀垣出倉卒無可爲計旁有淺池掖父立其中獲免母患逆嗽  
疾發輒累月公衣不解帶躬侍湯藥少師兄傅野學博終身奉惟  
謹弟卽香畹先生也都中南旋驟病劇歿於舟次公聞哭之慟撫  
恤遺孤謀行狀委曲詳盡筆隱淚痕余固遵令原之難者殆不忍

卒讀若夫冊本邑書院置合族義田他人或足誇美舉而於公祇屬小節云惜余生也晚老成典型末由親炙以視公姑無論爵位卽德望何敢覲萬一惟念列詞館後公五十年直內廷復後公四十年舉比之擁亦差似且年家子也猥承誦諉特撮敘大端用伸仰止之懷併誌私媿焉

傳史氏曰史例官二品以上始立傳公止三品故館籍無考然公卓有過人者固江南通志所宜載也雖功用未盡展而樸誠清介絕乎漢汲黯唐李絳之風矣性蕭散在朝無赫赫聲里居則杜門卻軌雅不求譽頌實至名歸使節自閩回士子建甯思碑維揚肆業生獻頌擬請泰山北斗歿後猶崇祀鄉賢爭治眾議大吏申請

帝曰允諧嗚呼是豈可邀而致哉

右傳朱琿撰

國朝香房類律系制

卷九十一

三

錢載

錢載浙江秀水人乾隆十七年進士改庶吉士十九年散館授編修二十二年三月充會試同考官二十三年三月大考二等七月充功臣館纂修十二月署日講起居注官二十四年五月充廣西鄉試正考官二十五年三月充會試同考官七月 命以原銜充日講起居注官十月充續文獻通考纂修官十一月遷右春坊右中允二十六年五月遷侍讀八月擢右春坊右庶子三十年閏二月擢侍讀學士六月充江南鄉試副考官三十一年三月充會試同考官十月擢詹事府少詹事三十三年四月以開送試差贊善路斯道年力就衰 上責其瞻徇情面交部議處尋降二級調用

得旨革職從寬畱任十一月稽查左翼宗學十二月擢詹事府詹事二十六年十月充武殿試讀卷官三十八年十月擢內閣學士三十九年六月充江西鄉試正考官四十年七月入直上書房十月充武殿試正考官四十一年五月提督山東學政四十二年差滿命仍在上書房行走四十三年六月教習庶吉士十月充武殿試讀卷官四十四年六月充江西鄉試正考官四十五年正月奉命祭告陝西四川嶽瀆及歷代帝王陵三月擢禮部左侍郎六月充江南鄉試正考官十一月諭曰江南省第一名顧問卷頭場四書文三篇純用排偶於文體有乖錢載著交部議處部議降二級畱任十二月奏考證堯陵應在平陽不應在濮州經大

學士九卿議駁載又具摺奏辨 諭曰前據錢載奏考證堯陵應  
在平陽不應在濮州經大學士九卿議駁該侍郎又具摺奏辨朕  
因復交原議大臣再議經大學士九卿等奏請將該侍郎所奏濮  
州屬虛平陽屬實之處仍毋庸議已降旨依議矣經生論古反覆  
辨證原所不禁但旣形之奏牘並經廷臣集議卽不當再執成見  
況該侍郎奏稱呂不韋門下客浮說之譌夫呂不韋卽不足取亦  
尙不可以人廢言況其門下客所著之書所謂懸之國門千金不  
能易一字者豈能謂之不足據乎且其時去古未遠或尙有所承  
述今乃欲以數千年後虛揣之詞遽行翻駁有是理乎至其覆奏  
大要以酈道元水經注證濮州堯陵之虛不知水經注所稱今咸



陽西有堯陵者實道元當時所親見該侍郎轉據爲辨誣尤屬自相矛盾至其覆奏內有原奏祇辨堯陵之有無未嘗敢一字涉及改祀之語該侍郎兩次具摺之意旣欲考證虛實卽爲改祀起見否則又何用如此喋喋爲耶錢載本係晚達且其事只是考古是不加深究若遇朝廷政治亦似此曉曉不已朕必重治其罪卽如明季諸臣每因遇事紛呶盈廷聚訟假公濟私始則各成門戶繼且分樹黨援以致無益於國政而國事日非不可不引爲炯戒著傳旨申飭四十六年禮部恭擬壬寅年正月祀祈穀壇日用次辛 上訓飭之下部議應革職 加恩寬免詳曹秀先傳二月充會試知貢舉四十七年四月常雩以懸鐘及更衣幄次陳設不備

奉 旨交部嚴加議處部議革任得 旨寬免詳德保傳四十八年三月休致五十八年卒孫昌齡己未科進士改庶吉士見任編修

右 國史館本傳

擢石襟情蕭曠真率自如性豪飲嘗偕朱竹君學士金輔之殿撰陳伯恭王念孫兩編修過余冬夜消寒卷波浮白必至街鼓三四下時竹君推戴東原經術而擢石獨有違言論至學問可否得失處擢石顛發赤聚訟紛挐及罷酒出門漸斷不已上車復下者數四月苦霜濃風沙蓬勃餘容佇立以俟無不掩口而笑者善鑒別書畫尤工繪事晚年致仕歸藉以給朝夕乾隆庚戌年八十三猶

爲子做黃鶴山樵長林修竹極雨葉風枝之妙

古湖海詩傳張維屏錄

博石侍郎維正壬子副榜乾隆丙辰舉鴻博報罷至壬申成進士  
年四十五矣是年會試在八月香樹先生賀詩云刻成楮葉廿年  
運嘗論韓公伸紙時梁殿爭看和氏璧瓊筵笑插菊花枝注云今  
年會試題卽廿年前中副榜題也與退之不貳過論題事相類

右悟門詩話張維屏錄

錢少宗伯載維正壬子中副榜時金槍門總憲客禾訂交丙辰大  
魁宗伯屢試不傳日者謂逢申方中年四十五壬申果聯捷自是  
典文衡陟卿貳七十歸卅八十七方卒

右藤陰雜記符葆森錄

錢公載字坤一號礪石又號瓠尊晚號萬松居士秀水人乾隆壬申進士官至禮部侍郎學殖淵懋品行修潔詩精於杜韓蘇黃脫去畦町自成一家工書善水墨其畫得法於南樓老人而間出新意尤工蘭竹供奉南齋時屢邀 睿賞著有礪石齋詩文集

右事略李元度撰



博清額

博清額富察氏滿洲鑲黃旗人乾隆十七年繙譯進士授兵部主事遷戶部員外郎軍機章京上行走三十四年隨經略大學士公傅恆赴緬甸軍營十月大軍敗賊於新街博清額在事有功議敘加一級三十五年三月回京授正藍旗滿洲副都統七月署兵部侍郎兼理刑部侍郎事 詔偕戶部侍郎索琳赴土默特鞠誠親王壻納遜特固斯謀鳩格格案三十六年正月因不能究出實情反將案犯交納遜特固斯看守又不候 旨徑同索琳回京交部察議部議降二級畱任三月改授內閣學士七月 命赴四川軍營會鞠提督李煦副都統常保住諱賊事五月博清額據防卡兵

丁供詞劾煦等諱賊屬實 命再詳鞫六月木果木大營失利李  
煦常保住隨參贊海蘭察駐防免罪時賊勢鴟張博清額偕總督  
富勒渾馳守蒙古橋復帶兵三百赴美諾與海蘭察相機策應

上嘉之授領隊大臣 諭曰博清額以派往審事之人卽同富勒  
渾帶兵馳守蒙古橋旋往美諾與海蘭察督兵聲援連日海蘭察  
奏到諸摺俱有條理必係博清額爲軍機章京辦事年久熟習機  
宜故能周到若此著賞戴孔雀翎八月同海蘭察奏整理軍器俟  
將軍阿桂至日隴時擬辦進兵事宜十月得 旨博清額辦事不  
及阿桂其攻剿亦不及海蘭察不必在軍營領隊卽著回京仍在  
軍機章京上行走三十九年署理藩院侍郎四十年授正黃旗蒙

古副都統四十二年七月署刑部侍郎四十三年閏六月 命往  
庫倫辦事四十四年授兵部侍郎四十五年十月遷理藩院尙書  
署左都御史十一月 命往西藏辦事四十九年授正白旗蒙古  
都統五十年 詔來京未至卒 諭賞銀三百兩料理喪事 賜  
祭葬諡恭勤

右 國史館本傳



日本書紀卷之二十一

三

伊齡阿

伊齡阿佟佳氏內務府鑲黃旗滿洲人乾隆十八年由官學廩膳生考取筆帖式二十四年補堂主事洊升郎中三十四年授九江關監督四十年加奉宸苑卿銜尋巡視兩淮鹽政四十一年十月調淮關監督 諭曰伊齡阿奏兩淮惟綱食口岸兩載以來鹽引暢銷各商感恩叩懇面請聖訓等語所奏大謬今春於山東接駕時諸事頗露高興鹽政實非所宜是以將伊調淮關監督今春甫於山東行在召見閱時未久又欲陛見不過來京時代商人呈遞貢物所見甚屬小器至口岸暢銷私販絕迹各商營運紓徐於眾商自屬有益前此金川用兵之時眾商懇請助餉尙屬有因今大

功告成部庫尙存六千餘萬朕方以日漸盈積籌所以裕民藏富之道豈可復令商人爲此無益之捐助耶伊齡阿識見鄙瑣在鹽政任內不知如何多事著高晉卽速秉公確查迅速覆奏慎勿循飾干咎尋奏伊齡阿聰明外露遇事有意見長其辦理鹽務均係率由舊章尙無紛更多事情弊又諭曰新任鹽政寅著於到任後卽將伊齡阿有無婪索入己情弊迅速訪查確實卽行奏聞旋奏伊齡阿平日辦事不無矜長好勝該商等有意迎合致多糜費實無勒索侵肥情事得旨料伊亦不敢不必吹求矣四十二年仍授兩淮鹽政五月諭曰兩淮鹽政見有查辦場竈餘鹽事宜必須鹽政悉心安定章程方能有益寅著人甚糊塗斷非伊所能

料理因念伊齡阿尙屬能事已降旨仍調兩淮鹽政矣伊在鹽政任內屢派商人多辦貢物頗露高興朕所不取又恐其日久累商將伊調任淮關俾知改悔伊在淮關兩年關務漸有起色今仍調鹽政務宜仰體教誨成全之恩痛改前非勿萌故智至見在查辦老少餘鹽務要緊關鍵全在辦理得法則弊源自可肅清伊齡阿俟接奉部覆後先將籌辦情形專摺具奏尋議將淮南淮北各場所產鹽斤俱設立循環印簿飭各分司場員逐一清查履勘冊報并緝私各款分條奏入均如所議行八月奏酌定查緝私鹽處分一摺獲私鹽承審官不能究出來歷及運往何處率混具詳照故縱例革職一鹽引未完四分以上者仍照舊例載督銷五分以上

例降職降俸者改降二級調用六分以上例降三級者改降三級  
 調用七分以上例降四級者改降四級調用其有軍功加級者准  
 抵別項紀錄不准議抵一私鹽要隘應委候補千總巡緝半年更  
 換獲私四千以上准畱巡一次半年期滿能緝積慣大夥在萬斤  
 以上者遇缺卽補兵役倍賞在漏私至四千斤者降一級畱任四  
 千斤以上降一級調用萬斤以上革職兵役嚴處一嗣後儻有大  
 夥梟徒如嶧縣鹽城拒捕傷差之案將包庇之兵役從重治罪私  
 售竈丁及窩頓匪犯發伊犁烏魯木齊爲奴 從之四十五年調  
 粵海關監督四十六年閏五月巡視長蘆鹽政 諭曰據伊齡阿  
 奏報接印任事日期一摺內有務期鹽饒環轉關課豐盈之語此

次更換鹽政因西甯年力就衰是以令伊齡阿前往其實西甯在任時辦理原無貽誤之處並非欲關稅增加另用伊齡阿也該鹽政到任後祇須查明章程妥協經理尤在體卹商力使得轉輸自如或西甯任內辦理未妥自當籌畫調劑但不可先存一關稅充盈之見若專以多取見好爲是又復如前高興以致苦累眾商是不能承受朕恩矣著傳諭伊齡阿諸事務須恪遵訓諭愛惜商力以期勿負委任八月奏改青州分司爲天津分司四十七年二月仍授兩淮鹽政四十八年十二月遷武備院卿仍留鹽政之任四十九年閏三月授總管內務府大臣四月 命偕戶部右侍郎曹文植覆檢海昇殿死伊妻吳雅氏一案得實 敕部議旋署刑

部侍郎六月授鑲紅旗滿洲副都統八月 命偕曹文植赴通州  
會同倉場侍郎督辦漕運嗣以籌辦迅速特予甄敘五十一年二  
月浙江巡撫福崧奏浙省倉庫虧缺請展彌補限期 上命尙書  
曹文植侍郎姜晟同伊齡阿前往查辦三月 命福崧來京候旨  
以伊齡阿代之 諭曰伊齡阿既任浙江巡撫海塘是其專責不  
可不實力妥辦伊係內務府人員久任鹽政俸廉甚厚自必積有  
餘貲今既擢用浙江巡撫若再於地方鹽務內稍思染指不但不能  
承受朕恩並恐不能保其素有伊齡阿受朕委任伊尙明白曉  
事務須仰體朕意實力整頓復 命大學士阿桂赴浙會同查辦  
虧空尋查明倉庫虧缺實數奏請分別在任年月勒限分賠下軍

機大臣會同戶部議行閏七月浙江學政竇光鼐奏參平陽縣知縣黃梅借虧空名目科斂累民及母喪演戲各款仍命阿桂曹文植會同伊齡阿查辦尋阿桂覆奏黃梅並無那移勒派情事丁憂演戲一節查係該縣爲伊母慶九十生辰於演戲之夜痰壅猝故請將竇光鼐下部議旋伊齡阿奏參光鼐親赴平陽招告傳集生童發怒咆哮用言恐嚇並勒寫親供鎖拏書役用刑偏喝命革竇光鼐職復奏光鼐在平陽縣城隍廟多備刑具追究書吏生監平民一槩命坐及由平陽回省攜帶多人曉曉執辯命將光鼐交刑部治罪光鼐尋奏親赴平陽查出該縣計畝派捐並據生監等繳出田單印票借票收帖各紙諭曰前據伊齡阿奏竇



光備回省攜帶生監多人以爲質證舉動頗狂且恐煽惑人心啟  
訐告抗官之漸是以降旨將寶光備拏交刑部治罪今觀寶光備  
所奏又似黃梅實有勒派侵漁等情且有田單印票借票收帖各  
紙確鑿可據豈可以人廢言阿桂見已起程在途接奉此旨仍著  
回至浙江秉公審辦此時寶光備自己由浙起解阿桂於途次遇  
見即將伊帶回浙省以便質對並 命江蘇巡撫閔黜元赴浙會  
鞠又 諭曰伊齡阿兩次奏參寶光備未必不受屬員慫恿此案  
伊齡阿無庸會辦以免迴護尋阿桂等覆奏訊黃梅婪索屬實  
諭曰前據阿桂等審擬黃梅勒索一案業經節次降旨並將阿桂  
等交部嚴議矣今思伊齡阿於種種勒派婪索雖非伊任內之事

但曾經奏參寶光庸而於寶光庸所奏黃梅在任勒借錢文及侵  
用田單公費朋帖各款何竟毫無聞見豈伊齡阿但能訪察寶光  
庸而不能訪察黃梅乎卽使所奏寶光庸情節係溫處道張裕穀  
等官員相護聯爲一氣率行裝點扶同具稟伊齡阿爲其所蒙蔽  
然爲督撫者釐奸剔弊是其專責豈舍此張裕穀等數人之外別  
無可寄耳目又何以察吏安民耶總之伊齡阿因寶光庸屢次曉  
曉爭辯心存憎惡成見一聞屬員之言不察虛實遽行奏參而於  
黃梅則不免意存瞻徇雖有侵貪款蹟亦置若罔聞以爲前任旣  
已辦過若再明辨恐累及前任卽此一見豈可復膺封疆之任伊  
齡阿著來京在總管內務府大臣上行走並兼管崇文門監督十

一月補兵部右侍郎十二月 命管理圓明園八旗及包衣三旗  
官兵兼管造辦處事務五十二年正月授正黃旗蒙古副都統十  
月總管工程事務五十三年八月充順天鄉試監臨官五十四年  
三月充會試知貢舉八月復充順天鄉試監臨官會順天府尹蔣  
賜棨等查出萬治庭等頂冒聯號等弊 諭曰伊齡阿派辦鄉試  
監臨並會試知貢舉業已三次朕因在侍郎中尙能辦事且恐科  
場外簾監試提調等官承辦日久易滋弊端是以屢次特派伊齡  
阿辦理該侍郎自必倍加認真釐剔弊竇方爲無負委任乃本年  
順天鄉試竟有頂冒代倩聯號等弊則是一味邀眾舉子之譽並  
未實力查察以致士子串通胥吏作奸犯科非尋常疎玩可比其

咎實難寬貸見交部嚴加議處自必予以實降伊齡阿著先行解任聽候部議尋議降二級調用五十五年五月 諭曰前因伊齡阿辦理科場不能實力稽查一味沽名邀譽是以將伊降調今因內務府事務較繁應量爲添派以資稽覈伊齡阿著加恩以三品銜在內務府大臣上行走八月上駟院卿巴甯阿奏大凌河牧廠內有不能牧放之空閒廠地請查丈招墾 命伊齡阿往勘嗣勘明大凌河東西牧廠應墾荒地共三十一萬畝有奇應添設莊頭承種復丈出私墾地一萬八千九百餘畝應令原業承種照例升科俱下部議行五十六年七月管理三山事務十一月任崇文門副監督五十七年正月授刑部右侍郎三月兼署工部左侍郎九

國朝名臣列傳卷之十一

月調兵部左侍郎五十八年六月調工部右侍郎兼管錢法堂事  
務六十年九月卒子德昌原任浙江鹽運使

右 國史館本傳

成德

成德葉赫氏滿洲正藍旗人由文生員於乾隆十九年考取內閣中書二十六年升侍讀二十九年授銀庫員外郎三十一年調戶部員外郎三十二年擢江西道監察御史四十三年晉吏科掌印給事中四十八年奏言臣查辦赴任違限官員各案接准督撫展限咨文開或限期將滿將原案之員撤回改委別員署理卽以改委之員接署之日起另扣限期度其情節非於原委之員操縱之閒別生意見離任之員任內有牽掣事故因藉改委以寬時日其中難保必無情弊嗣後不得託故改委以致輾轉遲緩如此交代既嚴而州縣更加警惕矣奉 旨此奏似有所見又奏云京察填

註四格考語理當詳慎覈對以定等第此次有二等四格一等考語者一員有二等四格三等考語者十六員經吏部依所開四格俱改列二等辦理誠恐照格更改勢必高下混淆請嗣後吏部預將一二三等定例四格考語式樣分錄清單咨送各衙門如移送冊籍有四格考語不符將承辦之員附疏題參下部議行五十七年擢通政司副使五十八年授太僕寺卿五十九年四月轉通政使十月授都察院左副都御史六十年九月擢戶部右侍郎十二月授鑲紅旗漢軍副都統嘉慶元年七月調工部左侍郎九月充經筵講官時長蘆商人范光震以商眾欺隱窩價呈控 命刑部侍郎張若淳偕成德前往查辦奏入 諭曰張若淳成德審訊范

光震呈控商總欺隱窩價分別定擬一摺所辦殊屬含混且案據俱未明確不足以服該鹽政運司及商眾之心著該侍郎等卽將案內人證及案卷等項帶京並令方維甸阿林保一併來京交軍機大臣會同該部另行審擬具奏旋鞫得實 諭曰張若涇等審辦此案當於鹽政運司有無請託賄囑情弊及商總等有無欺隱高價審明方爲正辦而一切俱未能審訊明確於鹽務民食是否窒礙情形槩置不問輒將所運鹽斤先行查抄變價以致沿途停運俾州縣無鹽接濟是何理耶且四商內惟楊秉鉞係被告之人其查善和查世延衛素昌三人並無應得罪名乃一併議令變價入官更屬乖謬張若涇成德辦理此事實屬錯誤著先行交部嚴



加議處十月 諭曰此案方維甸阿林保如有聽受賄囑情事不特發往軍臺尙當重治其罪乃張若淳成德並未審明案情率將方維甸阿林保問擬軍臺不足以成信讞而其辦理不善之處卽質之方維甸及阿林保亦俯首無辭至張若淳成德辦理此事並不查明情節率行定擬本應照部議降調但念伊二人亦祇糊塗不曉事體尙無他弊本日吏部議已加恩將該侍郎所得處分從寬改爲革職畱任所有軍機大臣等定案摺內請將張若淳成德嚴加議處著加恩寬免以示勸懲惟允宥過施恩至意十二月調鑲黃旗滿洲副都統二年三月兼署理藩院侍郎八月調吏部右侍郎十一月擢都察院左都御史兼鑲黃旗蒙古都統四年三月

擢刑部尙書調補鑲黃旗漢軍都統五月 賜紫禁城騎馬五年  
充崇文門副監督六年二月授戶部尙書 命在軍機處學習行  
走四月調鑲藍旗滿洲都統時軍務將竣 諭曰成德本年甫令  
在軍機處行走亦著加恩交部議敘尋議給軍功加一級紀錄三  
次七年三月因病請假 諭以不必開缺旋卒奉 特恩晉贈太  
子少保應得卹典如例 子謚恪慎子嵩安任戶部員外郎岳安  
任工部員外郎

右 國史館本傳

國朝通志卷之八十一

三

戈源

公諱源字仙舟自號曰橘浦然仙舟之號特著於士大夫間少負  
奇慧以隨父任於浙江官署不克就試年十六旋里一試卽補縣  
學生是年卽舉於鄉越歲甲戌成進士計自童子試至釋褐不滿  
一載眉宇秀發而老成深穩望而知其有吏才故 高宗純皇帝  
始 命爲縣令旣而 命學習於部曹蓋將使練習政事老其才  
而大用也在戶部屢居異等旋改御史轉給事中皆侃侃多所建  
白戊申擢太僕寺少卿督學山西者四載以未疾致仕故里無尺  
土寸椽流寓京師竟以貧病卒年僅六十三耳公生長世家少年  
高第而落落無紈袴習亦無名士風流習與朋友言恆有經世之

志不肖徒事温飽初公兄芥舟先生方舟先生相繼歿承藉舊業  
尚薄有田宅然無如食指之太夥公慨然曰吾忝爲官月俸尙足  
贍妻子九兄老而不第諸姪亦俱未成立是殆將不自存也乃以  
王橋田宅與兄以河閒府舊邸與方舟之子以京師校尉營舊宅  
盡與芥舟之子自不取豪釐坐是遂大貧殊不悔也凡至親之貧  
者多收養於家廩祿弗能給則齋鹽糜粥豐儉與其故其家內外  
上下同一食嘗戲謂余曰十刹海之法萬物平等一僧一室佛亦  
僅占一室一僧一盂飯佛亦僅供一盂飯佛尙可爾吾何不可與  
廝役同也嗟乎此其胸次居何等也使得行其志視天下之人如  
是矣居官多異政殆不能一一數其督理街道不動聲色能使豪

強侵占無所容塗徑圯墊無不治而胥吏不能舞弊取一錢余處坊橋宅前偶穢雜不治坐車上呼余僕隸立使掃除不以余故而牽就其官學使卷必親閱甚紕繆者必塗乙而張之壁逐句評駁如塾師爲弟子批課藝晉人多不嫻聲病公一一甲乙其試牘如批時藝其佳者則刊布以爲式其中或字句之疵類則點竄完善而細論所以點竄之故積勞成疾多由於此然公每莅一官必勤舉其職事事不苟可以想見矣使得竟其用樹立必有可觀者乃天不假年竟使齋志於地下是則深可惜耳公不喜聲氣攀援恆與物寡合宦資既深與特髦益不相款治病廢以後杜門卻掃幾不知長安道上有是人故公之行事漸不爲後進所知弋紀故世

婚余與公又同年相契余不志之恐後來益無所考乃撮其大端  
作爲此傳庶鄉黨有所矜式焉

右傳紀昀撰

國朝耆獻類徵初編卷九十二目錄

卿貳五十二

王鳴盛

阿肅

曹學閔

李封

杜玉林

王昶



臣等謹將所請開列

國朝耆獻類徵初編卷九十二

通奉大夫前署江西巡撫江西布政使司布政使湘陰李桓輯

卿貳五十二

王鳴盛

西泚先生以篤學鴻文登巍科入詞館不數歲而參綸閣班九卿  
貴且顯矣甫逾強仕奉諱星奔服闋遂不復出里居三十餘年日  
以經史詩古文自娛撰述等身弟子著錄數百人嘗取杜少陵詩  
句以西莊自號學者稱西莊先生西莊之名滿海內頃歲忽更號  
西泚予愕焉諷使易之不肯私謂兒輩曰泚者止也汝舅其不久  
乎西泚於經義專宗鄭氏茲以嘉慶二年十二月二日捐館歲行

在巳龍蛇之戾與康成先後一揆斯亦異矣子與西泚總角交子妻又其女弟幼同學長同官及歸田衡宇相望奇文疑義質難無虛日予鶩緩西泚數鏃厲之始克樹立平生道義之交無逾西泚嘗以異姓軾轍相況匪由親串暱就輒相標榜也今窀穸有期而子視息猶在人世誌石之銘奚敢辭西泚姓王氏諱鳴盛字鳳階一字禮堂外舅虛亭先生長子爲世父升孟公後幼隨王父卓人公丹徒學署奇慧四五歲日識數百字縣令馮公詠以神童目之稍長習四書義才氣浩瀚已有名家風度年十七補嘉定縣學生學使歲科試屢占第一鄉試中副榜才名籍甚巡撫陳文肅公大受取入紫陽書院肄業東南才俊咸出其下在吳門與王琴德吳

金晉趙損之曹來殷諸君唱和沈尙書歸愚以爲不下嘉靖七子  
又與惠徵君松厓講經義知誥訓必以漢儒爲宗服膺尙書探索  
久之乃信東晉之古文固僞而馬鄭所注實孔壁之古文也東晉  
所獻之大誓固僞而唐儒所斥爲僞大誓者實非僞也古文之眞  
僞辨而尙書二十九篇粲然具在知所從事矣乾隆十二年江  
南鄉試十九年會試中式殿試一甲第二人及第授翰林院編修  
蔣文恪公溥爲院長重其學延爲上客二十三年天子親試翰  
詹諸臣特擢一第一名超遷侍講學士充日講起居注官其冬  
扈從盤山明年充福建正考官未歲事卽有內閣學士兼禮部侍  
郎之命還都召對天語甚溫未幾御史論其馳驛不謹部

議降二級明年授光祿寺卿扈從木蘭秋獮二十七年以平定回  
 部 覃恩 誥封三代 賜貂皮大緞等物二十八年丁朱太淑  
 人憂去職回里既除喪以虛亭先生年高遂不赴補其後入都祝  
 萬壽者一迎 駕行在者再皆有文綺之 賜 恩遇不異供  
 職時而西泚自以多病無宦情矣性儉素無玩好之儲無聲色之  
 奉晏坐一室左右圖書呬晤如寒士卜居蘇州闔門外不與當事  
 通謁亦不與朝貴通音問唯好汲引後進一篇一句之工獎賞不  
 去口或評選其佳者刊而行之嘗言漢人說經必守家法亦云師  
 法自唐貞觀撰諸經義疏而家法亡宋元豐以新經義取士而漢  
 學殆絕今好古之儒皆知崇注疏矣然注疏惟詩三禮及公羊傳

猶是漢人家法它經注則出於魏晉人未爲醇備故所撰尙書後  
案專宗鄭康成鄭注亡逸者采馬王補之孔傳雖僞其訓詁猶有  
傳授非盡鄉壁虛造閒亦取焉經營二十餘年自謂存古之功與  
惠氏周易述相埒又撰十七史商榷百卷主於校勘本文補正譌  
脫審事迹之虛實辨紀傳之異同於輿地職官典章名物每致詳  
焉獨不喜褒貶人物以爲空言無益實用也蚤歲論詩溯原漢魏  
六朝宗仰盛唐中年稍變化出入香山東坡晚年獨愛李義山謂  
少陵以後一人前後吟詠甚富手自刪定爲二十四卷王琴德謂  
其以才輔學以韻達情粹然正始之音非虛憍恃氣者所及古文  
紆徐醇厚用歐曾之法闡許鄭之學一時推爲巨手又撰蛾術編

百卷其目有十曰說錄說字說地說制說人說物說集說刻說通說系蓋做王深甯顧亭林之意而援引尤博贍焉自束髮至垂白未嘗一日輟書年六十八兩目忽瞽閱兩歲得吳興醫鍼之而愈著書如常時春秋七十有六夫人寶山李氏子三人嗣構候選州同嗣穫嗣疇皆學生女六人壻姚麓嚴曜霄黃恩長顧亦宋宋豫芳吳振錡孫男女若干人銘曰

古三不朽立言其一言非一端所重經術漢儒治經各有師承後儒鑿空師心自矜堂堂光祿樸學是好祖述後鄭升堂覩奧學優而仕實大聲宏鷺鳥累百鸞鴛先鳴立朝九考晉秩二品優游林泉著作自任經明史通詩癖文雄一編纔出紙貴吳中弇山元美

畏壘熙甫兼而有之華實相輔枌榆共社科第同年肩隨兄事中  
以婚媾有過必規有疑互質相思披衣老而愈密壑舟云逝大名  
長留斯文光燄芘護松楸

右墓誌銘錢大昕撰

王鳴盛字鳳喈嘉定人明司業逢年之後少敏慧弱冠補諸生屢  
試第一巡撫招入蘇州紫陽書院院長歸安吳大受常熟王峻先  
後賞其才爲文鎔經鑄史風發泉涌乾隆十二年鄉試以五經中  
式會試不第歸蘇州時沈德潛以禮部侍郎致仕海內英駿皆師  
之門下以鳴盛爲最又其時長洲吳泰來上海趙文哲張熙純及  
鳴盛妹夫錢大昕皆以博學工詩文稱而羣推鳴盛爲渠帥十九



年以第二人及第授編修公卿爭禮致之刑部侍郎秦蕙田方修五禮通考屬以分修而尤見重於掌院學士蔣溥二十一年大考翰林鳴盛名第一特擢侍講學士三十四年考試差第二充福建鄉試正考官尋升內閣學士兼禮部侍郎事竣還京以濫用驛馬被吏議左遷光祿寺卿尋丁內艱歸遂不復出久之遷居蘇州學者望風靡至鳴盛又有江左十二子苔岑諸集之刻聲氣益廣名望益深而鍵戶讀書絕不與當事酬接家本寒素往往賣文諛墓以給用餘則一介不取也偃仰自得者垂三十年嘉慶二年十二月歿於蘇州鳴盛爲詩少宗漢魏盛唐排律則倣元白皮陸在都下見錢載蔣士銓輩喜宋詩往往效之後悔復操前說於明何景

明李攀龍李夢陽王世貞陳子龍及國朝王士禛朱彝尊之詩服膺無間大抵以才輔學以韻達情粹然正始之音也古文不專一家於明先嗜王慎中繼倣歸有光擷經義之精奧而以委折疏達出之詩文集凡四十卷先與元和惠棟吳江沈彤研經學一以漢人爲師鄭元許慎尤所墨守所著尙書後案軍賦考精深博洽比古今疑義而折衷之又著十七史商推於一史中紀志表傳互相稽考因而得其異同又取稗史叢說以證其舛誤前人糾繆拾遺之作不屑沿襲摭摭也晚作蛾術編有說錄說字說地說制說人說物說集說刻說通說系十門共一百卷亦以淵灝稱於世弟鳴韶字鶴谿少從兄鳴盛游學日進兼工詩畫爲古文以清簡爲

工兄奇其才責以制舉業鳴韶謂人曰兄固愛我不知我名心素  
淡也爲新陽縣學生時鳴盛已官翰林鳴韶獨晨昏侍父母閉戶  
研究典衣購書額其堂曰逸野旁闢一室縣蓑笠以見志嘗自作  
蓑笠軒圖少詹事錢大昕視學廣東邀與偕往途中遇名勝必往  
游有記程詩若干卷及歸遂於逸野堂授徒講業以終著文十卷  
春秋三傳攷十三經異義攷祖德述聞竹窗瑣碎共若干卷鳴盛  
次江左十二子詩以鳴韶居其一論者不以爲私

右傳王昶撰

王鳴盛字鳳喈一字禮堂別字西莊嘉定人生而敏慧四歲隨王  
父讀書丹徒學畧日識數百字縣令馮詠以神童目之年十二爲

四書文才氣浩瀚己有名家風度年十七補諸生屢試第一鄉試中副榜才名籍甚江蘇巡撫陳文肅公大受招入蘇州紫陽書院院長歸安吳大受常熟王峻皆賞其才乾隆十二年鄉試以五經中式會試不第客游蘇州時沈文愨公德潛以禮部侍郎致仕海內英雋之士皆出其門下與王侍郎蘭泉先生錢少詹大昕吳內翰企晉及曹仁虎趙文哲黃文蓮相唱和文愨以爲不下嘉靖七子又與惠松崖徵君講經義知詁訓必以漢儒爲宗精研尚書久之乃信東晉之古文固僞而馬鄭所注實孔壁之古文也東晉所獻之大誓固僞而唐人所斥爲僞大誓者實非僞也古文之眞僞辨而尚書二十九篇粲然具在知所從事矣十九年莊培因榜以

第二人及第授編修公卿爭以禮致之刑部侍郎秦蕙田修五禮  
通考屬以分修尤見重於掌院學士蔣文恪公溥二十三年天  
子親試翰詹諸臣特置一第一名擢侍講學士充日講起居注  
官明年充福建正考官未歲事卽有內閣學士兼禮部侍郎之  
命還京有御史論其馳驛濫用驛馬望吏議左遷光祿寺卿尋丁  
內艱歸遂不復出卜居蘇州閭門外不與當事通亦不與朝貴接  
家本寒素賣文諛墓以自給餘則一介不取也閉戶讀書日夕探  
討嘗謂漢儒說經必守家法亦云師法自唐貞觀撰諸經義疏而  
家法亡宋元豐以新義取士而漢學殆絕今好古之士皆知崇注  
疏矣然經注惟詩三禮及公羊傳猶是漢人家法餘經則出於魏

晉未爲醇備故所撰尙書後案以鄭馬爲主不得已間采僞孔王  
肅而唐宋諸儒之說槩不取焉又撰十七史商推一百卷主於校  
勘本文補正譌脫審事迹之虛實辨紀傳之異同最詳於輿地職  
官典章制度獨不喜褒貶人物以爲空言無益也又有蛾術編一  
百卷其目有十說錄說字說地說制說人說物說集說刻說通說  
系其書辨博詳明與洪容齋王深甯不相上下詩宗盛唐中年出  
入於香山東坡晚年獨愛玉谿生謂少陵以後一人手定詩集二  
十四卷古文若干卷老年因讀書窮日夜不輟目遂瞽有吳興醫  
鍼之而愈著書如常乃自號西沚卒年七十有六

右漢學師承記江藩撰

禮部通志卷之十一

禮堂晚年喜勸人學温飛卿詩爲余題新田十憶圖五古十章時年七十有四瞽目重開亦一奇也

右石溪舫詩話吳嵩梁撰

光祿王西莊先生鳴盛家居時有無賴子與人賭勝醉罵王氏之門門者不能忍先生力止之次日無賴子酒醒其母挈之詣先生家請罪笑謝之曰昨汝酒醉我卻不怪但以後醉了若罵他人恐致獲咎無賴子惶恐而歸戒酒終身卒無事先生涵養如此宜其瞽目復明年躋大耋也

右紀聞陳康祺撰

阿肅

阿肅滿洲鑲白旗人姓伊爾根覺羅氏乾隆十九年進士改庶吉士二十五年散館授檢討二十六年遷司經局洗馬二十八年大考四等仍降檢討二十九年遷侍讀三十年充日講起居注官七月充山西鄉試正考官三十一年三月充會試同考官三十二年四月擢詹事府詹事三十三年四月開送試差贊善路斯道年力衰邁 上以其瞻徇交部議處部議降二級調用得 旨改爲革職畱任九月 命提督福建學政三十四年五月失察古田劣生鍾超倫等滋事部議革任 諭從寬免其革職仍註冊三十五年九月請復原名考試之例疏稱舊例凡舉貢生監犯事情罪較輕



斤革後能改過自新准其原名應試令地方官查明申送提學卽  
准收考誠恐州縣官吏冒濫申詳難保無弊請嗣後該州縣官於  
結案時申明通詳督撫學政藩臬批飭存查方准收考其未經通  
詳批准者不得徑詳學政收考庶有稽查下部議駁 諭曰部駁  
甚是依議阿肅係滿洲翰林初授以學政之任理應實心辦事整  
飭士習今所奏緣事斤革舉貢生監原名應試名爲嚴覈而意欲  
從寬多爲收考地步若伊不諳成例此奏出於旁人愆慮則是爲  
人所愚不應糊塗至此若阿肅冀以此奏取悅於眾則有意沽名  
尤爲不合著交部議處部議革任十一月 諭曰前據阿肅條奏  
緣事斤革之舉貢生監於結案時詳報學政預爲收考地步殊乖

整飭士習之意降旨交部議處今經部議降一級調用阿肅係革職畱任又革任註冊之員無級可降請卽行革任覈其情罪尙可不致褫職而學政則不宜復畱著加恩以詹事降一級來京候旨其從前革任註冊之案補官日一並帶於新任三十八年九月奉  
上諭阿肅遇有侍講缺出卽行補用並著在日講起居注官上額外行走三十九年三月 命在上書房行走四月授光祿寺卿十月擢都察院左副都御史四十年三月充會試副考官四十一年五月遷禮部右侍郎十一月兼署兵部侍郎四十二年八月充順天鄉試副考官四十五年五月兼公中佐領十一月調吏部侍郎四十八年正月初七日阿肅家夜演影戲乳婦王朱氏乘間謀害

阿肅幼子經軍機大臣會同審擬具奏 諭曰軍機大臣會同刑部審擬吏部侍郎阿肅家乳婦王朱氏謀害伊子一案供詞內有正月初七日二更時合家俱聽影戲之語朕以是日係齋戒且值忌辰阿肅家不應演唱影戲指出詢問隨據軍機大臣奏請將阿肅交都察院嚴加議處等因本年新正初二三日卽逢時享齋戒之期朕雖未親詣行禮值齋戒日內並不聽演音樂初五日方始幸豐澤園筵宴外藩阿肅身爲侍郎豈有不知乃竟於齋戒日期內伊雖在外聽任家中演唱影戲卽據稱爲娛侍伊母亦豈不可稍緩數日至元宵令節耶阿肅乃滿洲侍郎出身何至不知體制昏憤若此且本日召見阿肅詢及此事並加慰問云伊子垂死而

得活將來或尙可能成器伊竟毫無感恩惶悚之意竟同木偶看來阿肅全係霑染習氣非無心過誤可比阿肅著交部嚴加議處旋議革職 諭曰阿肅係滿洲侍郎於齋戒忌辰之期聽任家中演戲非尋常錯誤可比著革去侍郎第念在上書房行走尙屬勤慎加恩賞給翰林院侍讀學士在上書房行走兼公中佐領四十九年充封朝鮮國王世子副使五十年擢內閣學士兼禮部侍郎充文淵閣直閣事五十一年八月充順天鄉試副考官五十四年因上書房曠班 命褫阿肅職仍在上書房效力行走旋授光祿寺少卿五十七年卒子富連候補筆帖式

右 國史館本傳

日本書紀卷之八

三十一

曹學閔

珪聞慕堂先生之訃既悲老成同志之凋謝已而編修錫齡昆季以書來請爲誌銘珪不得辭公曹姓諱學閔字孝如慕堂其號也山西汾陽人曾祖復琦祖應璽父曰英皆以公貴 誥贈中議大夫太僕寺少卿曾祖妣靳祖妣司樊母王皆 誥贈淑人兄弟四人學曾學思公次三其季學雍友于兄弟命錫齡以其官 贈學曾翰林院庶吉士 贈學思翰林院編修命祝齡爲學雍後公幼多奇兆乾隆六年辛酉舉於鄉會試報罷遊江浙名山水歸而設教里中勵志講學甲戌成進士改庶吉士庚辰散館授職檢討充武英殿功臣館纂修官辦翰林院事二十九年授河南道監

察御史三十三年遷刑科給事中巡視西南北城己丑充會試同  
考官三十五年轉吏科給事中公爲言官條奏事皆體要可施行  
三十七年授光祿寺少卿明年遷通政司參議擢太僕寺卿甲午  
充順天鄉試同考官四十一年稽察右翼覺羅宗學四十三年以  
復陳舉人會試徑由州縣出結赴部一摺部議降三級四十五年  
補鴻臚寺少卿前後屢 駕熱河 召見垂詢 上知公樸誠也  
四十八年遷內閣侍讀學士甲辰充武會試同考官先是公爲御  
史上言宜考古制建辟離於國子監部議未行至是會 天子將  
臨雍發 睿思 命大臣規濬園水禮樂備舉 上憶及前奏  
特旨嘉獎曹學閔能獨抒所見其建白亦不可沒有缺卽請旨升

用眞異數也五十年正月與 乾清宮千叟宴 恩賜便蕃五十  
一年超擢宗人府府丞復 命稽察右翼覺羅學是時公子錫齡  
在翰林有聲方督學雲南祝齡孝廉侍左右初公起家寒素以開  
濟自許與人交上下剛柔動靜無所不當地方利病口辨手畫井  
并有條目可措置雖富貴儉約如諸生及年過六旬反而講求性  
命之學泊然寡默幾於靜得公與先兄竹君同年進士與珪同館  
居同巷晚而交益摯每深夕來危坐相對閒則邀予至其齋蔬食  
清談蓋不愧素心晨夕者孳孳爲善不倦修山右三忠祠宣武門  
外椒山先生故宅祠及三晉會館南新門外義園永定門外掩骼  
會皆躬親襄舉擘畫可垂久性既恬淡官宗丞之年十月以嗽上



氣疾奏請解任調理奉 旨准以原品休致所著詩文彙若干卷  
藏於家晚作多心得近道者明年春錫齡自滇歸公僦道士院課  
孫養性手書寄珪猶以精進爲勛是冬感風寒力疾持心端坐而  
逝蓋乾隆五十二年丁未十二月八日丑時也生於康熙五十八  
年己亥十二月十三日子時年六十有九 誥授中議大夫例授  
通議大夫配同縣任淑人白首相寶有內則子五成者二錫齡乾  
隆乙未進士翰林院編修記名御史祝齡庚寅舉人議敘知縣爲  
叔父後孫八汝瀆汝瀾汝淵汝沆汝洵汝涵汝藻汝淳女一孫女  
五乾隆五十三年戊申十月十二日申時葬於池家莊之新阡銘

曰

木之材爲末爲舟木之神宜山宜邱材於人乎有益而無害神返其天乎與造物者遊是一非二吾以咨莊周

右墓誌銘朱珪撰

宗人府府丞汾陽曹公學閔之葬禮部侍郎朱公珪旣爲銘其藏而公子錫齡祝齡復遺書請予文其麗牲之石子與公同登進士久而以道義相取譬諸草木臭味無差池也公又嘗稱予文以爲有法述德感舊後死者之責其何敢辭謹按公字孝如號慕堂曾大父復琦大父應璽父曰英皆以公貴 贈中議大夫太僕寺少卿加一級公幼孤勤苦自立舉辛酉科鄉試甲戌成進士改翰林院庶吉士在館六年授檢討卽充武英殿纂修官以院長奏入院

國朝通志卷之九十一  
辦事改補河南道監察御史是時準噶爾回部初入版圖公奏請  
增修 大清一統志以昭 本朝畏懷之盛有 詔允行轉刑科  
給事中又轉吏科掌印給事中會三輔亢旱公奏請清理刑獄將  
朝審三次緩決人犯減等發落即日 召見下 詔施行公在臺  
垣八年所陳奏皆有關 朝廷掌故及於民生吏治有裨益者累  
擢鴻臚寺少卿光祿寺少卿通政司參議太僕寺少卿初公在給  
事言會試舉人宜徑由州縣出結送部以防展轉需索事下禮部  
議格及是復奏申前說 上以卿寺無言事之責且近明季爭辨  
陋習下部議降三級用頃之復補鴻臚寺少卿扈 蹕熱河 召  
見詢歷官本末甚悉尋遷內閣侍讀學士會 天子勅建辟雍告

成將行臨雍禮而公昔於御史時曾以此事入告 上憶公前奏  
特旨嘉獎令吏部於應升缺出請 旨擢用明年正月 詔於  
乾清宮 賜千叟宴公年六十有七得與有 御製詩刻及鳩杖  
文綺之 賜尋擢宗人府府丞稽察覺羅右翼宗學九寺列卿惟  
宗丞班次最高公由學士踰次得之實異數也公體素羸弱中歲  
得導養術神氣完固而素不耐寒嗽逆時作遂有止足之志是歲  
十月陳請解任 詔以原官致仕公性耽山水未第時往來吳越  
縱游東南諸名勝及登仕籍三十餘年公事之暇輒與三四知己  
出國門游賞如潭柘戒壇祕魔厓香界寺往往流連信宿或策蹇  
行冰雪中觀者以爲神仙中人治家質素金玉玩好之具不陳於

側午後輒掃地焚香觀心調息超然有塵外之想生平不臧否人物而胸中界限分明嘗曰人各有所偏但當棄短取長否則無一人可交矣詩文皆摭寫性情不事藻飾晚年課子讀書尤以浮華馳逐爲戒故諸子咸以文學自奮公雖移疾脫朝簿而長子方官詞垣侍養如意公旣樂而安之因令次子旋里營菟裘爲終老計旣而喘嗽加劇以乾隆五十二年十二月八日終於京邸春秋六十有九夫人任氏丁酉科武舉宗讚之女長子錫齡乙未進士翰林院編修次祝齡己酉恩科進士戶部額外主事孫八人汝瀆汝瀾汝淵汝沆汝洵汝涵汝藻汝淳孫女五人公學行誠篤未嘗皦訐求名而居家莅職清慎無玷當代名流咸慕與之交而介然

不可干以私在都下時正陽門外失火延燒數千百間鄰里焦燬  
殆盡獨公屋巋然無恙人以爲厚德之報云銘曰

宗正之司總以維藩丞哉其貳三品崇班堂堂曹公樂易坦白木  
天瀛洲柏臺梧掖敷歷五寺遂陟宗卿介不絕俗直非近名公有  
封事 天子嘉只公旋引疾 天子俞只知止不殆老氏所云葆  
眞恬淡以養穀神憶同唱第二百四十惟公與我氣同志合聞義  
相告有過亦規四海元伯千秋鍾期恆幹雖辭令譽長在馬鬣是  
封過者下拜

右神道碑銘錢大昕撰

曹慕堂宗丞余甲戌同年也交最契慕堂卒時余適以校理祕籍

在灤陽闕爲面訣意恆盡然旣而讀石君所作墓誌辛楣所作神道碑慨想生平宛如對晤不勝山陽鄰笛之悲惟是慕堂立身之本末二君言之雖詳其文均篤實無愧詞足信天下而傳後世然有一二逸事爲碑誌所未及者乾隆辛巳余與慕堂同司翰林院事會有八九英俊與同館爭名相軋同中輩語勢且挂白簡時余亦薄有聲譽方自危疑不能爲申雪惟坐清祕堂中與同事相嘆咤慕堂奮起拍案曰諸公以此事爲眞耶則數人皆輕薄子耳何必爲悼惜如灼知其枉耶則司院事者所司何事而喋口如寒蟬乃邀眾同詣長院慕堂婉請曰據公所聞此數人褻不蔽辜矣然公此語從何來儻彈章一上事下刑曹無證佐不能成獄願先示

名姓併列於章中院長沈吟久之事竟中止後八九人皆先後致  
通顯無知緣慕堂得免者慕堂亦終身未自言也同年陳侍御裕  
齋年過四十未有子又有所阻格不能置妾慕堂倡率鳩貲買一  
女送其家後舉一子裕齋夫婦相繼歿有壻謀踞其餘貲百計媒  
孽孤兒孀婦且旦夕不自存聞者扼腕然莫能爲力也慕堂又鳩  
率同年仗義執詞逐壻子乃得安今已讀書成立矣當時論者或  
以慕堂爲多事慕堂恬不介懷嗟乎朋友以異姓列五倫所貴乎  
濟緩急卹患難不以生死易心也平時酒食徵逐聲氣攀援怡怡  
然親若兄弟及身遇小利害乃引嫌避怨坐視其後人之阽危亦  
安貴此朋友耶慕堂此舉余時有所牽制未能赴約然心恆愧焉



論者乃以己不能爲轉非慕堂之能爲抑亦慎矣慕堂天性好淡超然於聲利之外似不甚預人事者又和平靜穆言訥訥如不出而此二事乃見義必爲如此賢者固不測哉余十六七歲入名場三十通籍仕宦四十餘年閱事非一閱人亦非一求如慕堂之古誼指不數數屈也人往風微慨然遠想因書以示受之侍御兄弟俾存諸家乘焉

右逸事紀昀撰

李封

李封山東壽光人乾隆十五年舉於鄉十八年大挑二等選滕縣教諭十九年中式進士改庶吉士二十二年散館改部二十三年補授刑部主事歷升員外郎郎中三十八年以保舉堪勝繁缺知府選授安徽廬州府知府調江蘇鎮江府旋調徽州府四十二年擢江西鹽驛道四十五年遷浙江按察使四十七年遷湖南布政使先是閩浙總督陳輝祖奉命籍王賈望家封以按察使專其事及擢布政使至熱河行在請訓適輝祖換金兩事發上因召對詢及之封未據實陳奏事旋察實諭曰李封由道府洵擢係朕加恩錄用身爲藩司大員經朕面加詢問於抽換抵兌情弊

俱知而不言實難免徇隱欺飾之罪著革職發往豫省河工效力  
四十九年 上南巡封於工次接 駕 上念封獲咎尙輕且在  
運河效力亦能奮勉 特旨簡授四川甯遠府知府尋擢福建汀  
漳龍兵備道五十年超升江蘇布政使五十一年擢湖北巡撫八  
月奏言各屬倉穀常平缺額十八萬三千石有奇總緣歷久因循  
州縣藉詞掩飾第流傳已久若徹底根究嚴參治罪必致輾轉追  
溯提問多人非仰體 皇上不爲已甚之意惟有飭令繳價子限  
三月盡解藩司以歸實貯再查湖北地方遼闊民居稠密額貯倉  
穀除借欠及平糶發賑各項外止實存三十八萬九千有零爲數  
無多而又散貯於六十八州縣更形稀少倉儲不爲充裕殊非有

備無患之道今早稼業經登場中晚二禾亦俱暢茂本年定卜有  
秋八月間新穀入市糧價必平臣屆期當責成各道府督同各州  
縣於市米廣聚之區按數陸續買補歸倉收貯以期倉穀充盈有  
備無患 上嘉納之五十二年二月與舒常同奏湖北缺額倉穀  
已買補十萬餘石出借籽種亦已節次徵收自應接續督催以歸  
實貯惟時距秋成尙遠糧價日增再加採買勢必市僧居奇有妨  
民食且楚民本鮮蓋藏上年雖稱中稔究因五十年被災之後元  
氣未復小民屆此青黃不接之際方資官糧接濟出貨穀石如槩  
令徵還民力不無拮据臣等仰體 皇上鴻慈悉心酌議應請俟  
本年秋季收後再行分別買徵以廣 皇仁而裕民食得 旨自應

如此三月至京 陛見自以年力就衰奏懇畱京補用得 旨俞  
允授刑部左侍郎旋面陳湖北吏治廢弛請 旨整飭 上卽申  
諭飭行五十三年六月湖北荆江泛漲隄潰決荊州滿漢兩城  
均被淹沒 上以封曾任巡撫不能先事預防飭解任赴楚監修  
自贖明年工竣還京 上察封年力就衰賞按察使銜令回籍居  
三年適 車駕巡幸五台山封赴正定 行在請 安特蒙 召  
對賞賚有加嘉慶元年赴千叟宴九月在籍卒子鈐原任工部司  
務鈺拔貢生候補布政使經歷

右 國史館本傳

公與余同以乾隆甲戌登進士是科最號得人其間老師宿儒以

著述成家者不一高才博學以詞章名世者不一經濟宏通才猷  
雋異以政事著能者不一品酒鬪茶畱連倡和以風流相尚者亦  
不一故交游款洽來往無夙期宴會無虛日余少年意氣亦相隨  
馳騁顧盼自豪公獨落落穆穆清靜自守於同年無所同異亦無  
所親疏若蕭然於仕途外也數十年來升沈不一登九卿者僅六  
人而公實居其一論者謂窮達有命不在聲華之相耀也是固有  
然然公以恬退樸訥之性而卒受 殊知得躋通顯者亦自有由  
公由翰林改刑部時有翁強污其婦婦爪傷翁面得免畏其再偪  
遂自盡眾謂傷翁不孝不宜旌公謂婦此時惟恐不免耳是無妨  
於孝仍宜旌錢文敏公從公言公緣是知名由郎中出守廬州時

奸民葉虎倡順刀會爲暴於鄉里公捕治渠魁而嚴戢其黨卒消  
亂於未萌由江西鹽法道擢浙江按察使時諸商感公革陋規疏  
鹽引瀕行贖以八千金公力拒不受由湖南布政使獲譴再起爲  
福建汀漳龍道時力懲海濱剽悍之俗終公之任無械鬪修造戰  
船嚴禁以舊料抵新料積弊一清官江蘇布政使僅四月清釐賑  
務所全活甚眾官湖北巡撫時會歲歉舊官不能察屬吏賑卹未  
周姦黠者或強借富民糧豪猾者又執而生瘞之公奏請悉行究  
治撫字多方枉陞者以安又廉知十年前盜糾眾入民舍肆劫掠  
而吏匿不報立置羣盜於法參治歷任各官罪而吏由是做盜由  
是戢 優詔褒嘉遂有兼署總督之 命知公之勤於其職簡在

帝心者久矣迨年近七旬自覺精力稍減卽不敢久居要任致  
察覈不周 天子亦俯鑒其誠改司秋憲蓋力所不能爲者卽不  
敢爲知凡所敢爲卽爲之而有餘矣豈泛泛委時任運者哉雖以  
荆江泛溢失於預防落職而工竣以後仍 特賜按察使銜俾頤  
養於林下嘉慶丙辰來京入千叟嘉宴 恩禮有加亦皆非偶然  
先師阿文勤公嘗曰仕宦措足於實地可無顛蹶卽意外失足亦  
必不至破顛損骨至哉言乎公其知此意矣公諱封字紫綬松園  
其別號也先世江西豐城人明洪武初遷山東壽光縣之斟灌莊  
故世稱斟灌李氏曾祖諱迴康熙甲辰進士官刑部右侍郎祖諱  
樸官南漳縣知縣父諱烈官蘇州府同知公生於雍正元年十一



月卒於嘉慶元年九月元配郭夫人繼配朱夫人俱先公卒子三  
長鈺官工部司務次鈺乾隆丁酉科拔貢生由四庫全書館分發  
署江西建昌府同知次鈺縣學生女五適王緯璧劉鼎燮王庭蘭  
劉世焮王允彬孫六曾孫一公長子早卒長孫景沆將奉公與兩  
夫人及側室陳孺人柩合葬於九巷莊先塋遣使走京師乞余爲  
銘余與公同舉迄今四十三年矣故交零落有若晨星閒居京師  
者僅查給事筵槎戈太僕仙舟繫朝籍者惟余一人在林下者亦  
止王侍郎蘭泉王光祿西莊錢詹事竹汀沈運使溉堂殷伏羌會  
詹及公尙時通音問回憶少年文酒之會杳若前生公今奄化又  
少一人矣俯仰今昔百感紛來爰慨然而爲之銘曰

人以官富公以官貧貧則貧矣而秋水無塵吁嗟乎吾黨又少此

一人

右墓誌銘紀昀撰



杜玉林

杜玉林江蘇金匱人乾隆十九年進士授刑部主事二十二年補缺二十三年升員外郎二十五年遷郎中二十七年京察一等奉旨以繁缺知府用二十九年丁父憂三十一年服闋補本部郎中經刑部尙書舒赫德奏請以升銜畱部三十二年京察一等三十三年授江西南康府知府三十四年擢吉南贛甯兵備道未赴任丁母憂三十六年服闋授四川鹽驛道時大軍征金川派辦糧餉三十八年赴打箭鑪一帶護守糧臺三十九年提督桂林奏雅州爲南路軍糧總匯該處素產茶斤民夫背赴打箭鑪其利勝於運米杜玉林請將長運鑪城糧石卽招股實茶商照給米石運價

并准帶茶斤小民奉公之餘兼資謀利無不倍加踊躍況茶爲番地所必需到鑪日多則各土司烏拉亦不期而雲集於南路軍糧實有裨益奏入 上嘉之四十年九月總督文綬奏杜玉林在川辦理驛站諸事俱悉心經理其總理南路糧運亦奮勉急公實心催趨得 旨賞給按察使銜十二月授四川按察使四十三年以合江縣民劉碧毆死繼母兇犯未獲部議降一級調用得 旨改爲革職畱任四十四年三月擢四川布政使四月授刑部右侍郎四十五年三月轉左八月充順天鄉試副考官九月 命往四川查審會理州貢生沙金鳳赴京控告胞兄土司沙金龍霸占祖遺田產又乘伊子述祖出外金龍之子健坤搶劫述祖牛隻穀石旋

審明將田產剖斷分給健坤搶劫屬虛擬述祖誣告罪四十六年  
沙金鳳復以訊斷不實赴京呈控 命將案犯解京令軍機大臣  
會同刑部查審尋奏此案杜玉林原斷分給地畝尙屬平允惟於  
沙健坤搶劫重情未經審出轉將述祖擬以誣告又未將署知州  
徐士勳附參明係贍徇奉 旨交部嚴加議處尋議降三級調用  
不准抵銷 諭曰本日吏部將侍郎杜玉林查審沙金鳳控告胞  
兄沙金龍等霸占搶奪財物一案並未將案犯提齊審訊卽擬完  
結贍徇草率議以降三級調用不准抵銷一本已照簽批發矣此  
案沙金龍父子欺壓霸占許訟連年地方官置而不辦特令杜玉  
林前往查審自應提集案犯秉公研訊俾案無疑實方爲不負任

使況從前欽差審辦案件未有結案後復赴京控告者卽虛捏翻供之案及派大臣覆行鞠審亦未有似此罪名出入者乃杜玉林審辦沙金龍父子起意搶劫各案既不能提集各正犯定擬完結而知州徐士勳到任二年延閣不辦之故並未附摺劾參該員係杜玉林同鄉其爲有心袒護已屬顯然難逃朕之洞鑒若不嚴予處分將來欽差大臣查審案件皆如此相率效尤朕將何以用人乎此案杜玉林卽照部議實降以示懲儆又甘肅冒賑案犯原任河州知州葉中之子葉椿等間擬寬縱部議補官日降三級得旨著於補官日降三級從寬畱任四月 諭曰杜玉林前於刑部侍郎任內因審辦案件有所曲庇故依議降調但其才尚可用著

加恩補授工部侍郎仍兼刑部上行走並帶革職留任八年無過  
方准開復六月調刑部右侍郎四十八年五月湖南澁浦縣民舒  
明珂赴京呈控舒邦孚誣告伊兄舒攀桂毆搶衣物地方官刑偏  
枉斷致伊母情急自盡 命杜玉林前往會同巡撫伊星阿審訊  
尋鞫實論罪如律六月 諭曰據都察院奏休甯縣民余德章呈  
控湖北漢川縣武舉胡光璘將店夥胡懷三致死因伊弟余子美  
曾與胡懷三口角誣控伊弟捏傷身死疊次刑偏認作正兇問擬  
絞抵請交湖廣總督審訊一摺此案先經刑部以檢驗三次所報  
屍傷互有不同情節甚多疑竇指駁今余德章所控各情與刑部  
指駁之處大略相同看來竟係地方官任情枉斷其中不無串通



舞弊情事若交總督審辦則承審之司道等仍恐不免回護著傳  
令杜玉林於湖南審案辦理完結順道至湖北卽提集此案犯證  
秉公研訊確情定擬具奏八月奏審得胡懷三曾被胡光磷手推  
當甯久據余子美供稱眼見今檢驗屍傷胡懷三實有心坎一傷  
原驗之漢川縣知縣馬殿翼並未驗出率將余子美捏傷胡懷三  
腎囊身死通報請將馬殿翼革職嚴審奉 硃批該部知道尋奏  
查驗原卷余子美之父余敬亨曾將伊子被誣各情赴前任漢陽  
府知府今升山西河東道曾承謨衙門具控該府並未親提嚴訊  
乃交原審之漢川縣知縣馬殿翼究 審以致該縣固執已見正兇  
漏網寃及無辜請將曾承謨革審 諭曰此案既據被誣余子美

之父在該府衙門具控則案情出入自應親提嚴訊秉公更正豈得復批發原審之漢川縣知縣馬殿翼查審杜玉林奏參甚是會承謨著革職並著農起派員迅速解往湖北交杜玉林歸案審辦十月奏審明胡懷三實係胡光璘用手指戳傷心坎復舉腳踢傷腎囊殞命該犯希圖漏網賄囑余子美頂兇擬光璘罪如律馬殿翼等論戍有差是月 諭曰據在京步軍統領衙門奏有直隸蠡縣民婦王氏喊控民陳濟捏寫伊兄家書誘拐偪勒成親並從前四十六年伊夫陳守義因說合賭博被吳八率同曹二小等用鐵尺小刀毆扎身死經該縣及委審之清苑縣審訊止將曹二小擬絞見在告孤子畱養其首犯吳八反脫然事外等因請敕交劉崧

查明原案究審一摺此案王氏所控吳八等毆死伊夫陳守義如果該縣等審斷不公有關罪名出入自應提集各犯究出正兇方成信讞若仍發交該督查辦則從前承審各官未免稍存瞻徇見在杜玉林審辦湖北余德章控告一案將次完結著於回京復命之便卽順至保定提取原犯集案秉公嚴訊務得確情究擬具奏步軍統領原摺著鈔寄閱看將此由四百里諭令知之尋奏陳濟娶王氏爲妻訊有媒證並無誘拐情事陳守義與吳八等爭毆實係曹二小用鐵尺截傷致斃該省依律定擬並無枉縱擬王氏罪如律十一月尙書福隆安家人富禮善責夫役張二致死賄囑趙文遠頂兇刑部不能究出實情奉 旨降三品頂帶仍革職畱任

四十九年正月扈 蹕南巡閏三月 命偕尙書福康安審訊清  
河縣民劉文光宿遷縣民張漠拔控縣書王立本胡朝俊等浮開  
戶口冒銷賑銀一案訊屬全誣擬罪如律八月有口民王正朋與  
川民邢持試爭占山界糾眾傷人杜玉林前在四川藩司任內不  
早爲勘明斷結致釀重案部議杜玉林無級可降請革任得 旨  
寬免仍註冊尋以辦理本年秋讞妥協 命復原品頂帶五十年  
四月工部員外郎海昇毆妻吳雅氏致斃裝點白緇得 旨派杜  
玉林會同覆檢仍回護原議 上以杜玉林係屢經獲罪棄瑕錄  
用之人於派審事件不知秉公辦理其罪更重著革職發往伊犁  
效力贖罪五十一年九月釋回五十二年二月授刑部郎中尋卒

右 國史館本傳

乾隆五十二年春前刑部侍郎杜公自謫所 詔起本部浙江司  
郎中去謫日甫越一期海內士大夫莫不知 上始終眷遇而公  
感激圖報必益布露其所未抒乃疾作於路遽旅殞於涇州莫竟  
其用聞者惜之於時公子光炎扶喪南還阻於青烏禁忌之說久  
而未藏迨嘉慶元年窆既有日函書及狀走使者至大梁以公墓  
道之文爲屬嗚呼公門下士顯且才者眾矣書受於其中最爲卑  
陋而公子獨不憚數千里誣諉之母亦追念公平生之言將以書  
受任紀述之役於公立心行政當無飾詞而節其譎薄無文不敢  
不勉而及也謹按公姓杜氏諱玉林字凝臺一字曲江世居金匱

縣曾祖諱圻祖諱錦父諱灝官沙河令有惠政公貴並 贈如其階公少慧書皆默識終日闕然不聞音塾師莫之測試叩所習則盡通悟乃喜不復強以誦十二齡從父之京師十五寓籍入大興縣學爲文洒洒千言庚午舉京兆甲戌成進士榜姓名曰玉林及是請復故姓改歸本籍由刑部主事遷員外郎郎中牘無巨細過目不遺母深刻母姑容請曹司亦非折衷於公勿定以最擢劉文正舒文襄諸公先後請留前此所未有也辛卯出爲四川鹽驛道至則方用兵金川羽檄旁午公奉 命督運中南兩路糧儲是時大軍駐美諾餉道寫遠難通精常不繼凡所經木坪山神溝礪頭等處深谷崇山懸延不絕仰如升天俯若瞰井奇石如戈鋌矗立

率羊腸盤曲一線攀蘿附葛前人足躡後人之肩蛇行獸伏而進  
舊設每三十里爲一程程列十夫夫負三斗然往往半途而蹙越  
宿而達及其還主故所則後來者已委其糗糒於地且所失亡多  
公患之亟思變通於是按其程險易一析爲五或析爲十而均其  
夫三居守七負載不得越所畫之疆循環旋轉更番而休密邇而  
替食病有常遂免於逃亡顛躓而軍食亦源源無匱乏之虞會大  
功告成制府以狀上 天子嘉之遷按察使再遷布政使總理軍  
需報銷旬稭無或冒濫者己亥內擢刑部右侍郎轉左侍郎壬寅  
詔議鑄級旋復工部右侍郎仍調刑部右侍郎公長身貌整肅兩  
目睖睖有光口不妄語外若沈鷲而有陰謀實則曾次坦然不設

城府而意極其慈祥遇事鋒銳剖決如流守曹郎時名臣如大學士兆公阿公鋒車所至俱奏辟佐治爰書迨位登九列六歲之間兩扈蹕潞河一扈從南巡兩充殿試讀卷官一主考順天鄉試三派閱考取三館四庫謄錄卷吏部職員卷兩派祭山東孟廟及常州四賢等祠而奉使讞獄者七四川甯遠湖南澱浦湖北漢川利川直隸蠡縣江西雩都江蘇宿遷所在尤殫心平反上愛其敏果倚爲股肱前命未復後命又殞公亦彌自激勵蹀蹀忘勞轍跡幾半天下乙巳四月以覆按戶部員外郎海昇妻死狀不實敕往伊犁效力贖罪未幾荷恩賜環先是公乘傳行適觸暑有湯火之烈風露宵征因而頭風大作居塞上奴多樸魯又



乏方劑至於負茲嗚呼公才足以斷大獄決大疑雖鬢髯早白而  
精英未衰屢蒙 召對 上溫語移時駸駸嚮用而公升沈不異  
喜怒不形論者謂六卿惟公以度勝信其然歟吾家君子與公爲  
垂髫之交書受十八謁公里門時公丁母孫太夫人之喪顏色憔悴  
庚子復出公門下依公邸第者三年窗外植老槐每侍公側嘗  
具獄令判曰刑一成而不變治律例猶善醫貴不泥於方書而察  
其受病之實不如是無以臨民語旣久槐花藪藪落盈襟袖初公  
官成都重建唐杜文貞草堂落成勒石以記及公使車再至則成  
都之民亦爲公造生祠於浣花溪以誌去思之愛而公初不之知  
公旣心乎經世之務無暇數數爲詞章然偶有撰述清麗纏綿乃

非人所可及嘗撰進賦頌並恭和諸詩均邀 乙覽其在雅州當  
戎馬倥傯之際尙復與僚佐濡翰登樓其標致如此公享年六十  
前長秋曹晉階光祿大夫配宋氏繼毛氏並晉 贈一品夫人子  
光炎國子監生女三俱適士族以某月日葬於惠巷頭之壟曩昔  
書受既嘗誌毛夫人而闕諸幽今又爲公碑銘蓋不勝追愴當時  
困苦之境悉公卵翼扶持且嘗命纂年譜而公欲自敘行實終以  
未就莫徵其詳故良法美意不獲盡公十一慙負前諾不覺至於  
拊膺而長慟也銘曰

英簫星輅行數萬里結竿爲橋以鞍代几用恤人勞軍儲就理臨  
決片言蘇公是擬民志之平 天聽則喜孤寒八百門集其美燭

淚成堆而不爲侈客去復來而不爲柅雷霆不驚雨露俄起卽之  
春溫望若嶽峙石不勝書百世可俟

右神道碑銘徐書受撰

王昶

王昶江蘇青浦人乾隆十九年進士二十二年上南巡召試  
一等欽賜內閣中書二十三年補內閣中書二十四年八月充  
順天鄉試同考官十一月在軍機司員上行走二十五年八月充  
順天鄉試同考官二十六年三月充會試同考官二十七年八月充順  
天鄉試同考官二十八年三月充會試同考官二十九年三月擢  
刑部山東司主事辦理秋審事三十一年遷浙江司員外郎署郎中  
三十二年五月升江西司郎中三十三年四月京察一等記名以  
道府用七月以漏洩查辦兩淮鹽引一案奉旨革職九月雲貴  
總督阿桂請帶往雲南軍營效力三十六年十月諭曰據溫福

奏革職郎中王昶在滇省軍營自備資斧效力見已滿三年今派令隨赴四川辦事懇量予加恩等語王昶著賞給主事所有應得分例准其支食十一月補吏部考功司主事三十七年十二月副將軍阿桂奏前經帶往辦事之主事王昶由雲南軍營效力復帶赴四川軍營一切奏摺文移皆其承辦頗爲出力得旨王昶著加恩以吏部員外郎用三十八年補稽勳司員外郎三十九年以軍營奮勉經大學士阿桂保奏以本部郎中升用四十年補文選司郎中四十一年五月諭曰吏部郎中王昶在軍機出力年久頗著勤勞著加恩升鴻臚寺卿並賞戴花翎仍在軍機處司員上行走七月授通政司副使四十二年遷大理寺卿四十四年擢都

察院左副都御史四十五年三月授江西按察使八月丁母憂卮籍四十八年二月服闋補直隸按察使三月調陝西按察使十月奏稱向例重犯脫逃州縣先於本境查拏初參限滿不獲始造具事由清冊分咨鄰省通緝查命案初參以半年爲限閱時旣久頑獷之徒早已乘間遠颺請嗣後遇有兇犯脫逃一面在本地嚴拏一面飛咨鄰省通緝得旨依議連行十二月奏陝省幅員遼闊東南與楚蜀接壤最易藏奸見飭各屬將舊有保甲逐一清理漢中興安一帶流寓民人取具相識保結方准棲止其無人認識蹤跡可疑者遞回原籍至往來過客於歇店給發印簿登記彙查儻詢出命盜重犯曾在該店歇宿照例治罪再兇器必宜禁絕除烏

槍業已陸續收繳其餘順刀禪刀不惟不容佩帶並不許製造仍  
飭各屬嚴密稽查毋任胥役藉端滋擾得 旨實力為之五十年  
署陝西布政使五十七年七月遷雲南布政使九月 諭曰據永  
保奏臬司王昶已升任雲南藩司應行交代赴任等語前因伊陽  
縣逸犯秦國棟及大名案首犯段文經徐克展等查拏未獲令王  
昶在商州搜捕今兩案正犯尚未弋獲正應令王昶在彼悉心督  
緝乃永保以該司升任雲南速派潼商道德明前往商州更換王  
昶回拘犯不曉事體如此所有陝西臬司印務著顧長紱兼署外  
王昶應仍在商州潼關一帶嚴緝要犯俟拏獲後再令交代起程  
十月又 諭曰王昶前在商州一帶緝拏要犯今秦國棟業經拏

獲王昶著仍遵前旨卽來京陛見後再赴雲南藩司新任五十三年調江西布政使五十四年二月授刑部右侍郎五十五年三月江蘇高郵州知州吳煥袒庇書役私雕印信冒徵錢糧一案經該州巡檢陳倚道查獲疊稟本省各上司遲延不辦至是揭報戶部上命偕兵部尙書慶桂馳驛前往會同兩江總督書麟審訊嗣以書麟奏到摺內並不細覈詳稟批發日月嚴究徇縱情節將巡撫閔鶚元奏參代爲掩飾將書麟交部嚴議 諭曰此案關係吏胥假稟重徵官吏通同隱蔽王昶籍隸江南未免心存瞻顧且恐不能堅定漫無主見必致附和書麟所奏代人受過著將案內犯證一切卷宗迅速解赴熱河行在審辦七月 命赴湖南鞠湘鄉



縣糧書需索案九月赴湖北鞫應城縣倉書浮收案十月鞫江陵  
縣書吏偷減土方案十一月鞫永明縣賄買武童案十二月鞫長  
沙縣勒買常平倉穀案各得實以 聞五十七年八月充順天鄉  
試副考官五十八年三月奏給假回籍省墓 上允之十二月回  
京 諭曰侍郎王昶假滿召見看其年力就衰伊亦自以精神日  
減難以供職王昶著以原品休致俟來歲春融卽行回籍以示體  
恤嘉慶十一年六月卒

右 國史館本傳

公姓王諱昶字德甫號述庵以居蘭泉書屋學者稱蘭泉先生先  
世居浙江蘭谿縣高祖懋忠遷江南青浦縣名在幾社曾祖之輔

祖瑛父士毅皆以公官累 贈至光祿大夫刑部右侍郎母錢太夫人以雍正二年十一月二十二日生公公少穎異博學善屬文體貌修偉弱冠爲名諸生侍父疾居喪盡禮服除家益貧作固窮賦以見志乾隆癸酉舉於鄉甲戌成進士歸選班二十二年 南巡召試一等第一 賜內閣中書協辦侍讀直軍機房洊升刑部主事員外郎郎中三十三年以言兩淮鹽運提引事不密罷職時緬甸未靖阿文成公以定邊右副將軍總督雲貴請公佐軍事遂至騰越出銅壁關擊賊江中勝之緬酋乞降阿公屬公草檄允其降班師旋永昌緬甸貢表久未至復從阿公如騰越三十六年温公福代阿公移師四川辦金川事奉 旨授吏部主事從温公西

路軍進討溫公屬公作檄斥僧克桑罪遂克斑爛山進攻日耳寨  
阿公奉 詔由北路進兵兼督南路公復從阿公軍攻克美美卡  
以皮船渡水克小金川僧克桑遁澤旺降進討大金川阿公奏公  
無兄弟母年七十餘明大義勛以殫心軍事今從軍五年矣得  
旨升員外郎三十八年至當噶山山脊絕險官兵營壘與賊錯處  
且雨雪甚夏溫公兵潰木果木阿公亦退兵至翁古爾壟時警報  
絡繹 詔旨疊至公力疾叱馬懸崖日行數百里夜治章奏文書  
於礮火矢石之中無誤無畏冬大兵復進據美美卡攻大板昭小  
金川平補員外郎擢郎中復從討大金川克勒烏圍刮耳巖四十  
一年三路兵合攻益急索諾木等率眾投罪公草露布告捷於是

兩金川地悉平公在軍中前後九年每有所攻克輒議敘凡加軍功十三級紀錄八次凱旋之日以戎服行禮 賜宴紫光閣 賞賚優渥奉 旨王昶久在軍營著有勞績升鴻臚寺卿賞戴花翎在軍機處行走秋擢通政司副使四十二年三月擢大理寺卿四十四年乞歸改葬光祿公暨嫡母陸太夫人依遷葬禮服總秋赴京冬授都察院左副都御史四十五年授江西按察使檄府縣力行保甲禁族祠訟鬪之習坐堂皇六十餘日決獄百餘案秋丁母憂哀毀盡禮服除補直隸按察使調陝西按察使奏命盜逃犯宜於定案時速通緝議行之逆回田五倡亂奉 命備兵長武時賊勢張兵少公試礮巡城籍強壯繕守具民以無恐京外大兵皆過

長武用車馬以萬計公飛書草檄立辦之暨乎班師迄無一誤河  
南亂民秦國棟等戕官奉 旨督緝獲之五十一年授雲南布政  
使雲南銅政繁公盡發故籍著銅政全書示補救調劑之術五十  
三年調江西布政使五十四年擢刑部右侍郎五十八年乞歸修  
墓冬還京以病乞休 上鑒其老允之 諭以歲暮寒俟春融歸  
明年歸名其堂曰春融堂嘉慶元年以 授受大典至京與千叟  
宴四年 純皇帝升遐復至京謁 梓宮蒙 召見敕建言公密  
封以進不留草夏歸青浦分賠滇銅鬻田宅以入官居於廟廡朋  
舊贈遺盡以刻書五年年七十有七重游泮宮十一年年八十有  
三五月病瘧六月初六日病甚口授謝 恩表自定喪禮屬元撰

神道碑文初七日雞初鳴公日時至矣遂卒子肇和以嘉慶十二年春葬公於崑山縣雪葭灣年字圩卽公所自營生壙也公妻鄒夫人耐焉側室許陸黃三孺人亦從葬焉公之扈 駕巡山東江浙也古帝王聖賢名臣陵墓祠廟嘗分遣致祭己卯庚辰壬午順天鄉試辛巳癸未會試五爲同考官壬子主順天鄉試皆以經術取士士之出門下爲小門生及從游受業者二千餘人又嘗主婁東敷文兩書院 欽定通鑑輯覽同文志 大清一統志續三通等書奉 敕與纂修事又奉 敕刪定三藏聖教經呪徧譯佛典深於禪理者不及也前後奉 使鞠奏高郵州假印重徵江陵縣偷減隄工等七案公正研求分別虛實高郵州案巡撫府州並擬

罪隄工案以知府草率捏飾劾落其職公之爲學也無所不通早  
年以詩列吳中七子名傳海外初學六朝初唐後宗杜韓蘇陸侍  
宴賡歌賜賚稠疊詞擬姜夔張炎古文力追韓蘇碑版之文照於  
四裔積金石文字數千通書五萬卷所至朋舊文讌提倡風雅後  
進才學之士執經請業舟車錯互屢滿戶外士藉品藻以成名致  
通顯者甚眾公治經與惠棟同深漢儒之學詩禮宗毛鄭易學荀  
虞言性道則尊朱子下及薛河津王陽明諸家居憂不爲詩文不  
就徵聘平生重倫紀尙名節篤棊之誠本於天性在軍營和平簡  
易自科爾沁王以下皆親重之爲司寇時與阿文成公爲舊識他  
非所契嘗訓子曰易言比之匪人不亦傷乎非匪人之能傷比者

自重其傷也公所著書春融堂詩文兩集宏博淵雅有關於經史  
文獻金石萃編青浦詩傳湖海詩傳琴書樓詞續詞綜等書皆刊  
成餘若天下書院志征緬紀聞屬車雜志朝聞錄等書四十餘種  
尙待次第校刊之元居憂受公遺言撰碑銘不敢辭旣除服乃爲  
銘曰

恂於儒者不達政事習尉律者迷誤文字惟公兼之經術爲治桂  
弱於文無能卽戎折衝千里於經鮮通惟公兼之乃多戰功尊漢  
學者或昧言性語性道者妄斥許鄭公兼通之履蹈賢聖皇熊疏  
義拙於文詞陸沈藻績樸學不知華實並茂公亦兼之公爲君子  
筮匪不比沖澹其神靖其其位敷歷中外進退禮義公爲名臣



帝嘉厥功金川磨盾 紫閣攷弓獄平政飭本孝於忠瞻彼中江  
秀鍾峯泖海內清望雲間大老雖不憇遺亦吹壽考佳城鬱鬱葭  
灣之中杏歸春雨純起秋風勒銘無媿碑樹桓豐

右神道碑阮元撰

先生諱昶字德甫號述庵一字蘭泉又字琴德其先世居浙江之  
蘭谿高祖懋忠始遷江南松江府青浦縣西珠街角鎮遂爲青浦  
人考士毅字鴻遠年四十五無子禱於杭州靈隱寺夢人贈以蘭  
明日市蘭歸逾兩旬蘭茁二枝一出土卽隕其一長尺有六寸森  
森若巨竹狀及夏紫燕栖於楹同巢異穴至冬陸太夫人孕男不  
育而錢太夫人生先生咸以爲蘭徵燕兆也先生生而開敏四五

歲時能背誦周伯弼三體唐詩爲人漢說杜用修廿一史彈詔妮  
妮不倦年十八應學使試以第一入學是年得韓柳文集歸震川  
集張炎山中白雲詞讀而愛之乃肆力於古文詞年二十一丁外  
艱先生侍疾日久哀勞毀瘠居喪讀禮不作詩文服闕游吳下蔣  
恭棐楊繩武見先生詩文謂宋文憲以後一人也肄業紫陽書院  
時從惠徵君定宇游於是潛心經術講求聲音訓詁之學是時沈  
尙書歸愚爲院長選先生及王光祿鳳階吳舍人企晉錢少詹曉  
徵贈光祿寺少卿趙升之曹學士來殷上海黃芳亭泌陽令文蓮  
七人詩稱爲吳中七子流傳日本大學頭默真迦見而心折附番  
船上書於沈尙書又每人各寄相憶詩一首一時傳爲藝林盛事

乾隆十八年癸酉鄉試中式十九年甲戌成進士歸班候選秦尙  
書蕙田延先生修五禮通考明年游山左歸陸太夫人病逝哭泣  
盡禮兩淮鹽運使盧見曾聘先生課其子及孫與程編修午橋馬  
同知曰瑄弟徵君曰璐汪部曹棣張貢生四科爲文酒之會二十  
二年 高宗純皇帝南巡獻賦 行在 欽定一等第一授內閣  
中書是歲仍畱揚州盧運使屬撰紅橋小志以記棣園平山堂亭  
榭花木之勝明年入都供職溧陽南沙薌林三公皆以國士待之  
二十三年授刑部山東司主事充方略館收掌官三十一年授刑  
部浙江司員外郎三十二年升刑部江西司郎中三十三年兩淮  
運使提引事發先生與趙文哲坐言語不密罷職時緬甸未靖

詔以伊犁將軍文成公阿桂爲兵部尙書定邊右副將軍總督雲南貴州文成文勤公阿克敦子也文勤爲先生殿試讀卷師是以知先生學問經濟請以從 詔許之三十四年文成出萬仞關駐騰越頃之得 旨命大學士忠勇公傅恆爲經略緬酋憤駁乞降經略屬先生草檄諭憤駁允其降三十六年文成罷用理藩院尙書溫福代之奏留先生佐籌善後事會四川小金川土司澤旺之子僧格桑指沃日呪詛發兵占其地又侵據明正土司濃等寨而金川應襲土司索諾木亦併革什咱殺其土司 上命溫福移師赴四川奏請以先生行奉 旨賞給主事隨往四川軍營辦事旋授吏部考功司主事僧格桑遣人訴沃日呪害狀先生作檄斥其

罪大兵進討克斑爛山破斯當安進攻日耳寨三十七年參贊大臣五岱與溫福訐訟 詔罷五岱 命文成往北山木雅斯底代統其眾先生從文成督兵緣山而下築卡斷賊路時南路總督桂林統兵次達烏久不能克乃以兵三千遣參將薛綜從墨壘溝經郭舟山出賊後爲夾攻之策既行大雨雪兵無繼者金川賊由格六古來援綜援絕糧盡全軍皆沒 上削桂林職趣文成督南路兵文成奏請以先生從先生因兵至達烏久不攻戰賊必無備乃建策潛師襲之於十一月四日子刻潛師渡溪遂據達烏翁古爾壘之賊亦震駭無守志破其柵克美諾僧格桑遁入金川先是文成奏先生係獨子母年七十餘深明大義勛以殫心軍事今從軍

已五年矣請量加拔擢至是得旨以吏部員外郎升用大兵進討金川議分三路溫福與參贊哈圖興由空喀文成與參贊明亮由當噶兵部尙書果毅公豐昇額與參贊舒常往綽斯甲由日傍俄坡未幾哈圖興病歿奉旨以海蘭察代之三十八年從師由美諾進發次當噶山攻克西山峯又克兩大礪而將軍溫福自空喀移兵木果木攻戰失利賊煽小金川人盡反其地先侵登達占固提督董天弼赴水死遂分寇登春八卦礪海蘭察奪隘出兵潰溫福死焉六月十日也金川旣得美諾率眾犯當噶參將劉輝祖率一百四十餘人拒戰自亥至寅殺賊二百人而領隊大臣奎林於色木則隘口拒賊日十餘接賊死者甚眾畏當噶兵乞降文成

知當噶不可守姑從其請撤師至翁古壘奏沃日乃進討大路請  
往視師乃西行是時晨夕得警報而 詔旨詢問無虛日先生馳  
馬日行四五百里夜草奏治文書恆徹夜不寐十一月八日大兵  
至大板昭僧格桑復竄入金川八日而小金川悉平三十九年分  
兵三路合攻先生從師自美諾啟行抵谷噶四月刑部侍郎袁守  
侗按事入川 詔令赴軍營視狀知軍牘皆先生一人經畫回京  
具奏 上嘉之有 旨垂問文成覆奏得 旨擢吏部郎中四十  
年五月克遜克爾宗奉 旨補吏部文選司郎中八月克勒烏圍  
賊巢十二月克則朗噶克下壓雍中喇嘛寺取之金川賊索諾木  
之母阿倉及姑阿青時在河西路斷不能歸來降於是移大營於

噶喇依卽刮耳崖四十一年三路兵合攻索諾木兄莎羅奔岡達克索

諾木明楚克等相繼投出二月合攻益急索諾木率其兄爽爾瓦沃雜爾弟斯丹巴妻巴底土妹得什安木楚及大頭人丹巴譎雜爾等二千餘人齎印出降僧格桑已病死並以首獻爾金川蕩平先生從征九年雖羽書旁午然磨盾之暇馬上吟詠穹廡誦讀無一日廢也凱旋至良鄉 駕幸黃新莊郊勞用戎服行禮四月二十九日 上遣皇子獻俘 太廟五月朔 御午門受俘訊於瀛臺以逆酋兄弟罪在不赦磔死縣首藁街是日 幸紫光閣 賜宴作四裔之樂宴畢 賜白金緞匹朝珠荷包奉 旨吏部郎中王昶久在軍營著有勞績著升授鴻臚寺卿並賞戴花翎在軍機



處行走 命纂金川方略充總修官尋擢通政使司副使四十二年三月擢大理寺卿四十三年 上因大清一統志成於雍正四十年至乾隆二十三年平定準噶爾回部拓地二萬餘里及府州縣增置改析者多 命重修充總修官四十四年補授都察院左副都御史又有 旨授河南布政使戶部尚書梁公國治言先生在軍機久多聞舊事請畱內用 上允其奏四十五年隨 駕南巡鑾輿次嘉興有 旨授江西按察使旋丁內艱回籍治喪能盡古喪禮奉諱家居時建宗祠置家塾以教族人子弟服闋補授直隸按察使未抵任改授西安按察使四十九年甘肅固原屬鹽茶廳回人田五阿渾倡復新教糾眾攻破安西州阿渾者回語通經

教主之稱也總督李侍堯提督剛塔具奏奉 旨以安西州距陝西長武六站恐回匪竄入 命往禦乃至長武長武有都司一員兵一百三十名提督調去存三十名又益以宜君兵五十名合參將孫受兵四十二名共一百二十名而長武之通甘肅者有七路各以兵役數人守之未幾田五自戕死餘黨張文慶等走會甯提督又調孫受兵去長武勢益弱賊又走安定之官川其地乃前回匪馬明心所居回匪盤聚於此賊勢甚張乃借兵於總兵三德得兵三百令通判黃秉哲率領以來椎牛享之分撥城內外聲勢稍壯民心乃安時副都統明善參將孫受以滿漢兵一千七百人駐高廟山擊賊失利二人沒於陣賊勢大熾距長武不及三百里先

生乃試礮巡城爲防禦計數堞分人籍城外民強壯者識其名如有急入城協守凡刀矛礮石鎧燭油米悉具無缺民恃以不恐邠乾永壽皆鑿塹填門而長武樵采往來自若也賊知有備不敢犯與石峯回匪合兵據隘以守 上命大學士阿桂戶部尙書福康安領侍衛內大臣都統海蘭察領京兵從山西來工部尙書復興領兵從河南來將軍莽古賚統甯夏兵一千阿拉善王旺親班巴爾統蒙古兵一千五百皆會隆德賊首馬文燾率眾降而總兵三德調赴甘肅敷倫泰代之會敷倫泰亦調往甘肅以太原總兵富敏泰統兵先生恐其未習地利遂出長武從隴州至長甯見富敏泰告以險要形勢及攻戰之策復歸長武諸軍攻剽斷賊水道賊

勢蹙欲突圍出海蘭察率兵邀截殲無算於是阿渾張文慶李可  
魁馬四娃等皆就擒餘黨悉平是役也用兵陝西綠營駐防五千  
名之外調山西兵二千京兵二千絡繹過長武需車輛馬騾約以  
萬計而銀錢火藥槍礮軍裝馱載者又以萬計先生不攜胥吏不  
藉賓僚草檄飛書無一舛誤奏上有 旨嘉許五十一年河南伊  
陽縣民秦某等三十餘人戕知縣孫岳瀨逸去巡撫畢沅搜捕不  
獲因奏言伊陽接壤湖陝恐由熊耳諸山遁入商雒得 旨派往  
督緝乃赴商州檄州同李景蓮邏緝奉 旨授雲南布政使仍令  
督捕事竣入都陛見未幾景蓮等獲秦某解京師卽 命入京  
陛見時奏肝氣不調精神疲憊請改京職 温旨不許乃之任

五十三年調江西布政使五十四年奉 旨授刑部侍郎五十五

年隨 駕東巡回鑾至青縣 上命與兵部尚書慶桂往江南同

鞫高郵州典史陳倚道揭州書吏假印重徵事定讞回京又 命

同兵部侍郎吉慶馳驛鞫湖南湘鄉縣民童高門控書吏收漕折

色案事竣又 命審湖北應城縣科派斂錢事發摺起行又得

旨鞫江陵縣趙學三控書吏何良弼修方家淵隄工偷減土方案

訊畢又 命訊湖南永明縣賄買武童及長沙勒買常平倉穀二

案分別定擬奏 聞奉 旨允行是年 純皇帝八旬萬壽 恩

詔晉封三代皆光祿大夫妣皆一品夫人先生暨鄒夫人亦封一

品勘方家淵隄工時按冊丈量無偷減情跡其殘損處應賠補者

屬知府張方理任之回至荊州方家淵隄工尙未修補乃具奏方  
理革率捏飾落其職五十七年隨 駕幸五臺八月充順天鄉試  
主考官有貴介子擯斥忤當軸旨遂乞假南歸有終焉之志矣一  
日 上召見大臣詢王昶何以不來輦下諸公飛札告知乃剋日  
就道時屆隆冬跋涉二千里精神疲茶動履盤跚 召見時 上  
鑒其老病以原品休致傳 諭歲暮苦寒宜煖春融回籍先生以  
文學受 純皇帝特達之知所以開續三通館方略館通鑑輯覽  
皆與纂修之役己卯庚辰壬午充順天鄉試同考官辛巳癸未充  
會試同考官及壬子主試順天所得皆知名士在京師時與朱笥  
河先生互主騷壇門人著錄者數百人有南王北朱之稱歸田後

往來吳門賓從益盛與王西泚錢竹汀兩先生艤舟白公隄下朋  
簪雜選詩酒飛騰望之者若神仙然六十年乙卯先生年七十二  
純皇帝以明年歸政舉行千叟宴 詔中外臣工逾七十者皆  
入宴遂詣 闕 召見時詢問舊事及江浙年歲豐稔狀奏對稱  
旨嘉慶元年正月初四日行千叟宴禮於 甯壽宮宴畢 賜  
玉如意栴木鳩杖綢緞裝錦大毡筆墨等十六件獻詩六章奉  
旨刻入燕集中二十一日 陛辭出都主婁東書院講席嘉慶四  
年正月 太上皇帝升遐入都哭臨三月初一日 召見詢問歷  
官始末及外省吏治民情與川楚寇盜未平之故奏對畢又 諭  
凡有欲言可繕寫密封以進明日詣 觀德殿前敬謁 梓宮遂

陳數事 上命畱覽四月十三日百日期滿具奏回籍先生以辛酉年補博士弟子至嘉慶六年辛酉六十年矣江蘇學政錢樾松江府知府趙宜喜請重游泮宮率新弟子祇謁文廟行釋奠禮宴於曲水園時阮侍郎元爲浙江巡撫請主敷文書院主講席者三年卒於家年八十有三先生天資過人於學無所不窺尤邃於易詩宗杜少陵玉谿生而參以韓柳古文則以韓柳之筆發服鄭之蘊功業文章炳著當代求之古文中亦豈易得者哉生平著述甚富春融堂詩文集六十八卷金石粹編一百六十卷明詞綜十二卷 國朝詞綜四十八卷湖海詩傳四十六卷續修西湖志青浦縣志太倉州志陝西舊案成編雲南銅政全書皆刊行於世其未



刊行者則滇行日錄三卷征緬紀聞三卷蜀徼紀聞四卷屬車雜志二卷豫章行程記一卷商雒行程記一卷重游滇詔紀程一卷雪鴻再錄二卷使楚叢談一卷臺懷隨筆一卷青浦詩傳三十六卷天下書院志十卷其未成書者則羣經揭橥五代史注揭橥取周禮職金注今時之書有所表識謂之揭橥之意蓋以漢學爲表識而專攻毀漢學者皆藏於家藩從先生游垂三十年論學談藝多蒙鑒許後先生因袁大令枚以詩鳴江浙間從游者皆鶩若蟻乃痛詆簡齋隱然樹敵比之輕清魔提唱風雅以三唐爲宗而江浙李赤者流以至吏胥之子負販之人能用韻不失占考皆在門下嘉慶四年藩從京師南還至武林謁先生於萬松書院從容言

曰明時湛甘泉富商大賈多從之講學識者非之今先生以五七  
言詩爭立門戶而門下士皆不通經史猶知文義者一經盼飾自  
命通儒何補於人心學術哉且昔年先生謂筇河師太邱道廣藩  
謂今日殆有甚焉先生默然不答是時依草附木之輩聞予言大  
怒造謗語搆怨幾削著錄之籍然而藩終不忍背師立異也

右漢學師承記江藩撰

己未夏吳中有杖責諸生之獄今得王述庵少司寇與平恕書文  
甚道勁故具載之書云違晤經時伏諗執事興居安豫第以鼎湖  
大故匍匐入都前日始回吳下備知諸生獲罪深爲駭異諸生寒  
士居多求貸於富戶乃事理之常伊等或以教課爲業或以筆墨

爲生無力償還亦其常情賴有父母師保之責者正宜加之憐惜或代爲寬解或再爲分限俾得從容措繳卽伊等語言粗率亦何至不能稍贖乃致扑責寒士以媚富戶實無情理此非該令平日與富戶交結往來受其餽賂卽係意存庇奸爲事後得錢之計情事顯然不待推求而可見諸生之不平則鳴有何足怪惟是時承審之員非該令平日結納之上司卽係狼狽爲奸之寅好通臬將赴湖南不顧其後而撫軍初莅新任以至四出查拏牽連數十掌嘴鎖項陵辱不堪成何政體當今律令內從未有生員借貸不還遂致責革之條若以聚眾爲名亦當視其應聚與否耳漢時太學生舉幡闕下見於漢書不一唐之太學生爲陽城而聚集宋之太

學生爲李綱而聚集至周朝瑞等爲趙汝愚而聚集史策載之不  
一而足以爲美談蓋凡事必先定其是非如諸生理屈詞窮糾眾  
以挾制縣令重懲之宜也若縣令先以挾私違制則人有同心豈  
能默爾一呼百應籲告上臺以求利斷自無不可斯時卽宜告承  
審各員研究富戶平日與該令有無交結何以討好如此果無他  
故然後科以性情兇暴違制擅責之咎仍另爲該生起限寬緩清  
還諸生自必欣然而散何至成此大獄使士民重足而立也往在  
京中那繹堂司空言宜撫軍爲人仁厚劉竹軒倉場亦言其老成  
精細及昨過蘇相見謙和恭敬抑然自下實有古賢臣風範特其  
時兩司未到獄案已定而執事又無一言救正縱地方官之所欲

恣其蹂躪此必非撫軍之本意也今者荷蒙 皇上坐照如神洞  
燭其違例擅責之由降 旨再飭制軍研審制軍居心公正未必  
謂然然成事不說是否覆盆能白尙未可知儻執事以繫鈴者解  
鈴則日月之更民皆仰之矣弟此次進京仰見 皇上典學右文  
而王韓城劉諸城二相國以及石君冢宰繹堂司空翊贊 熙朝  
愛才好士力持大體恐承 旨之下於此亦不慊然弟見數十年  
來小省學政職分本微奉督撫如上司與州縣相結納甚至幸其  
噓爾蹴爾之助媼媪唯諾殊爲可恥若夫江浙學差皆三品以上  
大員出膺任使地方旣高卓然自立故遇有諸生品行不端者斥  
之學業不進辭章不工者令廣文夏楚之其餘則是曰是非曰非

所以重人才而勵廉恥今執事久以詞林雅望游愛 主知冀且  
夕入贊綸扉惟是扶持士類主張名教庶可與石君諸公相見耳  
至近來州縣所以魚肉諸生其意蓋在立威威立而諸生箝口結  
舌則庶民何敢出而爭控是以獄訟之顛倒徵收之加耗無所不  
至比者言路大開江南漕政橫徵重斂已盡仰叨 聖鑒故制府  
亦力爲振作今冬定作清漕之局但州縣或有陽奉陰違倍收多  
取恐生監連名訐告而州縣指爲闈堂鬧事者甚多未知執事可  
能究其是否俟案定而後量加董戒抑或如此案不科州縣之失  
而卽科諸生之罪若使仍助其餽而長其氣則吏治之壞不知伊  
於何底也弟陳臬三司且於大理寺都察院刑部三法司均爲堂

上官所見生監控告之案不勝枚舉然未見有人因其抗令而右  
祖之至於此者弟與緣事諸生並無門生故舊之雅誼一至蘇州  
卽知此案業已上聞並荷聖明指摘所以不辭饒舌者實以  
此案追債事輕關於士氣者大而關於將來漕弊者尤大且爲執  
事風節所關夙叨世好度無冒效忠告之誼者故忘其愚戇用布  
區區如或以規爲慎則韓文公之諍臣論歐陽公之與高若訥及  
與杜祁公論石介書取而研之可也其文亦真可與韓歐諸文並  
傳不朽矣

右錄宗室昭榘撰

琴德早負詩名與王鳴盛錢大昕吳泰來曹仁虎趙文哲黃文蓮

爲江南七子所選湖海詩傳極數十年交游之盛又選爲今詞綜多藏金石碑版撰金石粹編一百六十卷

右名人尺牘小傳梁同書撰

虞夏時黃河循太行自北而東至洛水分九河以殺其勢復爲逆河以歸於海其餘衍沃皆資種食魏晉六朝以至遼金皆精水利未有運南方粟供給北方者自明開會通河濟運而北方水利久廢昔日九河今變爲三十六淀七十二沽千里內外沮洳淤澱海門又復狹隘不能迅速歸墟是以往昔膏腴悉歸蕪沒此述庵先生詩自註也論黃河今昔利病頗爲簡括

右松心目錄張維屏撰



1576000

文史地研究生閱覽室

國朝善類錄卷九十二

身

國初趙氏寄園舊址在今給孤寺鄰近乾隆庚辰辛巳間王述庵侍郎翁覃谿學士諸桐嶼太史結屋比鄰時有三家村之目

右紀聞陳康祺撰

